





LE CHEVAL
HIPOCON








ac

Ce Livre
a partien
a Monsieur
Francois
Noel Geny &

R

E.



LE
CHEVALIER
HIPOCONDRIAQUE.

Par le S^R. du VERDIER.



A PARIS,


Chez la veuve MATHIEV GUILLEMOT,
au Palais.

ET

MATHIEV GUILLEMOT, rue S. Jacques.

M. D C. XXXII.

AVEC PRIVILEGE DU ROY.





A

M E S S I R E
P H I L I P P E S

D A G V E S S E A V,

SEIGNEVR DE L'ORMAISON

Conseiller du Roy en ses Conseils
d'Estat & Priué, Maistre de la Gar-
derobe de la Reyne, Thresorier &
Recepueur general du Clergé de
France.



ONSIEVR,

*Je n'ay point eu de difficultés à
combattre pour me résoudre à donner cet
ouvrage à vostre merite, mais ie vous ad-*

EPISTRE.

uouë icy franchement que ie me suis treu-
uë merueilleusement empesché à iuger ce
que ie deuoïs le plus estimer en vous afin
de le publier & faire voir que c'est avec
beaucoup de raison que ie rends cette es-
pece d'hommage à vostre vertu plustost qu'à
la grandeur d'une fortune plus releuee:
Car soit que ie vous aye considéré com-
me vn des plus parfaits caualiers de Fran-
ce, ou comme vn des plus prudens hommes
du monde dans l'exercice d'une charge à
laquelle vous auez voulu reduire vos
soings, ie vous ay treuü si digne d'hon-
neur le quelque costé que ce soit, si braue,
si genereux & si sçauant aux choses du
monde, que la moindre de ces qualitez ad-
mirables m'a semblé plus que suffisante
pour faire aduouër que vous meritez en-
cor plus s'il estoit en ma puissance de vous
le donner. Je ne doute donc point que ie
n'aye bien fait de suivre l'inclination que
i'ay eüe à vous seruir en ceste façon, mais

E P I S T R E.

afin que l'on ne treuve rien à redire à ceste
 action ie veux satisfaire à l'humeur de
 quelques esprits qui diront peust estre que
 i'ay manqué de iugement en vous dediant
 les extrauagances d'un cheualier hypo-
 condriaque, puis que ie suis tres asseuré
 que vous estes l'exemple sur lequel les plus
 sages de nostre siecle forment leurs pensees
 & leurs actions. Pour m'excuser & leur
 faire voir qu'ils ne me blasmeront iamais
 avec raison, ie suis d'aduis de leur descou-
 urir ma pensee, de leur dire que ie vous
 presente cet insensé comme l'on fait un
 malade à son medecin afin qu'il guarisse
 par l'approche de son contraire, & que
 i'ay pris plaisir à vous l'adresser par ce
 que i'ay eu enuie de vous diuertir aggre-
 ablement en vous faisant voir ses follies.
 Cela suffit au moins ce me semble pour
 leur fermer à tous la bouche, mais Monsieur
 ie passe plus outre, ie vous ose bien asseurer
 que ce sont là les moindres considerations

E P I T R E.

que i'ay eüe's quand ie me suis proposé de
 vous le donner & vous iugerez infailli-
 blement que mon dessein a esté plus grand
 que l'on ne la creu, ie vous vay dire com-
 ment en peu de parolles. Voyez s'il vous
 plaist cet extrauagant hors des termes de
 la cheualerie errante qui est le malheureux
 fondement des sallies de son esprit ? Sans
 doute vous le treuuerẽz si poli, si vaillant,
 si courageux & si accompli que vous ne ti-
 rerez pas moins de satisfactiõ de ses admi-
 rables vertus que de plaisir de ses resueries:
 En effect c'est le portrait d'un plaisant
 hypocondriaque & un prototype de la
 gentillesse du monde que ie vous presente
 tout en mesme temps. Monsieur, iugez si
 ie vous pouuois rien adresser qui fust plus
 conuenable à vostre merite puis qu'en vous
 preparant d'un costé quelque subiet de
 vous diuertir doucement, ie vous donne de
 l'autre des occasions d'aymer la vertu? Cer-
 tes ie pense que vous considererez ceste in-

EPITRE.

rention, que vous aymerez ce cheualier
parce qu'il a des qualités qui sont fort ay-
mables que vous me ferez vn accueil qui
sera digne de vostre generosité & de l'af-
fection que ie veux auoir à vostre seruice,
& que vous aurez agreable que ie sois
tant que ie viuray.

MONSIEUR,

Vostre tres humble
seruiteur.
DV VERDIER.



AV LECTEUR.



M y Lecteur ie te veux ad-
uertir de ce que tu verras en
ce liure auāt que tu iettes les
yeux dessus, tu vas apprendre les ad-
uentures merueilleuses, d'un caualier si
parfait & si accompli au commence-
ment de son aage que s'il n'eust esté
malheureux en ses entreprises amou-
reuses il eust serui quelque iour d'e-
stonnement à tous ses voisins, mais sa
mauuaise fortune luy ayant fait ad-
dresser ses vœux à vne beauté beau-
coup plus orgueilleuse que digne des
affections d'un braue homme, il trou-
bla son cerueau par tant de noires &c

melancolicques humeurs que du depuis il a serui de passe-temps à beaucoup de personnes qui ont pris vn tres iuste subiet de rire de ses actions fort extrauagantes; De sorte qu'ayant resolu de publier les principaux traits de follie qu'il à faits & qui sont venus à ma cognoissance i'aurois fait cognoistre mon liure par le nom DV CHEVALIER EXTRAVAGANT, si cet epithete n'eust esté donné avec iugement à vn BERGER dont les imaginations n'estoient gueres plus sages que les pensees ou les fantaisies de nostre guerrier. L'autheur de ce fameux Roman, m'ayant donc preueu dans la rencontre de ce tiltre qui seroit propre à mon subiet, i'appelleray le mien LE CHEVALIER HYPOCONDRIQUE & supplieray tout d'vn mesme temps ceux qui prendront plaisir à voir ses boutades de considerer qu'el-

les sont fort differentes de celles du Berger qui la precedde & par consequent de croire que ie n'ay rien voulu emprunter de ses mouuemens non plus que de l'inuention du cheualier Espagnol lequel à commencé de monstrier la foiblesse de son cerueau par des impressions fantastiques & des actiōs ridicules. Ce bon-heur m'arriuant cōme ie le pense, il ne me restera rien à dire sinon à vous supplier Belles ames qui donnerez quelques heures de diuertissement à la lecture des aduantures de ce cheualier insensé, d'excuser les fautes de l'impression qui sont beaucoup plus grandes que ie ne voudrois, parce que ie n'estois pas à Paris du tēps qu'il estoit sous la presse afin que ie tire ceste premiere satisfactiō de ma peine: Vous me contenterez avec peu de chose & m'obligerez à mieux faire quelqu'autrefois, cependant, Adieu.

PRIVILEGE DV ROY.

LOVIS PAR LA GRACE DE
DIEV, ROY DE FRANCE
ET DE NAVARRE. A nos amez
& feaux Conseillers les gens tenâs nos
cours de Parlement de Paris, Tholose,
Roüen, Bordeaux, Aix, Dijon, Greno-
ble & Rennes, preuost de Paris, ou son
Lieutenât, Baillifs & Seneschaux des-
dits lieux ou leurs Lieutenans, & à tous
nos officiers qu'il appartiendra, Salut.
Nostre bien amé Pierre Billaine mar-
chand Libraire à Paris nous a fait re-
môstrer qu'il a recouuert vn liure inti-
tulé *le Cheualier Hypocōdriaque*, lequel
liure ledit exposât desireroit faire im-
primer, s'il nous plaisoit luy octroyer
nos lettres necessaires, A ces causes de-
siring iceluy exposant fauorablement
traitter, & qu'il ne soit frustré de son la-

beur, luy auons permis & permettons
par ces presentes, d'imprimer ou faire
imprimer, par tel imprimeur que bô lui
sēblera ledit liure, & l'exposer en vête
durāt le tēps de six ans, à cōpter du iour
qu'il sera acheué d'imprimer, deffendāt
à tous autres de quelque qualité qu'ils
soient de l'imprimer & faire impri-
mer durant ledit temps, sous quel-
que marque ou caractère que ce soit,
à peine de cinq cens liures d'amende,
& de tous despens dommages, & in-
terests enuers esdit exposant, ou ceux
ayant droict de luy, à la charge d'en
mettre deux exemplaires en nostre Bi-
bliothèque auant l'exposer en vente,
suiuant nostre reglement, à peine d'e-
stre descheu dudit priuilege. Si vous
mandons que du contenu en ces pre-
sentes, vous fassiez & souffriez iouir le-
dit Billaine, & ceux qui auront droit
de luy plainement & paisiblement.

VOVLONS en outre, qu'en mettant en
chacun exemplaire dudit liure ces pre-
sentes ou extrait d'icelles, elles soyent
tenuës pour bien & deuëment signi-
fiez, cartel est nostre plaisir. Donné à
Paris le xxviij. de Iuillet l'an de grace
mil six cens trente deux, & de nostre
regne le vingt troisieme. Par le Roy
en son Conseil. B O R A C E.

Les deux exemplaires ont esté baillees en la Bi-
bliothèque Royale le 12. Aoust 1632.

Ledit Billaine permet au sieur Mathieu
Guillemot, Marchand Libraire à Paris, de
iour dudit Priuilege pour la moitié, suiuant
l'accord fait entre eux.





L E

CHEVALIER HYPOCONDRIAQUE.

*Quelle fust la patrie du Cheualier qui sert
de fondement à tout cet ouurage, sa nais-
sance, ses mœurs, ses vertus, sa condition
& le commencement de ses amours avec
Syluiane.*

CHAPITRE I.

VOIC Y des exploits guer-
riers tout nouveaux, des ad-
uentures toutes crotèques
& des rencontres merueilleuses: Belles
ames qui voulez sçauoir toutes cho-

A

ses vous en deuez cognoistre l'auteur, il faut que vous voyez ce cheualier Hypocôdriaque qui a fait tant de belles choses & que vous ayez la curiosité de sçauoir ses extrauagances; l'ose dire qu'elles chasseront vos soucis, qu'elles vous donneront des subiets de rire souuent, & qu'elles vous rauront au delà du plaisir commun. Quant à moy ie ne vous en differeray point le contentement & cômenceray son histoire par les premiers iours de sa vie, par ses qualitez & conditions, ie la continueray par ses amours infortunées & par ses folies, & la finiray par des accidens admirables lesquels l'ayans remis dans l'usage de sa raison luy donnerent en fin la iouissance de la beauté qu'il auoit si religieusement adored. Les Isles Balears furent sa patrie, il s'appella don Clarazel de Gontarnos, & par ceste

Hypocondriaque.

Qualité qui ne se dōne qu'aux personnes de bonne maison vous pouuez iuger qu'il estoit sorti d'une race illustre: Ses perfections furent rares, son visage n'estoit gueres moins agreable que celuy d'un ange, sa taille estoit belle, il estoit adroit & courtois, il auoit l'esprit excellent, & sa conuersation estoit des plus agreables du monde. Sa naissance luy donnant l'entree dans toutes les bonnes compagnies qui estoient alors dans les Isles chacun le receuoit avec des caresses, & iamais il ne sortoit de quelque logis qu'il n'y laissast vn sujet de parler de luy dignement, de sorte qu'il estoit aymé d'une infinité de tres-belles dames: Mais son malheur l'ayant rendu insensible à l'affection de trente ou quarante qui eussent treuvé leur bonne fortune en son alliance, il n'arresta iamais ses desirs que sur vne ieune da-

moiselle que l'on appelloit Syluiane laquelle estant parfaitement belle estoit encor plus dedaigneuse. L'ayât rencôtre vn iour en quelque assemblée il treuua de si puissans charmes en ses yeux qu'il ne peut iamais conseruer à son ame la liberté qu'il auoit tousiours cherement gardee, il comença de luy donner toutes ses pensées, & dés ce moment malheureux il cessa d'estre sien pour ne vouloir viure qu'en elle. Ce nouueau mal qui le traualloit desia trop cruellement vn cart d'heure apres sa naissance luy donnant vne extreme enuie d'en guerir bien tost, il s'approcha de ceste belle & luy dit avec vne grace qui eut peu charmer vn rocher. Mademoiselle, il faut que i'aduouë maintenât ce qu'vne humeur fascheuse me deffendoit de croire il y a quelque téps? Ce sont des effets de l'inconstance des choses

Hypocondriaque.

5

du monde, luy respondit-elle avec vn
souffris? Mais encor seigneur Clarazel
expliquez vous vn peu ie vous en sup-
plie & nous faites voir si vous avez
plus de raison de confesser vostre foi-
blesse que vous n'en auiez il y a quel-
que tēps de soustenir ce que vous
desaduouēz aujourd'huy si facilēmēt?
Ie pensois (luy respondit-il) que nos
Isles n'auoient rien qui les peust recō-
māder par dessus les autres prouinces
du monde, & qu'entre toutes les filles
qu'elles auoient produittes il n'y en
auoit pas vne qui fust digne de mes
vœux ny de ma franchise, maintenant
ie dis le cōtraire, ie soustiens que vous
estes la plus belle chose qui soit sur la
terre, que vous meritez mes seruices
ou plustost que ie vous adore, & par
consequent que ceste contree a quel-
que droit de souueraineté sur toutes
les autres du monde. Par ma foy (luy

respondit. elle sans considerer qu'elle estoit extrememēt obligee à sa courtoisie) vous me faictes rire malgré que j'en aye? Clarazel, vous auez donc creu que toute la terre n'auoit rien qui fust digne de vostre merite? Sans mentir c'est vn trait de presumption fort insupportable; dittes moy ie vous en supplie, sur quoy fondez vous vostre vanité? Si vous vous estimez par la consideration de vostre noblesse, ne sçauiez vous pas qu'il y a plus de quatre-vings maisons dans nos Isles qui ne voudroient point cedder à la vostre, & qu'en ce grand nombre duquel ie vous parle il y en a plus de dix qui vont au dessus? Si vous faites estat de vostre courage ou de quelques autres perfections que la nature vous a donnees, ne pensez vous pas que vous treuueriez icy mille gentis-hommes de tres-bonne mine, aussi courageux &

braues que vous, & qui vous disputeront tousiours avec raison tous les aduantages que vous voudriez vous attribuer? Certes vous deuiez estre moins presomptueux, au moins ce me semble, & vous eussiez fait sagement de considerer que ceste folle amour de vous mesme vous a fait autant d'ennemis qu'il y a de galands hommes & de belles dames en ceste prouince; le suis des moindres, neantmoins ie vous feray voir que ie vous mesprise beaucoup plus que vous n'avez mesprisé toutes celles qui me ressemblent, car en vn mot ie refuse vos vœux, vos seruices & tous les respects que vous me rendriez comme à quelque diuinité. Ce disant elle se tourna de l'autre costé & le laissa si confus de ceste responce qu'il fust vne fort longue espace de temps sans se recognoistre: En fin reprenant vn

peu ses esprits il se mist à resuer à la liberté du discours qu'il venoit d'entendre lequel le faschant merueilleusement il fust trois ou quatre fois sur le point de chasser de son cœur l'amour qui n'y faisoit quasi que de naistre. Toutefois se sentant frappé viuement & les perfections de Syluiane luy semblans bien dignes d'un ennuy plus grand que le sien, il conclud de souffrir avec patience toutes les boutades qu'elle luy feroit sous vne ferme opinion qu'elle se laisseroit en fin forcer aux tesmoignages d'amour qu'il luy rendroit. S'assurant donc & s'approchant d'elle avec vn visage riant il luy dit: Mademoiselle vous m'avez tantost estourdi & mis dans vne inquietude si grande que ie n'eusse point senti le coup de la mort qu'ad elle me fust venue attaquer en cette agonie, mais ie veux faire gloire de

souffrir pour vous, & quoy que vous me puissiez dire vous ne me chasserez iamais de vostre presence. Si est-ce (luy respondit elle) que vous n'aurez pas desormais vn meilleur traitement de moy, voila pourquoy ie vous conseille d'arracher de vostre cœur ce trait amoureux qui le picque auant que le temps & ma cruauté en rendent la playe incurable. Vos menaces m'espouuëteroient (luy repliqua-t'il) si ie n'estois resolu à me perdre en ceste entreprise plutost que de m'en retirer avec la scheté, disposez de vos affections & de mon sort cōme il vous plaira vous ne me verrez iamais soupirer pour vne autre. He bien (dit elle) vous chercherez vostre mal i'y cōsentiray & me mocqueray de vos plaintes quand mes rigueurs vous obligeront à les publier. Alors prenāt l'occasion de quelques vnes de ses

compagnes qui se retiroient elle laissa nostre Clarazel si troublé qu'il fut contraint de quitter la compagnie pour s'en aller iusques à sa chambre dans laquelle il fist plus de tours qu'il n'y a de chateaux en Espagne sans pouuoir tirer d'une confusion de mille penſees la resolution qu'il deuoit prendre sur ceste occurrence. Sa colere luy fist dire plus de cinq cens fois que Syluiane ne meritoit pas la poſſeſſion de son ame parce qu'elle l'auoit meſpriſé avec des deſdains incroyables, & d'ailleurs son amour & l'eſperance de l'addoucir ayans appaiſé tant de fougues en moins d'un moment, il iugea qu'elle eſtoit ſeule dans le monde qui fuſt digne de la gloire de ſes penſees, & par conſequent il conclud de perſeuerer en ſes beaux deſſeins & de chercher toute ſorte d'inuentions pour ſe mettre en ſes bonnes graces.

Ayant mille fois leu que les lettres auoient vn pouuoir merueilleux en choses pareilles il enuoya querir du papier & mist dessus vne partie de ses pensees, mais avec vne telle confusion que luy mesme ayant bien cogneu qu'il n'y auoit ny rime ny raison en tous ses discours il effaça ce qu'il auoit fait avec tant de peine, traça dix ou douze fois vne mesme conception avec des paroles diuerses & fist tant qu'apres auoir trauaillé iusques à minuit il mist en fin ces paroles qui suivent au net.

A SYLVIANE.

S'il est vray que toutes les choses du monde soient sujettes auchangement, que ne me sera-t'il point auourd'huy permis d'esperer de vostre bonté puis que vous me traitastes hier avec des cruautez nō-pareilles? Syluiane, ie m' imagine que vous receurez ces nouuelles asscurāces de mon amour plus courtoisement que vous n'auiez fait les premiers tesmoignages de ma passiō, que ie cesseray d'estre malheureux parce que vous cesserez d'estre dedaigneuse, & que m'ostant le subiet de me plaindre plus longuement vous m'en donnerez de me resiouir & me plaire en ma seruitude. Ie vous demande ceste faueur avec autant de respect qu'il en faut pour estre regardéd'vn œil de pitié, ie vous supplie avec de larmes de me donner quelque part en vos bonnes graces, sans la posses-

sion desquelles ie ne pense pas pouuoir vi-
ure, Syluiane ingez s'il vous plaist que
vous ne me les pouuez refuser avec raison
puis que i'apporte en ceste priere l'humili-
té que vous demandez en mes actions,
Et que vous n'aurez plus le pretexte du-
quel vous vous seruistes hier pour me re-
buter avec rigueur. l'attendray donc vne
response fauorable à laquelle ie vous
veux obliger en quelque façon par la pro-
messe que ie vous fais de mourir plustost
mille fois que d'estre iamais autre que vo-
stre seruiteur tres-humble

DON CLARAZEL
DE GONTARNOS.

Cette lettre estant assez bien selon
son humeur il la mit entre les mains
d'un petit lacquais lequel ayant l'es-
prit fort gentil n'eut point d'autre
commandement que de la presenter

à Syluiane & d'en tirer responce s'il estoit possible. Cét ambassadeur d'amour sçachât donc prédre son temps assez à propos ne māqua point d'entrer dans la chambre de ceste fille & de l'aborder tout au mesme temps avec ces paroles qu'il luy dit de fort bonne grace. Mademoiselle, ie vous viens treuuer de la part d'un homme que vos yeux ont blessé si cruellement qu'il n'y a plus aucune esperance de vie si vous luy refusez le remede qu'il vous demande par cette lettre. Mon amy (luy respondist-elle avec vn souf-ris) ie ne sçay pas pour qui tu parles avec tant de liberté, mais si c'est pour celuy que ie pense tu luy peux biē rapporter sa lettre pour la responce qu'il attēd. Madame, luy repliqua-t'il, vous ferez ce qu'il vous plaira, car de for-cer vos inclinations c'est vne chose hors de mon pouuoir, mais si vous

considerez bien le merite du personnage qui m'enuoye qui est don Clarazel de Gontarnos, sans doute vous le traitterez plus courtoisemēt: Que s'il vous est odieux iusques à vn point que vous le iugiez indigne de cette faueur, ie vous supplie de la luy vouloir oſtroyer pour l'amour de moy qui me sacrifierois volontiers pour vostre seruice. Ah sur mon ame (dit-elle riant de bon cœur à ceste parolle) tu le prens sur vn si bon ton qu'il faut que ie me force pour satisfaire à ta priere, donne moy ce papier ie verray ce qui est dedans? A ces mots ce laquais le luy presentant avec respect elle l'ouurist tout incontinant & leut les passions de Clarazel avec si peu d'esmotiō que le lacquais iugea fort bien qu'il ne rapporteroit pas grand profit de son voyage ny de ses discours. En effet, si tost que Syluiane eust acheué la lectu-

re de cette lettre elle la mist au feu deuant luy & ne voulant point en demeurer-là. Mon petit amy (luy dit-elle) toute la responce que ie veux faire à ton maistre ne consiste qu'en cinq ou six mots, voila pourquoy ie ne prendray point la peyne d'escrire. Resouuiens toy seulement de luy dire que mon humeur ne ressemble point aux choses du monde qui ne subsistēt que par des changemens ordinaires, qu'elle est toute telle qu'elle estoit hier & que s'il continuē à faire le fou ie continueray de ma part à rire au despens de sa passion. Sur mon ame (dit ce lacquais sortant de la chambre) voila le plus indigne traitement que l'on pouuoit faire à vn cheualier de la qualité de mon maistre, mais s'il me veust croire il payera ceste ingratitude en mesme monoye & vous mesprisera beaucoup plus qu'il ne vous a iamais estimee;

estimee; le luy vay donner ce conseil
s'il ne s'en sert pas comme il faut &
qu'il ait du mal qu'il ne s'en prenne
qu'à sa lascheté, ie ne luy ayderay pas à
plaindre sa peyne. Ce disant il s'en re-
tourna tout droit au logis auquel
ayant treuvé son maistre qui l'atten-
doit avec des mouuemens estranges
que l'esperance & la crainte luy sus-
citoient, il luy dit sans luy rien desgui-
ser de toute l'affaire. Monsieur ne me
demandez point s'il vous plaist quel a
esté le succès du commandement que
vous m'aués fait? Vous soupirés pour
vne insensible & peust estre pour la
plus orgueilleuse beauté de la terre.
Helas (dit Clarazel) ie n'entens que
trop ce que tu veux dire, neantmoins
conte moy toutes les particularités de
l'affaire? Par ma foy (luy respondist-
il) il seroit bien plus à propos que
vous me commandassiez de me taire,

mais puis que vous le voulez de la forte; Scachez qu'à l'abord Syluiane m'a fait vne mine par laquelle i'ay conjecturé ce qui s'est passé; Elle a refusé de voir vostre lettre, & comme ie luy ay remonstré qu'elle faisoit tort à vostre merite, elle m'a respondu qu'elle ne s'en soucioit que fort peu, & qu'en vn mot ie vous pouuois bien rapporter vostre lettre pour la response que vous demandiez. Ces paroles m'ont vn peu picqué ie l'aduouë & comme i'auois vn extreme desir de vous rendre quelque bõ seruice en ceste occasion ie luy ay fait quelques plaisantes reparties par lesquelles ie l'ay obligée à voir vostre lettre, mais certes si i'ay esté mal satisfait au commencement la fin a encor esté plus fascheuse, vous allez voir comment par la response qu'elle vous enuoye. Mon amy (m'a elle dit) dittes à vostre maistre que

mon humeur ne ressemble pas aux choses du mode qui ne subsistent que par des changemens ordinaires, qu'elle est toute telle qu'elle estoit hier & que s'il continue à faire le fou ie continueray à rire aux despens de sa passion. Monsieur, iugez si ceste response n'est pas insolente, & considerez ie vous prie le tort que vous vous ferez de rechercher encor ceste dedaigneuse qui pour dire la verité ne merite pas vos affections: Quant à moy, ie ne suis pas don Clarazel de Gontarnos, mais ie m'offencerois de ceste parolle & en tirerois des subjects pour me faire hair ceste ingratte laquelle ayant trop bonne opinion d'un peu de beauté qu'elle a, ne croit pas qu'il y a dans ces isles plus de cent douzaines de filles qui meritēt mieux qu'elle les affections d'un braue homme. Monsieur au nom de dieu perdez le souue-

nir de ceste estourdie si vous voulez
viure en repos, sinon resoluez vous à
souffrir des peynes estranges? Ah mon
amy (luy • dit Clarazel) que la liberté
de ton discours me fait bié cognoistre
que tous les hommes ne sçauent pas
quelle est la nature d'amour? Sçachez
que le mespris d'une beauté allume le
feu au cœur d'un amant au lieu de
l'esteindre, qu'on ne peust auoir des
ressentimens d'outrage enuers vn
subiet qu'on adore & qu'on s'enfonce
le trait amoureux dans le cœur quand
on le pense arracher avec violence.
Syluiane me traite en maistresse qui
ne sçait pas donner l'estime aux cho-
ses, elle veust que ie souffre beaucoup
pour meriter les faueurs que ie luy de-
mande: aurois-je quelque raison d'ac-
cuser son beau iugement ou de vou-
loir extorquer d'elle ce qu'elle ne me
veust pas encor octroyer? Certes ie me


rendrois coupable d'un crime qui me priueroit de l'honneur de ses bonnes graces avec subiet, & ie meriterois des chastimens au lieu des recompenses que ie luy demande; Il faut fleschir ce courage obstiné par la patience & cependant ne laisser point passer vne occasion de seruice sans le luy rendre de bon cœur. Monsieur (replicqua ce lacquay pliant les espaulles) c'est ainsi que les malheureux treuent des excuses à leurs fautes, ou pour mieux dire qu'ils faillent pour se ietter dans le precipice; vous voulez languir aupres d'une ingratte, ie ne me puis opposer à vos volontés: l'affection que i'apporte à vostre seruice m'a fait parler vn peu librement pour vous diuertir de ces fantaisies dans lesquelles vous vous allez perdre, vous me le pardonnerez s'il vous plaist. Je voy bien (luy dit Clarazel) ie voy bien que la seule

pitié du mal que ie me procure avec imprudence t'a fait trouuer toutes ces raisons par lesquelles tu as pensé donner quelque allegement à ma peine, voila pourquoy ie ne t'en puis sçauoir mauuais gré, mais parce que les medicamens souuerains sont mesme inutiles aux playes incurables, la mienne estant de ceste qualité tu cesseras desormais de me tenir de pareils discours afin de ne point irriter mon mal au lieu de m'y apporter du remede, retire toy seulement pour me laisser vn peu dans la liberté de mes reueries vne autre fois nous en parlerons à loisir. Alors celacquay sortant de la chambre, don Clarazel commença de se plaindre de la cruauté de sa dame avec des souspirs si cuisans qu'il eust peu toucher vn cœur insensible. Ces regrets ayans continué tout le long du iour il reuint à soy sur la

nuir & quand & quand il prist vne resolution qui le deuoit mettre en repos si l'amour n'eust iuré de le trauailler iusques à luy faire perdre le iugement & la raison, vous verrez ce que ie vous veux dire en l'autre chapitre.

Comme don Clarazel se resolut d'aller donner vne serenade à sa dame : ha musique est interrompue par vn accident : Il desgage Adamant frere de Syluiane de la main de quelques filoux : Ses discours avec Syluiane : Son desespoir & quel fust le subiet de sa maladie d'esprit.

CHAP. II.

 Amais l'esperance ne meurt au cœur d'un amant & quelque sorte de cruauté qu'on puisse chercher contre luy il se pro-

met tousiours quelque grace pour le prix de son amour & de sa constance. Don Clarazel auoit subiet de se desesperer par la rigoureuse response que Syluiane luy auoit faite, il auoit esté trauaillé de puissantes inquietudes tout le long du iour & ie iuge que son deplaisir l'auoit reduit plus mille fois aux termes de se precipiter pour ne suruiure pas à la hayne de sa maistresse, neantmoins s'estant à la fin souuenu d'une chose que tous les amoureux pratiquent pour faire voir la grandeur de leurs passions, qui est de fleschir la rigueur de leurs dames par quelques chansons & quelques soupirs, il resolut d'aller donner vne serenade à ceste dedaigneuse beauté qui le mesprisoit : prenant donc son lut sans se soucier de manger il s'en alla sous ses fenestres & ressentant la rigueur du mal qui le

trauailloit commença de chanter ces
vers qu'il auoit faits peu de temps
apres le retour du lacquay qu'il auoit
enuoyé vers la dame.

Que Syluie est belle à mes yeux?

Sa grace qui rauist ces dieux

Me peust bien rauir à moy mesme?

*Le luy donne mon cœur sans plaindre
sa prison*

Et ie trouue vne gloire extreme

A le perdre avec ma raison.

Il est vray que c'est vn bon-heur

A ma raison & à mon cœur

D'entrer sous vn si bel empire?

*Mais helas i'ay bien peur qu'on ne
les veuille pas,*

Et qu'au lieu d'un bien où i'aspire

Je n'y rencontre le trespas.

En effect Syluie a des traits

Qui sont plus cruels que parfaits

I'en sens la rigueur & l'outrage

*Elle me fait souffrir ce qu'on peust
endurer,*

*Et bien peu s'en faut que la rage
Ne me fasse desesperer.*

O dieu viuray-ie encor long temps?

Quelque bruit l'arrestant à ceste parole ou pour mieux dire vn chamailis qui se faisoit assés pres de luy le retirant de ses amoureuses pensees, il donna son luth au lacquay qui l'accompagnoit, mist la main droite sur la garde de son espee & roullant vne cappe au tour de la gauche scauauca vers trois ou quatre hommes qui se battoient, entre lesquels ayant recogneu Adamant frere vnicque de Syluiane lequel estoit engagé entre les espees de trois volleurs qui le vouloient assassiner il luy escria. Courage valeureux Adamant courage, vous treuueriez icy des amis assez forts pour

vous faire tirer la raison de ceste canaille. Ce disant il porta fort heureusement vn grand coup au trauers du corps d'vn de ces filloux lesquels estans espouuentés par la cheute de leur compagnon & par l'opinion que ce caualier estoit suiui de cinq ou six autres ne prirent point de resolution plus genereuse que de se garantir par la fuitte : En effet enfilans vne rue vn peu ecartee avec vne promptitude admirable il se desroberent aux yeux de ces caualiers lesquels ne se soucians pastrop de les suiure s'embrasserent avec ces parolles que don Clarazel tint à Adamant. Mon bon seigneur (luy dit il) ie ne sçay pas quelle a esté l'intention de ces cocquins en vous attaquant, mais ie n'ignore point qu'ils ne soiét chastiez comme il faut? Ouy (respondit Adamant) par le moyen de vostre valeur à laquelle ie doy ma

vie, vous en disposerez vne autre fois
comme vous voudrez , cependant
nous entrerons s'il vous plaist au logis
de mon pere pour faire regarder à vn
coup que i'ay dans la cuisse , ie vous
donneray deux lacquais pour vous
reconduire afin que vous ne tombiez
point malheureusement comme moy
au pouuoir de ces esueillez lesquels
auoient vn desir extreme d'auoir ma
bourse & mon manteau. La crainte
de les rencontrer ne m'arresteroit pas
d'vn moment (luy dit Clarazel) &
s'il n'y auoit que ceste consideration
ie passerois outre, mais ne vous vou-
lant pas laisser au mauuais estat où
vous estes ie vous suiuray iusques
chez vous pour vous voir penser.
Vous me ferez plaisir (luy dit Ada-
mant) pour le moins si l'on nous at-
taque encor vne fois nous nous
deffendrons avec moins de crainte

que si nous estions separez. A ces mots laissant sur la place ce tireur de laine lequel estoit mort, ils s'en allerent chez le pere de Syluiane la maison duquel fust toute en allarmes à leur arriuee, toutefois aussi tost qu'il eust sceu comme l'affaire s'estoit passee il fist mille caresses à don Clarazel, il luy protesta de s'en reuâcher par quelque seruice & manda promptement des medecins & des chirurgiens afin que l'on mist le premier appareil à la blesseure de son fils. Ce pendant Clarazel estoit trauaillé par des inquietudes encor plus estranges que celles qu'il auoit souffertes tout le long du iour, car il n'osoit aborder Syluiane qui pleignoit le mal de son frere avec des larmes, par qu'il apprehendoit vn second refus, & que d'ailleurs il ne vouloit pas laisser passer ceste occasion qu'il sembloit que l'A-

mour eust fait naistre pour son repos. En fin ne voulant pas auoir le regret d'accuser sa lascheté d'une longue peyneils'approcha d'elle pendant que les chirurgiens fendoient la playe d'Adamât, & luy dit avec vn tremblement de voix assés grand pour tesmoigner l'alteration de son ame. Helas madame que ie porte d'enuie à la blesseure de vostre frere qui pour vous estre si proche parent vous oblige à le plaindre avec des larmes? Il me semble que vous auriez beaucoup plus de raison de guerir celles que vous faictes qui sont incurables si on n'y applique vn trait de bonté & de courtoisie, que de vous amuser à pleurer les autres qui peuuent estre fermées en fort peu de temps par la diligence des medecins: Que si vous ne me voulez voir mourir en vous accusant de la plus grande ingratitude

que femme ait iamais exercee enuers vn amant, changez les termes rigoureux que vous m'avez aujourd'huy mandés pour responce aux sermens de fidelité que ie vous faisois & me laissez esperer que mon amour aura les recompenses qui luy sont deuës. Seigneur Clarazel (luy respôdist-elle) certes vous estes malheureux beaucoup plus que ie ne voudrois, car vos merites, vostre naissance, ny le seruice signalé que vous venez de rendre à mon frere ne vous peuuent faire esperer ce que vous demandez par les raisons que ie vous vay dire : Je ne dispose plus de mon cœur, vn autre iouist de la gloire que vous souhaitez, & ie vous dis maintenant avec pitié ce que ie vous ay mandé ce matin avec arrogance, sçauoir est qu'il n'est impossible de vous regarder pour vous recompenser en quelque façon

que ce soit de vostre seruice. Au nom
de dieu payez vous de la verité de ceste
confession que ie ne vous deuois ia-
mais faire & que ie ne vous dirois pas
encor si ce n'estoit pour m'exempter
des reproches que vous me pourriez
faire avec raison, ne m'appellez plus
cruelle & fascheuse & considerez que
si ie ne satisfais point à vostre desir
c'est que ie n'en aypas le pouuoir com-
me ie voudrois. O dieu (dit-il) quelle
pitié, mais bien plutost quelle senten-
ce ? Ah Syluiane ie suis perdu, vous
auez creu addoucir mon mal par la
compassion de me voir souffrir sans
remede, vous l'auez irrité de telle fa-
çon qu'il est incurable, car ne me pou-
uant plus plaindre de vous apres ceste
declaration qui vous excuse veritable-
ment, ie n'auray pas beaucoup de con-
tentement à me plaindre de la fortune
comme de la seule cause de tout mon
malheur

malheur. Il ne me reste donc plus maintenant qu'un bien dans le monde, qui est que me deffendant d'esperer du soulagement à ma peine, vous ne me deffendez pas de mourir? Sylviane, ce sera bien tost fort asseurement, mais auparavant que cela m'arriue ie vous supplieray de dōner trois ou quatre larmes à ma perte afin que i'emporte ceste petite satisfaction de tant de trauaux. Ce disant, il la regarda d'un œil languissant & luy faisant vne reuerence assez humble pour la faire pleurer de pitié, il sortit de la chambre sans prendre congé de personne: Si tost qu'il fust en son logis il s'enferma dans son cabinet, où ayant fait dix ou douze tours, pendant lesquels il repassa dans sa memoire tous les discours que Sylviane luy auoit tenus, il mist les mains sur ses cheueux avec vnerage si grande qu'il en arra-

cha plus de la moitié. En suite de ce transport d'esprit il fist des plaintes si pitoyables qu'elles eussent peu amollir vn cœur de rocher. Fortune ingrante (disoit il) que n'ay-ie point à te reprocher maintenant puis que tous les maux que ie sens m'arriuent de la hayne que tu me portes sans sçauoir pourquoy ? A quoy me seruent les faueurs que tu m'as faittes au commencement de mon aage si tu m'en fais aujourd'huy payer la gratification par la perte de mon repos ? Pourquoi m'as tu donné des biens pour m'oster maintenant l'esperance d'en ioüir avec plaisir ? Ah cruelle, ces signes d'amour n'ont esté que des trahisons dangereuses ? Tu m'as tendu des appas pour me faire tomber dans des precipices, & tu ne m'as iamais caressé que pour me ruyner. Mais encor, chere Syluiane , deuez

vous contribuer aux desseins trompeurs de ceste traitresse ? Falloit il que vos artifices secondassent ses passions & comme ie suis l'obiet de sa rage le deuois- ie estre de vostre mespris ? Non sur mon ame, il me semble que ie meritois vn traitement plus doux que celuy que vous m'auiez fait, & si vous eussiez eu le iugement de considerer mes seruices, vous m'eussiez fait esperer les recompenses que vous me refusez aujourd'huy avec plus d'ingratitude que de raison. Vous dites que ie ne vous scaurois posseder par ce que vous auiez donné vostre cœur à vn autre qui iouïst de la gloire que ie pourchasse avec tant de soins ; O dieux quel artifice ou quelle infortune ! Syluiane, si c'est la premiere de ces deux choses vous estes la plus ingrante femme qui viue, si c'est la derniere ie suis le plus malheureux

amant qui soit sur la terre? A laquelle m'arrestera-ye? Helas il n'importe, ce m'est tout vn, ie suis perdu de quel costé que ie me tourne & vainement ie demande vn subiet d'accuser l'une ou l'autre du mal que ie sens: La fortune est coupable, Syluiane vous l'estes aussi; ie me plains donc d'elle & de vous, & comme ie demande avec passion que l'amour vous punisse vn iour de la cruauté que vous exercés enuers moy, ie le supplie encor d'exterminer le pouuoir & le nom de ceste deesse qui m'est si contraire. A ces mots cessant de parler il se ietta sur vn petit liët où n'ayant peu demeurer qu'autant de temps qu'il en fallust pour faire cent tours à droit & à gauche il se releua, commença de se promener par la chambre avec des postures toutes transportees, & continua de se plaindre & de souspi-


rer iusqu'au iour, auquel temps la nature ne pouuant plus fournir à ses mouuemens extraordinaires il fust contraint de se recoucher pour dormir & donner en ceste façon quelque relasche à ses deplaisirs. Ses douleurs s'appaisèrent veritablement pendant son sommeil qui fust de deux heures, mais elles se renouellerent à son reueilleil avecque tant de violence que toutes ses actions furēt des transports, & ses parolles des extrauagances si grandes que son lacquay le croyant priué de son iugement commença de pleurer apres auoir tenté trois ou quatre fois inutilement de le faire parler selon la raison. Toutefois son cerueau n'estant pas troublé tout à fait par les premiers efforts de la passion qu'il le trauailloit il reuint à soy, il resolust de donner moins d'excès à ses fascheries & cependant de se diuertir

le plus agreablement qu'il pourroit. Le ieu ne luy plaissant point en ceste saison, toutes les compagnies qu'il frequentoit ordinairement luy estans encor odieuses & les promenades ne luy semblans pas capables de le resjouir, il conclud de ne point sortir de sa chambre iusques à ce qu'il eust cogneu quelque amendement à son mal, de s'entretenir avec ses pensees la moitié du iour & de donner l'autre à la lecture de quelques liures. L'ayant resolu de la sorte il l'executa, il fist d'abord cinq cens tours par la chambre embarrassant tousiours son esprit dans vn labyrinthe de mille pensees, apres cela n'ayant mangé que legerement il prist vn liure d'Amadis de Gaule sur lequel il passa le reste du iour, employa plus de la moitié de la nuit à forger dans son cerueau mille nouuelles fantaisies, bref se pleignant

tantost de sa Syluiane , & tantost
maudissant la fortune qui prenoit
plaisir à le trauailler, il continua de vi-
ure en ceste façon par l'espace de trois
sepmaines au bout desquelles ces noi-
res melancholies qui l'auoient tyran-
nisé depuis tant de temps se saisirent
si bien des organes qui faisoient agir
sa raison, qu'elle n'eust plus d'exerci-
ce ny de pouuoir : En vn mot son
esprit deuint si malade que prenant
l'ombre pour le corps il se forgea mil-
le chymeres qu'il creut estre des veri-
tés & se rendist le plus plaisant hypo-
condriaque que l'on vist iamais. Vous
allez voir le premier acte de sa folie
dans l'autre chapitre.

Quelles estoient les imaginations de don Clarazel: Comme il prist resolution de se rendre hermite à l'exemple d'Amadis de Gaule: Le commencement de ses boutades faites à Lyon: Ses extravagances incroyables à la rencontre d'un aduocat & dans les discours qu'ils eurent ensemble.

CHAPITRE III.

 E mal-heureux amant ayant ainsi passé trois semaines parmy des supplices (ie n'ome ainsi ses inquietudes) vint à rencontrer le chapitre du second liure d'Amadis de Gaule, qui décrit amplement le desespoir de ce cheualier apres qu'il eust receu la lettre que Durin luy donna de la part de la Princesse Oriane la dame: Or est-il qu'ay-

mant toutes les actions de ce prince vaillant, qu'il croyoit desia toutes veritables, & telles qu'elles estoient peintes, il ne peut lire sa disgrace qu'avec des larmes, il souffrist en effect le mal qu'il luy voyoit souffrir en peinture, il fist pour son interest particulier les mesmes regrets qu'il luy voyoit faire, parce qu'il ressétoit la mesme douleur qui estoit exprimee par les plaintes de ce cheualier & le suiuiſt avec vne extreme pitié iusqu'à l'hermitage de la roche pauvre où le voyant couché sur la terre avec dessein de passer ainsi tristement le peu de vie qui luy restoit, il se mist en telle colere contre la princesse Oriane qu'il luy dist beaucoup plus d'injures qu'il ne luy auoit iamais donné de loüanges. Son humeur bilieuse s'estant ainsi deschargee contre la boutade de ceste princesse, il reuint à ce cheualier, leut toutes les peynes

qu'il auoit souffertes à la roche pau-
ure avec vn ressentimēt tres-puissant,
& continua de verser des larmes pour
luy iusques à ce qu'il vist arriuer à son
hermitage la damoiselle de Danne-
marc qu'il recogneut comme par mi-
racle & qu'il le ramena vers son Oria-
ne apres l'auoir asseuré de sa grace. Ce
fust alors qu'il changea de façon de
faire & de voix, il ressentist l'alle-
gresse qu'il croyoit qu'Amadis de
Gaule eust receue à ceste nouuelle, il
loua plus de mille fois la princesse
Oriane d'auoir recogneu sa faute si
bien à propos, & deslors il s'imprima
si bien dans la fantaisie que la chose
estoit ainsi qu'elle estoit descritte, que
resuant au bon-heur de ce cheualier
il s'imagina que s'il se retiroit en vn
hermitage, Syluiane l'enuoyeroit
chercher infailliblement pour le ren-
dre heureux. Ceste opinion s'estant

donc formee en sa teste il mist dans vne bougette tout l'or qu'il auoit, fist faire des accoustremens de drap noir, & montant vn soir à cheual sans vouloir ny lacquais ny pages parce qu'il auoit veu qu'Amadis s'estoit desrobé de son escuyer, commença de marcher au gré de sa bonne fortune & de son cheual. S'estant souuenu que celuy qu'il vouloit imiter auoit mouillé de ses larmes les chemins par lesquels il auoit passé, il se mist à pleurer aussi, il renouuella ses souspirs & ses plaintes avec les mesmes parolles qu'il auoit mises en sa memoire, s'en alla coucher trois ou quatre nuits sous des arbres sans vouloir vne nourriture meilleure que des fruits sauua- ges, & continua de viure en ceste fa- çon iusques à ce qu'il fust aux faux- bourgs de Lyon. Alors se remettant en memoire qu'Amadis auoit esuité

le passage des villes pareilles pour n'auoir point la conuersation d'une infinité de personnes qui l'eussent peu diuertir de son entreprise, il alla debriuer son cheual dans vn petit pré & se coucha sous quelques arbres iusques à la nuit laquelle arriuant à la fin selon son desir il se remist promptement en selle & s'auança tout le long du pont sur lequel on passe le Rosne. Estant à la porte les gardes luy demanderent où il logeroit & luy commanderent de dire son nom pour l'escrire sur quelque papier sans lequel les hostelleries ne sont point ouueres dans ceste ville, à quoy respondant froidement: Messieurs (leur dit-il) vous n'avez que faire de vous informer de mon nom, parce que vn serment que i'ay fait m'empesche de le declarer à qui que ce soit iusques à ce que i'aye mis fin à quelqu'aduen-

ture pour laquelle ie suis en campagne, & moins encor de me demander où ie logeray, car vous sçavez bien que les arbres seruent souuent de couverture aux bons cheualiers. Comment (repliqua le commis) monsieur vous mocquez vous de moy? Ie n'entens point vos railleries, parlez cōme il faut ou vous retirez, autrement ie prendray la peine de vous faire bien accompagner iusques au logis du gouuerneur, & peut estre de là iusqu'à la prison. Comment iusqu'à la prison (reprist Clarazel) paillard tu me penses donc espouuanter par tes menaces insolentes? Par dieu ie mettray ta teste en mille morceaux, afin que les temeraires y prennent exemple. Ce disant il tira l'espee & poussant furieusement son cheual alloit passer sur le ventre de quelques soldats si la porte n'eust esté fermee au mesme mo-

ment. S'arrestant donc par ce qu'il le falloit faire malgré qu'il en eust, il commença de crier à voix deployee qu'on luy vint ouurir, autrement qu'il mettroit bien tost les portes en cendres, surquoy douze ou quinze soldats s'estans assemblez avec des mousquets, des picques & des hallebardes à la main ils l'alloient infailliblement percer comme vn crible si le caporal qui estoit homme de iugement ne se fust douté de la maladie de ce gentil-homme : deffendant donc à tous ceux qui l'accompagnoient de tirer sans commandement, il ouurist la porte & s'auançant vn peu sur le pont dit à Clarazel: Monsieur, vous excuserez s'il vous plaist l'ignorance de ces soldats qui ne sçauent pas comme il faut respecter vn homme de si bonne mine que vous; pour moy qui suis leur capitaine ie vous viens sup-

plier de me dire qui vous estes & où
vo⁹ allez afin que vo⁹ tiriez de moy du
seruice si tant est que mes armes vous
soient necessaires. Vrayment mon ca-
pitaine (luy dit Clarazel avec vn accent
addouci) ie veux bien que le monde
sçache que ie ne suis pas moins cour-
tois que vaillât & fort, car cet humble
discours que vous m'auez fait aura
bien plus de pouuoir sur moy que
l'insolence de vos compagnôs Vous
voulez sçauoir qui ie suis? Sçachez
quel'on me nomme don Clarazel de
Balear, si malheureux aujourd'huy
par la cruauté qu'une femme exerce
sur moy que ie pense estre dans le
monde celuy qui a plus subiet de se
plaindre de la tyrannie d'amour: vous
me demandez encor où ie veux aller?
Certes ie ne vous le puis dire, les loge-
mens ordinaires des cheualiers er-
rans & des malheureux comme moy

estans par tout où ils se rencontrent,
mon coursier me meine où il veut
& ie suy plustost la fortune que mes
passions. Seigneur Cheualier (luy
dit alors le caporal lequel cognois-
sant en ce peu de mots le mal duquel
il estoit frappé eust bien desiré quel-
ques heures de passe-temps) ie m'esti-
merois bien heureux s'il vous plai-
soit de venir passer ceste nuict chez
moy, i'y reçooy fort souuent les bons
cheualiers, ie m'efforceray de vous y
faire bonne chere, & vous deuez croi-
re que ie donneray des diuertissemés
aggreables à vostre tristesse. Seigneur
(respondist Clarazel) ie ne souhaite
pas que le venin qui me tuë infecte les
autres, & puis dans le miserable estat
où ie suis ie ne pourrois gouster les
plaisirs, les delices d'un long repos, ny
la delicateffe des viandes les mieux
apprestees, voila pourquoy vous me
dispen-

dispenserez s'il vous plaist d'obeïr à vostre priere. Que si vous me voulez obliger en quelque façon, vous me conduirez hors de ceste ville, afin que vostre autorité m'empesche de mettre la main à l'espee si de fortune ie rencontrois des curieux qui voulussent sçauoir de moy quelque chose qu'il ne me plairoit pas de leur declarer. l'eusse beaucoup estimé l'honneur que vous m'eussiez fait (dit le caporal) s'il vous eust plu de prendre vne petite maison que i'ay pour vostre retraiete, neantmoins, puis que vous ne le desirez pas de la sorte, ie feray de fort bon cœur ce que vous souhaitez de moy. Ce disant il prist les resnes de son cheual pour luy persuader qu'il le faisoit entrer en triomphe, & fist signe à ses compagnons de ne dire mot, toutefois il ne fust pas en leur pouuoir de se retenir, ils com-

D

mencerent tous à rire comme il com-
mença d'entrer à la ville, & tout au
mesme temps qu'il eust fait dix ou
douze pas il n'y en eust pas vn dont
la voix ne s'esleua pour luy ietter quel-
que lardon, surquoy se mettant en
colere il dist à ce caporal qui le con-
duisoit. Mon Capitaine il semble que
vos gens ayent enuie de sentir que
pezent mes coups? Par dieu si ce n'e-
stoit pour l'amour de vous qui me
semblez bon cheualier & qui meritez
que l'on vous respecte ie les irois si
bien chastier que ceux qui pourroient
eschapper se souuiendroient d'estre
sages pour vne autre fois: N'entendez
vous point ce qu'ils disent? Ouy sans
doute ie l'entends (dit le caporal qui
ne se pouuoit aussi plus empescher de
rire) mais seigneur vous me pardon-
nerez s'il vous plaist si ie dis que vous
vous offencez sans subiet, car ces sol-

clats chantent vos louanges, & ne vous disent pas des iniures comme vous croyez. C'est donc ma douleur (dit don Clarazel) qui trouble aussi bien mes oreilles que mon ame & mon iugement, & par là ie cognois fort bien que ie suis malheureux tout à fait puis que ie prens de l'ombrage de ceux qui m'honorent : Quant à vous Seigneur cheualier vous m'excuserez s'il vous plaist, & pour la courtoisie que vous exercez enuers moy vous en tirerez quelque bon seruice quand il vous plaira. Ainsi s'entretenant de mille propos agreables ils passerent le pont de Saone suiuis de plus de quatre cens enfans qui menerent vn bruit fort estrange, & arriuerent peu de temps apres hors la ville où s'estans embrassés plus de quatre fois, le caporal s'en retourna par ce que l'on fermoit les portes, & nostre

hypocondriaque se mist à fuiure les riues de Saone sans se soucier des tenebres qui commençoient à rendre desia la terre fort noire. Ses pensees ordinaires l'ayans entretenu quelque petite espace de temps ie croy qu'il eust passé le reste de la nuit parlant à sa dame comme il auoit accoustumé de faire quand il estoit seul , s'il n'eust ouy la voix d'un homme qui se marioit assés doucement aux accords d'un luth. Ces aggreables accens qui le charmoient l'ayans fait arrester tout court il presta l'oreille pour ouyr ces vers lesquels auoient esté faits peu auparauant à la louange d'une fille par un des plus beaux esprits de ce temps.

Bel astre des mortels

*Le Ciel n'est point ialoux de te voir des
autels,*

N'es tu pas adorable?

Et ta vertu pareille à ta beauté

Voit elle rien qui luy soit comparable

Que ma fidelité?

Tes attraits sont pareils,

Tes yeux que iustemēt on nōme des Soleils

Ont vn esclat semblable:

Mais il est vray que ma fidelité

N'a rien aussi qui luy soit comparable

Que ta diuinité.

A ces mots qu'il ne peut souffrir
par ce qu'ils sembloient faire tort à la
beauté de Syluiane, il se mist en telle
furie que s'approchant de celuy qui
chantoit pour l'interrompre il luy dit
avec vn ton de voix qui le fist trem-
bler: Taisez vous insolent cheualier

& ne pensez pas que i'endure tant de blasphemes que vous faictes contre la beauté de madame preferant à son excellence vne qui ne merite pas de la regarder; Sur mon ame si i'auois receu l'ordre de cheualerie ie vous ferois laschement dedire d'un si grand mensonge, que si? Ah monsieur (respondist celuy auquel il parloit) vous me pardonneriez s'il vous plaist, vous vous mettez trop legerement en colere? Ne sçauiez vous pas que tous les amoureux ont le priuilege d'estimer leurs dames plus que toutes les autres qui sont sur la terre, & que ie ne fais point de tort à la vostre d'auoir telle opinion qu'il me plaira de celle que i'ayme? Si fait veritablement (reprist Clarazel) cela luy importe, car vous ne pouuez dire que la vostre soit si parfaite sans offencer les merites adorables de celle qui possede mon

cœur, voila pourquoy changez de propos au moins si vous voulez demeurer en mes bonnes graces, autrement vous me contraindrez de violer en vous les loix du deuoir qui me deffend de mettre les mains sur vn cheualier à cause que ie n'ay pas encor cest ordre sacré. M^osieur (respondist celuy qui tenoit le luth) certes ie croy que vous auez enuie de passer le temps aux despens de qui que ce soit, ie suis aduocat & non pas cheualier comme vous le dittes. Ah vraiment voila qui est bon (reprist Clarazel) vous seriez fort bon orateur si vous me pouuiez persuader que vous n'estes pas cheualier; Ce sont des artifices pour vous excuser du combat, mais vous vous trompez, il faut que vous confessiez que vostre maistresse n'entre point en comparaison avec la mienne, ou que vous me fassiez che-

ualier tout à ceste heure afin que i'entre en combat contre vous sur ceste querelle, & que ie vous chastie de l'insolence de vostre pensee. Sur mon ame (dit l'aduocat qui commençoit alors de cognoistre le mal du galland auquel il parloit) Monsieur, vous extrauaguez en telle façon que vous me faictes rire malgré que i'en aye; au nom de dieu suiuez vostre chemin & me laissez dans la liberté de mes actions. Non feray par dieu (reprist Clarazel en colere) madame a trop d'interest en ceste querelle, voila pourquoy ne pensez pas m'eschapper si facilement, ie vous ay prié de me donner l'ordre de cheualerie, vous me l'avez refusé par ingratitude ou par couardise, ie veux voir si vous aimez vostre maistresse avec des passions si grâdes que vo⁹ le châtiez tantost sur ce luth. Le vous cōiure d'oc par ses merites

& par vostre amour que vous ayez à me faire cheualier tout à la mesme heure? Seigneur (respondist l'aduocat qui commençoit à prendre vn plaisir merueilleux aux boutades de dom Clarazel) la chose par laquelle vous me coniurez est de si grand prix que ie satisferois à vostre priere si vous estiez en l'estat que vous deuriiez estre pour receuoir vn si grand honneur; mais considerez ie vous prie que vous n'avez cuirasse, ny casque, ny armes quelconques que vostre espee, & par consequent que ie ne puis effectuer ce que vous voulez. Vous avez raison (luy dit Clarazel) & pour ceste consideration ie vous laisseray viure iusques à ce que quelque cheualier excellent m'ait donné des armes avec les ceremonies qu'il faut pratiquer en choses pareilles: Alors ie vo⁹ iray chercher iusques aux enfers pour vous

combattre sur ceste quetelle & tirer de vous autāt de satisfactiō qu'il en faut pour appaiser le iuste courroux de madame. He bien (respondist l'aduocat en riant) i'auray du temps assez pour me preparer à me biē deffendre, cependant mon gentil-homme ie vous cōseille de songer plustost à vous faire guarir la ceruelle qu'à contraindre les volonteiz de ceux qui ne releuēt point de vos fantaisies, car en vn mot vous estes fou, & comme tel ie vous veux laisser avec les hiboux pour les faire rire de vos gaillardises: Ce disant il se retira & laissa nostre cheualier si mal content de ces parolles qu'il eust volontiers mis l'espee à la main pour en tirer quelque raison s'il n'eust creu qu'estant cheualier il ne le pouuoit attaquer avec iustice. Remettant dōc la vengeance de cet affront au iour qu'il esperoit de le combattre parce

qu'il auoit publié la beauté d'une
bourgeoise qu'il aymoit au preiudice
du merite de Syluiane, il le laissa reti-
rer en son logis où il entretint ses amis
de mille bons contes que ceste ad-
uenture extraordinaire luy fist ren-
contrer, & passant outre s'en alla des-
cendre peu de temps apres chez vn
bon homme de payſan lequel le trait-
ta fort courtoisement.

Comme don Clarazel se rendit hermite au mont d'or : Les discours que l'hermite luy tint sur ses folles imaginations, & comme il voulust estre appelé le beau desolé à l'imitation d'Amadis de Gaule qui s'estoit fait autrefois appeller le beau tenebreux.

CHAP. IV.



Es deplaisirs de don Clarazel ne luy permettās pas de dormir long-temps il se leua beaucoup plustost que le soleil, mangea quelques restes de son soupper auant que partir , & remerciant ce bon homme comme les cheualiers errans auoient accoustumé de faire au temps de leur regne se mist à cheual sur le point du iour. Si tost qu'il fust dās les arçons, Syluiane

luy vint en memoire, il renouuella quelques plaintes qu'il auoit faittes plus de mille fois les iours precedens, & s'imaginant que pour estre cheualier errant il falloit faire comme Amadis, lequel au temps de sa tristesse auoit suiui le premier chemin que son cheual auoit voulu prendre, il mist la bride sur le col du sien sans se soucier d'aller à trauers, à droit, ou à gauche. Il demeura par l'espace d'une bonne heure ainsi transporté resuant tousiours au mauuais traitement qu'il auoit receu de sa dame, mais sur ces entrefaittes le son d'une cloche venant à frapper ses oreilles il leua la teste comme s'il se fust resueillé en sursaut, & regardant de tous costés aperceut vn petit hermitage lequel estoit assis sur vne montagne que l'on nomme ordinairement le mont d'or. L'objet de ce lieu reculé le faisant sou-

uenir de la roche pauvre, il creut que
ses destins l'auoient adressé iustement
en ce lieu pour y passer le temps de sa
peyne, voila pourquoy tournant la
reste de son cheual de ce costé là il ne
manqua point de s'y rendre au bout
d'un cart d'heure, mit pied à terre, en-
tra d'as la chappelle où il fist quelques
oraisons, sortist de là peu de temps
apres, & voyant vn ombrage aggrea-
ble sous vne multitude d'arbres les-
quels n'estoient pas esloignés d'un
trait d'arc, treuua le lieu si delicieux &
si propre au dessein qu'il auoit de vi-
ure solitairement en quelque desert
qu'il resolut d'y finir ses iours, ou d'y
attendre que Syluiane l'enuoyast cher-
cher pour le mettre au suprefme de-
gré de sa gloire : Heurtant donc à la
porte de la cellule d'un hermite, lequel
ayant les vanités du monde en hor-
reur faisoit alors penitence en ce mes-

me lieu, il se mist à ses pieds, comme il vist la porte entr'ouuerte, & faisant rouller vn ruisseau de pleurs sur ses iouës luy dit avec vne infinité de souspirs. Mon pere, vous voyez vn ieune cheualier si mal traité de la fortune & del'amour quen'esperant ny repos ny biens, il se vient mettre à couuert de tant de miseres sous vostre protectiō & celle du ciel; Au nom de dieu ne me refusez point vostre compagnie, & souffrez que ie me plaigne de mes maux en ce lieu desert où i'ay resolu de passer ma vie. Monsieur (luy dist cest hermite tout estonné de ce discours) ie ne sçay pas le sujet qui vous à peu donner ceste estrange resolutiō de venir viure parmy des rochers & des arbres, mais il me semble que ie ne doy point satisfaire à vostre priere que ie ne vous aye informé de deux choses que vous ne deuez pas igno-

rer au moins si vous voulez voir vne fin heureuse à vostre entreprise. Premièrement il faut sçauoir si vous estes appelé par la voix du ciel à ceste vie la plus austere qui soit au monde, & voir en second lieu si vous estes propre à la maintenir. Pour cognoistre si c'est vn mouuement de dieu qui vous a donné ce dessein il est necessaire que vous me contiez vostre vie sous le secret de la confession ou bien autrement, afin que ie iuge si vous y auez esté porté par le puissant repentir des fautes que vous auez faittes en vostre ieunesse, ou bien par quelques considerations plus humaines; Cela fait, ie cognoistray bien si vous serez propre à souffrir toutes les incommodités que i'endure, & si ie deuray esperer des fruits heureux d'une sainte conuersion. Mon pere (luy respondist don Clarazel) il n'est pas besoing
ce me

ce me semble que ie vous fasse le discours entier de ma vie pour vous faire iuger de mon action & de mon dessein, car ie veux franchement aduoüer que le desespoir & non pas la deuotion m'ameine vers vous? O mon enfant (reprist l'hermite l'interrompant à ceste parolle) d'un commencement si estrange on ne peust attendre vne bonne fin non plus qu'un bon effect d'une cause toute mauuaise ; vous vous trompez de penser meriter quelques graces du ciel les demandant avec des boutades & sans reuerence, il ne benira iamais vos intentions, vous ne gousterez point les douceurs de la solitude parce que vous aurez tousiours l'esprit embrouillé des pensees de vostre malheur, vos ieusnes, vos traux, & vos oraisons resteront sans fruit, & tant que vous aurez le monde à la teste dieu n'entrera point

dedâs vostre cœur: Croyez moy, changez de deſſein, demandez le ſecours de vostre raiſon qui doit ſurmonter vos afflictions, vous en triompherez avec le temps, & n'aurez pas en fin le regret d'auoir voulu faire vne choſe au delà de vostre pouuoir. Mon pere (luy reſpondiſt-il) ie iuge bien avec vous que le ciel ne donne pas ſes faueurs aux deſeſperés pendant qu'ils ſont dans l'excès de leurs paſſions, mais qu'il ne ſe ſerue ſouuent d'vne cauſe pareille à celle qui me fait chercher les deſerts pour mettre en repos quelques malheureux, c'eſt ce que vous ne pouuez dire avec raiſon puis que ſon pouuoir paroiſt plus aux choſes qui ſemblēt impossibles qu'à celles qui ſont ordinaires; voila pourquoy ne faites point de difficulté de me receuoir avec vous ſous eſperance que contre l'ordre de la nature ie pourray

faire sortir de tres-bons effects d'une cause qui paroist mauuaise. L'œuvre que vo^r ferez sera charitable, car vous consolerez vn homme affligé, qui plus-est vous l'empescherez de se perdre tout à fait dans son desespoir: Que si vous voulez vn exemple pour vous obliger à faire ce dont ie vous prie vous vous resouuiendrez du saint homme de la roche pauvre qui receut en son hermitage Amadis de Gaule, lequel estoit mal traité de sa dame comme ie suis aujourd'huy de celle qui possède toutes les affections de mon cœur. A ces mots cet hermite qui auoit admiré les premiers discours de nostre affligé, iugeant la grandeur de son mal par les apparences ne se peut empeschier de luy replicquer ces parolles avec vn soupir. Ah mon enfant que me dittes vous? Prendrez vous bien ces fadaïses pour

des verités , & ne craindrez vous point qu'en me les donnant pour exemples ie ne vous dise avec subiet que vostre iugement est mallade? Reueuez à vous ie vous prie , considerez que vous me faites des contes que quelques gentils esprits ont inuenté pour se diuertir , & si vous voulez donner quelque fondement à la priere que vous me faites cherchez des exemples meilleurs. Alors il employa tous ses artifices pour le remettre dans l'vsage de la raison , mais voyant qu'il preschoit inutilement , & qu'il luy donnoit rousiours quelque trait de ces beaux Romans pour des authoritez sans replique, il se resolust de le receuoir en sa compagnie plutoist pour en tirer quelque passetemps que pour aucune esperance qu'il eust de le disposer avec le temps aux exercices de deuotiō. En effect l'embrassant fort

courtoisement il le mena dans son petit logis composé de deux chambres assez gentilles, & luy ayant à l'abord apporté vn petit potage qui n'auoit aucune faueur que par vn peu d'huile & de sel il le fist manger malgré qu'il en eust. Ce petit repas estant pris il luy demanda ce qu'il vouloit faire de son cheual, à quoy respondant assés froidement : le ne m'en soucie que fort peu (luy dit-il) vous en ordonnerez comme il vous plaira, mais afin que vous puissiez subuenir doucement aux necessités de nostre vieie prendray quelque argent qui est attaché sur la croupe. Alors ayant pris la selle de son cheual il la porta au pied de s^{on} li^{et}, & laissa ceste pauvre beste au trauers des champs: ce que l'hermite n'ayāt peu souffrir il l'alla prédre par la bride, & le mena chez vn bon payfan lequel demeuroit au pied du rocher

auec priere de le luy nourrir cinq ou six sepmaines pendant lequel temps il esperoit de voir quelque changement à la resolution de son hôte. Ceste affaire estant ainsi faicte il s'en retourna promptement en son hermitage où ne treuuant point Clarazel il se douta bien qu'il seroit dans vn petit bois lequel estoit fort près du logis : En effect il le treuua couché sous des arbres faisât ses regrets ordinaires, se plaignant de la cruauté de sa dame & du mauuais traitement qu'il receuoit de ses passions, sur quoy ce bon hermite s'estant approche le voulust plutoft entretenir selon son humeur que de perdre le temps inutilement à le consoler par des raisons solides & bonnes. Le voyant estendu sur l'herbe & treuuant ses yeux tous chargés de larmes, il luy dist. Hé bien Monsieur, ne refuez vous pas maintenant

à vostre disgrâce, ou plutoſt aux perfections de vostre maitreſſe ? Helas (reſpondiſt-il) ie n'ay point de meilleur entretien que de ces penſees lesquelles ſervans de nourriture à mes paſſiôs m'épeſchent neantmoins bié ſouvent d'en ſouffrir la rigueur & la violence, car elles me transportent ſi bien que ne me pouuant cognoiſtre moy meſme ie ne reſſens point ce qui me fait mal. Voila (dit l'hermite) vne choſe eſtrange, & certes vous me faites pleurer de compaſſion: Comment (reprit il) de compaſſiô ? Sur mô ame ie ne penſe pas qu'un rocher peut demeurer inſenſible à mes maux non plus qu'à mes plaintes ? Syluiane eſt ſeule en ce monde qui n'en a point le cœur touché. Ceſte cruelle dont vous vous pleignez s'appelle donc Syluiane (repliqua l'hermite) en verité ſi ie la cognoiſſois ie luy reprocherois ſon

ingratitude, & peult estre ie l'obligerois à recognoistre vos seruices, mais cela n'estant pas il nous faut songer à quelque autre chose pour vostre repos: Monsieur vous m'avez declaré de vos secrets peult-estre plus que vous ne vouliez, il faut que ie sçache encor qui vous estes sous la promesse que ie vous fais de ne le declarer à personne que par vostre consentement. Il est vray (luy dit Clarazel) que mon transport m'a fait nommer ceste dedaigneuse contre le dessein que i'auois de ne la faire cognoistre à personne, mais il n'importe vous auez assez de discretion pour vous taire; Quant à mon nom ie ne trouue pas encor à propos de vous le cacher, voila pourquoy ie vous diray que l'on me nomme don Clarazel de Baleare, surnom que i'emprunte de ces Isles fameuses que l'on appelle Baleares par ce que

i'y ay pris naissance; toutefois ie veux perdre ce nom si ie puis, & faire comme le pauvre Amadis de Gaule lequel estant en vn estat autant déplorable que celuy auquel ie suis auourd'huy reduit, se fist appeller le beau tenebreux: Ce nom fust de l'inuention de l'hermite de la roche pauvre, ie voudrois bien que vous m'en donnassiez vn semblable; vous le pouuez faire avec autant de iugement queluy parce que vous auez le mesme subiet: Amadis estoit extremement beau, ie ne luy cedde point ce me semble quant à ceste perfection, Oriane l'auoit chassé comme indigne de ses bonnes graces, Syluiane m'a fait desesperer d'auoir iamais quelques faueurs d'elle: Pour le reste vous pouuez iuger à ma contenance si mes afflictions sont moindres que n'estoient celles de ce prince dans l'excès de son desef-

poir. Il est vray (luy dit ce bon homme qui prenoit plus de plaisir à ces discours facetieux qu'à dire ses heurres) il est vray dis-je que ce nom seroit fort propre à vostre beauté & à la douleur que vous ressentez , mais parce que vous ne voudriez rien emprunter d'un autre , ou plustost que vous ne voudriez pas raurir à ce prince le contentement qu'il auoit d'estre ainsi nommé, ie serois d'aduis qu'au lieu de beau tenebreux on vous nommast le cheualier triste. Ah mon pere (luy replicqua don Clarazel qui ne se contentoit pas de cela) vous parlez fort bien quant à ma tristesse , mais vous oubliez l'autre des parties qui est ma beauté , & par consequent vous ne dittes que la moitié de ce qu'il faut dire. Vous auez raison (dit l'hermite qui cogneut bien qu'il auoit vne grande passion pour ce mot de beau)


ie ne prenois pas garde à la faute que ie cōmettois, ie m'acquitteray mieux tantost de ce que ie doy: De vous appeller le beau triste, cela n'auroit pas bonne grace, le beau affligé ne me reuient pas encor à la fantaisie, il faut si vous me voulez croire qu'on vous nomme LE BEAU DESOLE'. Ah mon pere (s'escriat-il tout incontinant) vous l'avez treuué sans mentir, & le nom de beau tenebreux ne me semble pas si bien exprimer le mal d'un homme desesperé que celuy de beau desolé, voila pourquoy ie puis asseurer avec raison que vous avez mieux rencontré que le bon-homme de la roche pauvre: vous ne m'appellerés donc iamais autrement, au moins s'il vous plaist & si de fortune il arriuoit icy quelque dame comme la belle Corisande fist à l'hermitage auquel Amadis pleuroit son malheur, vous

luy direz que ie n'ay point d'autre nō que celuy de beau desolé, car ie seray tres-aïse de le conseruer iusques à ce qu'il arriue icy quelque damoiselle de Dannemarc pour m'apporter des lettres avec la grace que i'en attens, & que i'aye donné trois ou quatre coups signalés dans quelque memorable combat comme fist Amadis de Gaule en celuy des cēt cheualiers du Roy Liffuard cōtre les cent du Roy Cildadan. Ouy mais (replicqua l'hermite) si vostre maïstresse ne se vouloit iamais souuenir de vous, à quoy vous resoudrez vous apres vne longue espace de temps? A mourir en celieu desert, luy respondit-il, par ce que ie choisirois plustost mille morts que de me presenter deuant elle sans vn exprés commandement. Seigneur cheualier (dit l'hermite) dieu veuille que vous ayez bien tost ces bonnes nouuelles

que vous esperez afin que ie voye finir vos peines, quant à moy ne vous pouuant seruir en ceste affaire qu'auec mes prieres i'en feray tous les iours pour vous. Ainsi nostre hypochondriaque resolust de demeurer en ce lieu desert où il cōmença de mener vne vie si estroitte & si retiree qu'on l'eust peu mettre au nombre des saints s'il eust donné ses larmes, ses regrets, ses plaintes, & les austeritez qu'il faisoit au souuenir de ses pechez comme il les donnoit aux chymeres de son cerueau.

La triste vie que don ClaraZel menoit
au mont d'or : Ses discours avec l'her-
mite : Comme ayant pris vne nouvelle
imagination par le moyen d'un songe
qu'il fist il se resolust de receuoir l'ordre
de cheualerie : Son despari de l'hermi-
tage du mont d'or : La rencontre qu'il
eust d'un lacquay mattois & ruzè qu'il
receut pour son escuyer : Leurs discours,
& comme changeant le nom de beau
desolé il se fist appeller le cheualier aux
tristes pensees.

CHAPITRE V.

 A tristesse de ce malheureux
prenant de l'accroissement
avec le temps son esprit de-
uint beaucoup plus malade qu'il n'e-
stoit au commencement, il fist de nou-

uelles extrauagances dans les discours qu'il tenoit ordinairement avec l'hermite, il alloit coucher la plus part du temps sous des arbres, ne faisoit que pleurer & que soupirer, & quand il voyoit quelque femme qui venoit faire ses deuotions à la chappelle de l'hermitage il s'imaginoit tout au mesme temps que c'estoit vne nouvelle damoiselle de Dannemarc qui luy venoit apporter des lettres de grace, mais quand il se voyoit trompé il auoit recours à ses larmes ausquelles il mesloit bien souuent ces plaintes. Syluiane, est il bien possible que vostre cœur soit insensible au mal que ie souffre, & que vous adorant avec tant de zele & d'affection vous me mesprisiez de la sorte ? Ah que i'ay iuste sujet de me plaindre de l'extreme cruauté que vous exercez enuers moy ? Vous perdez le plus loyal

cheualier qui fust iamais soufinis à l'empire de quelque beauté, la raison? Vous n'en auez point puis que ie n'ay iamais failly contre vous, ou pour le moins elle est si legere que vous ne l'oseriez auoir ditte de peur qu'on ne condamnaist vostre ingratitude; toutefois vous voulez que ie meure & que ie porte la peine d'un peché que ie n'ay pas fait; hé bien Syluiane ie m'en vay mourir, car ie sens desia les traicts de la mort qui me picquent, mais croyez moy vous vo⁹ repétirez quelque iour de m'auoir traité de la sorte, & vous aurez vn desir extreme de me rappeler lors que mon malheur m'aura rendu incapable de ceste faueur. Ainsi trauaillé de tres-grandes inquietudes & d'une melancholie encor plus profonde il fust cinq sepmaines en cet hermitage, au bout duquel temps s'estant endormi vn soir sous des arbres

bres il songea qu'il voyoit venir vne femme laquelle le reprenant aygrement du furieux dessein qu'il auoit conceu de mourir en vn lieu desert, luy commandoit de partir tout incontinent & de se diuertir dans le monde iusques au temps que la fortune luy promettoit la possession de sa dame. Se resueillant donc en sursaut il refusa longuement à ce songe lequel le portant encor insensiblement dans les fortes opinions qu'il auoit conceuës de la verité de tout ce qu'il auoit veu dans les amadis, il creut qu'Vrgande l'a descogneuë, auoit pris la peyne de le visiter pour l'aduertir des choses qui touchoient la diminution de son mal & l'establisement de son repos, & par consequent qu'il ne falloit point aller au contraire des commandemens qu'elle luy faisoit sur peyne d'estre malheu-

reux pour tout le reste de ses iours
se levant donc quoy que la nuit
ne fust pas encor escoulee il s'en
alla tout droit à l'hermitage &
frappant trois ou quatre coups sur
la porte assés brusquemens refucilla
le bon homme lequel demanda tout
incontinent qui va la? C'est moy mô
pere (luy respondit-il) ouurez la por-
te ie vous en prie, car ie vous veux con-
ter des nouuelles : Sont elles bonnes
(dit l'hermite le faisant entrer ?) Ouy
sur ma foy (luy respondist-il) elles
sont fort bonnes & ie veux croire que
vous vous en resiouirez aussi bien que
moy puis que vous m'aymez. Vne
sage magicienne, en vn mot Vrgande
l'a descogneue qui prend le soucy de
ma vie & de mon repos m'est venu
treuver ceste nuit , m'a repris avec
colere du choix que i'auois fait de ce
lieu desert pour y attendre la fin de

mes jours, m'a commandé de prendre les armes & d'aller esprouuer les aduentures du monde, le tout sous vne promesse asseurée de me mettre bien tost en possession de ma Syluiane, voila pourquoy ie veux aller faire vn tour à Lyon pour me faire faire des armes complettes & puis i'iray treuuer le Roy qui a le bruit d'estre le plus grád, le plus genereux & le plus courtois monarque du monde, afin qu'il me donne l'ordre de cheualerie, ce qu'estant asseuré d'obtenir sans difficulté ie feray des choses si rares que ie seruiray d'estonnement à toute la terre, Ce pendant vous ne m'oublierez point s'il vous plaist en vos bonnes prieres & saincts sacrifices. Mon enfant (dit ce bon hermite qui vist bien que ceste imagination nouuelle alloit faire naistre vne infinité de follies) certes c'est à ceste heure que ie vous

plains & que ie treuue vostre mal beaucoup plus grand que ie ne l'ay creu, car i'auois tousiours esperé que vostre cerueau gueriroit avec le tēps & que ces impressions dangereuses s'effaceroient quand vous ne verriez plus les liures qui les ont grauees en vostre esprit, mais tant s'en faut que cela soit arriué selon ma pensee, vostre maladie est deuenüe incurable en ce lieu desert, & ceste fantaisie nouuelle que vous auez prise me fait tout à fait desesperer de vostre remede: Considererez ie vous supplie s'il y a quelque apparence qu'une magicienne vous soit venu voir ceste nuit pour vous aduertir de toutes ces niaiseres que vous mettez malheureusement en vostre ceruelle? Comment (dit-il l'interrompant à ceste parolle) s'il y a quelque apparence qu'une sage magicienne me soit venu voir? Doutez

vous encor de cela? Mon pere ie vous assure qu'il est vray, que iel'ay veüe comme ie vous voy maintenant, qu'elle m'a tenu les mesmes discours que ie vous ay faiçts, & qu'elle m'a promis de flescir la rigueur de ma Syluiane apres quelque espace de temps? O Dieu (dit l'hermite pliant les espaules à ces mots) que ces liures remplis de fables sont dangereux quand ils tombēt dans les mains d'un homme qui a le cerueau mal fait & leger? Mon amy puis que mes raisons sont plus foibles que vos folles opinions vsez de vous comme il vous plaira, ie vous ay receu de bon cœur quand vous vous estes présenté pour demeurer en cet hermitage, ie ne vous empeschera pas d'en sortir puis que vous l'avez resolu; vostre cheual est au pied de ceste montagne, ie m'en vay descendre avec vous pour le re-

mettre en vostre pouuoir : que si ie puis desirer quelque chose pour vostre salut, ie demanderay au ciel qu'il vueille auoir pitié de vous, & qu'il change vostre malheur en quelque fortune meilleure. Alors le soleil commençant desia de paroistre, ils allerent iusqu'au village où s'estans embrassés trois ou quatre fois le bonhomme reprist le chemin de son hermitage, & nostre extrauagant estant à cheual prist celuy de Ville-franche & non pas de Lyon comme il proiettoit. Si tost qu'il se vist en campagne la cheualerie luy reuint si bien dans la teste qu'il n'eust autre exercice tout le long du iour qu'à songer comme il faudroit combattre vn geât, & sur ceste pensee il faisoit sauter son cheual à droit & à gauche comme s'il eust voulu esuiter les coups de quelqu'ennemy redoutable, il mettoit son espee à la

main, portoit tantost vn fendant, tantost vne estocade, & puis vn reuers, se courboit sur l'arçon de la selle comme si quelque foudre luy eust fait abaisser la teste, bref s'arrestant tantost comme s'il eust voulu contempler les merueilles de quelque enchantement qui se presentoit à sa fantaisie, & tantost mettant pied à terre comme s'il eust eu à combattre contre quelque monstre duquel son cheual eust apprehendé les approches, il faisoit des postures si estranges, ou pour mieux dire tant extrauagâtes que ses actions eussent fait rire l'homme le plus melancholique du monde, voire à ventre deboutonné. Ayant employé bien pres de six heures à faire toutes ces grimaces qu'il accompagnoit de parolles lesquelles rendoient encore la farce meilleure, il vist venir de loin vn gros payfan l'objet duquel fist esclat-

ter vne autre follic, car le voyant approcher il luy dit assez brusquement, Vien ça mon amy dis la verite? N'as-tu iamais leu les Romans? Les Normans monsieur (reprit le payfan) sur mon ame ie n'en sçay rien & difficillement pourray ie satisfaire à vostre demande si vous ne me dittes quelle beste c'est? Comment quelle beste c'est (luy dit Clarazel) Escuyer tu refuses sans doute? Ie ne te parle point d'une beste, mais ie te demande si tu as iamais leu les liures d'Amadis de Gaule, du cheualier du soleil, de Palmerin d'Oliue, de Primaleon de Grece, ou quelques autres de ceste espee. Ah monsieur (respondist le pitaut) ie n'auois garde de vous entendre quand vous m'auiez parlé de Romans, & par consequent il ne vous faut pas estonner si ie ne vous ay pas respondu selon vostre humeur, maintenant que vous parlez

d'Amadis de Gaule, Monsieur ie vous
asseureray que ie n'en ay iamais sceu
aucunes nouuelles, que ie ne l'ay point
veu au moins ce me semble, & qu'au
reste ie n'ay iamais peu dire voila vn
a ny voila vn b. Or va donc mon
amy (luy dit Clarazel) tu n'es pas mon
homme, car n'ayant pas appris com-
me il faut seruir les cheualiers errans
tu ne serois pas propre à estre escuyer.
Ce disant il laissa ce bon villageois &
passant outre se mist derechef à resuer
aux premiers exploits qu'il feroit quād
il auroit receu l'ordre de cheualerie :
Mais il ne demeura pas longuement
sur ceste pensee, rencontrant, peu de
temps apres vn lacquay des plus es-
ueillés qui fussent en France, il l'arresta
& se mettant sur sa bonne mine.
Gentil damoisel (luy dit-il) ie vous
prie de me dire en quelle prouince ie
suis, où vous allez avec vne diligen-

ce si grande & si ie puis quelque chose pour vostre seruice. A ces mots ce lacquay le regardant entre les deux yeux se mist à rire quand il ouït qu'on l'appelloit gétel damoisel; Neátmoins il demeura quelque peu surpris ne sçachant que respondre parce qu'il craignoit que ces parolles n'eussent esté dites par mocquerie, mais iugeant bien tout incontinent que la lune estoit descendue en fateste il luy respondist avec vn soufrire. Monsieur, vous estes dans vne prouince que l'on nomme le Masconnois, quant au subiet qui m'oblige à marcher si gaillement ie ne le sçay pas, & ne vous en puis donner autre raison sinon que c'est pour obeir aux commandemens de mon maistre qui me fait porter vne lettre à vne damoiselle pour laquelle il brulle d'amour. Voila qui va le mieux du monde (dit Clarazel) car

tu tesmoignes en ceste façon beaucoup de fidelité à ton maistre : mais mon amy dis moy par ta foy: Ce pays est-il fréquenté par vne infinité de bons cheualiers? As tu point ouy parler de quelques aduentures estranges, & sçais tu point où ie pourray treuuer le Roy duquel on fait si grande estime par toute la terre? Monsieur (respondist ce laquay) il y a si peu de temps que ie suis en ceste prouince que ie ne vous sçaurois dire avec verités'il y a des cheualiers & des aduentures. Hé bien (continua nostre extravagant) vn autre fera cet office, parlons d'autre chose. N'avez vous iamais pris plaisir à voir les admirables exploits d'Amadis de Gaule, les prouesses de l'excellent cheualier de l'ardente espee, de don Florizel de Nicquee & de don Rogel ne vous ont elles point rauy, & n'avez vous iamais ad-

miré l'extreme amour d'Agefilan prince de Colchos pour l'incomparable Diane? A ces mots ce lacquay ruzé ne doutant plus de la maladie de celuy qui l'interrogeoit il resolust de s'en donner vn peu par les iouës. Arrestant donc les yeux sur luy, il respondist de fort bonne grace. Helas Monsieur ie doy bien sçauoir quelles ont esté les actions de tous ses guerriers nōpareils desquels vous parlez, car mes predecesseurs ont esté nourris à leurs cours & à leur seruice. Gandalin le fidelle escuyer d'Amadis de Gaule fust mon bisayeul & pour vous donner vne preuue de ce que ie dis mon pere m'a fait nommer Gandalec pour l'amour de luy. Comment (repliqua Clarazel) est-il possible que vous soyez sorti de la race du plus digne escuyer qui ait iamais esté sur la terre? Ma foy vous estes gentil-hom-

me, & ie vous estime si fort que ie souhaite avec passion de vous auoir pour mon escuyer, ne doutant point que vous ne me rendiez autant de seruices que vostre predecesseur en rendist iadis à son maistre. Monsieur (respondit ce laquay, lequel oubliant la commission qu'il auoit resolu deslors de dupper vn peu nostre lunaticque) vrayement vostre mine me fait esperer de si grandes choses de vous que ie prendray vn extreme plaisir à vous suiure & à vous seruir iusques à ce que j'aye cogneu si vous estes aussi vaillant que beau & adroit : mais monsieur comme vous estes vous mis en campagne sans auoir la cuirasse sur les espaulles, le casque en teste & l'escu au bras? Pardonnez moy monsieur s'il vous plaist, vous faillez contre la coutume de ces grands guerriers lesquels ne marchoyent iamais qu'avec des ar-

mes? sçachez Gandalec mon amy (luy respondist-il) que ie ne serois pas en l'equipage auquel tu me vois si i'auois receu l'ordre de cheualerie. He bien monseigneur (luy dit Gandalec) le voulez vo⁹receuoir par les mains d'un cheualier que ie cognois le pl⁹ fameux qui soit aujourd'huy dans l'Europe? le me vante d'obtenir cela fort facilement. Gandalec (luy respondist-il) tu ne me sçaurois faire vn plus grand plaisir & pour battre le fer pendant qu'il est chaud, ie suis d'aduis que tu ailles à la meilleure ville qui soit icy proche , que tu me fasses faire des armes complètes qui soient toutes noires pour tesmoignage de l'affliction que la cruauté de madame me fait ressentir, que tu achepres vn bon roussin pour te porter & que tu n'oublies pas vne bonne lance. Monseigneur (luy respondist cet escuyer fait

à la haste) ie feray bien mieux s'il vous plaist, i'ay vne tante qui est fort bonne magicienne, elle vous fera par enchantement la cuirasse, le casque & l'escu afin que le coutelas de vos ennemis ne respande iamais vostre sang. Je ne pouuois aymer ces armes enchantees (luy dit Clarazel) par ce qu'elles amoindrissent les louanges que l'on peust tirer d'une victoire glorieuse, neantmoins ie veux suiure ton opinion aumoins pour ce coup, la raison? C'est que ie pourray mieux arrester la foudre des coups espouuentables de quelques geans furieux avec des armes enchantees, que si ie n'auois qu'un harnois tout simple & commun: qui plus est il tomberoit en pieces trop facilement sous les griffes de quelque serpent d'une prodigieuse grandeur que ie ne manqueray point de treuuer en quelque prouince

affligee. Recômande donc à ta tente qu'elle les fasse legeres & fortes afin que ie sois plus gaillard & moins empesché aux grands combats qui se presenteront de moment à autre: Voila cent pistolles que ie te donne pour auoir vn fort bon roussin, acquitte toy fidellement & le plustost que tu pourras de ce premier cômancement, ie ne bougeray point de ce petit bois que tu vois à nostre main gauche & tu m'y treuueras infailliblement dans cinq ou six iours. Le n'euoye point de presens à ceste docte femme qui est ta parente, parce que ie sçay fort bien que les magiciens assistent ordinairement les bons cheualiers sans vouloir autre recôpense de leurs actiôs genereuses que la gloire de les auoir faites, toutefois tu n'oublieras pas à luy faire mes tres-hübles recombâdatiôs à ses bonnes graces. Monseigneur (luy dit Gandalec)

vous avez raison de croire que les bons magiciens ne sont point du tout mercenaires, & ma tante auroit vn tres-iuste subiet de se plaindre de vous si vous la traittiez en femme qui veust de l'argent: Vous voulez que ie soye icy de retour dans cinq ou six iours, i'y seray plustost si ie puis. Alors faisant semblant de prendre congé de son maistre auquel il voyoit encor avec regret force pistolles en sa bougette, il fist bien vingt ou trente pas, mais le reuenant treuuer tout incontinant il luy dit. Monseigneur, nous auons esté sur le point de faire vne faute tres-grande? Hé comment mon amy luy respondit-il? L'oubliois (reprist Gandalec) à vous demander quelle deuise vous vouliez mettre sur vostre escu, & comme vous voulez que ie vous appelle dores en auât? Je ne suis pas d'aduis (luy respondist-il) de faire


mettre aucune enseigne sur mon escu, parce que ie n'en pourray treuuer qui soit conforme à ma tristesse ; l'escu d'Amadis de Gaule estoit tout noir lors qu'il se faisoit appeller le beau tenebreux : le cheualier solitaire qui estoit le redoutable Lisuard de Grece en auoit vn de mesme façon quand la ialousie de la princesse Onolorie le fist sortir desesperé de l'empire de Trebisonde, il me semble que le mien doit estre pareil, & qu'il me doit suffire d'estre appellé le beau desolé comme l'hermite du mont d'or m'a voulu nommer. Sans mentir (luy dit Gandalec) il a fait paroistre vn grand iugement quand il vous a donné ce nom, mais il me semble qu'une deuise seroit encor plus propre à cacher vostre nom & vostre naissance, car vous ne voulez pas que l'on vous cognoisse : Vous estes triste & affligé, laissez moy mer-

tre sur vostre escu vn grand nombre de petites fleurs qu'on nomme pen-
sees, on ne leur donnera pas des viues
couleurs pour releuer l'esclat ordinaire
de leur beauté, elles sembleront à de-
my flaiſtries, & par ainſi l'on vous ap-
pellera le cheualier des tristes penſees,
nom ſi propre à vostre douleur qu'il
ne doit rien en ſon inuention à celuy
de beau deſolé. Vrayment (dit don
Clarazel) ce petit trait d'eſprit me
plaist fort, & pour te teſmoigner que
ie t'ayme deſia bien autant qu'Amadis
aymoit ton predeceſſeur, ie ſeray bien
aiſe que tu me nommes quand il te
plaira *le cheualier aux tristes penſees*,
pourueu que tu n'oublies pas ce nom
de beau deſolé quand tu ne voudras
pas que l'on me cognoiſſe par l'autre:
Va donc & reuiens comme ie t'ay dit,
dans cinq ou ſix iours tu me trouue-
ras à l'entree de ce petit bois, cepen-

dantie m'entretiendray des perfectiōs
de madame & de la memoire de mes
deplaisirs.

Comme Gandalec escuyer de don Clara-
zel luy apporta des armes complètes:
La resolution qu'ils prirent ensemble
d'aller treuuer le conte d'Oran que
Gandalec surnommoit le cheualier à la
Roze-verte afin qu'il donnast l'ordre
de cheualerie à don Clarazel: Plai-
sante inuention de Gandalec pour ne
coucher point sur la dure avec son mai-
stre: Comme le conte d'Oran fust ad-
uertí de l'affaire du cheualier hypocõ-
driacque, & ce qu'il resolust touchant
ceste affaire.

CHAP. VI.

 Andalec estant expedié de la sorte que vous auez veu à l'autre chapitre prist le droit chemin de Mascon dont il n'estoit esloigné que de quatre lieuës pendant lequel il regarda plus de trente fois les belles pistolles que son maistre luy auoit donnees avec vne tentation merueilleuse de s'en aller treuuer ses parens pour les mettre en repos par le moyen d'une si grosse somme d'argent, mais se souuenant fort bien d'en auoir veu plus de quatre fois autant dans la bourse de celuy qu'il vouloit tromper, il creut qu'il n'vseroit pas bien de la bonne fortune qui se presentoit s'il se contentoit pour si peu, qu'il falloit auoir tout le reste, & par consequent il conclud de s'acquitter

pour ce coup en homme de bien du commandement qu'il auoit receu. S'en allant donc tout droit à la ville il achepta vne vieille paire d'armes d'un sergent lequel auoit esté autrefois d'une compagnie de cheuaux legers, les fist bien pollir & couvrir de noir par un peintre, fist promptement depecher vne rondache à la vieille mode, ne manqua pas de la faire couvrir de penſees comme il l'auoit reſolu avec ſon maistre, s'accommoda d'un fort bon cheual, & n'ayant pas oublié de faire faire vne lance propre à combattre à la barriere ſe rendiſt dans le temps prefix vers don Clarazel lequel l'auoit toujours attendu ſans auoir mangé que des fructs ſauuages depuis ſon deſpart. L'extreme deſir que ce malheureux auoit de voir ſur ſon dos la cuiraffe luy ayant fait attendre le retour de ſon eſcuyer avec plus d'im-

patience que le chasseur ne fait son gibier, il apperceut en fin ce braue laquay de fort loing, ce qui le faisant tressaillir de ioye il se mist à courre au deuant de luy, & mourant d'enuie de sçauoir ce qu'il auoit fait. Hé bien Gandalec (luy dit-il) aurons nous des armes? Comment monseigneur (luy respondist-il) auez vous douré de ma diligence & de mon deuoir? Ouy certes nous en auons, & ie puis dire les plus excellétes que cheualier ait iamais porté pourueu que vous n'y demandiez pas la richesse. Alors se iettant fort legerement sur la terre, il deplia toutes ces armes, mist la cuirasse sur les espauls de don Clarazel, laquelle se treuuant fort bien faicte il pour suiuit: Hé bien monseigneur, les magiciens ne prennent ils pas bien la mesure des hommes sans les auoir veus? Sur mon ame il semble que cette cuirasse ait esté

iettee sur le moule de vostre corps, voila le casque qui n'est pas moins bon que celuy qui fust conquis par Lisuard de Grece le mesme iour qu'il fust armé cheualier sous les portes de Constantinople comme vous l'auez peu voir quelquefois dans le sixiesme liure d'Amadis de Gaule, & quant à l'escu, dittes moy ie vous prie si celuy de Spheramond de Grece luy fust comparable? Non sans doute, car sa trempe est beaucoup meilleure, & qui plus est vous deuez estre tres-assuré de n'estre iamais enchanté tant que vous l'aurez sur le bras: Mais tout cela ne veut rien dire, le present que ie vous vay faire est encor plus beau: Voyez vous ceste lance qui semble estre d'or? Sçachez que c'est celle qui seruiſt au vaillant Argail frere d'Angelique de laquelle les plus grands Palladins de France furēt amoureux: Vous sçaucez sa ver-

tu mieux que moy, ie croy que vous luy dónerez l'estime qu'elle doit auoir, & que vous vous souuiendrez quelque iour del'affection de ma tête qui vous l'a gardee plus de cent ans auant vostre naissance. Mon amy (luy dit Clarazel) en verité ie suis si fort rai de la beauté de ces armes & de ceste láce, qu'il me tarde que ie ne sois desia dans les occasions de combattre afin que i'espreue si peu que ie veux avec des choses si rares, voila pourquoy remets le tout côme il estoit auparauant, & faisons la plus gráde dilligence qu'il sera possible pour treuuer ce bon cheualier du quel tu me parlois il ya quelque temps. Monseigneur (luy dit Gádalec) laissez moy s'il vous plaist le soucy de toute l'affaire, ie vous vay mener en si peu de temps au lieu où il est que vous n'aurez pas quasi le loisir de vous plaindre de la cruauté de vo

stre maistresse. Ce disant il remist son
pacquet sur la croupe de s^o roussin ,
n'oublia pas la fatale l^ace d'Argail , &
prenant le chemin de la maison du c^ote
d'Oran duquel il estoit fort cogneu
laissa marcher apres luy cet extraua-
gant, lequel esperant d'estre bien tost
armé cheualier commença de songer
aux propos avec lesquels il aborderoit
ce guerrier nompareil , pour le sup-
plier de ne luy point refuser cét ordre
sacré. Trois grosses heures s'estans
escoulees insensiblement la nuict les
surprit à l'entree d'un petit taillis, sur
quoy Gádalec qui n'auoit point encor
parlé tournant la teste vers son mai-
stre luy dit. M^oseigneur, vous plairat-
il que nous pressions vn peu nos che-
uaux afin que nous arriuiions à heure
commode au logis de ce cheualier
excellent duquel nous ne sommes
plus esloignés que de demie lieuë?

Comment Gandalec (luy respondist-il) as tu desia oublié que les cheualiers errans prennent leur logis par tout où la nuit les surprend ? Non non nous coucherons fort commodement sous ces arbres apres que nous aurons repeu des petites prouisions que tu n'auras pas manqué d'apporter. Par ma foy Monseigneur (luy dit Gandalec secouant la teste) vous ne vous deuez pas refier sur ma preuoyance aumoins pour ce coup, car ie vous iure en verité que ie n'ay ny viande ny pain. C'est tout vn (luy respondist-il) nous nous en passerons pour ceste nuit, demain le matin nous en mangerons de meilleur courage. A ces mots Gádalec fust vn peu surpris, car il n'auoit pas accoustumé de s'aller coucher sans soupper, qui plus est il trouuoit extremement rude de passer la nuit sur la terre puis qu'il pouuoit

dormir sur vn mathelas , mais il débrouïlla bien tost son esprit de ces fantaisies, & par vne ruze gentille il laissa son maistre au serain pour aller iouyr des commodités qu'il auoit: mettant donc pied à terre il attachas son cheual au pied d'un buisson pour le laisser paistre, & s'estant approché de dô Clarazel luy dit. Monseigneur, vous diray ie vne chose qui me vient de tomber dans la pensee, & qu'il est peust estre à propos de faire pour vostre seruice? Parle Gandalec (luy dit-il) parle librement, tu dois songer à mes affaires plutost que moy parce qu'estant ordinairement rauy dans la contemplation des diuines perfections de ma Syluiane, & pressé d'autre costé par la rigueur de mes deplaisirs ie ne me puis occuper aux choses qui sont de moindre consideration. Vous sçauiez (reprist Gandalec) que

les bons cheualiers ne demeurent pas
tousiours au logis, & qu'on les oblige
souuent à se mettre en campagne lors
qu'ils y pensent le moins, i'ay peur
que celuy que nous allons chercher
estant desiré de quelque damoiselle
affligée ne parte demain plus matin
que nous, & qu'il ne nous donne
beaucoup de peyne à l'aller chercher,
voila pourquoy ie ferois d'aduis d'al-
ler tout à ceste heure au lieu où il est
pour sçauoir s'il a point fait quel-
qu'entreprise, auquel cas ie ne man-
queray point de vous venir treuuer
des qu'il sera iour afin qu'il vous don-
ne l'ordre de cheualerie auant que
partir. Ce n'est pas trop mal aduisé
(luy dit Clarazel) Gandalec vas y de
ce pas, cependant ie m'entretiendray
comme de coustume & tu me treuue-
ras couché sous ces chesnes. Ainsi Gá-
dalec estant depesché selon son desir

monta sur son cheual, & s'en alla treu-
uer le conte d'Oran, lequel, l'ayât bien
recogneu sous des riches habits à cõ-
paraison de ceux qu'il portoit ordi-
nairement luy dit avec vn soufrire. He
bien Picart (c'estoit le nom qu'il auoit
pris avec la casaque) depuis quãd es-tu
deuenu gentilhomme? Mõsieur (luy
respondist-il de fort bonne grace)
vous dittes peult estre mieux que vous
ne croyez, car si ie ne le suis i'en fais
maintenant la profession: sçauiez vous
comment? Par la plus heureuse ren-
contre du monde: Vn gentilhomme
hypocondriaque que ie treuuy sur
les chemins il y a quatre iours me vint
aborder avec des parolles plaisantes.
Gentil damoisel (medit-il) il semble à
vous voir marcher si vistemẽt que
vous ayez crainte de quelque gean, ou
qu'vne affaire d'importance vous
presse beaucoup? De grace dittes moy

que c'est afin que ie vous serue comme i'en ay vn desir extreme ; Dittes moy s'il vous plaist encor si l'on rencontre en ceste prouince beaucoup d'auantures estranges, & si les cheualiers errans y sont bien venus. A ces mots il me fust impossible de me retenir, ie me mis à rire à bon escient, & cognoissant bien de quel mal il estoit frappé ie luy respondis selon son humeur, ie luy fis acroire que i'estois sorti de la race de Gandalin, que l'on m'appelloit Gandalec, & que ie scauois de fil en esguille toutes les actiōs glorieuses que les princes de Grece auoient faittes, de sorte que m'embrassant trois ou quatre fois il me fist des caresses estranges, m'assura qu'il ne doutoit point que ie ne fusse fort bien gentil homme parce que Gandalec pere de Gandalin estoit des meilleures maisons d'Escoſſe, & en suite

deces niaiseries me promist des montaignes d'or si ie luy voulois seruir d'escuyer. Monsieur, il faut que ie vous confesse icy franchement la verité de ceste affaire, ie resolus de plumer la beste comme i'ay fort bien commencé, car i'ay desia cinquante pistolles & vn fort bon cheual du reste de l'argent qu'il me donna pour luy faire faire des armes, & pour ceste consideration ie iugeay qu'il estoit à propos de le suiure douze ou quinze iours pendant lesquels ie trouueray bien l'inuention d'auoir sa bougette où il y a plus de mille escus. Par ma foy (dit le conte d'Oran) ceste rencontre est des plus plaisantes du monde, & ie souhaitte desia avec beaucoup d'impatience de voir cet extrauagant pour rire à ses despens par l'espace de cinq ou six iours. Monsieur, (replicqua Gandalee) me doutant bien que
ie vous

ie vous ferois plaisir en vous l'amenant ie n'ay pas manqué, il est à demie lieuë d'icy couche maintenant sous deux ou trois arbres, & parce que ie luy ay fait entendre que vous estiez vn des plus fameux cheualiers qui soient aujourd'huy sur la terre il vient expres pour vous supplier de luy donner l'ordre de cheualerie, ie croy que vous sçaurez bien faire vostre profit de ceste occasion? Ouy sur ma foy (respondist le conte) & ie ne pense pas qu'il m'eschappe sans me donner plus de plaisir que ie n'en receurois de cent comedies : Toutefois nous ne ferons rien si mon cousin le marquis d'Artigny n'est de la partie. Ie luy vay donner aduis de ce qui se passe. Alors depeschant vn lacquay vers le Marquis d'Artigny qui n'estoit qu'à deux lieuës de là, il commanda qu'on fist chere au Picart, qu'il ne pou-

uoit nommer Gandalec pour n'en auoir pas l'habitude, & commença de songer à ce qu'il feroit pour tirer le plaisir qu'il espéroit de la venuë de son cheualier. Il fist mille desseins sur ceste aduenture, mais toutes ses rencontres n'eurent point de grace au prix des premieres inuentions du Marquis, lequel ayant receu vne lettre qui ne luy declaroit rien de l'affaire monta tout incontinent à cheual pour se rendre vers son cousin lequel il croyoit estre embrouillé dans quelle querelle. Le conte s'esclattant de rire comme il vist entrer son cousin luy donna d'abord quelque peu d'ombrage, mais ne le voulant pas tenir en suspens il luy dit le subiet pour lequel il luy auoit donné la peine de venir, ce qui resueillant l'esprit du marquis qui n'aymoit qu'à rire il luy dit: Mō cousin sur mō ame la chose vaut bien la peine de faire

deux lieuës de iour ou de nuit, & si vous me voulez croire nous passerons ioyeusement douze ou quinze iours aux despens de ce malheureux ? Faites, faites (luy dit le conte) vous me deschargerez d'un tres-grand soucy, car ne voulant point laisser passer ceste occasion sans profit, ie ne sçauois à quoy me resoudre. Songez seulement (luy dit le marquis) à tenir bonne mine, demain le matin ie me promets bié quelque chose de bon pour vous resiouir pourueu que vous vouliez prendre la peine d'amener vostre nouueau cheualier iusqu'à ma maison. A cela netienne (luy dit le conte) que nous ne receuions de nostre entreprise toute la satisfaction que nous desirons, i'iray plus loing si vous le voulez, & si i'en suis creu nous ne nous separerons pas si tost d'une si douce compagnie que celle de ce cheualier que nous at-


tendons. Ainsi discourant de ce qu'ils feroient, la nuict s'escoula insensiblement, de sorte que voyans le soleil qui commençoit à dorer les terres, & Gandalec en estat de s'en retourner vers son maistre, ils l'appellerent pour luy dire qu'il fist diligence. Le bois où il alloit treuuer don Clarazel n'estant gueres loing il y fust en moins d'un cart d'heure, & le rencontra sous des chesnes non pas endormi comme il esperoit, mais faisant ses plaintes ordinaires contre la cruauté de sa dame. Luy voyant les yeux tous mouillés de pleurs il luy dit: Monseigneur, ces larmes sont si mal seantes à un grand courage que vous ne les pouuez respandre sans honte, ny moy les voir ainsi couler le long de vos iouës qu'avec beaucoup de regret; d'auantage que dira le vaillant cheualier à la roze verte, s'il vous voit en ceste posture?

Sur mon ame il vous blasmera & aura quelque raison de ne croire pas les loüanges que ie luy ay dittes de vous. Comment (dit-il) Gandalec as tu veu ce bon cheualier? Ouy (respondist Gandalec) & qui plus est il vous attend avec vne impatience fort grâde, depeschez vous donc ie vous prie? Al-
lons allons mon amy (luy dit-il) i'au-
ray des aisles pour aller receuoir vn honneur que ie desire plus que la vie,
& quant au reste ie couuriray si bien ma tristesse que ce grand cheualier n'aura pas subiet de m'estimer autre que tu m'as loüé deuant luy. Ce disant il se fist apporter sa cuirasse, la mist sur ses espauls avec vne ioye incroyable, y fist attacher toutes les autres pieces que les gensdarmes ont accoustumé de porter aux occasions, mist son cas-
que & ses gantelets à l'arçon de la selle du cheual de son escuyer, luy com-

manda de porter sa lance, & luy faisant attacher sur la croupe la mallette dás laquelle estoient ses pistolles, & luy fist prendre le chemin de la maison du conte d'Oran. Nous verrons à l'autre chapitre les ceremonies qui furent faictes en ceste action, & le commencement de ses armes par la plus agreable aduventure du monde.

Quelles furent les ceremonies que le conte d'Oran praticqua pour donner l'ordre de cheualerie à don Clarazel: Cōme il le fist combattre contre vn dogue qu'on luy supposa pour vn monstre: Particularités de ce combat estrange & plaisant: Insigne fripponnerie d'un page pour tromper nostre extrauagāt, lequel prist vn vieil apoticaire pour maistre Elizabeth chirurgien ordinaire d'Amadis de Gaule.

CHAPITRE VII.

 A maisō du conte d'Orā n'estāt esloignee que d'une demie lieuë pour le plus cōme nous auons desia dist, don Clarazelle descouurist tout aussi tost qu'il fust hors tu bois, & sçachāt de son escuyer

que c'estoit le lieu où le vaillant cheualier de la roze verte s'estoit arresté il pressa si bien son cheual qu'il y fust au bout d'un cart d'heure. Estant à la cour il mist pied à terre, tendist la bride de son cheual à Gandalec, & montant les degrés entra dans la salle où treuuant le conte d'Oran, le marquis d'Artigny, trois gentilshommes qui estoient ordinairement à leur suite avec cinq ou six valets de chambre ou officiers, il demanda d'un ton de voix qui tesmoignoit vne maiesté peu commune si le vaillant cheualier à la roze verte estoit là. A ces mots le conte d'Oran s'auançant il luy respondist courtoisement. Gentil damoisel me voicy, desirez vous quelque petit seruice de moy? Cheualier excellēt (continua don Clarazel se mettant à genoux deuant luy pour luy baïser les mains comme les cheualiers de l'anti-

quité faisoient tousiours quand ils abordoient quelques princes) vos exploits guerriers qui seruent d'estonnement à toute la terre, m'ayans fait desirer avec passion de recevoir l'ordre de cheualerie de vostre main plustost que de celle de tous les monarques du monde, ie suis sorti des Isles Baleares avec dessein de vous supplier de me faire ceste faueur: Ie suis à vos pieds avec ce desir, ie croy que vous ne me refuserez pas. Non certes (respondist le conte le prenant par le bras pour le releuer) car à voir seulement vostre contenance ie me promets des miracles de vostre valeur: Voulez vous pas entendre la messe afin que n'ayât pas veillé vos armes ceste nuit vous suppleez à ce deffaut par le merite de vos prieres? Ceste chose estât du deuoir d'un chrestien (luy respondist don Clarazel) ie seray bien aise d'aller

implorer la grace du ciel afin qu'il benisse mes entreprises. Alors le conte le prenant par la main le mena tout droit à l'Eglise où le curé se treuuant de bonne fortune prest à celebrer la messe fust commencee au mesme moment. Imaginez vous vn peu ie vous prie si le conte & tous ceux qui l'accompagnoient estoient alors poussés d'un esprit de deuotiō? Certes ie pense bien que non, car ils prenoient si grand plaisir à regarder les grimaces de ce malheureux, lequel estant à genoux à deux pas du prestre demandoit d'une voix assez haute pour entendre que dieu luy fist la grace d'estre aussi bon cheualier qu'Amadis de Gaule ou que le cheualier à l'ardēte espee, qu'ils ne pouuoient porter leurs pensées au ciel. Ainsi l'on ne fist que rire pendant que le saint sacrifice dura, lequel estat paracheué don Clarazel se vint dere-

chef mettre aux pieds du conte avec ces parolles. Valeureux guerrier, il est temps que vous accomplissiez la promesse que vous m'avez faite. He bien (luy respondist le conte) ie ne vous veux pas differer cet hōneur que vous meritez: Iurez donc que vous ne commettrez iamais aucun acte de lascheté? Ie te iure (dit don Clarazel l'interrompant à ceste parolle: Iurez encor (luy dit le conte) que vous ne refuserez iamais vostre secours aux dames qui vous viendront chercher pour estre assistees, que vous ne commettrez iamais trahison, que la crainte ne vous empeschera iamais de faire action d'honneur & de gloire, que vous n'attaquerez iamais homme du monde à vostre aduantage, & bref que vous ferez en homme de bien tout ce que les cheualiers errans doiuent faire sans vous excuser du combat ou d'une

entreprise par faute de cœur ou par artifice? Le te iure & vous le promets (dit don Clarazel) par les diuines perfections de ma dame & par tout ce qu'il y a de plus religieux dans le monde? Et moy (reprist le conte) ie vous fais cheualier au nom de mon dieu, avec vne ferme esperance que vous vous acquitterez fidellement de tant de sermens, & avec vne priere tres humble que ie fais au ciel qu'il vous veuille faire aussi bon cheualier que vous estes beau. Ce disant il luy donna le baïser de paix, luy mist vn espeon doré au pied droit, & se retirant vn peu à l'escart: Or sus mon compaignon (luy dit-il) vous voila maintenant cheualier & tout ce qui vous reste à faire est de prendre le reste des armes par la main de qui vous voudrez. De qui vous plaist il receuoir l'espee? A ces mots don Clarazel

tournant la teste de tous costés apper-
ceut entrer vne vieille femme laquelle
estant fort curieuse estoit sortie de la
cuisine où elle seruoit ordinairement
pour auoir sa part du plaisir que l'on
prenoit de ceste marotte, ce qui luy
faisant croire que c'estoit quelque
princesse qu'Virgande la descogneuë
luy enuoyoit pour luy rendre l'espee, il
s'auança promptement vers elle &
luy dit mettant vn genouil sur la terre.
Madame, ie commence à voir que le
ciel s'adoucist contre moy puis qu'il
vous fait treuuer à propos en ceste as-
semblee afin que i'aye l'honneur de
me voir mettre l'espee au costé par
vos mains blanches & delicates: De
grace ne me refusez pas cet honneur
à cõdition qu'elle trāchera tousiours
pour vostre seruice. Ces parolles qui
furent rire tous les assistans ayans ren-
du ceste pauvre femme plus honteuse

que n'est vn regnard qui se voit pris en quelque fosse, elle tourna promptement la teste & commença de gagner la porte, mais son estonnement ayant redoublé la rizee, le conte & le marquis qui se tenoiēt to⁹ deux par le vètre s'auācerent neātmonis fort legerement, & l'arrestans avec quelques parolles qui luy firent peur luy commanderent d'obeir à ce gentil homme qui la prioit si courtoisement, surquoy se resoluant assés promptement elle retourna, fist à nostre nouveau cheualier trois ou quatre reuerences à fesses ouuertes, prist vne espee que Gandalec luy presenta, & l'alla mettre à rebours sur le ventre de don Clarazel: ce qui faisant pasmer tous les assistans qui n'en pouuoient plus à force de rire le bruit fust si grand & le plaisir dura si long temps que ie ne pense pas qu'il y en eust vn dans la compagnie

qui ne pissast de rire en ses chausses:
Don Clarazel fust le seul qui ne s'es-
meut point de ce passetemps, car n'en
comprenant pas le subiet il compo-
soit ses actions avec vne grauité nom-
pareille afin qu'on l'eust en bonne
estime. Vne grosse heure s'estant es-
coulee en ceste premiere ceremonie il
fallut venir à toutes les autres qui
n'eussent pas moins donné de plaisir,
mais le conte estimant que c'estoit
assés pour vn coup il fist signe au mar-
quis d'Artigny son cousin de luy pre-
senter le casque & l'escu, ce qu'estant
fait quelques gentilhommes qui estoient
presens, & qui vouloient auoir part à
la gloire de ceste action luy donne-
rent les gantelets, de sorte qu'estant
tout couuert de ses armes on le retira
de l'Eglise pour le mener disner à la
salle. Le festin fust tres-magnifique,
& le passetemps ne fust gueres moin-

dre qu'il auoit esté à l'Eglise, car le marquis & le conte ayans mis leur nouveau cheualier sur ses aduentures, il leur dist avec tant de grace le subiet qui luy auoit fait prendre le furnom de beau desolé, qu'ils furent en fin contrains de lascher trois ou quatre fois le bouton pour ne creuer point tout à fait. Ces contes ayans duré bien pres de deux heures avec vn plaisir nompareil on vist entrer vn des lacquais du marquis d'Artigny lequel ayant pris vn accoustrement de bourgeois demanda si le cheualier à la roze verte estoit là. Le conte d'Oran que l'on auoit aduertit de tout le secret ne manqua pas de se leuer tout au mesme temps & de luy demander ce qu'il desiroit; A quoy ce lacquay repliquant avec quelques larmes le supplia de continuer ses bien-faits au monde & de vouloir deliurer toute
la pro-

la prouince d'un monstre horrible
qui la rauageoit avec des cruautés
nompareilles. Don Clarazel en-
tendant la priere de ce lacquay qu'il
croyoit estre quelque damoiselle, se
leua tout au mesme temps, & mettāt
les genoux à terre deuāt le conte d'O-
ran luy dit. Prince excellent, vos ar-
mes sont desia si glorieuses & si re-
doutables que vous n'adiousteriez pas
beaucoup à vostre renommee quand
vous aurez tué ce maistre, ie vous
supplie au nom de dieu de me laisser
ceste aduenture & vous reposer, afin
que ie donne vn commencement
heureux aux grandes choses qui me
sont promises par les destinees. Vray-
ment (luy respondist le conte qui
n'attendoit que ceste priere) mon cō-
pagnon ie seray bien aise que vos en-
treprises guerrieres commencent par
vne aduenture si grande & si dange-

reuse afin que vous acqueriez en vn iour autant d'honneur que i'en ay eu de mille combats que i'ay faits depuis quatorze ans, voila pourquoy ie vous en cedde de bon cœur le hazard, & pour vous tesmoigner que i'estime beaucoup ceste resolution genereuse que vous auez prise, ie veux aller avec vous iusques au lieu de vostre combat pour vous donner du combat par ma presence. Sur mon ame prince excellent (luy repliqua don Clarazel) c'est avec raison que l'on vous estime le plus courtois cheualier qui soit sur la terre, vous me voulez faire l'honneur d'assister à ceste entreprise, ie vous en prie avec passion, car la memoire de vos admirables exploits, & le souvenir de ma dame me rendront si fort que i'acheureray ceste aduenture avec plus de gloire que le vaillant Amadis de Gaule n'en acquist par la deffaitte

de l'Endriaque: Allons donc & ne differons point ce voyage: Non nō (luy respondist le conte) l'affaire n'est pas si pressee, il suffira de partir demain le matin, & vous n'en ferez que plus frais de vous reposer icy le reste du iour. Alors le priant de quitter les armes il l'enuoya dans vne chambre, & luy fist porter mille bagatelles dont il pouuoit auoir affaire. Cependant le marquis d'Artigny voulant donner ordre à ce qu'il auoit proietté pour signaller le commencement des armes de ce cheualier, il partist de la maison du conte & s'en alla tout droit à la siéne, où ayant fait venir vn peintre il luy fist peindre sur deux aulnes & demie de toille vne infinité de grosses escailles vertes & iaunes pareilles à celles dont on dist que les serpens d'une prodigieuse grandeur sont couuerts. Cette toille estant sei-

chee au bout de trois heures il se fist
amener vn gros dogue qu'il nourris-
soit pour faire vne guerre immortelle
aux loups, luy fist lier les quatre bouts
de ceste toille aux iointures des quatre
iambes, la fist bien coudre à l'entour
du col & sous le ventre, & puis la fist
remplir de dix ou douze bottes de
foing, de sorte que ce dogue estant
ainsi couuert & accommodé ne pa-
roissoit gueres moins gros qu'un
bœuf, retenât toutefois la figure d'un
serpent horrible par le moyen des es-
cailles qui estoient peintes de tous
costez, la teste seule estant capable de
faire cognoistre la feinte quoy qu'il
ne fallust pas tant d'inuentions pour
le faire passer pour serpent dans l'opi-
nion de nostre nouveau cheualier, il
luy fist attacher sur la teste des cornes
de bœuf avec vn si grand artifice que
la nature sembloit auoir plus de part

à ceste production que l'industrie de l'esprit humain, si bien que ce dogue estant lasché peu de temps apres dans la cour donna vne apprehensió merueilleuse à quelques payfans lesquels ayans l'vsage de la raison ne pouuoient neantmoins discerner la chose. Toute la nuit s'estant presque coulee à desguiser ainsi ce gros chien, il y auoit fort peu de personnes qui ne le treuuassent horrible à l'abord, mais cela ne contentant pas encor le marquis il se fist apporter vn couteau de chasse dont la lame estoit excellente, en fist esmailer la garde de vert & de rouge par le moyen des couleurs du peintre, & le passa tout au trauers de ces grosses toiles escaillees en telle façon neantmoins qu'il falloit auoir beaucoup de force & d'adresse pour l'arracher, le tout afin que nostre cheualier conceut vne ferme opinion d'auoir gai-

gné vne espee aussi riche que celle de Lisuard de Grece avec autant ou plus de gloire que ce prince n'en auoit acquis le iour qu'il auoit esté armé cheualier sous les portes de Constantinoble. En effect la chose arriua selon sa pensee comme nous vous dirons tantost: Le projet de ceste aduéture étant ainsi fait que vo⁹ avez veu le marquis se souuint qu'il auoit vne escarpolette chez luy par le moyen de laquelle il pouuoit faire vne autre entreprise: Il l'alla donc faire accommoder en telle façon que celuy qui vouloit courre pouuoit demeurer suspédu en l'air par le moyen d'une corde laquelle estoit attachee à vne fenestre, & se pouuoit hausser & baisser seló qu'on vouloit. Ceste seconde aduventure étant disposée en fort peu de temps le marquis commanda que le desieuner fust tout prest, à laquelle parolle quelques

vn de ses gens luy vindrét annoncer la nouuelle de l'arriuee du conte d'O-
ran. A lors s'auançant pour le receuoir
il le salua, & feignant de n'auoir iamais
veu nostre extrauagât qui ne le reco-
gneut point parce qu'il auoit d'au-
tres accoustremens que ceux avec les-
quels il l'auoit veu au chasteau du con-
te, il luy alla au deuant, & luy dit. Ver-
tueux cheualier, ceste pauvre prouin-
ce n'espere plus apres dieu qu'en vo-
stre assistance, ayez compassion d'un
peuple miserable, & qui vo⁹ attéd de-
puis quelques siecles côme celuy que
les destins ont esleu pour sa deliurâce?
Grand roy (luy respondist nostre che-
ualier qui l'estimoit vn des plus grâds
princes du monde parce qu'il portoit
vn accoustrement tout couuert de
passemens d'or) ie suis marry de
l'affliction que vostre pauvre peuple
a souffert depuis tant de temps, i'es-

pere qu'elle cessera tantost par la misericorde de Dieu, pour le moins i'y feray tout ce qu'un bon cheualier peust faire, donnez moy quelque vn ie vous prie qui me conduise au lieu où ce monstre s'est retiré, ie vous deliureray bien tost, ou ie m'acquitteray glorieusement de ce que tous les hommes doiuent à la nature. Vaillant cheualier (reprist le marquis) vous me pardonnerez si ie dis qu'il seroit à propos de prendre vn peu de refection auant que de vous exposer à ceste entreprise qui est sans doute plus difficile que vous ne croyez. He bien (dit il l'interrompant à ceste parolle) allons donc boire deux ou trois coups & puis vous verrez si ie scay combattre. A ces mots le marquis luy prenant la main le mena tout droit à l'office, ou pour vous le dire succinctement ayans desieusné comme il faut

nostre cheualier prist son casque, mist son escu sur le bras gauche, & mettant au poing vne bonne espee commença de marcher vers la basse cour où l'on auoit enfermé le dogue. D'abord que la porteluy fust ouuerte & qu'il fallust entrer dans la cour le chien qui se tourmentoit merueilleusement en l'equipage auquel il estoit vint tout droit à luy à grands sauts & sans luy donner le loisir de se recognoistre mist les dens dessus son escu assés furieusement pour luy faire peur, mais ce pauvre hypocondriaque auquel veritablement le courage ne manquoit point, se souuenant qu'Amadis de Gaule estoit deuenu courageux au seul obiet del'Endriaque, & que le braue Agefilan de Colchos n'auoit point tremblé lors qu'il eust en teste le cunalion, il s'assura en telle façon qu'au lieu de s'estonner il ne man-

qua point de porter sur ce dogue vn fendât de telle roideur que si le foing qui estoit deffous les escailles n'eust arresté la fureur du feu il l'eust mis en deux pieces infailliblement. Son coup n'ayant donc fait que d'ouurir inutilement ceste toille de laquelle il estoit couuert, il se mist à cartier, & commença la plus agreable bataille que l'on vist iamais, car ce dogue l'attaquant tantost à droit, & tantost à gauche l'obligeoit à se trouuer aussi promptement qu'il faisoit, s'il luy faisoit peur quand il s'approchoit avec des abbayemens fort horribles, l'esclat du coutelas qu'il entédoit siffler à l'entour de ses oreilles le faisoit retirer tout au mesme temps, de sorte que la crainte estant esgale par tout il y auoit vn plaisir extreme à les voir reculer & puis auancer, à voir faire des desmarches inegales à don Clarazel & des

sauts estranges à ce dogue. Vne heure s'estant escoulee pendant laquelle tous ceux qui regardoient ce merueilleux combat par quelques fenestres estoient à demy transportés de ioye, le dogue commença d'entrer en telle colere qu'il estoit perpetuellement sur don Clarazel, lequel pensant vne fois esuiter le heurt de cet ennemy redoutable il s'entretaila de telle façon qu'il s'en alla tomber à trois pas delà : Le dogue qui sembloit alors auoir quelque iugement, ne seietta plus sur les lames de fer qui le deffendoient, mais il luy planta ses dents dans les fesses avec vne telle furie qu'il le traîna quelque espace de temps par la place. Ce fust alors que tous les assistans furent sur le point de creuer de rire, car le voyans ainsi gouspiller, le bruit qu'ils firét fust si grand qu'il fist retentir toute la maison, neantmoins.

le conte d'Oran craignant beaucoup que ce chien ne le deuorast dans l'excez de la rage qu'il le possedoit, il entra dans la cour pour le secourir, mais sa presence faisant vn effort merueilleux dans l'ame de ce pauvre hypocondriaque, il se releua, pria le conte de ne luy point diminuer la gloire de ceste entreprise, & le poussa de telle colere contre ce gros chien lequel estant acharné sur luy ne craignoit plus rien, qu'il luy passa son espee au trauers du col. La douleur que sentist ce dogue l'ayant fait alors remuër fort horriblement il fist tomber ce cheualier encor vne fois dessus ses genoux, & le secoüa de telle façon que sautant tantost d'vn costé & tantost de l'autre il luy arracha l'espee de la main. Ce fust alors que don Clarazel eust vne extreme apprehension de mourir parce qu'il n'auoit plus de quoy se deffen-

dre : mais ne voulant point perdre courage à l'imitation de ceux qu'il auoit veus reduis à des extremités pareilles, il reclama sa Syluiane plus de mille fois, se releua avec vne promptitude admirable, & faisant plus d'estat d'une mort honorable que d'une vie ignominieuse s'approcha si brusquement de son ennemy qu'il se saisist du couteau qu'il sembloit auoir au trauers du corps. L'ayant arraché plus heureusement qu'il ne l'esperoit il alla presser ce gros dogue qui n'en pouuoit plus, luy abbatist vne de ses cornes avec vn reuers, & croyant auoir beaucoup fait commença de conceuoir vne si grande esperance de la victoire que ce dogue courant par toute la cour pour ne sentir plus son espee, il le suiuiſt avec tant d'ardeur que luy ayāt encor donné quelques coups au trauers du ventre, il l'enuoya tomber

à la fin avec les esclans de la mort. Ceste deffaitte qu'il estimoit vne des plus glorieuses du monde contentant merueilleusement son esprit, il se mist à genoux, rendist graces à Dieu du secours qu'il auoit receu de sa prouidence, & croyant qu'il falloit contrefaire le mort comme il auoit veu quelque fois practiquer en choses pareilles, il s'estendist tout d'un mesme temps sur la terre avec tant d'apparences de foiblesse que le conted'Oran luy tenant la teste entre ses deux mains commanda qu'on luy apportast du vinaigre. A ces mots vn petit page fort esueillé cognoissant bien avec quelle intention nostre extrauagant faisoit ceste feinte s'aduisa d'une meschance-té tres-digne d'un page, il courust au coing de la cour, mist dans vn papier vn morceau de la plus fine moutarde du monde, & courant tout droit au

lieu où don Clarazel estoit estendu.
Courage valeureux cheualier, courage (luy dit-il) vne sage magicienne me vient de dōner cēt onguent par le moyen duquel elle m'a promis que vous reprendriez vōstre sentiment, & que vous seriez preseruē de la mort. Ce disant il luy frotta les leures, & les nés avec ceste cire de bled, l'odeur de laquelle venant à donner droit au nés du conte il se leua tout incontinent, & ne se pouuant empescher de rire: Ah petit pendar (dit-il à ce page) de quel artifice t'es tu souuenu? Sur mon ame voila le meilleur trait dont i'aye iamais entēdu parler. Acheue, acheue, ie te laisseray faire le medecin tant que tu voudras. Alors s'en allant treuuer le marquis il le fist tant rire de l'inuention de son page qu'il fust contraint de se renuerser sur vn liēt sans se soucier de la santé de ce malheureux;

Neantmoins esperant d'en auoir vn plaisir plus long il descendist avec le conte & s'en allerent ensemble pour le retirer de la main de quelquelac-
quais qui sembloient prendre vn plaisir merueilleux à le faire re-
uenir avec ceste odeur souueraine. A l'abord ils luy firent mille compli-
mens, louèrent son adresse & son as-
seurance, firent semblant de porter enuie à la beauté de ceste espee qu'il auoit conquise, & bref le confirmerét si bien dans l'erreur où la lecture des liures d'Amadis l'auoit fait tomber, qu'il creut veritablement auoir fait des miracles avec les armes, & d'auoir conquis vne espee d'une richesse inc-
stimable. Toutes ces petites caresses luy ayans releué le courage iusques à luy faire mespriser le mal qu'il souffroit, il se mist sur ses pieds tout au mesme temps, se frotta le nez trois ou quatre

quatre fois pour enuoyer la mauuaise odeur qu'il sentoit quoy qu'il creut qu'elle vint du pretieux onguet qu'Vrgande la descogneue luy auoit donné, & s'adressant à ces deux seigneurs. Braues cheualiers (leur dist il) ne vous estonnez point de mes blessures elles ne sont point dangereuses aumoins ce me semble, & ie me treuve assés fort pour voir la fin de ceste aduentures'il y a quelque chose à faire ? Mon grand amy (luy respondist le conte d'Oran) certes vous auez tesmoigné tant de valeur en ceste entreprise que des maintenant vous deuez croire d'estre au rang des meilleurs cheualiers du monde, voila pourquoy vous vous deuez conseruer dans ceste reputation & ne vous perdre point à credit. Sçauiez vous pourquoy ie vous fais ceste remonstrance ? Pour vous diuertir d'un combat qui vous reste à

faire pour voir la fin de ceste aduventure, parce que vous deuez attendre que vous soyez gueri de vos playes. Puis que vous me le conseillez (luy respondist-il) ie n'iray point au contraire de vostre opinion : Allons donc chercher vn liēt & des chirurgiens. Ce disant il tendist le bras gauche au conte d'Oran, & l'autre au marquis lesquels le prenans avec vn soufريس s'auancerent vers l'escallier, auquel tēps vn vieil appoticaire qui estoit bon drōlle se treuuant de bonne fortune à la compagnie luy preuint de cinq ou six pas, & se tournant assez brusquement vers dō Clarazel, He biē seigneur cheualier (luy dit-il) n'avez vous point affaire de moy ? Sur mon ame (luy dit Clarazel) seigneur vous me pardōnez s'il vous plaist, ie ne vous cognoy point au moins ce me semble, & par consequent ie ne sçay si ie puis auoir

affaire de vous ? Comment (luy repliqua l'apothicaire) cheualier vous ne cognoissez point maistre Elisabeth qui vient icy par le commandement d'Virgande pour vous penser de vos playes qui sont dangereuses ? Ah sur ma foy maistre Elisabeth mon amy (reprist Clarazel luy tendant les bras) ie confesse que i'ay grand tort ? Sans doute ie vous deuois cognoistre vous ayant veu plus de mille fois du temps que vous seruiez le bon cheualier à la verte espee ? Vous soyez le tres-bien venu, & ie m'assure de ma santé, puis que ie vous voy pres de moy: Allons traualler ie vous prie, vous treuueriez assez de besongne: Ainsi entrant avec luy dans vne fort belle chambre où le marquis le voulust loger il se desarma, se mist tout incontinent dans le liect, & monstra ses fesses à l'apothicaire lequel eust bien voulu auoir alors vn

bon lauement pour le faire driller au lieu de dormir, toutefois ayant esté prié par ces messieurs de le bien traiter il le seruiſt avec des medicamēs si puissans & si ſouuerains qu'il le miſt ſur pieds au bout de huit iours.

*Comme la duchesse d'Arcail deuine
amoureuse de nostre cheualier hypo-
condriaque : Rare inuention pour fai-
re naiſtre vne aduventure des plus ag-
greables du monde par le moyen d'une
escarpolette : Admirable combat de
don Clarazel contre vn gentil homme
qui estoit deſſus : La fin d'iceluy par
vne façon toute eſtrange avec tout ce
qui ſe paſſa en ceſte entrepriſe.*

CHAPITRE VIII.

Pendant que les playes de nostre extrauagant se fermoient, le bruit de ses follies courust libien par tout le pays qu'au bout de trois ou quatre iours la maison du marquis d'Artigny fust pleine de gentil hommes qui vouloiēt auoir bonne part aux contentemens qu'il donnoit, & d'une infinité de tresbelles dames auxquelles ceste aduventure nouuelle faisoit esperer des merueilles & des transports, de sorte que chacun l'allant visiter iusques dans sa chambre avec des complimés nonpareils il acheua de se perdre par les sottes fantaisies dont il se coiffa, car tout au mesme temps qu'il voyoit entrer quelque dame ou quelque seigneur il s'imaginoit que sa valeur incomparable leur auoit donné vn ex-

tre me desir de le voir, les entretenoit au commencement de mille discours excellens, & neantmoins ne les laissoit iamais sortir sans les faire rire à bon esciét. Les diuerses humeurs des hommes prouenans des constellations diuerses, sous lesquelles ils viennent au monde, les opinions de tous ceux qui allerent voir nostre cheualier furent differentes: Plusieurs se mocquerent de ses follies, quelques autres donnerent des larmes au malheur qui l'accompagnoit, & tous generalemēt le louierent de deux choses, sçauoir est de la grace qu'il auoit à bien exprimer ce qu'il vouloit dire, & de faire ses vaillances imaginaires avec vn courage sans peur, de sorte qu'il passoit pour fort courageux dans l'estime des braues hommes, & enuers les femmes pour vn caualier tres-digne d'amour si son cerueau n'eust esté trou-

blé par vn malheureux accident. Neât-
moins, ce deffaut ne peut empescher
qu'Astralize duchesse d'Arcail laquel-
le estoit alors à la compagnie ne con-
çeut pour luy des affections enragees
comme ie vous diray tantost, car de
parler maintenant de ceste aduventure
qui fust vne des plus excellentes qui
soit iamais arriuee en France, ie ne le
treuve pas à propos parce que ie trou-
blerois l'ordre de mon histoire, & par
consequent ie ne contenterois pas le
lecteur: Ie reuiens donc à la seconde
entreprise du marquis d'Artigny
pour ne faillir point. Nous auons dit
à l'autre chapitre qu'il auoit fait ac-
commoder vne escarpolette en telle
façon que par le moyen d'vne corde
que l'on pouuoit tirer de quelques
fenestres on suspêdoit en l'air le cau-
lier qui vouloit courre, & on le pou-
uoit hausser & baisser quand on vou-

loit : Acheuons ce plaisant discours nous y treuuerons quelque chose pour nous resiouir. Nostre cheualier estant bien guarý de ses playes, & tout le monde luy parlant d'un cheualier enchanté qu'il falloit vaincre pour acheuer ceste aduventure, il s'adressa au marquis d'Artigny & luy dit. Grand roy le repos est si mal scant aux bons cheualiers qui veulent acquerir de la gloire que i'ay honte de demeurer si longuement les bras croisez : L'on me dist que pour voir la fin de l'aduventure à laquelle i'ay donné vn commencement fort heureux par la mort du monstre que vous auez veu, il faut que ie surmonte encor vn cheualier qui semble inuincible par le moyen des charmes d'un magicien qui a mis vostre royaume dans vne affliction merueilleuse, ie vous supplie tres-humblement de me dó-

ner congé de l'aller combattre. Vail-
lant cheualier aux tristes pensees (luy
dit le marquis) vous me demandez
vne chose dont ie n'oserois vous im-
portuner craignant d'abuser de vostre
bonté, ou que la douleur de vos playes
ne vous permist pas encor de pren-
dre les armes, mais puis que ie vous
voy fort gaillard ie seray tres-aise de
prendre la fortune au poil, & ne diffe-
rer pas iusques à demain veu que nous
entrons peust estre au moment heu-
reux auquel cet enchantement doit
treuuer sa fin; Disposez vous donc ie
m'en vay donner ordre au reste pen-
dant que vous irez charger la cui-
rasse. Ce disant il alla mettre vn gros
baston long de six pieds entre les
mains d'vn gentil homme qu'il auoit,
le fist asseoir sur l'escarpolette, le fist
esleuer bien pres des foliues, & luy
commanda de demeurer en ceste po-

sture iusques à ce qu'il vist entrer l'hypocondriaque: Les dames estans aduerties de la resolution qu'on venoit de prendre coururent aux fenestres & les caualiers entrerent en confusion dans la salle où ceste farce se deuoit iouer, mais le marquis ne voulant rien oublier de ce qui deuoit seruir à l'embellissement de la piece les fist tous ranger contre la muraille, fist apporter vn flambeau de cire à chacun, fist donner à quatorze ou quinze de bôspistolets chargés de poudre seulement avec aduertissement de ne tirer point qu'alors qu'ils luy verroiēt battre les mains, & les priât de ne brâler point, alla querir nostre cheualier à costé duquel il se mist pour luy faire honneur. Si tost qu'ils furent à la porte don Clarazel fust sur le point de l'enfoncer à grands coups de pied, mais s'imaginant qu'il entreroit bien

plus facilement par la vertu de sa riche espee il la mist au poing & portant le pommeau dessus la vist ouurir tout au mesme temps par ce que le marquis l'auoit ordonné de la sorte. Ceste ouuerture arriuant selon son desir il seietta fort legèrement dans la salle, & presenta le bras gauche avec l'escu croyant qu'on le chargeroit au mesme moment, toutefois ne voyant remuer personne il tourna ses regards par tout, s'approcha de tous ces gentils-hommes qui estoient rangés contre la muraille avec des flambeaux à la main & leur demanda fort courtoisement où estoit le cheualier contre lequel il deuoit combattre. Personne ne respondant à ceste parolle il se tourna vers le marquis qui l'accompagnoit & luy dit. Sire, sur mon ame voila des statuës les plus approchantes du naturel que ie vis iamais? Par vostre foy ne diriez vous

point qu'elles rient & qu'elles tournent les yeux comme nous ? A ces mots les voulant considerer vn peu de plus pres il porta le bout des doigts sur les leures d'vn lequel ouurant la bouche à propos luy planta ses dens dans la chair si sensiblement qu'il le fist sauter à cartier avec vne exclamation d'estonnement & de douleur, surquoy quelques vns de la troupe laschans leurs flâbeaux à force de rire, il se tourna vers le marquis qui ne le vouloit point quitter de peur qu'il ne fist quelque mal & luy dist à demy raui de merueille. He quoy Sire, les statues mordent elles en ceste prouince ? Sur ma foy ie croy que ce sont autant d'ennemis, & partât ie les veux deffaire auant que i'entre au combat contre le cheualier enchanté : Ce disant il se couurist de sa rondache & commença de marcher furieusement contre

celuy qui l'auoit mordu, lequel iettant son flambeau par terre mist tout au mesme temps l'espee à la main, mais le marquis voulât empescher le desordre qui pouuoit arriuer de ceste boutade arresta l'hypocôdriaque & luy dit. Nô non mon grâd amy vous ne profiteriez rien en ceste entreprise, ce sont veritablement des statues faittes par tel enchantement qu'elles ne peuuent sortir de leur place si on ne les touche, auquel cas elles prennent la force des plus redoutables geâs de la terre pour se reuancher: Songez plustost au combat que vous deuez faire contre le cheualier enchanté lequel vous pouuez voir là haut avec vne masse à la main. Puis que vous m'asseurez (luy respondist-il) que ce sont fantosmes par lesquels ie ne puis receuoir aucun trouble en mon entreprise, ie les laisseray faire leur deuoir pour faire le mien

d'un autre costé. Alors leuant les yeux vers ce gentil homme du marquis qui estoit assis sur l'escarpolette il luy dit avec vn ton de voix asseuree. Descens gean malheureux, descens promptement si tu ne veux que ie t'aille chercher avec des eschelles. A ces mots ceux qui tenoient ce gẽtil-homme en l'air avec des cordes les ayant laschees il porta le bout qu'il tenoit de telle furie contre l'escu de don Clarazel qu'il l'enuoya tóber à trois pas de là, & faisant signe qu'on le tirast se remist promptement au lieu duquel il venoit. Ce coup estourdist merueilleusement nostre cheualier, neãtmoins se relevant avec vne promptitude admirable. Maudit enchanteur (luy dit-il avec vn accent que la colere rendoit horrible) c'est envain que tu employes tant d'artifices pour esuiter le trenchant de mon coutelas, tu tomberas

deffous infailliblement, & malgré tant de charmes i'abattray auant qu'il soit nuict ceste grosse teste quite charge trop les espaules. Ces mots finifants parce qu'il voyoit que son ennemi descendoit il fist tomber deux ou trois reuers sur le bastó dont il se couuroit pensant le mettre fort facilement en deux pieces afin de s'en approcher apres plus facilement, mais tous ces coups ayans esté ruez inutilement ce gentil homme prist si bien son temps que luy ayant encor porté deux coups sur le calque il luy fist mettre les genoux & les mains à terre. Ainsi l'un estant tantost en haut & tantost en bas, & l'autre esperát tousiours qu'il l'attraperoit à la fin du conte leur cóbat deuint si plaissant qu'il n'y auoit personne en la compagnie qui ne se tint par les costés à force de rire. Ceste comedie ayant duré par l'espace

d'une bonne heure avec vn plaisir
nompareil, elle prist fin par vn trait
merueilleux & tout autre que l'ó n'es-
peroit? Ceux qui tiroient & laschoiét
les cordes de l'escarpolette comme il
leur plaisoit, n'ayans pas esté vne fois
assez diligens pour tirer leur charge
aux soliues, don Clarazel se mist à car-
tier & porta si adroictement vn reuers
sur les cordes qui soustenoient son
ennemy que les ayât toutes couppees
ce gentil homme tomba la teste la
premiere sur les carreaux. Ceste ad-
uenture ayant obligé tous les assistans
à vn merueilleux esclat de rizee, le
bruit alloit cōtinuer plus d'une grosse
heure si l'on n'eust veu nostre extra-
uagāt lequel haussant le coutelas qu'il
auoit en main l'alloit descharger sur le
cou de ce gentil homme pour luy se-
parer la teste du corps. Tout le monde
ayant donc vne extreme apprehensio
en celuy

& celuy qui couroit fortune beaucoup plus encor que les autres, en fist vn nouveau cri lequel ayant fait aduancer le marquis qui se pasmoit auparavant, il arresta le bras de don Clarazel, fist releuer son gentilhomme avec commandement de le saisir au trauers du corps, & fist signe ausquels il auoit donné des pistolets de tirer tous en mesme temps, ce qu'estant fait aux oreilles de ce malheureux avec le bruit que vous pouuez croire, il s'imagina que c'estoient des coups de tonnerre qui presageoient la fin des enchantemens de ceste aduventure, & qu'il se falloit laisser tomber sur la terre tout esuanoüy : L'ayant pensé il l'executa, il lascha le gētil homme auquel il auoit donné sur la teste vn coup de gantelet assez rudement, il se renuersa de l'autre costé & contrefist si bien vn homme lequel est tombé dans la pas-

moison qu'il y en eust quelques vns qui le creurent en effect priué de tous ses sentimens. Neantmoins le marquis cogneut bien quelle estoit son intention, voila pourquoy il le fist prendre par quelques valets qui le porterent dans sa chambre, pria deux ou trois damoifelles de le desarmer pour le confirmer tousiours dans la folle opiniõ qu'il auoit, le fist mettre doucement entre deux beaux draps, & se faisant apporter del'eau d'ange luy en frotta le nez assez rudement. Ce malheureux s'imaginant alors que ceste eau d'ange estoit vn medicament pretieux qui auoit la vertu de luy faire reuenir le cœur, il commença d'ouurir les yeux & de tourner ses regards par tout, surquoy le marquis s'approchant de luy. Hé quoy mon amy (luy dit-il) ne prendrez vous point vn peu de courage, & nous laisserez vous dans

la crainte de vous voir mourir mal-
heureusement apres auoir fait tant
de beaux miracles? De bout de bout
ie vous en supplie & vous resiouissant
d'auoir acquis autant d'honneur en
ceste entreprise qu'Amadis de Grece
en acquist iadis dans la conqueste de
l'Isle d'Argennes, caressez tous ces
cheualiers que vous auez glorieuse-
ment deliurez de la plus cruelle prison
de la terre, & toutes ces dames à qui
vous auez conserué l'honneur & la
vie. Ce disant il luy fist ietter les yeux
sur vne infinité de gentilhommes &
de damoiselles qui entroient alors dās
sa chambre, ce qui luy faisant croire
qu'ils venoient pour le remercier de
ce qu'ils auoient fait pour leur deli-
urance il mist les bons hors du liēt
comme s'il les eust voulu embrasser
& leur dist. Mes amis, ie suis bien aise
que le ciel ait pris pitié de vostre mise-

re, & qu'il se soit seruy de mes mains comme d'un instrumēt propre à vous rendre quelque seruice, vous estes en liberté maintenant, vous vous pouuez retirer quād il vous plaira sans craindre vne seconde captiuité puis que ce maudit gean enchanté n'est plus en estat de vous nuire. Mais à propos de ce gean (continuat il parlant au marquis) Sire, ne me direz vous point qu'il est deuenu? Sur mon ame ie ne sçay comme nous sommes sortis de nostre cōbat. Car ces espouuantables coups de tonnerre qui ont esclatté dans la salle lors que ie l'ay saisi au collet pour luy mettre la teste à ses pieds, m'ont bié tellement estourdi que i'ay perdu toute sorte de cognoissance mesme iusques à ne sçauoir pas par qui i'ay esté mis dans ce liēt? Mon grand amy (luy dit le marquis) ie pensois que vous eussiez veu les merueilles qui

sont arriuees dans la ruyne de l'enchantement de ceste aduventure, voila pourquoy ie n'auois garde de vous en parler, mais puis que vostre estourdissement vous a priué de ce plaisir ie vous diray fort volontiers les choses qui se sont passees. La principale force de ce cheualier enchanté consistant dans les charmes qui faisoient hausser & baisser les cordes sur lesquelles il estoit assis, il est tombé sur les carreaux tout au mesme temps que vous les auez tranchees avec l'espee, & comme vous l'auiez frappé sur la teste la terre s'est ouuerte avec des tremblemens horribles, nous auons veu sortir des fantosmes espouuentables lesquels ayans saisi son corps se sont recachez à l'instant dans les cauernes dont ils sortoient, & toutes ces statues que vous auez veuës en entrant avec des flambeaux à la main ont commencé

de marcher vers vous non pas comme des choses inanimees , mais comme des personnes humaines : En effect c'estoient tous ces bons cheualiers que vous voyez maintenant en ceste chambre, lesquels estoient demeurez enchantés voulans espreuuer l'adventure , & toutes ces belles dames que vous voyez lesquelles auoient esté arrestees de mesme façon : Quant au reste vous pouuez bien iuger que faisant vne estime tres-grande de vostre valeur, ie ne vous ay pas voulu laisser à la salle, & que ie vous ay fait apporter icy pour vous faire passer vostre estourdissement par la vertu de quelques medicamens souverains dont nous ne sommes iamais degarnis. Certes (luy repliqua don Clarazel) Sire , vous me contez des merueilles que ie n'ay veritablement point veus, & ie suis tresaise que la chose soit de

la façõ que vous auez ditte, tant pour la gloire qui m'en reuient que pour vous auoir donné le contentement de voir quelqu'aduenture extraordinaire. C'est le premier seruice que i'ay rendu à vostre maiesté, ce ne sera pas le dernier s'il vous plaist. Quant à ces cheualiers & aux dames qui les accompagnent ie leur ay desia dit que ie les remettois dans la liberté de leurs actions, chacun disposera de ses volontés à sa mode. Alors le conte d'Oran s'approchant de son liçt luy tendist les bras, & l'ayāt embrassé luy dit. Certes bon cheualier ie me doutois bien que ie faisois des miracles au monde quand ie vous faisois cheualier, & i'auray desormais raison de mettre au rang des plus glorieuses aduentures du monde l'honneur de vous auoir donné l'accollée, puis que vous vous acquittez si fidèlement de

vostre debuoir. Sur mon ame mon bon seigneur (luy respondist-il) si ie veux quelque chose vous en estes cause, & si peu d'honneur que i'ay acquis en ceste entreprise vous regarde aussi bié qu'à moy. Mais laissons to⁹ ces complimens ie vous prie, & parlons de nous diuertir à la chasse ceste apresdisnee? Cet exercice estant violent comme il est (repliqua le conte) vous n'en pourriez pas souffrir le trauail sans vous faire tort veu ce que vous auez souffert ceste nuit: Mais si vous estes en estat de vous promener nous irons iusques à Chaalons où l'on me vient d'auertir que quelques comediens qui ioüent fort bien doiuent représenter auourd'huy le rauissement de Proserpine: Or est-il que la piece estant belle & rare ie seray fort aisé de la voir ioüer. Hé bien m^{seigneur}, luy respondist il, si vous aymez mieux

aller de ce coste-la que de l'autre ie vous y feray compagnie. Ce sera donc (dit alors la duchesse d'Arcail qui ne se pouuoit separer de luy qu'avec regret) cheualier, ce sera donc à condition que ie vous y meneray dedás ma littiere. Encor mieux madame (luy respondist-il asses brusquement) pour le moins si quelqu'audacieux gean vous vouloit redre du déplaisir ie seray prest & en estat de vous secourir. Nô nô (repliqua la duchesse) nous sommes asseurez sur le chemin que nous allons faire, vostre escuyer portera vos armes & vous demeurerez avec nous habillé côme si vous ne vouliez point sortir de la chābre, car vostre harnois nous feroit perir. He bien madame (luy dit-il) vous disposerez de tout comme il vous plaira. Cependant afin que ie ne retarde point l'entreprise, ie m'en vay leuer. Ce disant il fist appel-

ler Gandalec, se couurist des riches habits que le conte d'Oran luy auoit donnés peu auparauant, & se rendât tout incontinent à la salle partist avec la Duchesse d'Arcail & sa suite, pour aller voir ceste comedie. Belles ames qui prenez plaisir à voir ceste histoire ie vous prie de la voir aussi, vous y treuuez de quoy rire.

Comme la duchesse d'Arcail descourist ses passions amoureuses à don Clarazel : La response qu'elle en receust. Son depit & la resolution qu'elle prist sur ceste matiere.

CHAPITRE IX.



Nous auons dit à l'autre chapitre que la duchesse d'Arcail ne se pouuoit separer de

nostre cheualier hypocondriaque qu'avec regret, & que pour ceste consideration elle s'estoit offerte à le mener iusques à Chaalons en sa litiere, tout aussi tost qu'elle vist que la resolution fust prise d'y aller entendre les comediens : Il me semble qu'il est à propos de dire pourquoy, afin que nous ne laissions point trauailler l'esprit du lecteur dans l'intelligence de nostre discours, & que nous y gardions vn bon ordre. Don Clarazel estant extremement beau, bien fait, de bonne mine, fort adroit, bien parlant, d'vne conuersation merueilleusement agreable, & bref des plus accomplis de la terre (à la reserue de ceste folle opinion qu'il auoit conceuë par vn accident fort estrange) estoit tres-capable de donner de l'amour aux femmes, & par consequent on ne se doit pas estonner si ceste belle dame

dont le cœur estoit fort sensible aux traits amoureux, ne se peut empescher d'aymer tant de rares perfections. Ceste raison que ie treuve bonne ne sera peult estre pas bien receuë de quelques esprits inconsiderz, lesquels diront que c'estoit vn trait de folle que d'aymer vn fou : mais ie replicque pour l'excuse de ceste dame qu'il luy estoit bien difficile de ne ceder point aux efforts d'un dieu qui vouloit triompher de sa liberté, que les discours de don Clarazel estans admirables quand il cessoit de parler des choses qui concernoient la cheualerie elle les deuoit admirer, que toutes ses actions estans faites avec vne grace qui pouoit forcer tout le monde, elle ne se pouoit empescher d'en estre forcee, & que son visage amoureux ayant des charmes ineuitables, il falloit qu'elle en fust rauie : de sorte

que ie dis encor vne fois qu'on ne de-
uoit pas s'estonner qu'elle desirast
avec passion de ne le point perdre de
veüe afin de ne se priuer point des con-
tensemens qu'elle auoit en le contem-
plant, parce que l'on ne sçauroit blas-
mer les hommes de chercher leur re-
pos en quelque façõ que ce soit pour-
ueu que ce ne soit point à la ruine de
leurs semblables. Ayant assez dit ce
me semble sur ceste matiere pour fer-
mer la bouche à tous ceux qui vou-
dront mesdire de ceste dame ie re-
uiendray à mon discours. Les cochers
ayans eu commandement de se tenir
prets dans vne heure on fist couvrir
les tables pour le desieuner, lequel
estant expedie peut estre plustost que
beaucoup de la compagnie ne l'eus-
sent voulu, chacun se mist en estat de
partir : Les gentils-hommes trouue-
rent des cheuaux de selle à la reserue

de don Clarazel lequel fust prié d'entrer en litiere avec la duchesse d'Arcail, & trois carosses menerent toutes les damoiselles dont les principales estoient Rozelie vicontesse de Palemon, Seluagine marquise de Brandamont & Clarizee dame des forests dangereuses. Tout le monde alloit à Chaalons sur Saone avec vn contentement incroyable sous opinion qu'il verroit quelques nouvelles boutades du chevalier hypocondriaque qui leur vaudroient bien mieux que trois comedies, comme en effect la chose arriva: mais de tous ceux qui marchaient avec ce dessein, personne n'en receust vn plaisir pareil à celuy que la duchesse d'Arcail ressentait, car se voyant seule aupres de celuy dont son ame estoit idolastre, elle se laissoit transporter au delà de mille delices, ses discours charmoient son oreille, sa beau-

té rauissoit son cœur, & l'extreme desir de le posseder la charoüilloit en telle façon qu'ellen'eust point porté d'en- uie aux felicités de tous les humains pourueu qu'elle eust iouy sans crainte de ses embrassemens & de ses baisers. La chose estoit fort facile selon son aduis: car estant extrêmement belle elle ne pensoit pas qu'un homme la peut refuser quand elle tesmoigneroit d'en auoir la moindre pensèe du monde, & sur ceste opinion elle croyoit que ce Cheualier ne manqueroit pas de luy en dire deux ou trois mots, puis qu'il en auoit les occasions, mais le voyant au bout de deux heures insensible à mille tesmoignages d'amour qu'elle luy rendoit, elle commença d'apprehéder qu'il ne se fust mis dans la teste la fidelité d'Amadis de Gaule comme il auoit fait ses exploicts guerriers, de sorte que balançant entre l'es-

perance & la crainte, elle disputa longuement en soy-mesme si elle luy decouuriroit son mal, ou si elle attendroit encor quelque temps qu'il fist l'office de requerant. Son honnesteté luy conseilloit de mourir plustost que de luy faire ceste ouuerture, sa passion la poussoit au mespris de ceste consideration qui semble estre vn peu tyrannicque, elle ouuroit la bouche pour luy dire ce qu'elle pensoit, la crainte de quelque refus la luy faisoit fermer au mesme moment, son visage changeoit de couleurs comme son cœur de pensees & de mouuemens, bref elle estoit en telle posture qu'elle ne scauoit sur quel pied danser. En fin elle se resolut & voyant l'occasion qu'elle auoit de parler à luy sans estre entendüe elle luy dist. Monsieur, ah madame (dit-il l'interrompant à ce premier mot) pardonnez moy si ie vous
ferme

ferme la bouche à ceste parolle? Les Princes de Grece n'ont point aymé ce mot de monsieur, & vous ne treuverez pas qu'ils ayent voulu tirer plus de gloire d'une qualité d'empereur que de celle de cheualier? Au nom de dieu puis que i'ay l'honneur de l'estre comme vous sçavez ne m'appellez jamais autrement? He bien (dit elle) i'é suis d'accord puis que vous le voulez de la sorte. Seigneur cheualier, ie suis preste à vous descouvrir vn secret de grande importance, mais parce que ie veux tirer quelque satisfaction de mon entreprise il est necessaire que i'obtienne vn don de vostre bonté. Madame (luy respondist-il) sur ma foy vous vous faictes tort de vous deffier ainsi de vostre merite & de ma fráchise: Je vous l'octroye de bõ cœur, & vous deuez croire que vous ne serez point esconduitte pourueu que

ce que vous desirez soit en' ma puissance. l'ay tousiours creu (luy replicquat-elle) que estans si courtois & si genereux vous me traitteriez en femme qui vaut quelque chose; ie veux dire que vous ne me refuseriez iamais rien, ie parleray donc plus franchement que ie m'eusse fait auant l'assurance de ceste promesse. Le secret que ie vous veux descouurir est que ie vous ayme avec des passions si grandes que vous me verrez bien tost mourir en desesperce si vous ne donnez quelque allegement à la playe que vous m'avez faitte au milieu du cœur: Ceste parolle est trop hardie, pour le moins r'aprehende beaucoup que vous ne m'estimiez par là quelque proye commune au premier passant? Mais cheualier ne faites point ce mauuais iugement de moy ie vous en supplie, vos perfections m'ont forcee, & ie

n'ay songé qu'inutilement aux raisons que la hôte & la modestie m'ont peu suggerer pour m'empescher d'en venir là. Si vous vous souuenez de vostre merite & de ces qualités excellentes que tout le monde admire en vous, vous iugerez que ce n'est point vne effronterie qui m'emporte, mais vn deuoir que ie vous rends : Cheualier ne me mesprisez pas par ce que ie me presente moy mesme, & considererez auant que respondre que ma beauté merite bien qu'on la reçoie avec respect. Madame (luy respondist il voyant qu'elle ne parloit plus) la franchise avec laquelle vous m'avez descouuert vos secrets m'oblige à vous parler aussi franchement: vous vous adressez à vn malheureux qui n'a rien de libre que la volonté de recognoistre par quelque seruice l'honneur de l'affection que vous luy

portez & par consequent vous ne deuez pas esperer qu'il satisfasse à vostre desir puis qu'il ne dispose pas de soy mesme: Syluiane la plus ingratte beauté qui soit sur la terre me possede tout, puis ie maintenāt partager mon cœur pour vous en donner la moitié? Madame ie ne le puis pas sans estre le plus lasche cheualier qui viue, & quād vous cōsidererez la raison sur laquelle ie fonde l'excuse legitime que'ie vous donne, & que vous vous souuiendrez du merite de vostre beauté qui peust donner de l'amour aux plus insensibles du monde, vous ne croirez pas que ie vous puisse traiter avec mespris. Amadis de Gaule prefera la mort aux prieres de Madasime qui desiroit de luy au preiudice de la fidelité qu'il deuoit à son Oriane la mesme chose que vous souhaittez au iourd'huy de moy, ie le veux imiter en ceste rare

qualité de fidelle amant comme ie
fais en celle de bon cheualier, Mada-
me ne m'empeschez point ceste gloi-
re ? Vrayment (dit elle) c'est bien
rencontré que de treuuer vn fonde-
ment sur des refueries ? Monsieur ,
vous faictes rire tout le monde quand
vous faictes ces contes-là ? Gouuernez
vous selon le temps où nous sommes
& ne songez point à vn Amadis qui
n'a iamais esté que dans les pensees de
quelques esprits qui se sont diuertis
aggreablement en contant des fables ?
Ah madame (dit-il) ne blasphemez
point s'il vous plaist contre l'honneur
de ce grand prince qui n'a iamais eu
son pareil, sans doute il a fait toutes
les belles actions que vous voyez
en son histoire & pour vne preuue de
ce que ie dis mon escuyer est arriere
fils de Gandalin qui l'a serui fidelle-
mēt en ses entreprises guerrieres: mais

plus encor en ses passions amoureuses. Hé bien monsieur (dit-elle avec vn desdain qui tesmoignoit bien la colere où ce discours l'auoit desia mise) donnons à vostre folle opinion tout ce que vous voulez qu'on luy donne ? Quand il seroit vray qu'Amadis eust refusé les affections de la dame de Gantasi, pensez vous qu'il eust merité des louanges de ceste actiō qui passeroit aujourd'huy pour vne sottise ? Ho , ho, madame (luy dit-il) arrestez-vous là ie vous prie , la vertu ne passe pas pour vne sottize si ce n'est enuers les meschans ? Amadis est extrêmement loüable de s'estre conserué cōtre les assauts impudiques qu'on luy a donnés , & pour vous dire ce que ie pense, la loyauté qu'il a gardée à sō Oriane ne luy a pas acquis moins d'honneur que les plus grandes victoires qu'il a obtenues avec l'espee;

L'arc des loyaux amans est vne preuve de ce que ie dis, & ie sçay fort asseurement qu'il n'a iamaïs tiré tant de gloire de la mort de Maudafabal, de Dardá le superbe, ny mesme de la defaite de l'Endriaque, que de la conquête de l'Isle ferme où il eust le plaisir d'entrer dans la chambre deffenduë autant par la grandeur de son amour que par celle de son courage. Or sus sus (dit-elle voyant qu'il se plongeoit tousiours de plus en plus en ses resueuries) cheualier laissons ce discours & ne mettons point Amadis en ieu, il est question d'autre chose. Me laissez vous avec le regret d'estre mesprisee? Madame (luy respondist il) pardonnez moy si ie vous interromps encor à ce mot: l'aymeroïs mieux mourir mille fois que d'vser de mespris ou d'ingratitude enuers vous, vous estes trop belle & mon humeur est trop

disposée à vous estimer; Si ie ne donne rien à vos passions c'est que ie ne puis rien sur moy-mesme, que ie n'agis que par les organes d'autrui, & vous considererez s'il vous plaist que si ie faux en quelque façon contre vous c'est que ie ne veux point faillir contre Syluiane à laquelle ie doy toute sorte de fidelité quoy qu'elle n'ait point d'amour pour moy. Commandez moy plutost d'aller mourir courageusement en quelque entreprise où il sera question de vostre seruice, ce parti me semblera bien meilleur & plus honorable que l'autre. Bien bien (dit-elle avec vn si puissant mouuement de colere qu'elle dedaigna quasi de le regarder) chevalier nous verrons ce que vous ferez pour reparer ceste grande offence lors que vous serez en campagne pour l'accomplissement du don que vous m'auéz tan-


toſt oſtroyé: Ne vous engagez point à perſonne que vous ne ſoyez quitte enuers moy, & vous diſpoſez à partir demain le matin pour ceſte entrepriſe. Hé bien madame (luy reſpondiſt-il) ie ſeray preſt quand il vous plaira & quand il faudroit aller iuſques aux enfers par voſtre commandement i'y deſcendray pour vous faire voir que ie prendray plaifir à vous obeir & nō pas à vous meſpriſer. Alors ceſſant de parler de ceſte matiere ils demeurèrent vne longue eſpace de temps ſans mot dire, don Clarazel ſe priſt à philoſopher ſur ceſte aduventure, & la duchefſe à mediter les moyens de ſe vanger de ſon meſpris & de ſa ſotize. Sa colere la fiſt reſoudre plus de cent fois à l'engager en telle affaire qu'il n'en fortiroit iamais avec la vie, & ſon amour luy fiſt rompre plus de cent fois ceſte reſolution trop cruelle:

Quand elle l'auoit regardé de trauers, elle addoucissoit ses yeux peu à peu, & le contemploit à demy rauie de l'excellence de sa beauté, & quand son ressentiment luy auoit fait dire qu'elle le deuoit chasser comme indigne de la possession d'un si grand tresor, l'esperance de le voir fieschir avec le temps la faisoit resoudre à la patience. En fin ayant repassé dans sa teste mille pensées fort differentes, elle conclud de le posséder avec artifice puis qu'elle ne le pouuoit acquerir par le merite de sa beauté, ny par les charmes de sa parole. Les moyens de venir à bout de son entreprise luy sembloient vn peu difficilles par ce qu'il falloit ranger à ses volontés vne humeur fort extrauagante & fort fascheuse à manier ; mais dequoy ne s'aduise vn amant pour iouir du contentement qu'il espere ? Son esprit luy fournist

vne inuention du tout admirable, & la tromperie qu'elle fist à ce cheualier fust conduite si finement qu'ayant obtenu sans difficulté ce qu'elle auoit desiré avec tant d'ardeur & de passion, ie puis dire qu'elle fist vn tour de souplesse qui n'estoit iamais tombé dans la pée de quelqu'autre femme. Nous vous descrirons ceste farce apres que nous aurons parlé dans le chapitre qui suit de la comedie qui faisoit aller vne si bonne compagnie à Chaalons, laquelle piece sera des meilleures & des plus crotiques du monde.

Les estranges extrauagances que fist nostre hypocondriaque dans la representation du rauissement de Proserpine : Prudence du conte d'Oran pour empescher le desordre qui pouuoit arriuer de tant de boutades : Gentil trait d'esprit des comediens pour faire vne farce aux despens de ce malheureux : Et quelle fust la resolution de la duchesse d'Arcail touchant son amour.

CHAPITRE X.

 A maison du marquis d'Ar-
tigny n'estant qu'à deux
petites lieuës de la ville tou-
te ceste compagnie arriua fort facile-
ment auant le temps ordonné pour le
commencement de la comedie, de
sorte que chacun eust la liberte de

chercher sa place apres que la duchesse d'Arcail, le conte d'Oran, le marquis d'Artigny, le Baron d'Alcret, nostre cheualier hypocondriaque, la marquise de Brandamont, la vicontesse de Palemon & Clarizee dame des forests dangereuses eurent pris leurs sieges aux places les plus honorables & commodes. Tous ces seigneurs s'estans entretenus de mille discours agreables pendant quelque espace de temps, on vist en fin parestre sur le theatre les comediens vestus fort magnifiquement, & tenans en leurs mains des violes, surquoy nostre extrauagant approchant sa bouche de l'oreille de la marquise de Brandamont il luy dit. Madame ne me croyez iamais si vous n'allez voir tantost des miracles; Tous ces cheualiers & ces dames qui tiennent des luths en leurs mains vont sans doute

celebrer quelque sacrifice d'amour, & si ie ne me trompe vous pourrez voir les ceremonies avec lesquelles don Falanges d'Astre faisoit offrir de l'encens & des odeurs aromatiques à la statuë de la princesse Alastraxeree qu'il estimoit fille du dieu Mars. Certes (respondist la marquise) cheualier ie ne suis pas de vostre opinion, ce concert de musique me feroit bien plustost penser que ce fust Amadis de Gaule, Esplaudian, don Galaor, Florestan, Agrayes & les autres, lesquels estans deliurés de l'enchantement qu'Vrgande auoit fait sur eux pour les conseruer dans le palais d'Apolidon, arriueroyent deuant la ville de Constantinople dans la grande caraque dôt les singes d'Vrgande estoiet les pilotes. Hé bien bien madame (luy replicquat-il) ceste pensee ne vaut gueres moins que la mienne. Quoy

que c'en soit vous verrez tousiours
des miracles, car la presence de tant de
cheualiers excellens nous doit tous ra-
uir s'ils arriuent comme vous croyez,
& si ces gens sont assembles pour ado-
rer Alastraxeree comme ie le iuge,
n'aurons nous pas sujet d'admirer la
puissance d'amour dans les actions
& les plaintes du prince Falanges? A
ces mots voyant que la musique
estant cessee les acteurs commençoiet
la piece, ils cesserent de parler pour
leur donner l'oreille & les yeux, ce
qui se fist vne assez longue espace de
temps avec vne attention merueil-
leuse: mais comme on fust sur le point
que Pluton se saisist de sa Proserpine
& qu'elle se prist à crier,

O dieux! au secours, on me force.

Nostre extrauagant se leua furieu-
sement, mist la main sur la garde de
son espee, & poussant sa chaire avec

le pied. Iamais dieu ne me soit en ay-
de (dit-il) si ie souffre ceste lascheté,
l'ordre de cheualerie estant instituee
pour des choses pareilles, il faut que
ce meschant rauisseur me rende conte
de son action, attens, attens maudit
gean (continuat-il parlant à celuy qui
faisoit Pluton) ta fuitte ne te seruira
pas de beaucoup, & quand ie te de-
uerois suiure jusques aux extremités de
la terre tu rendras ce butin trop riche
pour toy. A ces mots s'auançant brus-
quement contre le theatre avec l'es-
pee à la main, il mist toute la compa-
gnie en vne estrange confusion, les
comediens coururent aux armes pour
se deffendre au cas qu'ils fussent atta-
qués, le bourgeois commença de gai-
gner la porte à la fuitte, craignant
qu'en ceste grande esmeute il ne sen-
tist quelques coups d'espees tomber
sur sa teste ou sur ses espaulles, & les
dames

dames qui palmoient de rire s'estans toutes mises à l'entour de luy menoient vn tel bruit que l'on n'eust pas ouy cent coups de canon, de sorte que l'on ne vist iamais vn si grand desordre pour si peu de chose. Le marquis d'Artigny voyant que l'empeschement que ces femmes luy donnoient estoit plus propre à l'irriter qu'à l'adoucir, & qu'en les poussant avec violence il s'approchoit tousiours du theatre, le prist en fin par le bras & luy dit. Mon grand amy reueuez à vous ie vous prie, & confidez que tout ce qui se fait est vne histoire que l'on represente pour nous donner quelque passe-temps. Comment sire (luy respondist-il avec vne action toute furieuse) appelez vous passe-temps de voir forcer en vostre presence vne fille qui crie au secours ? Sur mon ame vous me par-

donnerez s'il vous plaist, ie m'estonne que vous ne fassiez chastier ce voleur pour donner exemple à ceux qui voudroient commettre de pareilles meschancetés, quant à moy ie mourray plustost que de le souffrir, & si vous m'empeschez d'en prendre vengeance i'auray tres-iuste subiet de dire par tout où ie me trouueray cy apres que vous ne gardez pas la iustice à vos subjets. Ce disant il se desmesla de ses mains assés brusquemēt, & se ietta sur le theatre avec vne disposition si gaillarde qu'il fist estonner beaucoup de personnes qui ne le pensoient pas si dispos, surquoy l'on alloit voir vn terrible eschec si le conte d'Oran estant monté promptement d'un autre costé n'eust empesché les comedians lesquels auoient tous l'espee à la main par ceste remonstrance qu'il leur fist. Messieurs (leur dist-il) donnez

vous bien garde de rendre aucun de-
plaisir à ce gentilhomme, car nous
interessans tous au mal qu'il auroit
vostre corps ne peseroit pas vne once
au bout d'un cart d'heure, mais pre-
nez comme nous le plaisir de luy voir
faire ses extrauagances; ie vous aduer-
tis qu'il est fort mallade d'esprit, qu'il
croit tout ce qu'il a leu dans les Ama-
dis, qu'il s'imagine qu'il est cheualier
& que la colere où il est ne prouient
que de l'opinion qu'il a eue qu'un
gean rauissoit ceste femme pour la
forcer: vous estes gens d'esprit aydez
nous à rire & satisfaittes à la passion
qui l'emporte. Bien bien monsieur
(dit alors celuy lequel representoit
Pluton) puis que nous cognoissons
son mal nous le scaurons bien traiter
comme il faut, laissez moy faire seule-
ment: Alors s'auançant l'espee à la
main il dist à don Clarazel que le mar-

quis d'Artigny tenoit par le bras. He bien cheualier que demandez vous? Je veux (luy respondist-il) que tu repares le tort que tu as fait à ceste damoiselle que tu as rauie ou que tu te disposes au combat : Au combat (reprist le comedien) pauure malheureux ie croy que tu refuses? Ne consideres tu pas qu'il en faudroit cinquante douzaines plus vaillans que toy pour me donner vn peu d'exercice? Retire toy petit morpion, & va toy vanter hautement de n'estre point mort par mon seul regard. Grosse beste (luy dit Clarazel) si tu m'eusses respondu plus courtoisemēt tu m'eusses fait peur, car ie t'eusse estimé vaillant, mais ton arrogance m'asseure, & ie tiens ma victoire toute certaine, va prendre tes armes, les miennes seront en moins d'vn moment sur mon dos, ou bien demessans ceste af-

faire avec l'espee seule puis que nous nous treuons en cet equipage. Sur mon ame (luy replicqua le comedien) ie n'eusse pas creu qu'un si petit homme eust eu le courage si grand, voila pourquoy nous demeurerons bons amis s'il te plaist, à condition que ie rendray la damoiselle que tu demandes. Fais la donc venir (reprist Clara-zel) si tu n'as point fait d'effort à sa chasteté nous sommes d'accord: Alors la damoiselle qui faisoit Proserpine s'estant presentee il luy dit. Madame, vos plaintes m'ont tantost touché si sensiblement que pour vous guarantir de la force que ce grand geant pouuoit faire à vos volontés ie l'ay deffié au combat, mais il se repent & promet de ne vous outrager de sa vie, luy pardonnez vous? Vaillant cheualier (luy respondist elle) si vous ne cognoissiez mieux que moy les admira-

bles effects del'amour, vous vous estonneriez de m'auoir ouï crier au secours il n'y a qu'un moment, & de m'entendre dire maintenant que ie suis contente de l'affection que ce grand cheualier me porte : Ie me voyois enleuer avec regret, ie louë à ceste heure la violence qu'il m'a faite, ie le regardois de trauers, ie le voy maintenant avec plaisir, ie tenois ses cheueux pour les arracher, ie m'en seruirois volontiers à ceste heure pour approcher ses leures des miennes, bref il faut que ie vous confesse que ma colere n'a iamais esté si grande que la ioye que i'ay de le caresser, vous ne luy demanderez donc rien sur ceste querelle au moins s'il vous plaist? Non madame (luy respondist-il) au contraire ie le seruiray pour l'amour de vous, & sçachant comme il faut excuser les fautes que nos passions nous

font faire, ie l'assisteray en ses entreprises amoureuses puis qu'il est question de vostre repos. Alors son ennemy luy tendant la main ils s'embrassèrent avec mille complimens, ce qu'estant fait les comediens le menerent derriere les toilles, luy firent apporter vne chaire au milieu de Pluton & de Proserpine, & faisans abatre vne toille qui cachoit vn enfer fort bien depeint le firent parestre assis sur le trosne qui deuoit seruir à Pluton. Ce fust alors que la risee fust renouvellee à bon escient, tous ceux qui s'en estoient fuy retournerent quand on les eust aduertis de toute l'affaire, & tout le monde discourant de ceste aduventure avec vn plaisir nompareil les comediens ne pouuoient obtenir silence pour paracheuer leur histoire. En fin voyant que l'on commençoit à se taire ils commencerent aussi à re-

prendre la piece par le mesme endroie
où la boutade de don Clarazel les
auoit contrains de la rompre; Mais
ils ne parlerent pas longuement : La
mere de Proserpine se presentant avec
des pleurs par lesquels elle tesmoi-
gnoit la douleur qu'elle ressentoit du
malheur qui estoit arriué à sa fille, ce
fou se leua derechef, & l'allant pren-
dre par le bras. Madame (luy dit-il)
ne souspirez plus, vostre fille n'est pas
malheureuse comme vous croyez,
voyez la ie vous prie en vn trosne di-
gne de son merite & de sa beauté. La
reyne d'Apolonie fut contrainte de
pardonner à Primaleon quand elle
vist sa fille Gridoine dans vn pareil
degré d'honneur, suiuez la prudence
de ceste femme & vous accommo-
dez au temps. Vrayement valeureux
chevalier (luy dit le comedien de fort
bonne grace) vostre conseil me sem-

ble si sainct & si bõ que ie suis resoluë
à le suiure en tout & par tout ; le mary
que ma fille a pris est sortable à sa qua-
lité, il est ie croy tout bon cheualier, ie
le veux aymer sans me souuenir de la
violence avec laquelle il en a pris la
possession, & pour vous tesmoigner
que ie parle sans artifice, allons ie vous
priedanser à leurs nopces : A ces mots
il le prist par la main, allerent tous
deux treuuer Proserpine, appellerent
Pluton & les autres, & se prirent tous
par les mains pour danser à la reserue
de celuy qui deuoit faire le barboüillé
lequel adressa ces parolles à la com-
pagnie. Messieurs il me semble que
vous ne deuez point souhaitter de
farce, car sur mon ame nous ne vous
en sçaurions donner vne qui vaille ce
branle. Ce disant il alla prendre ses
compagnons & se mist à sauter com-
me eux. Imaginez vous vn peu ie vous

prie si ceste action se peut acheuer sans plaisir ? Certes ce fust alors qu'il fal-
lust lascher le bouton, & que la plus
part de toutes ces dames mouïllerent
leurs chausses à force de rire, car tou-
tes & quantes fois qu'elles regar-
doient ce pauvre malheureux entre
cette troupe de comediens elles esclai-
roient en telle façon que tout le ieu de
paulme en retentissoit, & d'ailleurs le
bourgeois faisoit vn tel bruit que l'on
y venoit à la foule de tous les cartiers
de la ville. En fin ceste farce ayant
duré avec des rauïssemens incroyables
l'hypocôdriaque descendist du thea-
tre pour suiure à l'hostellerie le mar-
quis d'Artigny, le conte d'Oran, le
baron d'Alcret & toutes les dames
dont nous auons parlé cy dessus, par-
ce que la nuit approchant ils ne pou-
uoient se mettre en campagne sans
souffrir de tres-grandes incommodi-

tés. Si l'on s'estoit diuertý à la comedie on ne pleura pas toute la soiree si ce n'est à force de rire, car tous ces messieurs mettans nostre pauvre fou de moment en moment sur les liures d'Amadis de Gaule, du cheualier du soleil, de Palmerin d'Oliue, de Primaleon de Grece & de Palladien d'Aquilee il fist des contes si bouffons que personne ne vouloit parler de s'aller coucher quoy que la moitié de la nuict fust desia passée. Astralize duchesse d'Arcail fust la seule qui ne prist pas grand goust à tant de sottises, car l'aymant ardemment comme elle faisoit elle ne le pouuoit voir qu'avec regret dans ces termes extrauagans qu'il faisoient mespriser des lacquais & des marmitons: Neantmoins ne voulant pas descouurir son secret elle faisoit la meilleure mine du monde, elle rioit comme tous les autres &

sembloient mesmement chercher des inuentions pour le plonger tousiours plus auant dans ses fantaisies quoy qu'elle desirast des moyens couuerts pour l'esloigner de tant de personnes qui ne demandoient que des gorges chaudes pareilles pour passer le temps doucement. N'en treuuant point de plus cōmode que celuy qu'elle auoit proietté pour venir à bout de son entreprise amoureuse elle luy dit. He bien cheualier vous souuenez vous des promesses que vous m'auiez faites aujourd'huy? Ouy madame (luy respondist-il) commãdez, ie suis prest à faire ce qu'il vous plaira. Or fus (reprist elle) tenez vous donc prest à partir dès le point du iour pour aller à l'espreuue d'une aduanture qui vous remplira de contentement & de gloire, vn de mes valets de pied vous ira mener iusqu'au lieu & vous fera sça-

uoir apres le combat le reste de mes volontés. Alors appellant vn lacquay qu'elle auoit fort cogneu sage & discret. elle luy dist baslement à l'oreille qu'il partist à la porte ouurante pour conduire ce gentilhomme dans vne de ses maisons qu'elle luy nomma , qu'il deslogeast le lendemain pour le mener encor à vne autre, & qu'il ne manquast point de le rendre dans Arcaïl au troisieme iour comme les tenebres commenceroient à couvrir la terre. Ce lacquay ayant eu cet ordre avec vn commandement tout expres de tenir l'affaire secrette, elle retourna vers la compagnie avec vn visage ioyeux, ce qui faisant croire à tous ces seigneurs que c'estoit quelque nouveau dessein de passer le téps, ils prirent la marquise de Brandamôt avec la vicontesse de Palemon, & preuenans l'abord d'Alstralize de cinq ou

fix pas la supplierent courtoisement de ne les priuer pas du plaisir qu'elle vouloit tirer de don Clarazel. Ces parolles l'estonnerent merueilleusement à l'abord, car elle auoit fait estat d'estre seule pour n'auoir point tant de surueillans à ses actions, le moindre desquels estoit suffisant de renuerfer tous ses beaux desseins, mais ayant l'esprit fort present elle iugea que son estonnement la pourroit accuser de quelque malice, qu'elle donneroit de l'ombrage à tous ces seigneurs si elle refusoit de satisfaire à ceste priere, & par consequent elle conclud qu'il falloit forcer son courage. S'assurant d'oc de treuuer quelque autre artifice pour auoir ce qu'elle vouloit au cas que la princesse de ces messieurs ne luy permist pas de iouyr de son cheualier comme elle pensoit, elle leur respondist avec vn soufris: Sans


mentir voila qui est bon , Messieurs, pourquoy pensez vous que ie fasse ceste entreprise si ce n'est pour vous rendre le plaisir que i'ay receu par vostre moyen ? Laissons, laissons partir nostre fou demain le matin avec mon laquay, il le ramenera quand il sera temps, cependant ie donneray ordre à ce que i'ay proietté dans mon esprit sorte son effet: Si ie ne suis la plus fausse astrologue du monde nous aurons encor dequoy rire . Allons nous coucher seulemēt, demain nous parlerons du reste. A ces mots s'approchant de nostre hypocondriaque elle luy dit. Bon cheualier, ayant mis ordre à vostre despart il ne me reste plus rien à faire qu'à vous supplier de vous acquitter fidellement de vostre promesse. C'est vne aduventure dans laquelle il est question de vostre repos, ie pense que vous l'entrepren-

drezauec courage. Madame (luy respondist-il) ie vous ay promis de mourir plutost que de manquer à ceste entreprise, vous verrez en quelle estime i'ay l'honneur des commandemens que vous m'avez faits. Je prendray donc congé de vous avec vne priere tres-humble que vous me mettiez tousiours au rang de vos bons seruiteurs, & tout d'un mesme temps ie remercieray ces princes & ces cheualiers de l'honneur qu'ils m'ont fait dans leur beau palais. Ce disant il se baissa deuant le marquis d'Artigny qui l'embrassa, prist la main du conte d'Oran qui luy fist les mesmes caresses, fist quelques complimens au baró d'Alcret, à la marquise de Brandamont, à la vicontesse de Palemon, & s'humiliant derechef deuant Astralize luy baissa les mains malgré qu'elle en eust. Ainsi estant expedie on le mena dans
vne

une chābre où il se coucha tout chauffé & vestu sur vn liēt apres auoir commandé à Gandalec que ses cheuaux fussēt prêts dès le point du iour. Nous auons à dire des merueilles à l'autre chapitre qui traictera de l'aduenture à laquelle la duchesse d'Arcail l'en-uoioit, voila pourquoy prenons haleine & nous reposons.

Artifice admirable de la duchesse d'Arcail pour tromper nostre extrauagant, & le posseder sous le nom de sa Syluiane: L'estonnement de ce malheureux apres la cognoissance de ceste tromperie, & comme son dépit luy fist quitter ceste compagnie.

CHAPITRE XI.

 Endant que don Clarazel estoit en campagne pour aller cōbattre des mousches, Astralize estoit trauaillee par des inquietudes estranges, car desesperant de venir à bout de son entreprise par ce qu'elle voyoit tant de surueillans à ses actions, elle se mordoit quelque fois les doigts de depit & se reputoit malheureuse de n'auoir pas conduit ses desseins avec plus de prudence & de iugement. Tantost elle se resoluoit d'enuoyer au deuant de don Clarazel, de le faire venir à minuit & en iouir fort secrettement, mais se souuenant qu'il falloit tromper cet extraua-
gant par des artifices & faire voir quelques galanteries pour se desga-
ger honorablement de tous ceux qui

l'accompagnoient, elle perdoit tout incontinent ceste fantaisie & songeoit à d'autres moyès pour satisfaire à sa passion & au desir deses amis. En fin ayant fait mille & mille resolutions inutilles, elle s'arresta à vne pensée tref-digne de l'esprit d'une femme qui veult posseder ce qu'elle ayne & s'acquitter sans soupçon d'une promesse qu'elle auoit faite à des importuns. Elle emmena trois ou quatre ouuriers de Chaalons iusques dans Arcail, fist faire trois barrieres dans vne gallerie laquelle donnoit l'entree à vne des plus somptueuses chambres de tout son logis, ordonna que le conte d'Oran, le marquis d'Artigny, le baron d'Alcret & trois ou quatre gentilhommes seroient masqués pour deffendre l'abord des barrieres avec de longues perches de bois, qu'ils laisseroient forcer la premiere.

après l'auoir deffendue vne longue espace de temps, qu'ils courroient tous à la seconde pour y faire vne resistance pareille, que dans la plus grande ardeur du combat ils se ietteroient dans vne petite chambre laquelle estoit à la main gauche pour laisser passer l'hypocondriaque avec vne ferme croyance de donner fin à l'adventure par vn commencement tant heureux, & que la marquise de Brandamont, la vicontesse de Palemon & la dame des forets dangereuses seroient à la troisieme barriere avec neuf ou dix damoiselles, lesquelles l'environnant toutes en mesme temps s'efforceroient de l'abatre sur les carreaux. Vrayment madame (luy dit la marquise de Brandamont) vous me pardonnerez si ie dis que ceste ordonnance est vn peu cruelle pour nous, car nous porterôs peust estre lescoups

qu'il n'aura peu donner sur ces gétils-hommes ? Non non (replicqua la duchesse) ie vous respondray sur ma vie de tout le mal qu'il vous fera, voicy la raison : Estant preueni de ceste folle opinion qu'il seroit blasmable s'il faisoit quelques actions que les princes de Grece n'eussent iamais faites, il gardera le respect aux dames qu'il a veu que ces cheualiers leur gar-doient, & pour mourir il ne songera pas à vous faire outrage. Madame (luy dit la vicontesse de Palemon) vos raisons me semblent fort bonnes, & ie veux croire qu'il en arriuera tout ainsi que vous l'auez dit, mais pardonnez moy s'il vous plaist si ie vous demande deux choses qui regardent vn peu ceste affaire ; Quel est l'obiet de tant de desseins, & s'il n'y a point de danger pour nous de nous exposer à la colere de ce fou, pourquoy ne vous

mettez vous point avec nous pour
côduire la barque côme il vous plaira.
Ah ha (respondist la duchesse en riant)
madame c'est là où est le secret de toute
l'affaire : Vous n'auriez pas vn plaisir
parfait si ie vous le descouvrois
maintenant, croyez seulement que
ie ne fais pas tant de beaux projets
pour en demeurer sur ces termes, &
que nous ne verrons jamais la fin de
toutes ces choses qu'avec vn plaisir
incroyable. Quant à moy ne vous
imaginez point que ie ne fusse la pre-
miere à mettre les mains au collet de
ce chevalier si ie ne seruois point ail-
leurs ; le seray dans la chambre avec
Solize & ma Morisque qui seruira de
fondement à mes artifices, mais pre-
nez garde ie vous prie au moment
que ie mettray la main hors la porte
pour le faire entrer dans la chambre,
& le laissez tout au mesme temps, il se

souuiendra qu'Amadis de Gaule fust pris par vne main qui le tira iusques dans la chambre deffendue du beau palais d'Apolidon, & par consequent il croira tout ce que ie luy voudray faire croire. Nous voila satisfaittes en quelque façon (dit la vicontesse) madame faites comme vous le iugerez pour le mieux, nous nous acquitterons courageusement de nostre debuoir. Ainsi toute l'affaire estât resoluë la duchesse fist planter vn posteau au pied de l'escallier par lequel on alloit à la gallerie, & y fist attacher vne table sur laquelle ces parolles estoient escrites.

PROPHETIE.

QVand le Lyon desesperé s'approchera de ce beau palais où la belle proye qu'il a desirée est maintenant endormie par les charmes de la

sage reyne de l'isle d'Argennes, il fera des rugissemens tant espouuantables qu'elle s'esueillera tout incontinent pour sa gloire, car couppant les ongles cruels avec lesquels elle luy a deschiré le cœur, elle n'aura plus que des mouuemens d'amour pour reparrer le mal qu'elle a fait.

Toutes choses estans donc disposees avec l'ordre qu'elle vouloit, elle s'enferma vn soir dans son cabinet avec sa femme de chambre qu'on nommoit Solize, & vne morisque qu'elle nourrissoit il y auoit troisans où sans leur demander des sermens pour les obliger au silence elle leur dist: Mes amies ayant à communiquer vn secret de grande importâce à quelques vns de mes seruiteurs ie vous ay toutes deux choisies comme les plus secrettes & les plus aduisees de celles qui sont ceans sous l'assurance que

i'ay prise que vous mourriez plustost mille fois que de descourir ce que vous verrez. Je ne sçay sous quel astre i'ay veu ce pauvre gentilhomme qui fait de grandes extrauagances quand on le met sur quelques liures qu'il a leus en vn mauuais temps, mais il faut que ie vous aduouë n'auoir iamais rien aymé à l'esgal de ce que ie l'ayme par ce qu'il me semble le plus accompli caualier qui soit sur la terre, si ie reserue ceste follie qui ne le tient qu'à certaines heures, voila pourquoy ie diray que i'en desire la iouyssance avec vne passion peu commune. Vous vous regardez toutes deux comme si ce discours vous auoit troublees, & ie iuge à vos contenance que vous me représenteriez volontiers le mal qui me peult arriuer de ceste entreprise? Mais mes amies ne le faites point, vous trauailleriez inutilement, vne

ame preoccuppee de ces passions violentes ne reçoit pas bien les considerations qu'on luy donne, elle demande du soulagement & point de raisons, & les moindres parolles qu'on dist pour s'opposer à ces desirs enragés qui la sollicitét luy donnent plus de mouuemens qu'elles n'en esteignent, de sorte que vous vous deuez resoudre à me seruir selon mon humeur sans perdre le temps à chercher quelques remonstrances qui seroient sans fruit. La chose vous semble vn peu hazardeuse & peult estre bien difficile ? Mes amies elle ne l'est pas, mon honneur ne sera point du tout en danger, vous ne courrez point de fortune & ie me promets de conduire l'affaire si finement que ie tromperay tous ces clair-voyans par vn artifice admirable que ie vous communiqueray tout à ceste heure, que craindrez

vous donc? Rien madame (respondit Solize) puis qu'il est question de vostre repos, pour le moins ie feray de mon costé tout ce que vous trouuerez bon de me cōmander; Et moy (pour suiuiſt la Morisque) ie me feray pluſtoſt tailler en mille morceaux que de vous faillir au beſoin; Madame, faites nous nostre leçon quand il vous plaira ie mettray ſi bien la mienne en ma teſte que ie n'en oublieraſ pas vn ſeul mot. Alors la duchefſe les ayant toutes deux embrassees avec promeſſe d'une recompense eſgalle au ſeruiſſe qu'elles luy rendroient, elle les inſtruiſiſt amplement de tout ce qu'elle auoit à faire, & ſ'en allant coucher avec vn repos d'eſprit qu'elle n'auoit pas depuis quatre iours remiſt le ſuccès de toute l'affaire à la nuit ſuiuante que don Clarazel deuoit arriuer. Ses inquietudes ne luy permettant

pas le repos qu'elle pensoit prendre, elle fist mille & mille tours dans son liēt parmy lesquels se souuenant tousiours de son aduenture elle fist de nouueaux desseins pour la rendre plus accomplie & de meilleur goust: Elle se leua comme le soleil commençoit à dorer ses vitres, fist accōmoder quelques aïx en forme de trosne dans la chambre où elle esperoit d'auoir la recompense de ses trauaux, fist mettre dessus deux fort belles chaires, commanda que l'on mist vne arcade de lierre à l'entree de la gallerie avec ceste inscription qui paroissoit en grosses lettres: C'EST ICY LE PALAIS DE LA GLOIRE DE SYLVIANE, & de peur que cet insensé ne fist quelque mal elle eust soing de luy faire faire vne fort belle espee de bois d'vne façon toute extraordinaire laquelle elle luy fist presenter à la vieille

mode comme nous vous dirons tantost. Toutes ces choses estans dans l'ordre qu'elle les vouloit elle s'en alla soupper fort gaillardement avec tous ces seigneurs & toutes ces dames lesquelles s'entretenans tousiours aux despens du pauvre bon homme souhaittoient merueilleusement son retour quand on leur vint dire qu'il arriuoit avec le laquay qui l'auoit conduit. A ceste nouuelle tout le monde quitta la table & chacun commença de courir aux fenestres avec vn desir de le voir, mais la duchesse qui ne vouloit point manquer à son conte les pria tous de ne point parestre, enuoya vne damoiselle pour le conduire dans vne chambre, & commanda qu'on luy fist porter à soupper. Pendant qu'il deuoroit les viâdes elle disposoit toutes choses comme elle l'auoit projecté, elle fist passer à la gal-

lerie le conte d'Oran, le marquis & les autres, les mist dans la place qu'ils deuoient auoir, rangea les dames entre les troiziemes barrieres, & la chambre avec nouvelles instructions de tout ce qu'elles deuoient faire, & s'entretenant de mille discours agreables avec les vns & les autres attendist le temps que ce cheualier fust au liect. Si tost qu'elle en fust aduertie elle fist mettre des chandelles allumees sur toutes les fenestres de son chasteau, enuoya deux gros flambeaux aupres du pilier auquel la prophetie cy dessus escrite estoit attachee, en fist porter deux autres à l'entree de la galerie, & fist tirer dix ou douze coups de mousquets presqu'en mesme téps, s'imaginans que l'hypocondriaque sortiroit sous esperance de quelqu'adventure. En effect il ne manqua point, ce bruit qui fust espouuenta-

ble l'ayant mis en ceruelle tout aussi tost qu'il l'eust ouy, il se ietta promptement à bas de son liect, ouurist les fenestres & voyant la maison toute en feux s'imagina qu'il voyoit vn pareil enchantement qu'Amadis de Grece surnommé le cheualier de l'ardente espee deffist en l'isle d'Argennes quand il deliura l'empereur de Trebisonde, Lisuard de Grece qui estoit son pere, Perion de Gaule & le gentil Olorius prince d'Espagne lesquels y auoient esté enchantes par Zirfec comme vous auez veu dans le septiesme d'Amadis de Gaule. Courant d'oc à la garderobe où son escuyer ne faisoit quasi que d'entrer pour aller dormir il luy eseria. Sus sus Gandalec donne moy mes armes, voicy sans doute ceste aduventure dans la fin de laquelle les destins m'ont promis du repos; Regarde tout ce superbe pa-

lais en feu, c'est à dire qu'il y a de tres-grands secrets. A ces mots Gandalec, lequel sçauoit bien vne partie des desseins de ceste aduenture, s'auançant iusques aux fenestres fist semblant de s'esmerueiller des choses estranges qui se presentoient à ses yeux, apporta promptement sa cuirasse, son casque & son escu, & le voyant prest à marcher luy mist son espee au costé. Son impatience ne luy permettant pas de songer au reste des pieces de son harnois il descédist à la cour en cet equipage où tout au mesme temps vne gentille damoiselle paroissant avec l'espee de bois que la duchesse auoit fait faire luy dit apres deux ou trois reuerences: Vaillant guerrier quelques magiciens qui vous aiment & vous estiment, sçachans bien l'importance de l'aduenture que vous allez maintenant esprouuer, m'ont commandé

mandé de vous presenter ceste espee
sans laquelle vous ne viédriez iamais
à bout d'une entreprise si dangereuse.
Mademoiselle (luy respondist-il) ce
n'est pas la premiere faueur que i'ay
receuë de ces bons sages qui vous en-
uoyent, vous les remercerez de ma
part & les assurez qu'en recompen-
se ils pourront disposer de moy quād
il leur plaira. Alors regardant le pom-
meau de ceste espee lequel estoit ri-
chement esmaillé avec de la peinture
il l'estima tant qu'appellant Ganda-
lec pour luy donner son espee il mist
cette piece de bois au costé, & conti-
nuant son chemin s'en alla tout droit
au perron par ce qu'il y voyoit deux
flambeaux, & qu'il creut qu'il y ap-
prendroit quelque chose du secret de
cette aduventure. Son opinion ne le
trompa point, regardant par tout
curieusement il descouurist la pro-

phetic que nous auons cy dessus escripte, & la leut depuis l'un des bouts iusqu'à l'autre : sus quoy s'escriant sans refuer long temps. Sur mon ame (dit il) ie ne pense pas que ceste prophetie n'ait esté faite pour moy il y a plus de quatre cens ans, car quand ie considere ses termes & l'estat où ie suis reduit, ie treuve vne grande correspondance de ses pensees à ma vie. Premièrement, ce Lyon desesperé duquel elle parle ne peult estre signifié que par moy qui n'espere rien par la cruauté de ma Syluiane laquelle est asseurement enchantée en ce beau palais où la sage princesse d'Argennes la punit pour luy faire perdre la memoire des resolutions cruelles qu'elle auoit prises contre moy & la disposer apres à m'aymer. Par les rugissemens estranges que ce Lyon doit faire icy, ie doy entendre les faits d'armes incroyables que i'exe-

cuteray en ceste entreprise par lesquels ie retirera y ceste ingrante beauté de l'enchantemēt merueilleux où elle est pour mon repos lequel est entendu par ce mot de gloire : Quant au reste *Elle couppera ses ongles cruels avec lesquels elle luy a deschiré le cœur, & n'aura plus que des mouuemens d'amour pour reparer le mal qu'elle a fait*, qui ne l'explicquera fort facilement, & qui ne cognoistra que la prophetie veut dire qu'elle addoucira sa rigueur par laquelle ellem'a fait mille fois desesperer de ma vie, & que me donnant place en son cœur elle se repentira de m'auoir traitté de la sorte? Certes voila le sens litteral de ces parolles tant obscures, & ie commence d'esperer plus de bien que ie n'ay iamais souffert de miseres. O amour donne ceste douce recompense à tant de trauaux! O madame, changez vostre cœur

pour me faire changer de vie ! Vous estes enchantee en ce beau palais ie vay vous affranchir de ces charmes qui vous retiennent, ou mourir en ceste entreprise. A ces mots s'auancant courageusement vers le grand escalier il alloit mettre les pieds dessus quand il vist paroistre deux gentilshommes qui vindrent à droit & à gauche le pot en teste, la rondache dessus le bras & l'espee au poing, lesquels faisans semblant de l'aborder avec furie luy crièrent tous deux presqu'en mesme tēps : Arreste cheualier insolent, arreste, ceste aduēture n'est reseruee qu'au premier cheualier du monde. Par dieu (leur respondist il avec vn accent de colere) ie ne sçay si ie doy prendre la vanité de croire que ie suis celuy duquel vous parlez, mais quoy que c'en soit ie ne differeray point l'esprouue de ceste aduventure par aucune crainte

que i'aye de vous. Ces parolles estans encor quasi sur ses leures, ces deux gentilshommes qui tenoient chacun vne boete le chargerent avec tant de grace & si brusquement qu'il s'estonna ne sçachant auquel il deuoit repondre, mais se resoluans en moins d'un moment il presenta le bras de l'escu à celuy qui estoit à gauche, & commença de presser l'autre si viuement qu'il luy donna cinq ou six grands coups tout de suite sur sa rondache. Ces messieurs ayans concerté ce qu'ils deuoient faire celuy qui se voyoit poursuiuy se laissa tomber sur la terre comme s'il eust succombé à la furie d'un coup dangereux qu'il auoit receu sur la teste, sur quoy nostre extrauagant qui le croyoit mort tournant teste à l'autre continua son escrime par l'espace d'un bon cart d'heure avec vne telle furie qu'il le contraignist à se

laisser aussi tomber à la renuerse. Ce commencement heureux luy faisant donc esperer vne fin pareille il monta les degrés sans empeschement, & paruint iusques à la porte de la gallerie sur laquelle voyàs estoit en grosses lettres C'EST ICY LE PALAIS DE LA GLOIRE DE SYLVIANE, il se troubla en telle facon que pour ne tomber point sur la terre il fust contraint de s'appuyer contre la muraille. Son estonnement se passant avec le temps il leut derechef ces parolles lesquelles luy faisant croire que tout ce qu'il s'estoit imaginé de la prophetie estoit veritable, il s'escria trois ou quatre fois. O madame, est il bien possible que le ciel me soit amy iusques à ce point que de vous donner pour moy d'autres mouuemens que ceux qui ont fait naistre mon desespoir & ma misere! O sage princesse d'Argennes

quelle obligation n'ay ie point à vostre bonté par laquelle mes maux vont cesser? Certes vous meritez beaucoup de loüanges, aussi ie les publieray par toute la terre, & le bien que vous me faictes aujourdhuy ne se pouuant payer que par des seruices infinis ie vous en rendray de si grands tant que ie viuray que vous n'aurez iamais subiet de vous plaindre de mon ingratitude: Mais dittes moy sage princesse pourquoy vo⁹ auez mis Syluiane dans vne gloire pareille à celle de l'incomparable Nicquee plutost que dás vn enfer aussi triste que celuy du malheureux Anastarax, car il me semble que la rigueur meritoit mieux des supplices que des triomphes, & des chastimens que des felicités si grandes? Ah! ie cognoy vostre mouuemét, vous auez considéré le merite de sa beauté plutost que ma peyne, & par conse-

quent vous auez pris plaisir à la mettre en vn lieu de gloire sans vous soucier des afflictions que sa cruauté m'a données ? Sans mentir vous auez raison, elle estoit digne de cet honneur, & moy des maux que i'ay soufferts, voila pourquoy ie ne vous querelleray iamais de l'aduantage que vous luy donnez puis que le tout doit succeder à mon proffit & à mon honneur selon que vous l'avez predit dans vos propheties. Il n'est donc plus question de me plaindre, mais de sçauoir si iela doy retirer de ce lieu si plein de delices ou m'y confiner avec' elle ? Amour vous me conseilerez s'il vous plaist sur ceste matiere & me conduirez à bon port afin que ie ne me disparte iamais de l'obeissance que ie vous ay renduë iusqu'icy. Ce disant il donna du pied contre la porte de la gallerie laquelle n'estant qu'à demy

fermee s'ouurist pour le laisser entrer sans difficulté. L'extreme desir qu'il auoit de voir Syluiane, ne luy ayant pas permis d'arrester ses yeux sur des peintures excellentes qui embellissoient ceste gallerie, il s'auançoit si transporté qu'il ne voyoit pas les barrieres qui luy deffendoient le passage quand il ouit vne confusion de voix lesquelles crioïent toutes: Arreste cheualier malheureux, arreste, autrement tu sentiras le bout de nos picques. A ces mots se resueillant comme en sursaut, il s'estonna d'abord de voir le conte d'Oran, le marquis d'Artigny, & le baron d'Alcret assistés de dix ou douze autres lesquels commençoient à luy presenter le bout de leurs perches: Mais la memoire de Syluiane te rendant si courageux qu'il eust mesprisé des armées, il fist si peu d'estat de tant d'ennemis qu'apres auoir encor

dist. O madame donnez moy maintenant secours puis qu'il est question de vostre salut, il baissa la teste & se poussa si furieusement contre eux qu'il leur eust passé sur le ventre, si les barrieres ne l'eussent empesché: Estant donc contraint d'arrester, ces messieurs luy donnerent tant de coups de perches qu'ils l'enuoyerent sur les carreaux porter les espaules & la teste, ce qui le mettant iusques dans l'excès de la rage, il se releua fort legerement, & pensant couper tous ces grands bastons qui romboient à chaque moment sur son casque, il mist les deux mains sur sa riche espee de bois, & la porta sur ces perches cinq ou six fois auec vne telle furie qu'il la mist en pieces. Ce fust alors qu'il desespera de l'honneur de ceste entreprise, car n'ayant plus d'armes offensives & sentant vne gresle de coups qui pleuuoient

tousiours sur son corps, il pensoit bié qu'il seroit à la fin contraint de s'en retourner sans rien faire : Toutefois se souuenant que Syluiane estoit le prix de tant de trauaux, il s'estonna moins, il prist vn courage nouveau, ietta le pommeau de son espee à la teste de ses ennemis, laissa tomber sa rondache sur les carreaux, & saisissant vne des perches avec lesquelles on l'assommoit fist vn tel effort pour l'auoir, que l'arrachant des mains de celuy qui le manioit, il alla donner du cul contre terre à six pas delà. Cette cheute qui fist rire extraordinairement tous les assistans, l'ayant plustost irrité que de l'estonner, il se releua brusquement & courant tout droit aux barrieres frappa si furieusement à droit & à gauche qu'ayant donné trois grands coups de perche sur les espauls & sur la teste de quelques vns ils lascherent

le pied tous ensemble, & se ietterent dans la chambre qui leur deuoit seruir de retraite au lieu de deffendre la seconde barriere comme il auoit esté resolu, chacun craignant avec raison de tomber sous la main de cet insensé lequel pensant auoir des geans furieux en teste frapport comme vn sourd. La fuitte de ces gentilshômes fist vne merueilleuse peur à toutes les dames lesquelles estoient vestuës en bergeres afin de n'estre point recogneuës, entre les troisiemes barrieres & la chambre: Neantmoins s'asseurant vn peu elles le laisserent entrer avec ces parolles que la vicontesse de Palemon luy dit. Braues guerriers puis que la force de nos cheualiers n'a pas esté suffisante pour vous empescher de venir icy, nous voulons voir si vous ferez plustost vaincu par nos charmes que par leurs espees? Delacez s'il vous plaist

vostre casque & vous reposez avec nous? Belles bergeres (leur repondist-il) vous ne deuez point mettre en doute que vostre pouuoir ne soit bien plus grand que celuy de vos cheualiers, & que ie ne sois plus sensible aux traits de vos yeux qu'au tranchant de leurs coutelas, mais vous me pardonneriez s'il vous plaist si ie n'oste point mon heaulme à vostre priere: Il me souuient que don Sylues de la Selue estant descendu dans la grotte infernale par laquelle il falloit passer pour aller deliurer tous les princes de Grece enchantés, ne se voulust iamais decouurir apres mille & mille prieres qui luy furent faictes par des damoisselles qui se transformerent en serpens, par ce que s'il eust quitté son casque il n'eust iamais mis fin à ceste nopareille aduenture qui le fait viure glorieux au siecle où nous sommes.

Comment (luy dit la marquise de Brandamont) ferez vous si mal gracieux que de refuser quelque chose à ceste princesse la plus belle qui soit au iourd'huy sur la terre ? ie ne luy refuse rien ny à vous aussi (luy respondist-il) que ce que la raison me deffend de vous octroyer, demandez moy quelque'autre chose vous l'obtiendrez plus facilement. Non nō (dit la vicontesse de Palemon) nous vous voulons voir sans heaulme, & parce que vous ne vous estes pas voulu descouurir à nostre priere nous serons satisfaittes en depit de vous. Ce disant elles luy sauterent au collet, aux bras, & aux iambes, & commencerent à le persecuter en telle façon qu'il ne fust iamais en si grande peine, car de les frapper il n'osoit par ce qu'il les estimoit damoisselles, & qu'il craignoit de contreuenir à l'ordre de cheualerie de se laisser

forcer, il ne pensoit pas aussi qu'il fust à propos de le faire pour ne perdre point la gloire de ceste aduventure. Enfin voulât vaincre sans respâdre le sang de ces femmes, il se secoüa de telle furie qu'il en enuoya cinq ou six les pieds contremont, contraignant toutes les autres à se retirer, sur lesquelles entrefaittes la duchesse d'Arcail auançant la main hors la porte le prist par les courroyes de son casque, & le tira facilement, parce qu'ayant veu la main qu'il croyoit estre celle de Syluiane, il ne fist point de resistance non plus qu'Amadis auoit fait quand il fust tiré dans la chambre deffenduë par vne main que les historiens de ce temps passé asseuroient estre celle d'Apolidon ou de Grimanese. Il fust vn peu surpris au commencement par ce qu'il entroit en vn lieu auquel il n'y auoit aucune clarré, neantmoins tenant la

main de la duchesse il s'assura & luy dit. Madame au nom de dieu dittes moy qui vous estes & ce que vous faictes en ce lieu que l'obscurité rend horrible ? Ah mon amy (luy respondit elle) sans mentir vous avez raison de ne cognoistre pas vostre Syluiane, & de la mespriser maintenant puis qu'elle a quelquefois mesprisé vos affections & vostre seruice : Sçachez que ie seray tousiours enuelpée dans les horreurs de ceste nuit, iusques à ce que i'aye satisfait à tant de trauaux que vous avez soufferts par ma cruauté, auquel moment vous verrez ceste riche chambre aussi claire que le soleil, & moy dans vne gloire si grande que ie ne porteray point d'enuie aux anges. O dieux (dit-il) est-il bien possible que ie sois heureux iusques à ce poinct ? Ah madame pardonnez moy ie vous supplie, ie deuois
verita-

veritablement vous cognoistre par-
my ces tenebres, & vous auriez main-
tenant raison de renoueller les ri-
guez avec lesquelles vous m'avez
fait mourir mille fois le iour, mais
madame ne le faites pas, & vous con-
tentez ie repareray ceste faute par tant
de deuoirs que vous ne vous en sou-
uiendrez iamais que pour concevoir
vn nouveau desir de m'aymer. Ce di-
sant il ietta son casque par terre, mist
sa cuirasse sur les carreaux, & repre-
nant Astralize laquelle s'estoit assise
sur le pied d'un liēt commença de la
caresser avec tant d'ardeur que les pre-
miers embrassemens n'ayans peu suf-
fire à sa passion il les redoubla tout in-
continent avec des rauissemens in-
croyables qu'il donnoit & qu'il rece-
uoit. Ceste premiere fureur estant
appaïsee il la voulust serrer contre luy
pour luy faire le discours de ses ad-

uentures & de ses miseres attendant vn troisieme effort, mais elle qui auoit son paquet, & qui craignoit qu'une plus longue espace de temps ne fist soupçonner ce qui se passoit, elle l'interrompist aux deux premiers mots, luy dit qu'elle alloit monter à sa gloire, & laissant la morisque dans vne des chaires du trosne sortist avec Solize par vn escalier desrobé pour s'en aller treuver toute la compagnie laquelle enrageoit d'enuie d'entrer dans la chambre pour sçauoir ce qui s'y passoit. Si tost qu'elle fust dans la galerie toutes ces dames l'environnerent, & luy demanderent ce qu'elle auoit fait de l'extrauagant, à quoy respondant avec vn soufrire & sans s'estonner : Venez, venez (dist-elle) ie vous en vay rendre bon conte, & ie puisse mourir si nous n'allons rire à bon escient ? Alors faisant prendre six

gros flambeaux à quelques pages, & commanda qu'on ouurist les portes s'imaginant bien qu'elle ne manqueroit point de treuver le cheualier pres de la morisque : En effet il estoit assis dans vne des chaires par le moyen que ie vous vay dire. Les embrassemens d'Astralize luy ayans refueillé l'appetit, il se treuua merueilleusement ennuyé si tost qu'il fut hors de ses mains, de sorte que ne se pouuant taire il dist assez hautement ces parolles. Hé quoy madame pouuez vous bien demeurer sans moy maintenant ? Sans mentir ie languis desia plus cruellement que ie ne puis dire. Ne vous pleignez point cher amy (respondist alors la morisque) l'impatience qui vous fait tant de mal me traueille aussi bien que vous, & mon amour n'estant pas moindre que la vostre vous deuez croire que mon deplaisir

n'est pas moins puissant que celuy qui vous fait languir, voila pourquoy ne pouuant sortir de ce trosne sans vostre assistance ie vous supplieray d'y monter : Les tenebres sont vn peu grandes, il n'y a remede, ma voix vous seruira de guide. O madame (dit-il) ie vous prie ne me parlez plus de tenebres, vos yeux ont assés de lumiere pour esclairer toute ceste chambre & pour me guider : Alors montant sans beaucoup de difficultés il s'approcha d'elle, la baïsa trois ou quatre fois avec tant d'ardeur qu'il l'eust renuersé de l'autre costé si la muraille ne l'eust soustenue, & se mist tout incontinent apres dans l'autre chaire par le commandement qu'elle luy en fist. Son esprit estant transporté de plaisir il luy prist les mains & les approchant de ses leures avec quelques souspirs quel'excés de sa ioye faisoit sortir, il

commençoit à luy faire le discours des peynes qu'il auoit souffertes lors qu'il vist entrer les flambeaux qui marchoient deuant la duchesse d'Arcail, la marquise de Brandamont, le conte d'Oran, le marquis d'Artigny & toute leur suite. L'obiet de tant de personnes qu'il cognoissoit l'estonna du commencement, toutefois il se mist sur sa bonne mine & demeura quelque espace de temps dans la chaire sans se remuer comme s'il eust pris plaisir qu'on l'eust contemplé dans vn siege d'honneur & de gloire. Ceste posture qui fist rire tous les assistans ayant aussi donné subiet à la morisque d'en faire de mesme il se tourna vers elle pour la regarder. Mais ô dieux! de quel estonnement ne fust il point saisi quand il vist vn teint noir comme de la poix, des yeux ardans comme des charbons, des leures plattes

& renuërsees, & bref vn visage effroyable auquel il auoit donné tant de chauts baisers? Plus estonné qu'il n'auoit esté de sa vie il ietta par terre la chaire dans laquelle il estoit assis, se recula deux ou trois pas, & tenant ses regards attachez sur elle. O dieux (s'escriat il) que representez vous à mes yeux? Est ce vn songe, ou plustost suis-ie enuveloppé dans les charmes de quelque forcier? Quoy, ce fantosme hideux pour lequel i'ay fait de si grands combats est ma Syluiane? Non non, vous m'avez trompé malheureusement, c'est vn demon plustost qu'une femme, voila pourquoy maudits enchanteurs ie deteste vostre science, puis qu'elle n'est faite que pour desobliger les bons cheualiers. La rage l'emportant à ceste pensee il voulust descendre les degres du trofne, mais le morisque le prenant par le

bras l'arresta avec ces parolles. Quoy
mon cheualier mespriserez vous
maintenant ceste souueraine beauté
que vous adoriez il n'y a qu'un mo-
ment, & mescongnoistrez vous ces
traits agreables qui sont graués si
viuement dans vostre cœur? Vous me
disiez tout à ceste heure que mes yeux
estoint des soleils qui dissipoint
les tenebres de ceste chambre, cepen-
dant vous faites semblant qu'ils vous
donnent des frayeurs estranges: Le
vous ay donné des embrassemens à
l'abord qui vous ont transporté iuf-
ques au delà des felicités que le mon-
de donne, & toutefois il semble à
voir le trouble où vous estes qu'ils
vous ont fait plus de mal au cœur
qu'ils ne vous ont donné de plaisir?
I'en'ay pas refusé de receuoir plus de
cinquante baisers ardens par lesquels
il sembloit que vous me voulussiez

deuorer , neantmoins vous en estes ingrat, & ne vous contentant pas de cela vous medittes encor des iniures: Ah certes vous recôpés mal tant de tesmoignages d'amour que ie vo⁹ ay rédus pour vous obliger, & ie n'ay pas vn moindre subiet de me plaindre aujourd'huy de vous que vous en auiez il y a quelque temps de m'accuser d'ingratitude & de cruauté? Mon cher amy reprenez vostre iugement, baisons nous encor plus de mille fois avec plus d'amour que iamais sans nous soucier de ces cheualiers ny de ces bergeres qui portēt enuie à nostre bon heur. Ce disant elle fist semblant de se vouloir ietter à son cou, mais luy qui creuoit de honte & de rage la regardant d'un œil de trauers la repoussa fort rudement, & me pouuant retenir sa langue dans l'excès de ceste colere. Va vieille marmite d'enfer (luy

dit-il) va chercher des demons qui
soient semblables à toy pour te cares-
ser, car si tu t'approches de moy en-
cor vne fois ie t'estrangleray pour te
punir de la trahison que tu m'as faite
à la faueur des tenebres & de la nuit.
Alors croyant fort asseurement luy
auoir donné les embrassemens les-
quels auoient rassasiés en quelque fa-
çon les brutales passions d'Astralize
il en conceut vn si grand regret que
ne voulant point se treuuer deuant le
marquis d'Artigny, le conte d'Oran,
ny les autres qui creuoient quasi tous
derire de le voir en telle colere, il se
ietta du haut du trosne sur les carreaux,
passa sur le ventre à trois ou quatre
gentils-hommes qui luy vouloient
empescher le passage, prist sa cuirasse
& son heaulme qui estoient au milieu
de la chambre, & commença de cou-
rir si legerement tout le long de la

gallerie que malgré les barrières sur lesquelles il sembloit voller il se treuua en fort peu de temps à la cour si fasché de ce qui luy estoit arriué, que s'il eust eu vne espee il s'en fust peust estre donné au trauers du cœur. Sa rage augmentant parce qu'il ne sçauoit où aller, il fust sur le point de baisser la teste & d'en donner furieusement cōtre les murailles, quand il aduisa Gandalec lequel ayant esté present à toute la farce l'auoit suiuy plus legèrement que les autres. Son obiet le consolant en quelque façon il luy alla mettre les bras à l'entour du col, & ne se pouuant empescher de verser des larmes luy dit avec quelques soupirs. Mon amy, si tu sçauois l'estrange accident qui m'est arriué en ceste entreprise tu t'affligerois pour l'amour de moy, mais ie ne t'en feray point le recit que nous ne soyons en


campagne par ce que ie veux sortir promptement de ce lieu maudit où ayant esté trompé le plus malheureusement qui se puisse dire ie veux asseurer par toute la terre que les magiciens qui ont fait ces enchantemés ont esté des diables plustost que des hommes. A ces mots iettant la cuirasse sur ses espaules sans l'attacher que d'une courroye, il mist le casque en teste, la rondache sur le bras gauche, & voyant que la duchesse d'Arcail descendoit avec toute la compagnie pour l'arrester encor dix ou douze iours afin d'en prendre vn plus long plaisir, il apprehenda tellement leur rencontre qu'il se prist à courir apres Gandalec lequel entroit dans l'escurie, prist son cheual sans attédre qu'il fust sellé, monta dessus & sortist hors de la maison laissant le soucy du reste à son escuyer quiluy amena tout son equipa-

ge au bout d'un cart d'heure. Tous ces seigneurs & toutes ces dames ne le virent esloigner en ceste fa  on qu'avec regret, mais la duchesse d'Arcail fust celle qui ressentist plus viuement le desplaisir de son depart, car l'ayant esprou   si vaillant & si bon picqueur elle eust bien voulu qu'il eust pass   le reste de ses iours avec elle; Neantmoins elle prist patience malgr   qu'elle en eust, & c  tinua iusqu'au iour le plaisant discours de ceste aduenture par mille contes qu'elle fist faire    la morisque auquel temps voyant que toute la compagnie souhaitoit vn peu de repos elle se retira pour aller dormir, ce qu'elle ne peut faire alors    cause de ces mille pensees qui la trauaillerent extremement. Laissons la parmy ces inquietudes estranges, donnant le loisir    tous ces seigneurs de se separer & publier les mer-

ueilles qu'ils auoient veuës par la rencontre de ce cheualier hypocondriaque, la renommee duquel volla tout incontinent par toute la Bourgonne, & le remettons en ieu dans l'autre chapitre puis qu'il est le subiet de nostre discours.

Subtille inuention de Gandalec pour tromper son maistre, luy voller son argent & se retirer: Discours plaisant du cheualier hypocōdriaque avec vn berger: Son abord vers vne damoiselle auaricieuse: Meschanceté de ceste damoiselle pour le chasser de sa maison: Son arriuee chez vn paysan sur la plainte duquel il resolust d'aller deffier le baron de la Tour.

CHAPITRE XII.

 Endant que la duchesse d'Arcail s'efforçoit quand à l'apparence de faire rire la compagnie, & qu'en effect elle sentoient vn regret extreme de l'esloignement de ce cheualier, il s'estoit mis sous quelques arbres pour attendre son escuyer si mal content de la tromperie qu'on luy auoit faite, que s'il eust peu prendre la lune avec les dents il l'eust deuoree pour satisfaire à sa fureur. Il y fust par l'espace d'un bon cart d'heure, au bout duquel temps entendant venir Gandalec il sortist de son embuscade & pleurant comme vn enfant qui vient de receuoir dix ou douze coups de fouët sur les fesses luy dit. Ah Gandalec falloit il que la fortune me donast de nouuel-

les occasions de me plaindre de sa tyrannie? Sur ma foy i'enrage tout vif, & si tu sçauois le malheur qui m'est arriué en ceste aduventure tu ne t'empescherois iamais de pleurer non plus que ie fais. Ie ne sçay pas (luy dit Gandalec) si vous avez receu vn si grand sujet de vous plaindre comme vous en faites la mine, mais si la chose qui vous fait tant de mal au cœur m'auoit esté faite, par ma foy ie m'en mocquerois. Ah (luy replicquat-il) Gandalec, tu me fais bien voir que la gloire d'vne belle pensée ne sçauoit entrer en ton ame, & que tu n'es pas né pour de grandes choses: Si tu sçauois en quelle estime les bons cheualiers ont tousiours eu la fidelité, sans mentir tu treuuerois des pleurs pour plaindre la disgrâce qui m'est arriuee. Ce sont des contes (reprist Gandalec) vous avez baillé la morisque sous l'o-

pinion que c'estoit vostre Syluiane? He bien monsieur est ce vn subiet pour vous faire desesperer? Pour moy ie ne vous scaurois plaindre, car ie ne me plaindrois pas moy mesme si ceste partie n'auoit esté dressée aussi bien qu'à vous. Mais laissons ce discours s'il vous plaist, remettons la selle & la bride à vostre cheual, prenez le reste de vos armes & vostre espee & nous esloignons de ceste maison où vous n'avez receu que du deplaisir. Certes ie croy que ce que tu dis est bien à propos (luy respondist-il) & que pour me mettre hors de l'inquietude où ie suis il faut que ie tire de longue toute la iournee, voila pourquoy ie te veux croire. Ce disant il mist pied à terre pour faire accommoder son cheual, & remontant dessus tout incontinct prist le premier chemin qui se presenta. Le deplaisir qu'il auoit receu par
l'artifice

l'artifice d'Astralizeluy reuenant à la memoire de moment à autre ils'entretint bien pres de trois heures se pleignant continuellement de la rigueur de ses destinees & de la meschanceté des magiciens qui auoient forgé cet enchantement, mais en fin il perdist la memoire de ce deplaisir par la souuenance de Syluiane à laquelle il commença de redonner toutes ses pensees, & se remist plus qu'il n'auoit iamais fait sur les folles imaginations de la cheualerie par laquelle il esperoit la fin de ses maux avec des louanges immortelles. Pendant qu'il travailloit ainsi son esprit, celuy de son escuyer n'estoit gueres plus en repos, car cet elueillé ne pensant iamais auoir vn temps plus commode pour effectuer son dessein il resua tout le lóg du iour pour inuenter quelque artifice par lequel il se pourroit approprier les pi-

stolles de ce cheualier sans estre soup-
onné de fripponnerie : Il fist mille &
mille resolutions sur ceste matiere les-
quelles ne luy reuenans pas dans la
fantaisie il s'auisa finalement d'vne
meschanceté que l'esprit d'un laquay
estoit capable de conceuoir. Voyant
que la nuict approchoit il dist à son
maistre qui s'entretenoit tousiours de
ses resueries, s'il ne luy plaisoit pas de
chercher quelque logement pour re-
paistre & passer la nuict : A quoy ce
malheureux respondant avec vne ne-
gligence incroyable. Mon amy (luy
dit-il) fais tout pour le mieux, mes
deplaisirs sont si puissans qu'ils me
font perdre la memoire de ce que ie
suis, & par consequent il est à propos
que tu sôges à mes affaires plutost que
moy. Hé bien (replicqua Gandalec)
puis que vous me laissez ce soucy, ie
m'en acquitteray comme vn bon es-

cuyer qui n'ayme que vostre repos. Ce disant il le mena tout droit dans vn bourg où s'estant informé du meilleur logis il y alla descendre, fist tres-bien preparer à soupper, luy fist entendre que ce festin prouenoit de la liberalité d'une bonne vefue, & l'ayant fait manger mieux qu'il ne pensoit, le fist mettre dans vn bon liect pour le refaire des traux qu'il auoit soufferts la nuict precedente. L'entendant ronfler presque au mesme temps qu'il fust entre les draps, il alla remplir son ventre des bonnes viandes qui estoient restees, mist ordre que ses cheuaux fussent bien pensez, & se retira peu de temps apres dans sa garderobe non pas pour dormir, mais pour entasser les pistolles de don Clarazel dans la basque de son pourpoint, & la ceinture de ses chausses : Ce qu'il fist si soigneusement qu'au bout de trois

heures il y en auoit plus de quatre cens à couuert. Ceste affaire estant despeschée il alla dormir, ne manqua point de se leuer dès le point du iour, mist bon ordre à ce que le desieuner fust tout prest, contenta l'hostesse selon son humeur, & se mist en campagne pour s'uyure son maistre qui vouloit marcher pour treuuer quelque memorable aduventure. Trois heures s'estans escoulees sans que le compagnon eust treuue l'occasion de faire son coup, ils entrerent en fin dans vn bois lequel semblant le plus propre du monde à son entreprise il conclut de ne plus tarder. Laisant donc aduancer son maistre d'vne demi lieue il commença de courir apres à bride abbatuë, & l'abordant apres quelque petite espace de temps il luy dist avec vn ton de voix qui sembloit haleter de crainte. Ah monsieur ie suis le plus

malheureux escuyer du monde, & vous le plus infortuné cheualier qui soit sur la terre? Vous estes perdu, & sans doute vous aurez raison de me mettre tantost vostre espee au trauers du corps : Comment Gandalec (luy dit-il se resueillant à ceste parolle) qu'est-il arriué? Helas monseigneur (luy respondist-il) tout ce que ie pouuois iamais redouter pour l'amour de vous : M'estant voulu arrester sous vn arbre pour quelques petites necessités i'ay veu arriuer deux geans les plus espouuentables du monde lesquels m'ont pris la mallette où estoit vostre argent & vos hardes, & par ce que ie les ay menassés de la vengeance que vous en prendriez ils m'ont laissé mon cheual pour vous venir dire qu'ils ne croyoient pas que vous eussiez l'assurance de les regarder. He quoy mon amy (luy dit-il) n'est

ce que cela? Sur mon ame on diroit à te voir pleurer de la sorte que l'on porte au cercueil le meilleur de tous tes amis, la chose ne merite pas de si grandes plaintes, voila pourquoy tu as tort de t'en affliger: Quelles armes portent ces geans? Monseigneur (luy respondist-il) i'estois si troublé que ie n'ay pas pris garde aux deuises de leurs escus, mais l'un deux m'ayant dit qu'il s'appelloit Morgalion proche parent du redoutable Morgant le gean qui fust deffait par le vaillant Oger le dannois, ie croy que vous en aurez fort facilement des nouvelles pourueu que vous preniez le mesme chemin qu'ils ont pris. Quoy (reprit-il) que ie tienne le mesme chemin? Par dieu ie les suiurois iusqu'au bout du monde plustost que de ne les point attraper pour en prendre vne memorable vengeance. Sa boutade l'empor-

tant à ceste parolle il se fist mettre dans vn chemin tel qu'il pleust à Gandalec de luy monstrier, il donna de l'esperon dans le vêtre de son cheual, & s'enfonçant au trauers du bois s'y engagea de telle façõ qu'il n'en peust sortir qu'apres vne longue espace de temps. Gandalec le voulant bien perdre de veuë le laissa courre tout le long du iour, reprist le chemin qui s'en alloit du costé d'Ostun, & se rendist chez son pere au bout de huit iours où ses pistolles & le bon equipage auquel il estoit luy faisans bien tost treuuer vn tres-bon parti il espousa vne belle fille avec laquelle il vescu du depuis honorablement. Mais reuenons à nostre cheualier hypocondriaque afin que nous ne nous esloignons point de nostre dessein : L'extreme desir qu'il auoit de récontrer ces deux geans imaginaires dont Gandalec luy

auoit embroüillé la ceruelle, l'ayant fait courir par l'espace de trois heures sans dóner que quelques momens de relasche à son cheual, il vist passer vn ieune berger l'objet duquel luy faisant esperer des nouuelles il luy demanda s'il auoit point veu passer deux geans horribles. Monsieur (respondist ce berger) ie vous iure en ma conscience que ie n'ay d'aujourd'huy veu ny gans ny mitaines, & si vous en auez perdu vne paire vous en pouuez bien chercher des nouuelles ailleurs. Comment ny gands ny mitaines (reprist Clarazel) mon amy ie pense que tu te mocques de moy, ie ne parle pas de gans, mais de geans ? Monsieur (replicqua ce berger) vous direz ce qu'il vous plaira, mais sur ma foy ie ne vous entends non plus que tantost, & ie ne comprendray iamais ce que vous me dittes si vous ne me parlez Fran-

çois. Tués donc vn terrible lourdaud
(luy dit Clarazel) puis que tu ne sçais
pas que ces geans dont ie te parle sont
des hommes qui ne sôt gueres moins
grands que ces arbres. Ah ah ah des
hommes aussi grands que ces arbres
(reprist ce berger en riant) ma foy
vous avez bien enuie de vous gau-
differ : Monsieur ie n'en ay iamais
veu de ceste façõ, que si vous en vou-
lez sçauoir des nouuelles il vous fau-
dra aller iusqu'à vn chateau que vous
treuuez au bout d'vn cart d'heure
pourueu que vous ne quittiez point
ce sentier, quant à moy ie m'en vay
chercher vne de mes vaches qui s'est
perdue parmy ces buissons de peur
que le loup ne la mange. Va va mon
amy (luy dit Clarazel) les dieux te
veulent garder de tomber au pouuoir
de ces inhumains qui peut-estre te
mettront en pieces pour rassasier leurs

ventres de ta pauvre chair. Alors laissant ce berger presque transi d'une froide apprehension qui le saisist à ceste parole, il continua son chemin avec la mesme diligence qu'auparauant iusques à ce qu'ayant fait plus de mille tours il se treuua pres d'un petit chateau sur le point que les tenebres comméçoient à rendre la terre fort noire. L'obiet de ceste petite maison luy alloit faire oublier toutes ses fantaisies si son escuyer eust esté present, mais ne le voyant point parce qu'il auoit pris un autre chemin, comme nous vous auons dist cy dessus, il s'imagina qu'il estoit tombé au pouuoir de ces inhumains, & sur ceste pensce il entra en telle colere que croyant de les treuuer plus facilement de nuict que de iour il fust prest trois ou quatre fois de tourner bride & continuer son trauail ; Toutefois sentant bien

que son cheual ne pourroit satisfaire à ses passions il conclud de passer la nuit en ceste maison qu'il voyoit avec quelque petite esperance que Gandalec pourroit retourner : S'auançant donc il se treuua peu de temps apres dans la cour dont les portes estoient toutes ouuertes , mist pied à terre, & laissant son cheual avec vne ferme croyance que quelques pallefreniers ne manqueroient point de le venir prendre pour le mener à l'escurie, monta trois ou quatre degres au bout desquels treuuant vne chambre il entra dedans : Il auoit opinion qu'on le receuroit avec des caresses par ce qu'il auoit veu qu'on n'auoit iamais refusé de loger tous les cheualiers qui couroient le monde du temps d'Amadis ; mais il se treuua bié loing de son conte en moins d'un moment. Vne vieille damoiselle la

plus mesquine qui fust peut-estre au
reste du monde, le voyant entrer luy
demanda mal gracieusement ce qu'il
cherchoit? A quoy respondant avec
autant de douceur & de bonne grace
qu'elle sembloit auoir de colere il luy
dit, Madamoiselle, ie suis vn cheualier
errant si fatigué d'auoir couru tout le
long du iour apres deux geas lesquels
ont desrobé quelque chose à mon es-
cuyer, que malgré moy ie suis con-
traint de vous demander le couuert
pour me refaire des grands trauaux
que i'ay soufferts, de grace faites
moy preparer à soupper & me met-
tez apres dans vn liect digne de ma re-
nommee & de ma naissance. A ces
mots elle qui n'auoit iamais ouy par-
ler de geans, de cheualiers errans, ny
de pareilles gentilleses, le regardant
d'un œil de trauers luy respondist
avec vne mine toute rechinee. Vray-

ment monsieur vous nous en auez belle baillee avec vos discours si plaisans, Dieu vous fasse bien s'il luy plaist, il n'y a point de pain cuit ceans, vous ne treuueriez pas vne goutte de vin dans la caue, & quand ie vous voudrois donner quelque chose ce ne seroit qu'un potage de choux à l'huile. Bien bien madamoiselle (luy replicquat il) il se faut accommoder au temps & au lieu, les bons cheualiers se contentent de tout ce qui leur est offert, & ie treuueray peult estre vn morceau de pain de meilleur goust en vostre maison que les plus delicates viandes du monde dans le palais des princes & des roys. Ceste responce qui pensa faire mourir de rage ceste vieille femme l'ayant fait leuer sur le bout des pieds elle luy-dit toute en colere. Voyez vous monsieur il n'y a qu'un mot qui serue à cela, nous ne

logeons point ceans de gendarmes. Ho ho madame (luy dit-il se picquât d'honneur à ceste parolle) vous vous trompez en vostre pensee, & ie voy bien que vous ne cognoissiez pas les honnestes gens : le ne suis pas gendarme, mais cheualier, & si vous cognoissiez bien mon merite vous reparteriez à tres-grand honneur le traitement que ie vous demande à ce soir. Voire voire (luy respondist elle en branlant la teste) ma foy vous avez mieux la mine d'un emballleur ou d'un filloux que d'un pot à beurre; Au nom de dieu sortez ie vous prie: Pardieu mademoiselle (luy respondist-il) le temps n'est gueres propre à cela, & vous serez de mauuaise humeur si vous me refusez vne chose que vous me deuriez offrir avec respect. A ces mots l'impatience l'emportant elle fust trois ou quatre fois

sur le point de le chasser à coups de baston , mais songeant tout au mesme temps qu'elle ne seroit pas la plus forte , & que si elle l'irritoit trop il seroit peut estre homme à la mettre dehors elle mesme , elle resolust d'vser d'artifice pour se deliurer de ses importunités & de la crainte qu'il luy donnoit. Faisant donc mine des'adoucir elle luy dit: Vrayement, monsieur vous me pardonnnerez s'il vous plaist si ie vous ay traitté moins courtoisement que ie ne deuois, vos armes m'ont donné vne telle peur au commencement que ie ne sçauois à quoy me resoudre. Vous me demandez vne belle chambre, ie vous meneray moy mesme au plus beau cartier du logis. Alors le prenant par la main elle luy fist descendre les degrés qu'il auoit montés, & luy faisant trauerfer la cour ouurist vne petite porte par la-

quelle l'ayant fait passer elle la referma tout incontinent avec vne promptitude si grande qu'il commença de se douter du mauuais tour que l'on luy iouïoit. En effet ayant tourné ses regards par tout il cogneut qu'il estoit hors de la maison, ce qui le mist en telle colere que portant mille coups de pierre dessus ceste porte il dist plus d'iniures à ceste vieille auaricieuse qu'elle n'auoit de dens à la bouche: Toutefois elle ne s'en soucia pas beaucoup, car ayant fait mettre son cheual dehors par la grande porte pendant qu'il coignoit sur la petite avec passio, elle n'apprehendoit plus ses menaces, & le laissa tempester plus de demie heure, au bout de laquelle ayant rencontré son cheual il monta dessus avec vn contentement nonpareil par ce qu'il le croyoit perdu, & prist le premier chemin qui se presenta

senta le long duquel la perte de son
escuyer luy reuenāt à la memoire plus
que le deplaisir de l'affront qu'il auoit
receu, il commençoit de le regretter
auec des larmes quand il ouyt l'abboy
de deux ou trois chiens lesquels luy
faisās deuiner qu'il estoit proche de la
loge de quelque payfan luy firent ou-
blier ceste fantaisie pour songer à pas-
ser la nuit plus commodement qu'il
n'eust fait au pied d'un noyer ou d'un
chesne: En effect voyant trois ou qua-
tre maisons fort prochaines les vnes
des autres, il entra dans celle qui luy
sembra la plus commode & la meil-
leure, où treuuant vn vieil homme en-
cor à la table il luy dit. Mon bon hom-
me ie m'asseure qu'en l'aage où tu es
tu auois appris à receuoir honora-
blement les bons cheualiers, voila
pourquoy ie ne doute point que tu ne
me fasses bonne chere & de tres-bon

cœur. Ah vrayment (luy dit le payfan lequel le voyant entrer avec des armes auoit apprehendé desia plus de douze fois qu'il ne luy rauist la vie ou la bourse) monsieur vous soyez le tres-bien venu, ie suis pauvre, mais ie m'efforceray de vous bien traitter selon ma petite puissance. Ces parolles courtoises furent suiuiues de l'effet, il se leua de table, fist couper la gorge à quelques poulets, & commāda qu'on en fist vne fricassée, cependant voulant tesmoigner que le cœur respondoit aux apparences de sa bonté il s'approcha de l'extrauagant pour le desarmer, ce qu'estant fait il le vist ietter sur la viande avec vn si grand appetit qu'il l'eust deuoree en moins d'vn cart d'heure. Son ventre estant rassasié il fist mille questions à son hoste, lequel n'entendant pas ce qu'il vouloit dire quand il luy parloit de geans, d'en-


chantemens & d'adventures estranges du monde luy respondoit tout à contresens, si bien qu'ayans tous deux dist presqu'autant de bouffonneries que de parolles sans que leurs contes extrauagans les fissent rire par ce qu'ils ne s'entendoient pas, nostre hypocondriaque luy demanda finalement s'il desiroit qu'il luy rendist quelque seruice pour la recompense du bon traitement qu'il luy auoit fait : A quoy ce bon homme respondant avec quelques larmes. Monsieur (luy dit-il) si ie ne craignois d'abuser de vostre bonté ie vous supplerois volontiers de plaider pour moy enuers monsieur le baron de la Tour lequel estant nostre seigneur veut que ie luy vende mon bien qui accommode fort sa maison, & de luy remonstrer s'il vous plaist que s'il me contraint à cela il mettra mes pauures enfans au bissac.

Vrayement mon amy (luy respon-
dist-il) vostre cause me semble si iu-
ste & vostre affection me touche si
sensiblement que ie ne manqueray
pas demain le matin d'aller treuuer ce
meschant homme pour luy deman-
der la raison des outrages qu'ils vous a
faits : S'il veut aymer la iustice ie le
seruiray sinon ie le deffieray au com-
bat, tant ya que ie garderay vostre
bon droit ou ie mourray en ceste en-
treprise: Mais afin que ie sois plus dis-
posé à bien faire au cas qu'il faille iouer
des cousteaux, allons nous en dormir
iusqu'au iour, & n'oubliez pas s'il vous
plaist de faire bien nourrir mon che-
ual duquel i'auray affaire en ceste en-
treprise. Alors voyant que ce bon
homme luy replicquoit qu'il n'en fal-
loit pas venir iusques là il luy dist.
Mon amy, les loix de cheualerie me
commandans d'executer ce que i'en-

treprenez, vous trauaillerez inutilement de me le vouloir oster de la fantaisie, il faut que ce maudit gean rende gorge, qu'il me promette de ne tyranniser iamais ses subjets, ou qu'il passe sous la fureur de mon coutelas. Ce bon homme n'osant replicquer à ces mots qu'il prononçoit avec vn ton de voix serieuse, il le mena dans vne chambre vn peu reculee où il le fist coucher dans vn fort bon liēt.

Comme l'hypocondriaque alla deffier au combat le baron de la Tour: Les propos qu'ils eurent ensemble sur ceste matiere: Grande amitié contractee entre eux: Aggreable dispute de l'extravagant & d'un capucin pour sçauoir si la lecture des liures d'Amadis de Gaulle estoit inuile ou pernicieuse: Et comme le baron de la Tour voulant tirer du plaisir de ce malheureux mandats tous ses amis avec resolution de leur bien faire passer le temps.

CHAPITRE XIII.

 I tost que le iour eust fait leuer les bergers qui deuoient mener leurs troupeaux à l'herbe nostre cheualier estant esueillé par le bruit qu'ils firent en les tirant

hors de l'estable, il fust sur pieds en moins d'un moment, il se couvrist de ses habits & de ses armes, & n'ayant pas perdu la memoire des promesses qu'il auoit faictes à son hoste le soir precedent il fust en estat de partir pour aller treuuer le Seigneur du lieu qui se nommoit le baron de la Tour. Le bon homme refusoit d'y aller par ce qu'il craignoit vne charge de coups de baston, mais don Clarazels'aigrissant au premier refus qu'il en fist il luy dit. Comment mon amy craignez vous quelque chose estant avec moy? Sçachez que quād ce malheureux que vous redoutez seroit encor cent mille fois pl⁹ diable qu'il n'est ie ne m'acqueris pas d'é venir à bout ayāt la iustice de mon costé & le cœur aussi bien que luy, marchez marchez & me venez conduire où il est? Ainsi ce bon homme ne redoutant pas moins les mena-

ces de cet insensé que la fureur du sieur de la Tour fust contraint de marcher deuant & de le mener iusques chez son maistre, lequel estant alors à son escurie avec trois ou quatre gentils-hommes de ses amis qui l'estoient venu visiter fust tout incontinent aduertty par quelques lacquais qu'un homme armé de toutes pieces entroït à la cour. Ceste nouuelle l'estonna du premier abord, & comme il estoit braue caualier il creut que c'estoit quelque gentil-homme de ses amis qui luy venoit apporter vn cartel & l'inuiter de cōbatre à la barriere, desorte que se tournant vers ceux qui l'accompagnoient il leur dist. Messieurs, à ce que ie voy l'on nous veut faire passer le temps, & l'equipage auquel cet homme nous vient voir me fait croire qu'il ne tiendra qu'à nous de faire partie. A ces mots s'arre-

stant tout court il leua les yeux vers
don Clarazel, lequel l'ayant bien re-
marqué par les parolles que son con-
ducteur luy en auoit dittes il s'en ap-
procha, planta sa lance sur sa cuisse
pour donner plus de grace à ses actiós,
& leuant la visiere de son heaulme
luy dit froidement. Gean, les dieux
qui sont les protecteurs de l'innocen-
ce & qui prennent tousiours en main
la cause des foibles que l'on opprime,
estans lassés de te voir viure, ou pour
mieux dire ne pouuans plus souffrir
tant de tyrannies que tu exerces en-
uers tes subjets m'ont fait aujourd'huy
rencontrer en ceste prouince pour te
chastier & t'apprendre qu'il te faut
estre moins violent, voila pourquoy
va prendre tes armes, ou bien si tu te
veux recognoistre iure solemnelle-
ment d'estre moins cruel, plus iuste,
plus courtois, & que tu restitueras avec

franchise tous les heritages ou autres meubles que tu vsurpes injustement. Si le baron fust estonné de ceste harangue, belles ames qui lisez cecy ie croy que vous ne me le demanderez point, car n'estant pas assés bon medecin pour cognoistre la malladie de celuy qui parloit à luy il regardoit tous ces gentils-hommes qui l'accôpaignoient comme s'il leur eust voulu demander ce qu'il deuoit dire & ne sçauoit à quoy se resoudre pour luy respondre sans faillir. En fin ne voulant pas demeurer muet pour ne point faire soupçonner son cœur de quelque foiblesse il luy dist fort modestement ; Le ne sçay qui vous estes, ie n'entens point ce que vous m'avez voulu dire par le discours que vous m'avez fait, & qui plus est ie ne puis comprendre comment vous vous estes armé pour venir ceans : Neant-

moins il me semble que c'est pour me
deffier au combat , si vous estiez en
l'estat qu'un caualier d'honneur doit
estre ie satisferois à vostre desir sans
m'informer du subiet de vostre bou-
tade. Comment (reprist don Clara-
zel avec vne action de colere) si i'e-
stois en l'estat qu'un caualier d'hon-
neur doit estre tu satisferois à ma pas-
sion : Gean outrageux dis moy ie te
prie que me mancquet il dece qu'un
bon cheualier doit auoir puis que ie
vay sans peur à ceste action, & que
i'entreprens ceste affaire sur les plain-
tes de tes subjets qui sont accablés de
tes tyrannies? Non non, tu ne t'excu-
seras pas du combat avec la langue, il
faut que ie sçache si ton courage res-
pond à ceste grosse masse de chair qui
couure tes os , va prendre tes armes,
autrement tu me contraindras à te
charger avec aduantage ce qui me fas-

cheroit extremement par ce que ie contreuendrois aux saintes loix de cheualerie. Vrayment (replicqua le baron qui commença de cognoistre par ces discours que sa ceruelle estoit percee par vne des cornes de la lune) cheualier vous auez le courage si bon qu'il faut que ie deuienne vostre amy malgré que i'en aye: l'auois resolu de vous exterminer d'un seul coup d'espee, ie veux maintenant le contraire, & ie n'auray iamais vne plus forte passion que de vous seruir. Je satisferay donc à vostre demande, mais il faut aussi que de vostre costé vous m'accordiez un don s'il vous plaist afin que nostre amitié commence & s'attache par des obligations reciproques. Je vous l'octroye (dit don Clarazel) pourueu qu'il ne contreuienne point à mon entreprise: Je ne meriterois pas l'honneur de vostre affection (luy

dit le seigneur de la Tour) si ie vous demandois quelque chose hors de la raisó: Cheualier ce que ie veux de vo^r est que vous me fassiez la faueur de demeurer ccans trois ou quatre iours afin que i'aye le loisir de vous bien traicter, cependant ie repareray les outrages que i'ay faits à tous mes subiets, & commenceray dès à ceste heure par celuy pour l'amour duquel vous estes icy. Certes (luy dit don Clarazel) vertueux Gean vous n'avez iamais acquis tant de gloire qu'en ce combat où vous vous estes surmonté vous mesme qui selon la prodigieuse grandeur de vostre corps ne deuez iamais estre vaincu de personne: La franchise avec laquelle vous m'avez ouuert vostre cœur me rend vostre amy tres-intime, & pour vous en donner vne preuue ie vous promets de demeurer avec vous dix ou douze iours plutost que

de vous donner subiet de vous plaindre: le principal motif de mon arriuee en vostre maison a esté le repos d'un pauvre homme qui m'a bien receu ceste nuict, satisfaittes à la parole que vous me venez de donner luy promettant en ma presence que vous ne le troubleriez plus dans la iouissance de ses heritages, apres cela nous viurons vous & moy comme l'excellent Amadis de Grece viuoit avec le bon Gean Mandroc, ou le gentil Agefilan de Colchos avec don Galtazar de Barberouffe. A ces mots l'hoste de don Clarazel estant amené tout passe de crainte le baron luy iura qu'il ne receuroit iamais aucun deplaisir en sa personne ny en ses biens, ce qu'il executa veritablemēt, & le renuoyant avec un contentement nonpareil tourna la teste vers don Clarazelle-quel auoit desia mis pied à terre. Leur

abord fust tout plein de caresses & de cōplimens, ils s'embrasserent trois ou quatre fois & continuerent ces ceremonies iusques au logis où nostre cheualier estant arriué dans vne chambre fort bien meublee il quitta les armes par le moyen d'un lacquay qui luy fust donné. Pendant qu'il prenoit le loisir de se raffraischir le baron trauailloit pour donner aduis à tous ses amis de l'occasion qu'il auoit de leur faire passer le temps : En effect ayant enuie de les faire rire à bon escient pour faire payer à son hoste la despense qu'il luy feroit il en manda vn si grand nombre qu'en moins de trois iours il eust au chasteau de la Tour plus de compagnie qu'il n'y en auoit eu peu auparauant dans Arcaill & dās Artigny comme ie vous diray tantost. Toutes ses lettres estans escrites il s'en alla voir nostre extrauagant,

le traitta magnifiquement au disnet,
le fist promener par vne longue es-
pace de temps pendant laquelle il profi-
ta merueilleusement dans la cognoif-
sance de son humeur, car il n'oublia
pas à luy dire le succès de ses aduentu-
res, il luy conta la vie qu'il auoit me-
nee au mont d'or, luy recita bien au
long le subiet pour lequel il auoit
quitté l'hermitage, ne iugea pas qu'il
fust à propos de luy taire le nom de
beau desolé qu'il auoit pris par la fan-
taisie de l'hermite, il ne luy cela pas
aussi que son escuyer nommé Ganda-
lec l'auoit surnommé le cheualier aux
tristes pensees, bref il l'entretint trois
ou quatre heures en ceste façon au
bout desquelles le baron le ramena
iusques à sa chambre où il le laissa
parmy cinq ou six liures d'Amadis
qu'il auoit fait mettre expres sur la
table pour le pousser tousiours dans
le pre-

le precipice avec plus de violence. Luy voyant deuorer ces liures il s'en alla mettre ordre à quelques affaires iusques au souper qu'il l'alla querir pour luy persuader qu'il l'estimoit merueilleusement. Les ceremonies que l'on fait ordinairement quand on veut prendre place à table estans faittes, chacun commençoit à manger quād vn lacquay tirant le baró par la manche l'aduertist que deux capucins estoient arriues lesquels desiroient de parler à luy. Ceseigneur ayant commandé qu'on les fist entrer chacun se leua pour leur faire honneur, on leur fist prendre de l'eau tout au mesme temps, ils furent placés au bout de la table, & l'on continua de soupper avec la mesme allegresse que l'on auoit desia commencé. Vne petite heure s'estant escoulee pendant laquelle les plus affamés auoient eu loi-

fin de remplir leurs ventres on com-
mença de parler de choses diuerſes
parmy leſquelles quelqu'un venant à
louër hautement l'amour extreme
d'un gentil-homme cogneu de tous
ceux de la compagnie, lequel auoit
ſouffert de grandes trauerſes auant
que d'auoir la poſſeſſion d'une belle
fille qu'il auoit eſpouſee depuis qua-
tre iours, don Clarazel priſt la parole
& tournant ſes regards ſur celui qui
auoit entamé ce diſcours luy dit.
Monſieur, il eſt vray que ce cheualier
duquel vous parlez a rendu de tres-
grands teſmoignages d'amour à ſa
dame, mais que ſa fidelité ſoit com-
parable à celle du vaillant Amadis de
Gaule, ny ſes trauaux pareils à ceux
que le gentil Ageſilan de Colchos
ſouffrit pour Diane, certes vous ne le
pouuez dire avec raiſon, & ie veux
ſouſtenir avec les armes à la main que

cela n'est point: A ces mots ces bons peres capucins l'ayans regardé presque estonnez de ceste boutade, vn d'eux luy replicqua si soudainement que le gentil-homme auquel il parloit ne luy peust respondre Monsieur (luy dit-il) ie ne sçay si vous parlez à bon escient ou si c'est pour vous esgayer que vous meslez des fables à nos verites: Mais il me semble qu'une authorité meilleure eust esté bien plus receuable. Comment des fables (luy respondist-il) mon pere vous imaginez vous que ie voulusse alleguer icy quelque chose qui fust menlongere ou contre l'ordre de la raison? Non sans mentir, & ie pense que vous auez enuie vous mesme de vous moquer auiourd'huy de nous, de dire que l'authorité d'Amadis de Gaule ny d'Agésilas de Colchos n'est pas receuable pour preuuer les traux & la

fidelité d'un amant? Monsieur (luy replicqua le pere fort modestemēt & sans s'esmouuoir) s'il y auoit quelque fondement à ce que vous dittes nous nous contenterions de vostre raison, mais pardōnez moy si ie dis que vous extrauaguez merueilleusement, cet Amadis de Gaule ny cet Agefilan de Colchos desquels vous parlez n'ont iamais esté qu'en peinture. Ah mon pere (luy repartit-il l'interrompant à ceste parolle) ie voy bien que vous n'estes pas des plus sçauans capucins du siecle puis que vous ignorez l'histoire d'Amadis de Gaule. qui a esté roy de la grande Bretaigne, & qui a souffert des traux incroyables pour l'amour de son Oriane laquelle fust fille du roy Lisuard, il a esté comme vous estes maintenant, non pas capucin, mais cheualier tres-excellent: De luy sont sortis les empereurs Esplau-

dian, Lifuard de Grece, Amadis de Grece, Florizel de Nicquee, don Rogel de Grece, Spheramond, Rozalmont de Grece & plus de cent cinquante princes vaillans, au nombre desquels estoit cet Agesilan que l'antiquité nous a donné pour vn exemple de gentillesse & de loyauté : Voulez vous vne preuue irreprochable de ce que ie dis ? l'auois il n'y a pas encor quatre iours vn escuyer sorti de la race de Gandalin qui seruiſt tousiours Amadis de Gaule pendant qu'il fust cheualier errant ; Ne me dittes donc plus ie vous prie que ie vous deuois apporter vne autorité meilleure & plus receuable, car veritablement cela ne se peut. Monsieur (luy repliqua ce pere pliant les espaules comme s'il eust esté touché de compassion du malheur de ce cheualier) est-il possible que vostre esprit se soit perdu en

telle façon parmy ces fadaïses & ces
niaïseries qu'il n'y ait plus de lieu pour
vous faire cognoistre l'erreur où vous
estes? Au nom de dieu considerez
que ce sont des contes faits à plaisir,
que ces liures pernicious que vous
auez leus sont tous remplis de men-
teries, que tous ces princes que vous
me venez de nommer sont autant de
fantosmes conceuës par de foibles es-
prits qui n'ont pas voulu donner leur
estude à choses plus hautes, & que
vous faillez mesmement contre les
loix du Christianisme de croire tou-
tes ces follies comme si c'estoient arti-
cles de foy. Ah mon pere (dit-il) ar-
restez vous là s'il vous plaist, sur ma
foy vous estes heretique, & ie ne scau-
rois souffrir la continuation de vostre
discours sans me plaindre du tort que
vous faictes à Messire Nicolas d'Her-
beray commissaire de l'artillerie, vn

des plus beaux esprits de la terre, & plus encor de l'iniure que vous faictes aux princes de Grece que vous appelez des fantosmes ? Est-ce la recompense que vous leur donnez d'auoir respendu leur sang mille fois pour la gloire de Iesus-Christ ? Les pouuez vous blasmer avec raison apres les auoir veus si courageux contre Armato roy de Turquie, contre les empereurs de Russie, & les autres princes payens qui cherchoient la ruine de nos autels avec des armes effroyables ? Ne les ont ils point deffaits bien souvent deuant Constantinople, dans l'empire de Trebisonde, sur les terres du Soldan d'Alape & ailleurs ? Cependant vous en parlez comme l'on feroit de quelques meschans : Ah c'est vne ingratitude, ou pour mieux dire vne impieté plus blasmable en vostre bouche qu'en celle d'un autre, que si

vous ignorez tout ce que ie dis il seroit bien plus à propos de vous taire que d'en parler, ou si vous en voulez parler il vous seroit bien plus seant de le faire avec respect que par passion. Helas (dit le pere) voila que c'est d'avoir des liures si pernicious & d'en permettre la lecture laquelle cause des maux infinis: Au contraire (luy respondist-il) ces liures sont les meilleurs du monde, par ce qu'ils sont tous remplis de tres-bons exemples de courage & de vertu, qu'ils apprennent la bien seance du monde, qu'ils nous instruisent mesmemet dans la religion chrestienne, & qu'ils nous monstrent beaucoup de vices pour nous en donner de l'horreur. A ce que ie voy (replicqua le pere avec quelques larmes) vous n'avez point d'oreilles pour moy, c'est avec beaucoup de regret, mais puis que mes raisons ne sont pas assez puis-

santes pour combattre ceste folle imagination dont vostre esprit est preoccuppé, monsieur tout ce que ie puis faire est de detester ces esprits méteurs qui se plaisent à forger en l'air des chimeres & de plaindre vostre malheur. Et moy mon pere (luy respondist-il brusquement) d'auoir pitié de vostre ignorance & de louer ces bons auteurs qui nous apprennent tant de belles choses. A ces mots toute la compagnie se mettant à rire on continua de s'entretenir sur ceste matiere iusques à ce qu'il fust temps de s'aller coucher, à laquelle heure les peres ayans esté conduits en vne chambre on mena nostre extrauagant dans celle où il auoit laissé ses armes avec opinion qu'il iroit dormir tout incontinent, neantmoins il eust des occupations nouvelles qui l'en empescherent, ayant treuue sur sa table les li-

ures d'Amadis de Gaule qu'il y auoit laissés peu auparauant il y leut avec tant de plaisir & d'attention l'enchantement auquel Fortunian le beau auoit esté retenu par la magicienne Ginolde que cela luy fist naistre vne nouvelle fantaisie dans la teste comme nous vous dirons par la suite de nostre discours, de sorte que la moitié de la nuict estoit escoulee auant qu'il parlast de se despoüiller; Encor n'eust il pas songé à cela sans l'importunité d'un lacquay lequel ne pouuant plus veiller luy arracha quasi le liure des mains. Laissons le dormir & nous reposons aussi de nostre costé pour reprendre haleine afin que nous descriptions mieux en l'autre chapitre les choses admirables qui se passerent pendant son seiour en la maison où il estoit.

Priscalie princesse d'Alban, Philoxenee duchesse d'Osmont, Cleandrine marquise d'Orbeil, Armoriane contesse du mont des sauvages, Philodamant duc de Saxalie & de Floridanis arriuent au chasteau de la Tour: Le baron treuve l'inuention d'une aduventure du tout admirable: Cleãdrine marquise d'Orbeil donne les derniers traicts à cet artifice par vne pensee excellente, Et comme nostre extrauagant entreprist d'espreuuer cet enchantement.

CHAPITRE XIV.



A nuit estant doucement escoulee le seigneur de la Tour qui vouloit faire profiter le temps qu'il deuoit iouir de la presence de don Clarazel l'alla treuuer iu-

ques dans sa chambre où luy voyant entre les mains le liure d'Amadis de Gaule dans lequel il auoit leu le soir precedent il ne se peut empescher de luy dire. Seigneur cheualier, l'affection que vous portez à ces romans estant toute extraordinaire, ie veux croire que vous deuiendrez vous mesme Amadis auant peu de iours. Ah pleust à Dieu (luy respondist il) que ie le peusse ressembler en vaillance comme ie suis tres assure de l'esgaller en ceste admirable fidelité qu'il a gardée à son Oriane : Croyez seigneur que toutes mes actions seroient des miracles, & que ie donnerois subiet à tous les historiens de la terre de travailler incessamment pour recommander mes faits heroïques aux siècles futeurs comme nous voyons maintenant les siens dans la bouche de tout le monde, mais ie ne pense

pas que ie puisse iamais tirer de mes armes vne gloire pareille à celle que ce grand prince s'est acquise, aussi ie ne m'attache pas à la lecture de son histoire avec vne vaine opinion d'arriver à ceste perfection merueilleuse, mais seulement pour ne point ignorer les traicts de vertu qu'il nous a laissés pour exemples que nous devons suiure : Ne suis-ie pas loüable en ce beau desir, & ne blasmeriez vous point ce pere ignorant qui me vouloit hier disputer vne chose beaucoup plus claire que le soleil. Certes (respondist le baron) la gloire de ceste dispute vous estant demeuree avec aduantage nous cogneusmes bien tous qu'il ne scauoit rien que sa patenostre, aussi vous vistes bien qu'il nous fist rire longuement & à ses depens. Toutefois laissons ce propos & si vous me voulez croire allons chercher de l'ap-

petit dans les promenades ? I'en suis content (luy dit Clarazel) pour le moins nous aurons loisir de nous entretenir de mille discours agreables qui nous redront le temps fort doux. Alors quittant le liure qu'il auoit encor dans la main il sortist avec le baron, luy fist mille contes bouffons parmy lesquels n'oubliant point les aduentures du beau Fortunian de France qu'il auoit leuës le soir precedent, il se mist à parler de l'enchantment auquella belle Ginolde l'auoit retenu fort long temps avec vne imagination si puissante qu'il le voyoit encor parmy ses delices amoureuses qu'il luy prist vne merueilleuse enuie d'estre enchanté de mesme façon sans se souuenir alors de l'exacte fidelité qu'il vouloit garder à sa Syluiane. Ceste pensee l'emportant dans des reueries qui faisoient perdre au seigneur

de la Tour le plaisir qu'il auoit de luy il le refueilla trois ou quatre fois, & le mist sur d'autres propos lesquels estâs en fin diuertis par l'arriuee de dix ou douze gentilshommes qui parurent presqu'en mesme temps, don Clarazel s'imagina que le baron de la Tour estoit quelque prince, & que to⁹ ceux qui le venoient visiter estoient ses subjets, de sorte qu'apprehendant de ne luy auoir pas assez rendu de respect il mist le bonnet à la main & sâs auoir esgard aux complimens de ceux qui s'approchoient pour le saluër luy dir avec vn genoüil sur la terre. Puissant prince de la Tour vermeille, j'ay de grandes excuses à vous faire si d'abord ie ne vous ay pas rendu le respect que ie deuois à vostre naissance, vostre bonté & mon ignorance seruiron de fondement au pardon que ie vous demande, tant que pour ne m'estre

pas acquitté de ce que tout le monde doit à vostre vertu & à vos merites que pour vous auoir quelquefois estimé beaucoup moins courtois que vous n'estes : le creus lors que l'on me parla de vous à mon arriuee en ceste prouince que vous estiez autant insolent & cruel que le redoutable Mandafabul duquel vous estes descendu puisque vous occupez maintenant ceste isle & ceste maison dont il fust seigneur auant vous, mais certes ie cognoy le contraire au iourd'huy tant par le bon traitement que vous m'avez fait que par le gracieux accueil que tous ces cheualiers recoiuent de vous, & ie me persuade avec apparence que vous tenez des bonnes qualitez de Balan qui fust des intimes amis d'Amadis de Gaule plustost que des mauuaises mœurs de Mandafabul son predecesseur & le
vostre

vostre de sorte que si i'ay quelque fois desiré d'estre vostre amy ie sou-
haitte maintenant avec passion de
deuenir vostre seruiteur. Gentil che-
ualier aux tristes pensees (luy dit
le baron qui deuina tout incontinant
que la lune se renouuelloit dans sa
teste voyant qu'il le prenoit pour le
successeur des seigneurs de l'isle ver-
meille) vous ne me deuez point faire
d'excuse puis que vous n'auiez point
fait de faute , car si vous ne m'auiez
consideré comme prince vous m'auiez
aymé comme cheualier , cela me suf-
fist , & partant nous n'en parlerons
plus s'il vous plaist , quand est de la
mauuaise impression que l'on vous
auoit donné de moy cela m'importe
encor fort peu puis que vous ne l'auiez
plus maintenant , & de bon cœur ie
pardonne à ceux qui m'ont voulu
rendre odieux aux hommes d'hon-

neur parce qu'ils ne m'ont peu faire du mal, & qu'ils sont cause que ie vous cognois: Ne me souciant donc point de cela nous ne songerons qu'à nous resiouir puis que nous auons bonne compagnie: A quoy desirez vous qu'on passe le temps? Par ma foy (luy respondist-il) ie m'accomode à toutes choses, & ie feray fort volontiers tout ce que vous voudrez proposer, mais si i'en estois creu ie ferois publier vn tournois à Ieudy prochain car ie ne sçache point d'exercice plus honorable que celuy là. Vrayment (repliqua le baron) vostre raison me semble si braue que vous n'en ferez pas desdit; Allons disner, & puis ie depecheray des courriers par tous les royaumes circonuoisins. A ces mots toute la compagnie entrant au chasteau & peu de temps apres dans la salle où les tables estoient couuertes chacun y

prist place selon son honneur ou sa
qualité, à la reserue de l'extrauagant
lequel par vne faueur speciale fust as-
sis au bout de la table: La farce qu'il
appresta le long du repas ayant esté de
meilleur goust que le reste de toutes
les viandes, le baron de la Tour se le-
ua, fist mine d'aller depescher des cour-
riers, & le laissant entre tous ces gen-
tilshommes qui le ballotterent d'une
façon toute admirable s'en alla rece-
voir l'incomparable Priscalie princes-
se d'Alban, Philoxene duchesse d'Os-
mont, Cleandrine marquise d'Orbeil
& la gentille Armoriane contesse du
mont des sauuages, lesquelles estans
aduerties de l'occasiõ qui se presentoit
de passer le temps venoient sous la
conduitte de Philodamant duc de Sa-
xalie & du braue Floridanis seigneur
des Isles recogneuës. Ceste compa-
gnie excellente meritant vn tres bon

accueil le baron de la Tour n'oublia rien de tout ce qui se doit practiquer en la reception de personnes si releuees, & s'acquitta de ses complimens avec tant de grace qu'il donna sujet à toutes ces dames de se louer de sa courtoisie : Les departemens estans faits d'un beau pavillon pour toutes ces femmes & d'un autre corps de logis pour le duc de Saxalie, Floridanis, & vingt ou trente gentilshommes, il fust question de sçauoir comme l'on se comporteroit pour tirer les premiers plaisirs des extrauagances de don Clarazel qui estoit alors dans sa chambre feuilletant dans son Amadis sans rien sçauoir de l'arriuee de tant de seigneurs & de dames, à quoy le baron de la Tour voulant donner ordre il mena Philodamont, Floridanis & quelques vns des principaux dans la chambre de Priscalie à laquelle vou-

lant deferer la disposition des desseins de ceste entreprise il luy dit. Madame, puis que vous m'avez fait l'honneur de venir ceans pour tirer du contentement des actiōs extrauagantes d'un homme qui est fort mallade d'esprit, vous nous prescrirez s'il vous plaist des loix selon lesquelles nous nous comporterons en ceste affaire, & tous d'un mesme temps vous nous donnerez des inuentions pour quelque gentille aduventure, car vous ne seriez pas satisfaitte de vostre voyage de l'entendre parler seulemēt, quoy que pour dire la verité il nous ait desia fait treuuer des rauissemens parmy ses discours quand nous l'auons mis sur la vie des cheualiers errans de l'antiquité qui est le subiet & le fondement des extrauagances qu'il fait. Monsieur (luy dist ceste princesse) nous sommes icy venues pour auoir part

au plaisir que vous prendrez des actions & des discours de ce pauvre fou, & non pas pour vous donner des leçons comme il le faut prendre : vous estes le maistre de ceans vous le ferez encor des ceremonies au moins s'il vous plaist, car nous sommes toutes resoluës à vous obeïr & à contribuer de nostre costé ce que nous pourrons pour auoir vn contentement de longue duree. He bien madame (luy dit le baron) ie commenceray donc nostre comedie puis que vous le treuuez bon de la sorte, mais ce sera s'il vous plaist à condition que vous nous fournirez apres de nouuelles de nous faire rire quand celles que ie me propose auront eu leur cours. Vous sçauiez bien que les iardins de ceans sont des plus beaux de toute la france, qu'il y a au milieu vn somptueux cabinet lequel est environné

d'un fossé large de vingt cinq ou de trente pieds où l'eau qui est de trois pieds de haut est plus verte qu'une esmeraude, & que pour entrer en ce cabinet il n'y a qu'un pont qui tourne comme une girouëtte au premier pas que l'on fait dessus à droit ou à gauche, & s'arreste quand on le veult par le moyen d'un valet de bois: Or est il que mon principal dessein est de faire tomber dans ceste eau nostre cheualier hypocondriaque, ce que ie ferois fort facilement sans autre proteste que celuy de la promenade, mais parce que ceste simple action ne nous donneroit point de plaisir i'ay resolu de feindre que ce cabinet est un nouveau chateau du tresor auquel les plus belles dames du monde seront enchantees, & de l'embarquer en ceste entreprise par quelques gentilleses dont iene vous parle pas maintenant

pour vous les faire treuuer plus belles : Mais il faut aduouër icy que ie n'ay peu inuenter vne bonne fin à ceste aduventure, car apres qu'on l'aura retiré de l'eau, ie ne pense pas qu'il soit à propos de luy faire entreprendre quelque autre chose. Non non (dit alors Cleandrine marquise d'Orbeil, laquelle auoit vn esprit des plus pensans de toute la terre) monsieur, ne nous arrestons point à cela, i'ay desia treuue vn expedient pour venir à bout de nostre entreprise avec plaisir ? Madame la princesse d'Alban, madame la duchesse d'Osmon, madame la comtesse du mont des sauuages avec ma petite Clarice qui fait des miracles avec la voix seront dans le cabinet duquel vous parlez chacune avec vn luth à la main, elles sonneront quelque sarabande, & feront croire à ce pauvre fou que leur concert sera composé

de la voix d'un ange & des instrumens de quelques celestes esprits, de sorte que se laissant emporter à un desir merueilleux de mettre fin à ceste aventure il ne manquera point d'avancer iusques sur le pont & par consequent de faire le saut: Quand au reste de tout l'affaire ie l'acheueray glorieusement & d'une façon que ie ne vous veux point dire encor afin que vous en treuuez l'invention plus gentille & de meilleur goust, seulement ie prieray ces dames de sonner tousiours & ne parler point en façon du monde quand i'entreray dans le cabinet iusques à ce que ma Clarice me mette vne couronne de fleurs sur la teste auquel temps elles se leueront toutes & se mettront à genoux devant moy pour me faire des remerciemens de leur deliurance. A ces mots la resolution estant prise de commen-

certoute ceste affaire des le lendemain
chacun se separa pour donner ordre
à ce qu'il pésoit : La marquise enuoya
promptement querir chez elle vne
cûirasse , vn casque & vne rouda-
che de carton dont elle s'estoit seruie
autre fois dans vn ballet auquel elle
auoit représenté la deesse Palas : Le
baron fist faire en diligence deux ha-
bits de toille lesquels estans peints re-
presentoient naturellement des sau-
uages , & scachant qu'il y auoit de
bonne fortune en son bourg vn ours
de ceux que l'on meine ordinaire-
ment par la france pour asseurer les
petits enfans , il le fist arrester avec
commandement à vn de ses valets de
chambre qui deuoit estre tout cou-
uert de lierre de le tenir le lendemain
proche de la premiere porte par la-
quelle on alloit au cabinet vert , on
appelloit ainsi le lieu où la force des

enchantemens deuoit estre. Apres cela quelqu'un proposant tousiours quelque chose il fust encor resolu que toutes les dames ne paroistroient point deuant nostre extrauagant que dans le cabinet des merueilles afin qu'il n'eust point d'ombrage de la fourbe qu'on luy feroit, & que cependant Philodamant duc de Saxalie & le braue Floridanis feroient venir trente ou quarante paires d'armes telles que les cheuaux legers ont accoustumé d'en porter aux occasions afin que tous les gentils-hommes qui estoient alors en ceste maison entraissent au tournois comme le seigneur de la Tour l'auoit arresté dans sa fantaisie. Toutes choses estans donc disposées de la façon que ie vous ay dit, le baron s'en alla treuuer nostre cheualier dans sa chambre, & luy faisant quitter vn liure qu'il auoit en main

luy dit avec vn visage vn peu triste, seigneur cheualier, ie vous ay cogneu si courtois & si courageux que voulant esperer la fin de mes maux par vostre valeur ie ne craindray pas d'estre refusé d'un don que ie desire obtenir de vous. Gentil prince (luy respondist-il) sans mentir vous auez eu raison de croire que ie ne refuserois rien à vostre merite tant parce que ie vous suis beaucoup obligé que pour valoir la peyne que ie respande mon sang pour l'amour de vous, parlez d'oc quand il vous plaira, si vostre repos depend de mes armes ie vous en feray iouir auant qu'il soit nuit. I'ay tousiours bien creu (luy dit le baron) que la rare valeur dont vous estiez renommé par toute la terre seroit encor accompagnée de toutes les parties excellentes qui n'abandonnent point la vertu, & que ie ne vous treuuerois

pas moins courtois que vous estes
vaillant & braue, voila pourquoy
vous remerciant plus de mille fois, ie
continueray mon discours pour vous
faire sçauoir que depuis peu de temps
en ça la fortune & l'amour m'ont fait
vne guerre cruelle, car cestuy cy rauist
mon cœur par l'objet d'une princesse
la plus belle que ie vis iamais, & celle
la me fist perdre au bout de huiet iours
l'esperance de la posseder par vn acci-
dent fort estrange. Vn magicien qui
m'estoit mortel ennemy l'enleua par
la puissance de ses charmes, & lors que
ie pensois recueillir le fruit de mes
amoureuses inquietudes, il l'enchant
de telle façon qu'il n'a iamais esté en
mon pouuoir de m'approcher du lieu
où elle est, ce qui me rend si melan-
cholique & si triste que si vous m'a-
uiez veu dans l'excez de mes plaintes,
& de mes regrets, sans doute vous au-

riez quelque compassion du mal que ie souffre; mais comme ie me suis forcé pour l'amour de vous afin que vous ne ressentissiez point mon mal comme moy, ie vous supplie aussi d'arrester le cours de quelque victoire plus grande que vous pourriez obtenir ailleurs glorieusement, pour me secourir en cecy : Vous me l'avez promis par le don que vous me venez d'octroyer, regardez si vous voulez satisfaire à vostre parole ? Ouy sur ma foy (luy respondist-il) i'y veux satisfaire d'aussi bon cœur que i'entrepris iamais aucune aduventure du monde, & pour vous en donner vne preuue ie partiray tout à ceste heure si vous le voulez pour vous aller procurer le contentement que vous desirez, pour le moins i'y employeray courageusement tout ce que i'auray de force & d'adresse : Si ie ne suis

assez heureux pour vous bien servir, vous ne vous en prendrez qu'aux destins & non pas à moy, donnez moy donc quelque conducteur ie m'en vay charger la cuirasse : Valeureux guerrier (luy dit le baron) il est trop tard pour donner quelque commencement à ceste entreprise, & par ce que le lieu auquel ma belle maistresse est captiue n'est esloigné d'icy que de mille pas tout au plus, il me semble que nous en deuôs remettre l'espreuve à demain, cependant ie vous laisseray s'il vous plaist dans la liberté de vos actions & parmy les doux diuertissemens que ces belles histoires vous donnent, afin que ie ne vous rende point triste ny melancholique par l'objet de mes pleurs que ie ne puis retenir qu'avec de la peine. Hé bien monsieur (dit l'extrauagant) vous en userez comme il vous plaira, quant à

moy ie seray fort content d'estre seul puis que ie ne sçauois iouir de vostre presence sans contraindre trop vostre humeur. Alors s'estans separés avec tous les complimens que l'on sçauoit dire, le baron le fist bien seruir au soupper & s'en alla tenir compagnie à toutes ces dames qui l'estoiét venu visiter auxquelles il conta en quelle façon il auoit preoccuppé l'esprit de son hôte.

Suite

Suite de l'adventure du cabinet des merueilles espreuee par l'extrauagant : Admirable inuention de la marquise d'Orbeil qui se feint estre Daraide pour donner fin à ceste adventure : Sarencontre avec l'hypocōdriaque: Les plaisans discours qu'ils eurent ensemble: Combat de ce cheualier lunatique cōtre deux gentils hommes vestus en sauuaiges: Autre combat qu'il eust contre vn ours : Sa cheute dās vn fossé plein d'eau dont le cabinet des merueilles estoit enfermé: Et quelle fust la fin de ceste entreprise.

CHAPITRE XV.



*LE Soleil commençāt à do-
rer la terre, toutes les dames
qui estoient chez le baron*

de la Tour quitterent le liēt, les seigneurs furent couuerts de leurs habits en moins d'un cart d'heure, & nostre cheualier n'ayant pas oublié la promesse qu'il auoit faite le soir precedent, eust la cuirasse sur le dos en vn mesme temps, de sorte qu'il demeura quelque espace de temps à se promener attendant que le baron parust pour le conduire à l'espreuue de l'enchantement à la ruyne duquel il vouloit employer ses forces. Pendant qu'il fantasticquoit mille choses sur l'occurrence des combats qu'il se promettoit en ceste entreprise, le baron mettoit ordre à tout avec vne peine incroyable, premierement il fist dejeuner tous ses hostes, enuoya son valet de chambre couuert de lierre à la porte du cabinet avec lours duquel ie vous ay parlé cy dessus, fist habiller deux gentilshommes des accoustre-

mens de sauuages qu'il auoit fait faire, leur mist à la main deux masses faittes d'un cuir bouilly fort dur, en fist peindre vne à la porte de son iardin laquelle estoit de carton remplie de foin & couuerte d'une grosse toile peinte, & ne voulant rien oublier de ce qui pouuoit seruir à son entreprise, y fist planter vn perron de bois avec vne table de mesme matiere sur laquelle ces parolles estoient escrites.

Cheualier, ie ne te veux pas donner sujet de te plaindre de ceux qui ont forgé cet enchantement, car ie t'aduiſe pour ton salut que le danger y est beaucoup plus grand que la gloire: Que si ton cœur est à l'esprouue de toutes les occasions qui peuvent faire trembler les hommes, prens ceste masse & commence tes aduentures avec la faueur de ta bonne fortune, sans l'assistance de laquelle tu ne verras iamais

*le precieux tresor qui est dans le cabinet
des merueilles.*

Toutes ces choses estans disposees de la façon que ie vous ay dist, il fist entrer au cabinet la princesse d'Alban, la duchesse d'Osmon, la contesse du mont des sauuages avec la petite Clarice, lesquelles auoient toutes des luths à la main, & les laissant avec l'esperance de ne point mal passer le temps parce qu'elles pouuoient voir fort facilement le combat des sauuages & de l'ours, il sortist pour aller sçauoir ce que vouloit faire la gentille marquise d'Orbeil laquelle n'auoit point voulu descouurir ses intentions à personne, mais comme il trauersoit la couril descouurist nostre extrauagant tout armé lequel treuuant la longueur du temps importune descendoit pour l'aller chercher. A nouuelles occa-

sions il faut des resolutions nouuelles : L'objet de ce cheualier luy ayant fait perdre la fantaisie d'aller à la chambre de la marquise, il s'auança vers luy pour le saluër, & luy ayant souhaitté le bon iour luy dist, hé bien seigneur estes vous prest? Vous me voyez (luy respondist-il) en estat de satisfaire à ma promesse, & par là vous pouuez iuger qu'il me tarde beaucoup d'en venir aux mains, monsieur nous commencerons quand il vous plaira: Attens donc (luy dit le baron) nous auons quelquefois des momens heureux qu'il ne faut point perdre : Alors ils commençoient tous deux à marcher quand vn lacquay se vint mettre à genoux deuant le baron avec ces parolles. Prince excellent, ie vous viens aduertir que la vaillante Daraide est arriuee en vostre cour avec vn extreme desir d'espreuuer l'aduenture du ca-

binet des merueilles, & d'en retirer Lucenie pour la captiuité de laquelle vous mourez mille fois le iour, aduisez s'il vous plaist à luy rendre l'honneur que merite sa rare vaillance, & l'intention qu'elle a de vous rendre quelque seruice: A ces mots le baron se treuuant surpris par ce qu'il n'entendoit pas ce langage, regardoit ce lacquay sans se pouuoir resoudre à respondre, & sembloit luy demander avec les yeux ce qu'il vouloit dire, quand il vist venir vne femme couuerte d'une cuirasse de carton doré par compartimens & par chiffres, le casque en teste ombragé d'une belle plume, portant vne riche espee en escharpe & marchant de si bonne grace que sa beauté iointe à la maiesté d'un port releué la luy fist admirer de loing sans la recognoistre. Son objet l'estonnant merueilleusement il s'avan-

goit pour la receuoir s'imaginant bien
que c'estoit quelque inuention pour
rendre leur entreprise plus belle, mais
quand il eust recogneu que c'estoit
Cleandrine marquise d'Orbeil, il s'a-
uança & deuinant tout aussi tost le
sujet qui l'auoit fait armer de la for-
te il iugea qu'il falloit aider à la feinte.
Ouurant donc les bras, & s'allant met-
tre à genoux deuant elle il luy dist. O
madame, la fortune m'a telle bien ay-
mé iusques à ce point que de vous fai-
re arriuer en ce lieu où i'ay tant d'af-
faire de vostre presence? Sans mentir
ie conte ce iour pour le plus heureux
de ma vie. Braue prince (luy dist la
marquise avec vne grauité nompa-
reille) ayent sceu par la voix de la re-
nommee que la fortune ne vous trait-
toit pas selon vos merites & vostre
vertu qu'elle vous auoit merueilleuse-
ment affligé par la perte de vostre

chere Lucenie, & que vous n'auiez receu aucune assistance de tous les cheualiers errans qui s'estoient presentés pour vous secourir, i'ay pris l'adresse de vostre maison pour esprouuer ceste aduventure, & vous tesmoigner que ie vous estime beaucoup, mais i'apprehede d'auoir pris ceste peine inutilement par ce que l'on m'a dist en entrant ceans que le fameux cheualier des tristes pensees auoit resolu de se ietter en ceste entreprise. Madame (luy dit le baron) la volonté que vous auez de m'assister ne m'oblige pas moins que l'effect, voila pourquoy mon ressentiment ne sera pas moindre que si ie iouissois par vostre moyen de ce que i'ay le plus désiré dans ce monde; Quant au reste il est tres-vray que ce vaillant cheualier duquel vous parlez, a fait le dessein d'aller à l'espreuue de ceste ad-

uenture, dieu vucille qu'il en vienne à bout avec autant de gloire qu'il merite ; Nous sommes en chemin pour cela vous en aurez le contentement s'il vous plaist. Comment monsieur (luy dit la marquise) est-ce là ce cheualier renommé par toute la terre ? Ouy madame dit le baron : Ah certes (reprist elle tout aussi-tost) ie n'ay pas perdu mes pas ny ma peine puis que i'ay le bon-heur de le voir & de le cognoistre, sur mon ame s'il ne me desdit nous serons amis & compagnons d'armes iusques à la mort. O madame (respondist alors nostre extrauagant) comme vous refuserois ie vne chose que ie vous deurois demander à genoux ? Sur mon ame ie suis plus content de vous voir que ie ne serois de la possessiõ de toute la terre : Vous madame dont les admirables promesses m'ont rauy mille & mille fois,

vous (dis-je) qui nous auez laissé des exemples d'une incomparable fidélité, desirez la compagnie d'un pauvre cheualier errant qui n'a rien que l'esperance & son espee ? Ah c'est un bon-heur que mon foible esprit ne scauroit comprendre & une faueur dont le prix est inestimable, voila pourquoy ie ne la refuseray point, au contraire ie vous demande par les merites de ceste incomparable beauté que vous auez nommé mille fois vostre vie & vostre deesse, ie veux dire par vostre Diane, que vous vous souueniez eternellement de la parolle que vous venez de proferer. Il est vray que l'affliction de ce braue prince de la Tour vermeille me touchoit le cœur, & que i'estois sur le point de luy aller chercher du remede ou de mourir en ceste entreprise: Mais puis que vous estes icy ie suis excusé de ce grād

travail, car ce seroit vouloir faire briller vne estoille deuant le soleil. Non non braue cheualier (luy dist la marquise) ie ne veux point desrober vostre gloire, & ie ne receuray pas moins de contentement d'estre iuge de vos combats que de combattre moy mesme & de vaincre les plus redoutables geans de la terre : Ne differez donc point ie vous en supplie, & tesmoignez en ceste aduventure que vous meritez les louanges que l'on vous donne par tout le monde. Puis que vous le desirez de la sorte (luy respondit-il) madame ie ne puis faillir en executant vos commandemens. A ces mots le duc de Saxalie, Floridanis & tous ceux de leur compagnie estans aduertis de l'inuention de la marquise d'Orbeil qu'ils treuuerent de fort bonne grace & qu'ils louèrent extrêmement, ils s'auancerent tous & pa-

rurent presqu'en mesme temps dans la cour, ce qui estonnant vn peu nostre cheualier qui ne les auoit point encor veus il se tourna vers la marquise & luy dit avec vn soufrire. Madame remarquez icy ie vous prie la puissance des charmes de vostre beauté & de vostre valeur tout ensemble: Personne ne paroissoit en ceste maison auant vostre abord, tout aussitost que vous y estes entree tout le monde s'y est treuue pour vous admirer, de sorte que i'apprehede beaucoup qu'il ne se trouue encor icy quelque nouveau roy de Galdap qui deuienne fou pour l'amour de vous sous l'opinion que vous soyez fille, ou bien quelqu'autre Fuzilee laquelle ayant cogneu vostre sexe deuienne insensee quand vous aurez refuse de satisfaire à ses passios. Madame, si cela vous arriuoit maintenant quelle resolution prendriez

vous? Celle que ie pris alors luy dit la marquise: Ie les laisserois plustost consumer tous deux dans leurs flames que de secourir Fuzilee comme Agefilan, ou le roy de Galdap comme Daraide au preiudice de l'amour que i'ay pour Diane. Ah certes (dit l'extrauagant faisant quelques mouuemens de la teste) voila respondre en Agefilan de Colchos, ie veux dire en prince fidelle, & non pas en don Rogel de Grece qui se mocquoit de la loyauté: Gentil prince conseruez vous tousiours pour ceste rompareille beauté, les recompenses que vous en aurez seront si douces qu'elles effaceront de vostre memoire le souuenir des traualx que vous endurez, quant à moy ie suis resolu de vous imiter en ceste loüable partie comme ie fais tant qu'il m'est possible en vos faits d'armes glorieux. Alors se pre-

nant par la main ils firent ensemble cinq ou six pas sur lequel temps don Clarazel s'arrestant tout court pour contempler la marquise qui auoit la meilleure grace du monde, il luy dist avec vn accent qui tesmoignoît quelque estonnement. O madame, à quoy pense-ie? Sur mon ame ie ne vous puis regarder qu'avec des rauissemens incroyables, sçauiez vous pourquoy? Non pas si vous ne me le dittes luy respondist elle en riant: Je m'esmerueille (reprist-il) comme vous vous pouuez treuuer icy maintenant avec ces habits, car vous les quittastes s'il vous en souuient avec le nom de Daraide quand vous fustes recogneu par la forte reyne Alastraxeree vostre mere apres le combat que vous eustes dás la Tour de Phœbus contre vostre cousin don Rogel sur la statue de don Florizel de Nicquee son pere que

vous auiez decapitee en pourfuiuant le roy de Ruffie, & puis il me semble que vous estes mort deux fois pour le moins? La premiere sur les terres du souldan d'Alape, lors qu'Amadis de Gaule, Esplaudian, Lifuard de Grece, Anaxartes, Falanges d'Astre, don Sylues, & les autres princes de Grece furent massacrés, & la derniere dans ceste redoutable iournee, où le mesme Amadis de Gaule, Amadis de Grece, don Florizel, don Rogel, Sphera-mond & tous les princes de leur sang furent tués encor vne fois par Brauorante roy de Morimont, Roussardan roy de Grifalare, Armalion, le redoutable Grifilant, & tous les autres roys payens lesquels furent aussi tous taillez en pieces: ie sçay bien que vous m'allez dire que vous fustes retiré du nombre des morts la premiere fois avec Amadis de Gaule, Florizel

de Nicquee & plusieurs autres par le moyen du geant Alcandre qui vous conferua dans le precieux chasteau du tresor, mais ie sçay bien que vous mourustes à la derniere dont ie vous parle, & par consequent ie m'estonne avec raison de vous voir viure maintenant. Cheualier (luy dit la marquize) ne vous esmerueillez pas de cela, vn autre magicien plus sçauant qu'Alcandre me resuscita, & fist si bien par l'incomparable vertu de ses charmes que ie reuins au mesme estat que i'estois lors que ie combatis le Caualion au chasteau de mont. Ah certes ie m'en doutois bien (luy dit-il) que vous deuiez viure en ceste facon, car c'eust esté vn tres grand dommage de faire mourir vn prince si vaillant que vous; Mais vous ne parlez point d'Amadis de gaule, de l'excellét empereur Amadis de Grece, du grand cheualier
du so-

du soleil, de don Belianis de Grece,
ny de tous ces princes vaillans qui fi-
nirent leurs iours glorieusement en
ceste deplorable iournee où vous
mourustes aupres du valeureux Falan-
ges d'Astre vostre pere, sont ils resus-
cités aussi bien que vous? C'est vne
question (luy dit la marquise) que
vous ne me deuez point faire au
moins ce me semble : car vous deuez
croire qu'on ne les a pas laissez au
tombeau puis que l'on m'en a retiré :
de vous dire où ils sont aujourd'huy,
ie ne le puis pas, & moins quād ils pa-
roistront les armes au poing parce
qu'il m'est deffendu de vous reueler vn
secret de telle importance, mais sou-
uenez vous que vous les verrez quel-
que iour ensemble dans vne bataille
dont la consequence sera tres-grāde,
cependant nous irons voir s'il vous
plaist quelle fortune vous est reseruee

en ceste dangereuse entreprise où vous estes tout prest d'entrer. Ce disant ils passerent outre, & se rendirent peu de temps apres à la porte du grand iardin où dō Clarazel ayant leu l'escriteau duquel nous auons parlé cy dessus, il prist vne masse de carró couverte d'vne toille peinte, laquelle estoit attachee au posteau, & frappant rudement du pied sur la porte l'ouurist sans beaucoup de difficulté. Son courage l'emportant alors il entra furieusement l'escu sur le bras, & la masse dans la main droite, & s'imaginant qu'il falloit vser d'vne diligence incroyable pour artiuier à ce fameux cabinet des merueilles qu'il voyoit desia, se prist à courir de telle roideur que sans la pesanteur de ses armes qui le contraignirent de s'arrester pour reprendre halaine, l'inuention des deux gentilshommes vestus en sauuages estoit

inutile. Ces messieurs prenans donc leur temps à propos l'aborderent sur ces entrefaittes, & faisant des grimaces du tout estranges le chargerent fort rudement de deux coups de masse avec vne ferme croyance qu'ils l'estourdiroient du premier abord; neantmoins ne s'estonnant point il s'auança courageusement contre eux, frappa le premier qu'il treuua, avec vne telle furie, qu'il l'eust assommé si sa masse eust esté capable de répondre à l'effort du bras qui poussoit le coup, & se tournant vers l'autre, avec vne dexterité qui fist esmerueiller ceux qui sçauoient la difficulté qu'il y a à faire de belles desmarches avec des armes, le choqua de telle furie, & luy porta deux ou trois coups si habilement qu'il ne sçauoit plus où il en estoit quand l'autre le vint secourir, avec deux grands coups de masse qu'il

rabatist sur la teste & sur les espaulles de l'extrauagant. Ces coups qu'il treuua merueilleusement rudes & pesans, parce que les masses de ces gentilshomes estoient d'un fort bon cuir bouilly, comme nous vous auons dit cy dessus, luy ayant fait tourner la teste il luy en rendist quelques vns, & deslors on vist un combat le plus agreable du monde, car ils s'escrimerent vne longue espace de temps de si bonne grace, qu'ils donnerent un contentement merueilleux à tous ceux qui les regardoient, & sans doute ce plaisir eust duré bien plus longuement si la masse de nostre cheualier eust esté plus forte, mais n'estant faite que de carton & de toile peinte, elle se mist en mille morceaux par un accident que ie vous vay dire. Ce malheureux ayant receu presqu'en mesme temps trois ou quatre coups sur la teste qui l'auoient fait

chancellor en se reculant, il deuint tellement furieux parce que ce malheur luy estoit arriué deuant Daraide, qu'il choisist plustost de mourir que de n'auoir point sa reuanche. Iettant donc sa rondache sur la poussiere il prist la masse avec les deux mains & la porta de telle roideur sur la teste de ce-luy qui se rencontra deuant luy qu'il l'enuoya tóber à trois pas de là, quoy que sa masse se mist en pieces par la violence du coup: Neantmoins ce gentilhomme fist ses demarches & son action si bien à propos qu'il fist croire à tous les assistans qu'il estoit tombé de son mouuement comme le baron de la Tour luy auoit commandé de faire. Ainsi se tenant estendu, il tourna la teste pour voir comme il arriueroit du combat de son compagnon, toutefois il n'en eut pas le plaisir qu'il en esperoit, car don Clarazel se voyant

sans masse mist soudain la main à l'espee, & se tournant furieusement vers celuy qui le poursuiuoit l'alloit mettre au nombre des morts s'il n'eust pris sagement la fuitte comme le seul moyen qui luy restoit pour se garantir de ses mains. Ce pauvre fou l'ayant donc perdu de veüe en moins d'un moment, & ne voyant plus personne qui luy deffendist le passage il s'en alla droit au cabinet duquel estant desia fort proche il descouurist l'ours que le valet de chambre du seigneur de la Tour tenoit attaché d'une corde. Ce fust alors que son cœur naturellement genereux conceut l'esperance d'une grande gloire puis que les difficultés estoient grandes : Il s'auança sans auoir peur, & entédant gronder ce gros animal luy porta la pointe de son espee tout droit dans le muse : Surquoy cet ours deuenant

furieux s'eslança de telle roideur contre luy qu'ayant entraîné le valet de chambre qui le retenoit de toute sa force il l'alla lier avec ses deux bons merueilleux. Si le plaisir auoit esté grâd par le combat des deux sauuages la crainte fust extreme en ceste seconde rencontre, car cet ours ayant esté mis là seulement pour faire peur à ce cheualier plustost que pour le faire seruir à sa rage, on n'eust iamais pensé que la chose fust venue au point où on la voyoit, de sorte que Philodamant, Floridanis, & le baron de la Tour s'auancerent l'espee à la main pour secourir cet extrauagant : Mais luy qui les vist approcher avec la marque d'Orbeil eust si grande honte de receuoir de l'assistance de quelqu'un contre vn animal, que faisant vn effort merueilleux il se desgagea de ses bras velus, luy mist l'espee au tra-

uers du ventre, & se retirant avec vne disposition du tout admirable s'approcha de la marquize d'Orbeil plustost quedu duc de Saxalie, Floridanis, ny des autres ausquels il voyoit l'espee à la main, car s'imaginant qu'elle venoit pour l'assister il luy dit. Incomparable Daraide, au nom de dieu laissez moy combattre tout seul, & ne m'enuiez point la gloire que ie puis acquerir en ceste aduenture. Non non gentil cheualier (luy respondist elle autant satisfaite de son courage qu'elle estoit marrie de son malheur) ie ne m'approche pas pour participer à l'honneur de vos actions, mais bien pour les admirer & vous secourir à l'extremité: Allez poursuiure vostre victoire i'en receuray vn contentement nompareil. A ces mots don Clarazel tournant la teste vers son ours lequel estant blessé à la mort

iettoit des cris si effroyables qu'il faisoit trembler tous les assistés, luy mist encor son espee au trauers des trippes, & le laissant couché sur la terre sans pouuoir nuire à personne passa outre pour entrer dans le cabinet. Mais ô dieux! que succedat il à la gloire de ceste action genereuse? Vn malheur qu'il n'attendoit pas, & qui pourtant luy auoit esté préparé pour faire rire la compagnie; Tout aussi tost qu'il eust mis le pied sur le pont qui ne manqua point de tourner on vist voller son escu d'un costé, son espee s'en alla de l'autre, & luy fust poussé de telle roideur par les aix qui luy donnerent contre les fesses qu'on le vist enseuelir dans l'eau verte de ce fossé avec vn plaisir nompareil. Toutefois le seigneur de la Tour ayant crainte qu'il n'y demeurast tout à fait à cause de la pesâteur de ses armes il fist

ietter vn grand lacquay dans l'eau
presqu'au mesme temps, lequel l'ayât
pris par le bras le fist leuer avec toutes
les peynes du monde. Ce lacquay
estant bien instruit de ce qu'il deuoit
faire l'appuya contre la muraille, luy
osta son casque, & le treuant tout
estourdy qu'il ne se cognoissoit quasi
point il luy dist. Courage cheualier
courage, & ne vous estonnez point
pour si peu de chose, les grands mal-
heurs suiuent les grandes entreprises
comme les grandes louïanges en de-
pendent: Vous auez fait des miracles
en ceste aduenture, la fin en est reser-
uee à quelqu'autre plus heureux, mais
non point plus vaillant que vous, il
faut auoir de la patience & remercier
en vostre ame la sage Vogande la des-
cogneuë qui m'a tiré d'aupres de Ne-
ptune pour vous venir retirer du
fonds de ces eaux sous lesquelles vos

destinees auoient resolu vostre sepulture. A ces mots le laissant contre la muraille il se ietta dans l'eau, & sçachant bien nager se rendist tout incontinent de l'autre costé du cabinet où quelques vns de ses compagnons luy ayans tendu vne eschelle il alla reprendre ses habits qu'il auoit laissés pour descendre dans le fossé. Cependant nostre pauvre hypocondriaque estoit si troublé qu'il ne se cognoissoit quasi plus, car se treuuant dans l'eau iusqu'à la ceinture sans aucun moyen d'en sortir, & voyant vne infinité de gentils-hommes appuyez contre les balustres du fossé, vingt ou trente damoiselles d'un autre costé lesquelles le voyans en ceste posture ne se pouuoient empescher de rire à gorge deploiee, il ne sçauoit à quoy se resoudre, & demeura vne fort longue espace de temps à regarder de toutes parts sans

pouuoir parler; Mais enfin reprenant vn peu ses esprits & se souuenant fort bien de tout ce qui s'estoit passé peu auparauant il s'escria. O mó dieu quelles trahisons on fait ordinairement aux bós cheualiers? Sur ma foy ie creue de rage de ne tenir point les magiciens en diables lesquels ont forgé tel enchantement de la sorte, car ie ne manquerois point de les mettre en pieces en dépit de tous leurs demós: Toute-fois dequoy me plains-ie? il les faut auoir & les aller chercher iusques aux extremités de la terre puis qu'ils ne m'ont peu faire mourir en ceste eau punaise. Ce disant il remist son casque encor tout plein d'eau sur la teste, & voulust grimper contre la muraille, mais s'estant laissé tomber dans l'eau trois ou quatre fois tout au mesme téps qu'il en estoit hors il vist bien qu'il ne sortiroit iamais avec ses armes, de sorte

qu'il commençoit à tirer son casque pour le laisser dans le fossé avec sa cuirasse quand la marquise d'Orbeil qui veritablement estoit genereuse luy fist ietter l'eschelle par laquelle on auoit tiré le lacquay. Le trouble de son esprit n'estant pas alors assez grand pour l'empescher de discerner ce que l'on faisoit, il remarqua bien que c'estoit la marquise d'Orbeil qu'il estimoit estre don Agefilan de Colcos quiluy faisoit ceste courtoisie, dequoy n'estant gueres moins satisfait que des combats qu'il auoit heureusement faits deuant luy, il luy parla comme à Daraide, & luy dit assez hautement. Madame, la grace que ie reçois maintenāt de vous fait bien cognoistre à tout le monde que vous sçauiez par experience les extremités ausquelles les bons cheualiers se trouuent souuent, ie recognoistray quelque iour vne obliga-

tion si puissante, pour le moins ie publieray par toute la terre que vous n'estes pas moins charitable que belle & vaillante: Cependant ie fortiray de ce lieu puant pour aller tenter encor vne fois l'adventure de ce cabinet des merueilles puis que le secours que vo⁹ me donnez m'en laisse les occasiōs. Alors s'estant souuenu que son espée & son escu estoient dans l'eau il fist tant de tours à droit & à gauche qu'il les rencontra, ce qui l'ayant plus resiouy que ie ne vous sçaurois exprimer il remōta tout incontinent & s'alla mettre à genoux deuant la marquise d'Orbeil pour la remercier du bien qu'il auoit receu par son assistance, à quoy ceste dame respondant fort courtoisement luy dit. Vaillant cheualier ie n'ay fait que ce que la loy de cheualerie m'obligeoit de faire pour vous, voila pourquoy ne m'en faites point de remer-

ciment: ie vous viens d'ouyr dire au moins ce me semble que vous voulez tenter encor vne fois la fortune, ie ne vous le cōseille pas, la raisó? C'est que vo⁹ auez deu iuger par le málheureux succés que vous auez eu en ceste entreprise que la gloire de ceste aduventure estoit reseruee à vn autre: ie vay recevoir la mesme disgrace que vous, ou bien parachuteur heureusemēt ce que vous auez cōmencé avec tāt de valeur & tāt de courage. A ces mots ayāt fait auparauant arrester le pont par le moyen du valet de bois qui le soustenoit, elle s'auāça, surquoy la princesse d'Alban, la duchesse d'Osmon, la comtesse du mont des Sauvages commençans à toucher leurs luts, Clarice y messa sa voix de si bōne grace que ce cōcert fust capable de raur ceux qui l'entendoient: En effet la marquise estant entree dans le cabinet avec no-

stre hypocondriaque, le duc de Saxa-
lie, Floridanis, le baron de la Tour, &
cinq ou six autres, ce cheualier se lais-
sa charmer en telle façon que ne res-
sentant point la fraischeur de l'eau
qui le faisoit trembler malgré qu'il en
eust, il se mist à genoux deuant elle
comme il auoit veu par imagination
le prince Anastarax deuant Nicque
lors qu'il la contemploit en sa gloire.
Ceste posture ayant encor fait rire ces
dames malgré qu'elles en eussent, Pri-
scalie princesse d'Alban prist vne bel-
le couronne de fleurs qu'elle auoit mi-
se sur ses cheueux, & la posa sur le cas-
que de ce malheureux qui en receut
vn contentement incomprehensible,
mais sa ioye ne fust pas de longue du-
ree, elle la retira presqu'au mesme
temps pour l'aller mettre sur la teste
de la marquize, deuant laquelle s'e-
stant mise à genoux avec ses compa-
gnes

gnes, ceste belle dame les baïsa toutes à la iouë, & faisant signe à cinq ou six gentilshommes auxquels elle auoit dit le petit mot leur fit tirer huit ou dix coups de pistolets lesquels retentissans merueilleusement en ce cabinet, nostre hypocondriaque creut que c'estoient des coups de tonnerre qui signifioient la fin de l'enchantement, de sorte que courant embrasser la marquise il luy dit. O madame, ie me doutois bien que ceste aduëture estoit reseruee à vostre merite, & que i'en tentois le hazard temerairement, mais ie me console en vostre bon-heur duquel ie ne suis pas moins aise que s'il m'estoit arriué selon mon desir: Quant à ces dames (parlant de Priscalie & des autres qu'il croyoit fermement auoir esté defenchantees) elles se souuiendront de vous tant qu'elles viuront, pour le moins elles y

sont merueilleusement obligees, alors les allant caresser comme s'il les eust bien cogneus, il leur dist tant de choses à la louange de la marquize qu'il appelloit tousiours Daraide, que le cronicqueur Galerfis n'en dit iamais tant en sa grande histoire: D'autre costé ces belles dames luy firent mille remerciemens des choses esmerueillables qu'il auoit faittes pour leur deliurance, si bien que se contentant du ressentimēt qu'elles en tesmoignoiēt, il creut auoir bonne part à la gloire de ceste aduventure, & sur ceste bonne opinion, il se laissa conduire en triomphe avec la marquise iusques au chasteau où le baron le faisant soigneusement traicter & seruir luy enuoya vne paire de beaux habits avec lesquels il vint treuuer la compagnie vne heure auant qu'on voulust soupper.

Admirables discours tenus entre Priscalie, Philoxenee, Armoriane & nostre cheualier hypocondriaque sur les noms de Lucelle, Miralinde & Clairangie que ces belles dames empruntèrent: Meschanceté nompareille d'Armoriane pour se vanger de l'extravagant: Recit de toute ceste aduventure: Et quel fust le ressentiment de don Clarazel.

CHAPITRE XVI.

Es vents ne soufflent pas tousiours, les ondes de la mer ne sont pas esmeuës par des tempestes continues, & comme l'esprit des hommes n'est pas tousiours dans vne parfaite tranquillité, il n'est pas aussi per-

petuellemēt pressé de tristesse & d'inquietude? Vn si grand nombre de gentilshommes & de dames qui estoient assemblés à la tour diuertissans la douleur de don Clarazel il oublia le suiet de son deplaisir, il perdist pour vn peu de temps la memoire de Syluiane, & se voyant caressé des vns & des autres, il commença de familiariser avec tout le monde. Chacun parlant donc du combat admirable qu'il auoit fait contre les sauuages, de l'assurance merueilleuse qu'il auoit tesmoignée à l'abord del'ours qu'il auoit vaincu courageusement & sans artifice, du malheur qu'il auoit eu en passant le pont, & par consequent de la gloire de Daraide laquelle auoit deliuré de l'enchantement quatre dames des plus parfaittes de la terre, il s'aduifa que la curiosité de sçauoir le nom de ces dames estoit necessaire pour quelque

raison, voila pourquoy s'adressant de fort bõne grace à la princesse d'Alban il luy dist. madame, toute la peine que la vaillante Daraide & moy auõs prise pour vous rendre quelque seruice ne nous apporteroit pas tant de contentement que de gloire si nous ignorions qui vous estes ; Au nom de dieu faites nous la faueur de le dire afin que nous tirions de nos actions toute la satisfaction que nous en auõs esperee. Vaillant cheualier (luy dit la princesse) certes il est tres raisonnable qu'ayans des obligations si puissantes à vostre valeur nous cõtentiõs vostre desir en tout & par tout. Je suis Lucelle fille d'Alpatrace roy de Cicile pour l'amour de laquelle l'excellent cheualier de l'ardente espee fist des miracles en l'Isle de Silanquie, alors la plus glorieuse princesse du monde par les affections de ce cheualier indomtable

que ie possedois, maintenant la plus malheureuse qui viue par le mespris qu'il a fait de moy pour donner toutes ses pensees à Niquee. Ah madame (dit-il s'abbaisant iusques sur la terre) permettez s'il vous plaist que ie baise vos belles mains ; Certes i'auois tousiours bien creu qu'il y auoit quelque chose de precieux en ce cabinet des merueilles lequel meritoit ce furnô pour l'amour de vous. Ah! vous descouriray-ie icy toutes mes pensées? Ouy madame ie ne m'en puis empescher maintenant : Scachez que i'ay mille fois loué vostre amour, vostre fidelité, vostre modestie, & que i'ay voulu mal de mort mille fois au redoutable empereur Amadis de Grece parce qu'il abusoit malicieusement de vostre bôté, & qu'il en adoroit vne autre qui ne valoit pas mieux que vous, que si i'eusse esté de son temps ie

l'eusse infailliblement combattu sur ceste querelle, neantmoins puis que vous luy auez pardonné i'ay iugé que mon ressentiment ne deuoit pas aller au de là du vostre, & que ie le deuois honorer par la cōsideratiō de sa naissance & de sa valeur. Je suis extrememēt satisfait de vostre rencontre, & me reputé tres-heureux de vous auoir veüe, sçachons ie vous supplie si ie receuray vn pareil contêtement de la cognoissance de vos compagnes? Madame (poursuiuiſt il adressant sa parolle à Philoxence duchesse d'Osmon) ie vous prie dittes moy aussi qui vous estes? Cheualier (luy respondist-elle) vous estes si braue que l'on ne vous sçauroit refuser quelque chose sans crime, aussi donnant à vostre merite ce que vous voulez plustost qu'aux obligations que ie vous ay, ie vous diray que ie suis Miralinde femme de

don Clarizel de Guindaye? Vraymée
madame (luy dit-il) ie croy ce que
vous medittes avec beaucoup d'ap-
parence, car ie vous voy maintenant
telle qu'on vous a quelquesfois de-
peinte, c'est à dire parfaitement belle
& presqu'adorable : O combien de
fois vous ay ie admiree, & quelles pa-
rolles n'ay ie point trouuées pour re-
commâder quelques fois vostre cha-
steté? Sans mentir, quand ie vous vo-
yois de nuict au milieu d'un bois cou-
chee seule avec vostre amant sous des
arbres, quand i'entédois les puissantes
raisons qu'il vous alleguoit pour vous
persuader que vous deuiez donner du
soulagement à sa peyne, & quand ie
voyois vn ruisseau de pleurs sur vostre
visage, que la compassion de son mal
faisoit distiller de vos yeux ie m'ima-
ginois que vous ne resisteriez iamais à
tât d'amoureuses attaques que sa pas-

ſion vous donnoit, mais quand i'eus
ouy vos reſponſes, que i'eus entendu
vos raiſons pour cōbattre ſa fureur &
ſes mouuemens, & que i'eus veu avec
quelle force d'eſprit & quelle gran-
deur de courage vous repouſſaſtes ſes
aſſants, ie m'eſtonnay comme eſtant
ſimple bergere vous pouuiez auoir
tant de iugement & de retenuë, ie
m'eſcriay que vous eſtiez la merueille
des dames du monde, & ie diſ tout
haut que voſtre vertu deuoit deſor-
mais ſeruir de modelle à toutes celles
qui vouloient viure glorieuſement &
ſans crime; l'ay dit tantost que le ca-
binet qui vous retenoit enchantee
meritoit bien d'eſtre appellé le cabi-
net des merueilles: parce que l'excel-
lente princeſſe de Cicile y eſtoit, ie diſ
maintenant qu'il y falloit adiouſter
pour l'amour de vous le cabinet des
merueilles incomprehenſibles, de ſor-

te que ne vous deuant pas moins de respect qu'à la belle infante de Cicile, parce que vous estes femme d'un prince vaillant comme elle a esté maistresse d'un cheualier incomparable, ie vous supplieray de me donner aussi vos mains à baiser afin que ie satisfasse tout d'un mesme temps à vostre merite & à mon desir: Ce disant il mist les genoux à bas deuant elle, luy baïsa les mains malgré qu'elle en eust, & se relevant tout incontinât il tourna les yeux sur la contesse du mont des sauvages à laquelle il dist ces parolles. Madame, n'ayant pas moins d'enuie de vous rendre quelque seruice qu'à ces dames incomparables qui m'ont fait l'honneur de se descouurir à moy franchement, vous ne serez pas moins courtoise qu'elles, au moins s'il vous plaist, & comme vous auez veu qu'elles ont parlé sans se faire tirer l'oreille

vous me direz aussi qui vous estes? En verité seigneur cheualier (luy respondit-elle) ie ne voudrois pas que vous eussiez plus de sujet de vous plaindre de moy que vo⁹ auez d'elles, parce que ie ne suis pas moins sésible à vos bien-faits, ny moins amoureuse de vostre vertu. Sçachez dōc que ie suis Clairangie la belle reyne de Romerie. Ah madame (dit-il alors l'interropant à ceste parolle, & faisant trois ou quatre pas en arriere comme s'il eust apprehendé de s'en approcher) pardonnez moy si ie vous dis que ie ne vous sçauois beaucoup estimer parce que vous auez failly contre la foy que vous deuiez à vostre mary? Falgoran de Canabee estoit braue & vaillant, il est vray, mais que ses rares perfections seruent d'excuse ou de couuerture à vostre impudicité si cogneuë, c'est ce que vous ne me ferez pas à croire, parce

que le vice n'est iamais vertu quelque habit qu'on luy donne pour le defguiser; Dittes moy ie vous prie qu'eust il esté de vostre vie si vous n'eussiez esté secouruë par vostre amy lors qu'on vous exposa au feu, en quel danger estoit vostre honneur, & ne pésiez vous point auoir donné de tresmauuaises impressiôs de vostre vertu à tous ceux qui vous cognoissoient quoy que la victoire de Grandimore & de Falgoran donnast quelque opinion de vostre innocence? Non non, sur ma foy vous ne pouuez dire que vous ne vous exposastes à vn peril du tout euidet, & quant au reste ie vous assure que tout le monde parle de vous comme d'une femme meschante & sans foy; de sorte que vous ne vous deuez pas estonner si ie ne vous réds pas les mesmes hôneurs que i'ay fait à ces belles dames parce

que vous ne les meritez pas. A ces mots faisant encor quelques petites demarches en arriere il rendist cette pauvre femme qu'on soupçonnoit veritablement de quelques pratiques secrettes, si confuse & si estonnee qu'elle ne sçauoit à quoy se resoudre ny que luy respondre, & d'ailleurs tous les assistans s'esclattans de rire de voir avec quelle innocence il disoit vne chose qu'on tenoit pour toute asseuree, disoient sourdement que la verité se treuuoit tousiours dans la bouche des enfans, des yurongnes & des foux, de sorte que la cōtessè voyāt que chacun parloit à l'oreille entra tellement en colere qu'elle fust sur le poinct de tesmoigner qu'elle s'offençoit du discours de cet extrauagant, & plus encor des actions de la compagnie: Neantmoins mettant vne bride à la passion parce qu'elle iugea tout

incôtinât qu'elle l'interesseroit beaucoup plus par vne boutade que dans la verité de la chose elle se retint & se mist à rire comme tous les autres qui firent faire mille contes à ce pauvre fou; Toutefois ne pouuant demeurer contente si elle ne se vengeoit de luy en quelque façon que ce fust, elle cômencea de songer aux moyès qu'elle auoit d'auoir sa reuanche. Son esprit estoit fort present, & sa colere luy fournissant vne infinité de subiets elle treuua tout incontinent vne admirable inuention laquelle reussit selon sa pensee côme ie vous diray tout à ceste heure. Elle enuoya son valet de châtre chercher d'vne poudre qui fait plus faire de pets en vne heure qu'un bon Philosophe ne sçauroit treuuer d'argumēs en vn an sur quelque sujet que ce soit, l'aduertist de la donner à son page avec commandement

de la faire prendre à l'extrauagant dās du vin, & l'ayant amplement instruit sur les desseins d'vne aduventure qu'elle auoit proiettee en son esprit, luy commanda que toutes choses fussent prestes au bout de deux heures. Ce valet de chambre ayant bien compris toutes les intentions de sa maistresse ne manqua point d'aller au bourg prendre de la poudre chez vn appoticaire, la mit entre les mains du page qui s'acquitta tres-dignement de ceste petite commission, & de là s'en alla preparer le reste avec vne diligence si grande que la contesse treuua la mine en bon estat quand il la falust faire iouer. Le souper ayant donc esté magnifique, le diuertissement du tout agreable, car il y auoit tousiours quelque petit trait en campagne pour faire aualler les viandes à force de rire, & plus de trois heures s'estans escou-

lees parmy des contentemens incroyables, chacun parla de s'aller coucher, surquoy la contesse faisant signe à toutes ces dames, au duc de Saxalie, à Floridanie & aux autres qu'il y auoit quelque chose sur le tapis, on laissa sortir l'hypocondriaque tout seul. Si tost qu'il fust hors de la porte, les fenestres qui regardoient sur la cour furent pleines en vn moment, car la contesse y estant allee chacun y courust pour y auoir place. Mais si le desir de sçauoir ce que l'on feroit auoit esté grand, la merueille ne fut pas moindre quand on descouurist au milieu de la cour quatre grands flambeaux allumez aux quatre coings d'une longue table, sur laquelle il y auoit vn homme estendu portant sur ses cheueux vne couronne de carton doré, & tenant avec les deux mains vn poignard, la pointe duquel estant plantée dans

tee dans ceste table sembloit luy tra-
uerfer le col. Les fenestres estans vn
peu trop esloignees pour bien voir
toutes les particularitez de ceste ad-
uenture personne n'y voulust demeu-
rer, ils descendirent tous à la cour, &
parce qu'ils virent que l'hypocon-
driaque s'estoit arresté pour confide-
rer ces merueilles, ils enuironnerent
tous le tombeau pour voir ce qu'il ar-
riueroit de ceste entreprise. En effet ce
cheualier ayant eu cet objet tout au
mesme temps qu'il estoit entré dans
la cour s'estoit approché & regardoit
alors ce corps esté du sur la table avec
vn rauissement si profond qu'il ne
vist point arriuer toute cette bande.
Son imagination estant disposée à re-
cevoir beaucoup de folles impres-
sions, il creut tout aussi tost que c'e-
stoit quelque roy malheureusement
assassiné, le corps duquel auoit esté

apporté là par enchantement, & par consequent il conclud de venger sa mort, comme il y pensoit estre obligé par les loix de cheualerie. S'approchant donc de la femme de chambre de la contesse laquelle estoit alors dans vne chaire aux pieds de ceste table il luy dit: Mademoiselle à ce que ie voy vous estes icy pour rendre raison de la mort de ce pauvre roy & des secrets de ceste aduventure. Au nom de dieu declarez moy ce que vous en sçauiez afin que vous ne mancquiez point d'assistance si mes armes sont necessaires à vostre repos ou à la satisfaction de quelque princesse offencee. Vertueux cheualier (luy dist ceste femme que la maistresse auoit instruite fort à propos) pardonnez moy si d'un premier abord ie vous desnie ce que vous me demandez avec tant d'instance, il m'est deffendu par les

loix de ceste aduventure de vous en declarer le secret que vo⁹ ne soyiez obligé par serment de m'oétroyer vn dó tel que ie le voudray de vous? Mademoizelle (luy repliquat il) vous auez tort de me demander quelque chose, car ie sçay bien que les bons cheualiers n'entreprennent iamais aucune aduventure qu'auec les conditions que vous dites, voila pourquoy comme ie vous accorde de tresbon cœur tout ce que vous auez desiré de moy, vous auez deu croire que vous le demandez inutilement: Parlez donc hardiment, & me dittes comme s'appelloit ce roy malheureux, & qui sont les traistres qui l'ont meurtry si cruellement? Seigneur cheualier (luy dit-elle) puis que vous vous obligez volontairement, il est tres-iuste que ie m'acquitte fidellement de la charge quel'on m'a donnee, qui est d'esclair-

car tous les cheualiers qui entrepren-
dront l'aduenture de toutes les choses
qui la regardent. Sçachez donc que ce
prince que vous voyez fust surpris il y
a quelque temps de sept ou huit pen-
dars lesquels ayans resolu d'vsurper
sa couronne luy porterent le fer à la
gorge comme vous voyez, & l'eussent
acheué sans doute, si Vrgande la des-
cogueuë arriuant sur ces entrefaittes
dans vn char de feu n'eust arresté vn
autre coup que ces meschans luy al-
loient planter dans le cœur, & ne les
eust fait tomber sur la terre si bien pri-
uez de sentiment que commençans à
se rouller depuis l'vn des bouts de la
salle à l'autre avec des mouuemens de
rage, ils oublierent le furieux desir
qu'ils auoient d'acheuer ce bon che-
ualier: Vrgande estant extremement
bonne & l'aymant beaucoup, car il
faut que vous sçachiez que c'est don

Guillan le pensif fort bon amy d'Amadis de Gaule elle l'enchantà tout à la mesme heure & me commanda de le mener par toute la terre iusques à ce que i'eusse treuue deux autres Amadis au moins en cas de valeur & de loyauté, le premier desquels ayant conserué la vie à ce bon cheualier se coucheroit aussi sur ceste table pour y attendre le second avec l'ayde duquel il extermineroit tous les traistres qui auoiēt attenté à sa vie. Voila le veritable recit de cet accident, vous avez enuie de sçauoir si la fortune vous a reserué l'honneur de ceste aduventure, vous avez iuré d'observer les conditions avec lesquelles on vous en permettra l'espreuue, il ne reste plus qu'à bien faire, allez baiser ce roy malheureux, apres cela vous sçaurez le reste. Nostre extrauagant qui croyoit que toutes les choses du monde ne fussent fai-

tes que pour sa gloire, ayant entendu ce discours s'auança tout incontinent, & ne manqua point d'aller ioin-
dre ses leures à celles de ce nouveau Guillan le pensif, mais il se recula plus
viste qu'il ne s'en estoit approché, car ce malicieux ouurant la bouche ino-
pinément luy prist avec les dents le bout du nez qu'il esgratigna parce
qu'il ne le peut retenir, surquoy ce pauvre malheureux se reculant tout
en desordre. Ho ho (dit-il) quelle estrange aduventure est icy, les morts
veulent mordre? Monsieur (luy dit la femme de chambre qui se mist à ri-
re avec les autres) ne vous estonnez point de cela ie vous en supplie; ce
cheualier veut espronuer en ceste fa-
çon si vous estes capable de peur, &
pas consequent si vous estes vn de
ceux ausquels l'honneur de ceste ad-
uventure est promis. Voila que c'est

(dist l'extrauagant) que d'ignorer les particularitez d'une chose, si i'eusse sçeu ce que vous me dittes, ie ne me fusse iamais reculé quand il eust deu m'emporter le nez avec les dens, mais que voulez vous il n'y a remède, cela prouient de mon ignorance plustost que d'une foiblesse de cœur, venons au reste ie vous prie, que faut-il que ie fasse encor? Il faut (luy dit-elle) que vous le baisiez derechef sans faire parestre aucun signe de lascheté, & qu'apres vous luy arrachiez des mains le poignard qui le trauerse cruellement. Bien bien (dit-il) puis que la faute que i'ay faitte se peut reparer, vous verrez ce que ie feray pour tesmoigner que i'ay le cœur bon. Ce disant il ioignit encore vne fois sa bouche à celle de ce valet de chambre, lequel l'empoignant avec les dés le mordist si fort à la iouë, que luy ayant veu

souffrir vne douleur extreme sans s'escrier, il fust luy mesme contraint de la lascher pour se mettre à rire parce que tous les assistans qui scauoient bien ce qui se passoit rioyent à gorge desployee. Don Clarazel prenant bié son temps se retira fort promptemēt, & mettant la main sur la garde du poignard qu'il tenoit l'arracha de telle furie, que l'emportāt sans resistance il alla donner des espaules cōtre la terre, neātmoins il ne demeura pas longuement en ceste posture: car s'estant leué avec vne prōptitude incroyable & vn contentement nōpareil, il s'approcha de ce valet de chambre & luy dist. Gentil cheualier, ie suis si content de vous voir dans l'vsage de vostre raison que ie reputeray tousiours ceste aduenture pour vne des plus glorieuses qui m'arriueront de ma vie. Certes mōsieur (luy dit alors la fem-

me de chambre empeschant la respõse que ce valet luy alloit faire) vous vous pouuez bien aussi vanter d'auoir autant fait qu'eust peu faire Amadis de Gaule, mais vous n'estes pas encor à la fin, il faut subir les conditions que l'on vous a proposees à l'abord. Certes (dit il) mademoiselle ie n'appelleray pas de vostre sentence, & vous pourrez disposer de moy comme il vous plaira. Couchez vous donc sur ceste table (luy repliquat elle) apres cela i'iray supplier tous ces cheualiers d'espreuuer l'aduenture de l'enchantment auquel vous ferez en la place de don Guillan, & si ie suis assez heureuse de treuuer vn second Amadis que ie cherche, nous partirons quand il sera temps pour aller deffaire ces traistres. A ces mots, nostre extrauagant ne s'estant point fait importuner s'estendist dessus ceste table, au-

quel moment quatre grands pédarts
lesquels estoient cachez deffous pas-
sans subtilement des cordes par huit
ou dix trous le lierent si estroittement
qu'il ne se pouuoit remuer: toutefois
luy qui creut que c'estoit de la condi-
tion de l'enchantemēt ne fist pas sem-
blant de sentir ce qu'on luy faisoit.
Estant attaché de la sorte il y en eut
vn qui desnoüa son esguillette pour
effectuer le commandement qu'ils
auoient qui estoit del'estriller deffus
& deffous, mais la poudre qu'il auoit
prise à son souper venant alors à faire
son operation il fist cinq ou six pets
avec tant de bruit que tous les assistās
se mettans à rire à bon escient, ceux
qui se préparoient à luy faire tomber
ses puces se prirent aussi par le ventre,
de sorte qu'ils luy donnerent vn peu
de relasche, pendant lequel ce pauvre
fou qui s'imaginant que ces vents pro-

uenoient de la force de l'enchantement petoit tousiours avec plaisir, & riant d'aussi bon courage que pas vn des autres disoit hautement. Messieurs pour le moins vous remercieriez s'il vous plaist ces bons magiciens qui ont forgé ceste aduventure de ce qu'ils vous donnent à boire d'un si bon tonneau, & continuant à peter leur disoit mille sornettes & bouffonneries; Mais ô dieux quel reuers a ceste medaille? Comme il reïteroit ces premiers mots pour la quatriesme ou cinquiesme fois on luy rompist son esguillette, on tira ses chausses en bas, & il sentist vne charge de coups de fouëts qui luy tomberent sur les cuisses avec tant de violence que ne les pouuant endurer il se prist à crier à l'ayde. Iusques là la farce estoit bõne, & tout le monde auoit treuüé la vengeance de la contesse tres gentille &

de bonne grace, mais quand on luy vist decoupper la peau si cruellement on s'offença fort de ceste action, principalement le baron de la Tour dás la maison duquel il estoit, & la gentille marquise d'Orbeil, laquelle s'auançant brusquemét sous les armes qu'elle auoit porté tout le long du iour chassa ces marauts à coups de bastón, & fist deslier ce fou malheureux. Tout le monde pensoit que ceste action deust estre la fin de la comedie: Toutefois on en vist à l'instant vne autre laquelle n'apresta gueres moins à rire que la precedente; Nostre extrauagant sentant encor la douleur des coups qu'il auoit receus, releua ses chausses le plus promptement qu'il luy fust possible, & voyant encor les verges à la main de ceux qui l'auoient battu, chargea dessus à coups de poing avec vne telle furie qu'il en renuersa deux par terre


des deux premiers coups, & parce que les autres gaignoient au pied il danſa ſi bien ſur le ventre de ces deux icy qu'il les euſt creué infailliblement ſi la marquife d'Orbeil ne l'eueſt prié de leur pardonner. A ces mots deuenant plus doux qu'un aigneau il laiffa courir vingt ou tréte perſonnes en diuers endroits lesquelles apprehendans vne pareille tempeſte ſur leurs eſpaules s'eſcarterent comme des perdreaux, & ſe tournant vers la marquize par le moyen de laquelle il croyoit eſtre deliuré de l'enchantement auquel il eſtoit il luy diſt. Madame, ie m'imaginois bien que l'honneur de ceſte aduenture n'eſtoit reſerué qu'à voſtre vertu, ie vous ſuis eſtroitement obligé de ma deliurance ie vous ſeruiray quand il vous plaira, cependant nous ſongerons à nous mettre aux champs pour chaſtier les traiftres qui ont ren-

du tant de desplaisir au braue don
Guillan le pensif qui fust si bon amy
d'Amadis de Gaule. Vaillant cheua-
lier (luy dit la marquise) ie deuois à
vostre merite le secours que ie vous ay
donné maintenant, quant au reste
nous auôs du temps pour en aduiser,
car nous ne sommes obligés à nous
treuuer à la grande Bretaigne que
d'icy à vn an, auquel temps vous vous
y rendrez s'il vous plaist avec vne fer-
me assurance que vous m'y verrez si
ie ne suis morte ou captiue. He bien
madame (luy dit-il) le temps & les oc-
casions nous conseilleront là dessus,
cependant ie me retireray s'il vous
plaist pour aller dormir. Ce disant il
luy souhaitta le bon soir, s'en alla tout
droit à sa chambre où il se mist au liçt
tout incontinant. Laissons le dans ses
refueries & sans entreprendre de reci-
ter icy tous les discours particuliers

qui se tindrent tout le long du soir de la boutade de la contesse du mont des sauuages de laquelle chacun parloit selon son humeur, allons nous reposer aussi bien que les autres puis que nous auons de nouuelles choses à dire en l'autre chapitre.

Comme l'hypocondriaque soustint les ioustes pour la gloire de Syluiane & de toutes les dames qui estoient alors à la tour: Les ceremonies qui furent faites pour l'armer: Insigne friponnerie d'un page pour luy faire prendre le saut: Particularitez de ces ioustes: Arriuee d'un estrangier pour emmener nostre extrauagant.

CHAPITRE XVII.

 Es charmes du sommeil n'ayans pas esté capables de faire perdre à nostre extruagant la memoire des choses qui auoient esté proposees le soir precedent, il se leua presque aussi tost que le soleil sans faire estat de la douleur des coups de fouët qu'il auoit receus cinq ou six heures auparauant, & se souuenât fort bié que tous les gentilhommes assemblés en ceste maison deuoient combattre à la barriere, ce qu'il appelloit faire des ioustes selon les Amadis, Belianis de Grece & le cheualier du Soleil, il eust vn extreme desir d'estre vn des tenans pour le merite de la beauté de Syluiane, la memoire de laquelle luy rafraichissant alors la playe de ses desplaisirs, il deuint si triste & melan-

melancholique qu'il oubliâ quasi le dessein qu'il auoit de prendre les armes, neantmoins trois ou quatre trompettes sonnans des fanfares sur ces entrefaittes, elles luy refueillerent si bien les esprits que ne se souuenant plus de son mal il ne songea qu'à combattre pour adiouster quelque nouuelle gloire à sa renommee. Courant donc à ses armes avec vne ardeur incroyable il commençoit à ietter la cuirasse sur ses espaules quand il vist arriuer le baró de la Tour lequel luy ayant dist qu'on n'entreroit au camp de trois heures il laissa ses armes au crochet, & fust bien aise de prendre l'occasion d'aller voir ces dames avec luy. Sa naissance, les bonnes parties qu'il auoit en luy, sa conuersation qui estoit des plus agreables du monde & sa folie le rendans fort recommandable, il ne faut pas demander s'il fust bien receu

de ces dames, lesquelles l'aymans toutes de l'amour avec laquelle on ayme la gentillesse & la vertu auoient quelque compassion du malheur qui luy auoit troublé la ceruelle? Certes il n'y en eust que fort peu dont il ne fust caressé selon son merite, & si tost que l'vne l'auoit assure de quelque petit traict d'affection, l'autre luy alloit offrir du seruice & de l'amitié si bien que ne sçachant à laquelle il auoit de plus puissantes obligations il les honoroit toutes esgallement, ne voulant pas preferer Lucelle à Miralinde & à Daride, ny l'vne de ces deux icy aux deux autres, car notez qu'il ne faisoit pas grand estat de la contesse du mont des sauages parce qu'il l'estimoit estre Clairangie maistresse du redoutable don Falgoran de Canabee. Quelques petits complimés qui se font à l'abord de toutes personnes estans faits entre

luy la princesse d'Alban l'appella & le mettant sur le propos des ioustes qui se deuoient faire apres le disner luy demanda s'il vouloit estre son cheualier pour maintenir avec la lance qu'elle estoit la plus belle dame du monde: A quoy respondant brusquement sans point songer il luy dist. Madame, ie ne doute point que ie ne doie tout à vostre merite, & que la priere que vous me faites ne me soit vn heur nompareil, mais considerez ie vous en supplie si ie puis satisfaire à vostre desir & à mon amour, & si ie doy offencer ma dame preferant vos beautez aux siennes? Certes si vous vous souuenez bié de ce que le cheualier à l'ardéte espee a fait quelquefois pour soustenir l'excellence de vostre beauté, & si vous remettiez en vostre memoire que beaucoup de vaillants princes qui l'ont suiuy ont plustost

choisi mille morts que de relascher quelque chose de l'intérest de leurs belles dames, vous ne me commanderez point vne chose laquelle est hors de mon pouuoir. Ayez donc agreable que ie tire ma chere Syluiane du pair, ou pour le moins permettez qu'esgallant sa beauté à la vostre ie soustienne que vous estes les deux plus belles dames qui viuent. l'en appelle (dit alors la duchesse d'Osmon s'adressant à luy de fort bonne grace) cheualier, ne sçauiez vous pas que toutes les dames de la terre m'ont quelquefois ceddé le prix de la beauté, & que si vous me faictes ce tort, don Clarizel de Guyndaye qui est mon seigneur vous ira chercher iusqu'au bout du monde pour vous combattre sur ceste querelle? Parlez autrement afin que ie n'aye pas subiét de me plaindre ou bien vous verrez que? Ah madame

(luy respondist-il) appaisez 'vous vn peu ie vous prie, certes vostre ressentiment est tres iuste; car ie ne pense pas que la terre ait iamais porté vne plus belle dame que vous, voila pourquoy ie suis d'aduis pourueu que la princesse de Cicile ne s'interesse point trop en ceste action que ie sois son cheualier, le vostre & celuy de ma Syluiane tout en mesme temps : Alors ayant vn si beau subiet de bien faire vous verrez que ie ne manqueray point d'emporter la victoire en depit de tous ceux qui s'en mesleront. Tout beau tout beau cheualier (dit alors la marquise d'Orbeil) que deuiendra donc ma chere Diane? Pensez vous que la victoire que vous vous promettez vous couste si peu? Sans mentir vous l'acheterez plus cherement que vous ne croyez, & desà ceste heure ie vous defie mortellement puis que vous l'auez

oubliee au nombre de celles qui meritent d'estre adorées: Incomparable Daraide (luy respondist-il) sur ma foy ceste petite colere me plaist tellement que ie ne vous eusse pas estimee comme ie fais si vous n'eussiez pas parlé de la sorte? Il est vray que Diane merite bien qu'on la mette au rang des plus belles, voila pourquoy ie ne fais point de difficulté de l'esgaller à ma Syluiane, à Lucelle & à Miralinde, mais aussi pour recompenser ceste courtoisie vous m'octroyerez vn don s'il vous plaist? Vrayment (dist la marquise) ie le veux, car ceste incroyable bonté qui vous fait relascher de l'interest de vostre maistresse m'oblige si fort qu'il m'est impossible de vous refuser quelque chose; Parlez donc & me dittes ce que vous desirez de moy? Ce que ie demande (reprit-il) est que vous n'entriez point en ces ioustes parce qu'il

n'y a rien à gagner pour nous là où vous ferez? He bien (dit elle) ie vous l'accorde, mais ce sera à condition que vous vous appellerez aujourdhuy le cheualier des dames, & non pas le beau desolé! Soit soit (dit-il) nous voilà d'accord, i'oublieray mes douleurs pour l'amour de vous & de toutes ces belles dames: A ces mots les viandes estans prestes on se mist à table selon l'ordre qu'on auoit tenu le soir precedent, & chacun commença de iouer des dents plus vertueusement qu'on ne fist de la lance apres le disner, car il y en eust beaucoup qui mangerent autant que trois, & qui neantmoins ne se peurent tenir en selle quand il fust question de cōbatre. La memoire de nostre extrauagant estant excellente en plusieurs choses il se souuint de l'aduenture qui luy auoit cousté tant de coups de fouëts, surquoy frap-

pant des mains l'une contre l'autre, il dit au baron de la Tour, avec une action qui sembloit tesmoigner de l'estonnement, ah. monsieur que nous auons fait une grande faute ! Comment donc luy dit le baron qui ne scauoit pas ce qu'il vouloit dire ? Nous auons oublié le pauvre don Guillan le pensif (luy repartist l'extrauagant) lequel ayant tousiours esté au rang des meilleurs cheualiers du monde, meritoit bien à mon aduis une place honorable en ceste compagnie ? Seigneur cheualier (luy respondit alors le baron) nous ne sommes pas si blasmables que vous le croyez : car si ce bon cheualier eust esté ceans ie l'eusse honoré selon son merite. L'exces de ses passions amoureuses l'a fait sortir d'icy dès le point du iour, & ie pense qu'il soit à ceste heure auprès de sa dame pour se recompenser des tra-

uaux qu'il a soufferts à son sujet. Je croyois (dit l'extrauagāt) qu'il prendroit congé de nous autres auant que partir, mais ie voy bien que les hommes ne sont point maistres de leurs passions quand ils se sont donnez vne fois en proye à l'amour: il s'en est allé dieu le vueille bien tost mener à bon port; Quant à nous ie pense que cela ne nous empeschera pas de passer le temps au moins si tout le monde est de mon humeur. Nous ferons encor mieux que vous (luy dit le baron) voila pourquoy sortons de table & battons le fer tandis qu'il est chaud; Alors tout le monde s'estant leué chacun s'en alla à sa chambre pour prendre les noms à la reserue de nostre hypocondriaque, lequel fut arresté par toutes ces femmes qui voulurēt auoir le plaisir de luy mettre la cuirasse sur les espaules & le casque en teste afin

de le plonger tousiours plus auant dans le precipice, & luy persuader qu'elles suiuioiēt les anciennes façons de faire. En effet ce pauvre malheureux se laissant armer par les mains de ces quatre dames qu'il croyoit estre Lucelle, Miralinde, Daraide & Clairangie, ressentoit vne telle ioye qu'il se fust estimé le plus heureux homme du monde si Syluiane eust esté de la compagnie. Toutefois ne pensant point qu'il fust à propos de tesmoigner alors la moindre tristesse du monde, il se monstra merueilleusement alai gre & disposé. Tout estant prest & les trompettes appellans tout le monde aux lices, il se baissa deuant la princesse d'Alban, la duchesse d'Osmon t & la belle marquize d'Orbeil, leur baisa les mains malgré qu'elles en eussent, & sans se souuenir de leur demander les mâches des chemises qu'elles por-

toient, comme il auoit veu pratiquer quelquefois dans les Amadis, se contenta des banderoles de diuerfes couleurs qu'elles auoient fait attacher à sa lance. Estant donc descendu à la cour où il treuua vn fort bon cheual qu'vn lacquay luy tenoit en main, il voulut faire comme il auoit veu faire à don Rogel, Florizel de Nicquee, don Sylues de la Selue, Spheramod & à beaucoup d'autres qui se iettoient ordinairement d'vn saut dans la selle de leurs cheuaux sans mettre le pied dans l'estrier. Mais le cheual s'estant espouuanté du mouuement qu'il luy voyoit faire, & par consequent s'estant reculé fort legerement, ce pauvre malheureux alla donner du nez contre terre si rudement que l'ayant presque tout escrazé il en sortit vne grande abondance de sang. Vn autre que luy se fust peut estre amusé à se plaindre,

toutefois ayant opinion qu'il auoit passé par dessus la croupe de son cheual, & que sa cheute n'estoit pas d'un homme lourdaud, mais d'un cheualier adroit & dispos il se consola, & se tournant vers les dames qui rioient à bon escient. Belles princesses (leur dit il) voila que c'est que d'estre vert par la pensee de vostre beauté? Sans mentir ie me suis treuvé si gaillard que i'ay vollé sur mon cheual au lieu de me ietter en selle; l'honneur y estant plus grand que la faute ie ne m'en affligeray point, au contraire ie le prendray pour vn presage de bon-heur, vous en allez voir des effets. Ce disant il s'esbranla derechef avec tant de force & d'adresse que malgré les boutades de son cheual il se trouua dans les arçons où s'arrestant de fort bonne grace il mist sa lance sur la cuisse, se baissa plus bas que l'arçon pour saluer toutes ces

dames, & commença de marcher au lieu où il voyoit aller tous les autres. Deux trompettes qui sonnoient continuellement deuant luy ayans fait sçauoir qu'il venoit, le duc de Saxalie entra le premier dans la lice avec vn extreme desir de sçauoir iusques où s'estendoit la vertu de ce cheualier, mais n'ayant pas vne moindre enuie de faire rire les dames que de commencer serieusement le combat, il traualloit à treuuer quelque inuention, quand vn page prenant l'assurance de parler à luy, luy promist qu'il soulageroit sa pensée. Ce petit esueillé s'auisant donc d'une ruze digne de la malice d'un page s'auança tout incontinent iusques à l'autre bout des lices où il voyoit nostre extrauagant, & luy dit que le cheualier aduantureux qui se presentoit l'enuoyoit prier d'auoir agreable que Daraide, Miralinde &

Lucelle fussent leurs iuges, & feignāt que les fangles de son cheual n'estoiēt pas bien mises s'approcha tout incontinent pour les attacher, mais au lieu de les bien ferrer il les lascha toutes, & se retira promptement pour le laisser courre pource que les tompettes sonnoient. L'intention qu'il auoit eue faisant ceste friponnerie eust l'effect qu'il s'estoit promis, car tout au mesme temps que le Duc de Saxalie l'eust touché du bout de sa lance la selle tourna tellement qu'il tomba sous le ventre de son cheual avec la mesme disposition qu'eust fait vn sac remply de foing. Ceste disgrace qui fist rire la compagnie à bon escient, l'ayant mis en fougue il se releua promptement, remist la selle sur son cheual en l'estat qu'elle deuoit estre, & s'approchant de la marquise d'Orbeil & des autres qui estoient sur vne terrasse à l'om-

brage d'une multitude de tres beaux arbres, leur remonstra si pertinemment l'artifice duquel on s'estoit serui pour donner l'aduantage à son ennemy qu'il obtint le permission de courre encor vne fois contre luy. Ceste sentence luy donnant vn contentement nompareil il se fist donner sa lance qui estoit par terre, se remist en lice, & courut de telle furie que n'ayant point māqué de porter son bois sur le casque du duc il l'enuoya sur la poudre malgré qu'il en eust. Ceste cheute n'ayant pas moins donné de plaisir que la precedente on retira le duc pour faire place à cinq ou six autres, lesquels ayans esté renuersez par des coups que les meilleurs gens d'armes treuuoient admirables, le braue Floridanis se mit sur les rangs. Ce cavalier estant des plus adroits qui fussent en France leur rencontre fust

tres-aggreable, ils rompirent tous deux avec vne grace pareille, passerent outre sans estre esbranlez, & fournirent leurs courses si gaillardement qu'ils furent loüez de tout le monde. L'on ne treuve iamais des difficultez en quelque entreprise qu'elles n'apportent du desplaisir, & nous ne souffrons point qu'avec regret qu'on esgale la vertu de quelqu'un à la nostre? Ces cheualiers qui ne s'estoient peu vaincre voyans qu'on leur partageoit l'honneur de ceste course eurent ie ne sçay quel petit meue-ment de colere qui leur fist esleuer le cœur, ils reprirent de nouueaux bois, & se choquerent encor vne fois de telle roideur qu'ils allerent tous deux marquer leur mesure sur la poussiere quelque effort qu'ils eussent fait pour se retenir tous deux dans la selle, ce qui mettant nostre extrauagant en
fureur

fureur il se releua tout aussi tost que Floridanis, & mettant la main à l'espee l'alloit charger fort vertement si la marquize d'Orbeil apprehendant quelque malheur ne luy eust crié qu'il se souuint des loix de la iouste lesquelles deffendoient le combat avec l'espee. Ceste parole l'ayant fait arrester tout court il iugea qu'il auoit failly d'auoir tesmoigné plus de passion que de modestie: S'auançant donc vers Floridanis il luy dit. Cheualier le plus valeureux que j'aye rencontré de ma vie vous me pardonneriez s'il vous plaist si le regret de ne vous auoir pas vaincu m'a transporté de telle façon qu'il m'a fait perdre la memoire des ordonnances de la iouste, & vous defier au combat avec l'espee? Ce repentiment est si naturel qu'il merite bien qu'on l'excuse. Cheualier (luy respondit Floridanis) ne vous excusez

point de ce mouuement genereux que vous auez eu, car si vous auez failly en cela i'ay peché tout ainfi que vous n'ayant pas eu vn moindre desir de vous espreuuer à l'espee que vous auez eu de sçauoir ce que ie vallois en ceste façon. Nos iuges ne le permettent pas remettons la partie à quelque autre fois. I'en suis tres-content (dit l'extrauagant) cependant vous me ferez s'il vous plaist vne courtoisie: Ah vrayment (dit Floridanis) ie ne la sçauois refuser à vostre merite, pourueu que ce que vous desirez soit en ma puissance vous l'obtiendrez sans difficulté, dittes moy qui vous estes (reprit nostre hypocondriaque) afin que ie ne m'en aille pas de ceste contree avec le regret d'auoir ignoré le nom d'un cheualier si vertueux. Cheualier (dit Floridanis) i'eusse bien voulu que vous n'eussiez pas eu ce de-

sir, car vous sçavez que les cheualiers errans ne prennent pas plaisir à estre cogneus, neantmoins puis que ma parolle y est engagee ie vous diray que ie suis don Sylues de la Selue fils del'empereur Amadis de Grece. Ah mon seigneur (s'escria nostre extrauagât courant embrasser ses genoux) est il possible que ie sois heureux iusques à ce point, que d'estre sorty de vos mains avec tant d'honneur? Certes vous pardonneriez s'il vous plaist à mon ignorance de laquelle vous m'eussiez fort bien chastié, & pour vn tesmoignage que ie ne vous veux iamais rien disputer, voila mon espee que ie vous presente comme à mon vainqueur. Non non braue cheualier aux tristes pensees (luy respondit Floridanis) vostre espee est en bonne main, & ne l'ayant pas gaignee par ma valeur ie n'en receuray point le

present, demeurons amis, & parce que ie voy là haut au moins ce me semble mon nepueu don Agefilan de Colchos sous l'habit qu'il portoit lors qu'il se faisoit appeller Darinde, nous nous auancerons s'il vous plaist pour le saluer. A ces mots remontans tous deux à cheual ils s'en alloient treuuer les dames, quand ils virent parestre vn ieune homme lequel s'adressant à don Clarazel luy dit ces paroles. Vaillant cheualier aux tristes pensées, les loüanges que tout le monde de ceste prouince vous donne sont si grandes que ie vous suis venu treuuer pour sçauoir si la flatterie n'adiouste rien à tant de gloire; Pour en auoir la cognoissance il est necessaire que i'obtienne vn don de vostre bonté, vous ne me le refuserez point s'il vous plaist? Non sans mentir (luy respondist-il) ie ne vous le refuseray point,

voila pourquoy vous me pouuez dire fort franchement ce que vous voudrez. Ce que ie veux (reprist cet homme) est que sans differer dauantage vous me suiuez iusques en vn lieu où vostre valeur est tres-necessaire pour le repos de deux amans qui sont parmy des supplices incroyables, ie ne vous diray point icy toutes les particularités de ceste aduenture parce que le discours en seroit trop long, & que d'ailleurs ie me reserue pour vous en entretenir pendant le chemin: aduisez si vous voulez accomplir la promesse que vous m'auez faitte? Iesus (dist-il) n'en doutez point, ie suis en estat de marcher, allons sans nous arrester icy plus long réps, ce bon cheualier (monstrant Floridanis à costé duquel il marchoit) fera s'il luy plaist mes excuses à ces belles dames que vous voyez sur ce grand eschaffaut de pierre (il appel-


loit ainsi la terrasse sur laquelle ces dames estoient) à ces mots le baron de la Tour ne pouuât souffrir avec patience qu'on luy fist perdre la compagnie de cet homme qui luy donnoit tant de plaisir, regarda de trauers celuy qui l'estoit venu demander comme luy voulant faire cognoistre qu'il s'offensoit de son action, & prenant nostre extrauagant par la main: Non non (dit-il) bon cheualier ie vous ayme trop pour vous laisser aller si facilement, vous estes icy plus necessaire que là où l'on vous veut mener, que cet escuyer s'en retourne s'il veut ie ne vous quitteray de six mois. Ah monsieur (luy respondist-il) vous scauez que la parolle d'un bon cheualier est inuiolable ie suis obligé il faut que ie marche quād ie serois mesmement assure de perdre la vie, & quant à ce qui vous regarde ie pense que vous ay-

mez moins vostre cōtētemēt que ma gloire. Comment (repliqua le baron) c'est donc à bon escient que vous vous resolvez à suiure cet homme? Ouy sās doute (respondist-il) & de ce pas ie prendray congé de vous avec mille protestations de me souuenir eternellement de la bonne chere que vous m'avez faite. Sur ma foy (reprist le baron) il ya plus de six mois que ie ne receus vne affliction si puissante, que maudit soit celuy qui a donné le mouuement à ce pendart qui vous emmeine, de vous venir chercher iusques icy. Ce disant il luy prist enuie trois ou quatre fois d'estriller ce nouueau venu, mais ne scachāt à qui il estoit, & d'ailleurs ne voulant pas fascher nostre cheualier duquel il estimoit merueilleusement le courage, il fust contraint de plier les espauls & de le conduire iusques hors des cours du logis, sur le-

quel temps toutes ces belles dames arri-
uans avec vn desplaisir sensible de
perdre vne compagnie si chere il n'y
en eust pas vne qui ne luy fist assés de
caresses pour le faire pleurer de regret
de quitter tant d'honnestes gens com-
me elles mesmes creuoient de depit
de la voir enleuer de la sorte par vn in-
cogneu. Laissons les affliger les vns &
les autres, donnons le temps à tant de
seigneurs & de dames de se separer, &
dilon vn peu qui estoit cet homme
qui emmenoit nostre cheualier afin
que nous ne nous esloignons point
de nostre subiet. Vous verrez ce dis-
cours en l'autre chapitre, & tout d'vn
mesme temps nous vous conterons
deux ou trois aduentures estranges,
ou pour mieux dire merueilleusement
aggreables qui luy arriuerét en ce vo-
yage.

Qui estoit celuy qui emmenoit nostre chevalier hypocondriaque: Le subiet pourquoy: Trait admirable d'un fillou qui se feint estre le fraudeur des riches pour luy desrober son cheual: Recit de ceste aduanture crotresque.

CHAPITRE XVIII.

 Ous auons promis dans l'autre chapitre de vous dire qui estoit ce ieune homme lequel emmenoit nostre extrauagant, & le subiet pour lequel il l'auoit tiré de la maisõ du sieur de la Tour, il faut satisfaire à ceste promesse afin que vous n'ayez pas subiet de vous plaindre, mais parce que ce discours depend des choses que vous auez veuës dans les chapitres precedens il sera fort à

propos ce me semble que ie vous en fasse reffouuenir. Vous auez leu comme la duchesse d'Arcail deuint amoureuse de ce cheualier, ie pense que vous n'avez pas perdu la memoire des artifices d'ot elle se seruist pour le posséder par ce qu'elle le voyoit fort opiniastre dans la fantaisie d'imiter la fidelité d'Amadis de Gaule, & ie veux croire que vous vous souuiendrez bien encor que nous la laissasmes merueilleusement affligée de l'esloignement de ce cheualier qu'elle auoit treuvé si vaillant aux escarmouches amoureuses. Cela estant ie ne travailleray pas beaucoup à vous donner l'intelligence de ce secret, & ie vous voy desja deuiner que ce ieune homme estoit vn petit messager d'amour qui le conduisoit à Arcail où la duchesse proiettoit vne ruze toute nouuelle pour le tromper encor vne fois? Ouy

belles ames il est vray que c'estoit vn
messager d'amour enuoyé de la part
de ceste duchesse laquelle s'estant sou-
uenue avec quelle rigueur ce cheualier
l'auoit caressée elle en treuua l'esloi-
gnemēt tant insupportable que n'ayāt
peu fermer les yeux lors qu'elle fust
seule en son liēt elle renouuella les
larmes qu'elle auoit commencé de
verser fort secrettement vn cart
d'heure apres son despart. Parmy cent
mille pensees qui la trauaillerēt, alors
elle n'en iugea pas vne plus propre à
son repos que celle de l'inuention de
le rappeler, elle s'y resolut donc à la
fin, mais parce qu'elle n'en pouuoit
encor treuuer les moyens ses pensers
luy firent vne guerre nouuelle, de for-
te que le iour la surprist auant qu'elle
eust resolu quelque chose. Toutefois
quelles difficultés ne surmonte point
vn esprit lequel est possedé de l'a-

mour? Vne lumiere vint à dissiper ces nuages qui l'empeschoient, elle se souuint de l'enchâtement amoureux auquel don Rogel de Grece fust retenu par Sardenie que l'on appelloit la dame des quatre chateaux, de celuy du beau cheualier de la Claire-estaille par la magicienne Ginolde, & de celuy du prince Edoüard d'Angleterre que la belle Argonide retint pour auoir de luy le braue Pompides & le sage magicien d'Aliart de sorte que s'imaginant qu'elle le tromperoit fort facilement sous vne couuerture pareille elle conclud de l'enuoyer chercher pour en auoir le contentement qu'elle en esperoit. Elle fist donc appeller vn sien domestique de la fidelité duquel elle auoit de tres-bonnes preuues, luy donna tout ce qui luy estoit necessaire pour vn long voyage, au cas qu'il y fust obligé, & ne manqua point de

luy prescrire quelques loix selon lesquelles il se deuoit gouuerner lors qu'il auroit rencontré l'hypocondriaque, cependant elle mist ordre à ses affaires avec vne adresse si grande qu'elle priua ses plus familières amies de la cognoissance de tout son fait. Vous auez veu avec quelle prudence ce galland auquel elle s'estoit refié d'une chose de telle importance exécuta la commission qu'il auoit receuë, ie vous diray ce qui arriua de ceste entreprise apres que ie vous auray raconté les auantures qu'il eust en ce beau voyage. Si tost qu'il fust à la campagne il se remist sur les pensées de sa tristesse, la memoire de sa disgrâce se renouella, & comme il estoit grand imitateur d'Amadis de Gaule, il ne manqua point d'appeller mille & mille fois Syluiane pour luy demander iusqu'à quand elle auoit resolu de

le traicter si cruellement. Trois heures s'escoulerent ainsi tristement au bout desquelles son conducteur se faschant d'un si long silence, il l'alla prendre par le bras & le tirant assez rudement. He quoy Monseigneur (luy dit-il) ne vous retirerez vous point de ces resueries qui ruynent vostre esprit & vostre repos pour me demander à quelle aduventure ie vous vay mener? Par ma foy mon amy (luy respondit-il) vous auez raison d'appeller ainsi l'inciuilité que ie fais de ne vous point entretenir, ie ne songeois ny à vous ny à l'adventure pour laquelle vous m'auiez fait mōter à cheual, & i'occupois toutes mes pensees à la memoire de la cruauté de ma dame; Mais puis que vous m'auiez retiré d'un sommeil si triste & fascheux ie feray mon profit de la remonstrance que vous m'auiez faite: Dittes moy ie vous supplie

qui sont ces malheureux amans desquels vous m'avez parlé ce matin? ConteZ moy le subiet pour lequel ils sont parmy des supplices cruels, & n'oubliez pas à me dire quelles sont les difficultés qu'il faut vaincre pour venir à bout de ceste entreprise? Ce que vous demandez est si raisonnable (respondist cet homme) que ie ne puis refuser de vous satisfaire. Sçachez seigneur cheualier, que vous marchez pour le secours d'une belle dame qui languist d'amour parce qu'une meschante ~~magicienne~~ a fait perdre le iugement à son cheualier, & qu'au reste vous auez des geans à combattre, des monstres à dompter & des difficultez si grandes à vaincre que vous n'apporteriez pas grand honneur de ceste aduventure si vous n'estiez le plus vaillant cheualier qui soit au iourd'huy sur la terre. Ah mon amy (luy dit Cla-

razel) ne vous flattez pas de ceste esperance, il y en a plus d'un million dans le monde qui vont beaucoup au dessus de moy; Je sçay bien que les princes de Grece sont resuscités, qu'ils vont maintenant par le monde, que le chevalier du Soleil est en vie, que Rosclair, Claridian de l'Esphere, Claramante, Belianis de Grece, Belfloran, Fortiman de Grece, & tous ceux desquels vous avez ouy parler quelquefois iouissent de ce priuilege, iugez ie vous prie si sans vanité ie me puis estimer tel que vous me dittes au preiudice de ces grands princes qui n'ont iamais esté vaincus en quelque combat que ce soit? Monsieur (luy respondist cet homme) il est tres-vray que tous ces chevaliers dont vous venez de parler sont tres-excellens, & qu'ils ont acquis vne gloire qui ne doit iamais mourir dans le monde, mais qu'ils

qu'ils soient plus vaillans que vous, c'est ce que ie ne confesseray pas fort facilement? N'ay-ie pas de tres-grâdes preuues de vostre malheur dans la deffaitte de ce monstre horrible que vous mistes à mort dans la cour du roy d'artigny le iour mesme que vous receustes l'ordre de cheualerie? Ne sçay ie point que beaucoup d'espouuentables geans ont passé sous la foudre de vostre espee, & pensez vous que i'ignore ce que vous auez fait contre des sauuages & des ours dans la cour du prince de l'isle vermeille? Non non, ie sçay iusques où s'estend vostre force & vostre vertu, & i'oserois bien asseurer que pas vn des princes de Grece n'a eu plus d'honneur que vous au commencement de ces armes: d'auantage nous auons veu vne prophetie qui nous asseure que ceste dame doit receuoir du soulagement par l'effort

d'un beau cheualier mal traitté de l'amour & de la fortune, voila pourquoy i'estime que ceste aduenture vous est reseruee. Vrayement (repliqua Clarazel que ces loüanges auoiert merueilleusement chatoüillé) ie le voudrois bien pour l'amour de ceste pauvre dame, quant à ce qui me regarde en ceste entreprise, ie vous prometttray bien sur la foy que peut donner vn bon cheualier que ie choisiray plustost mille morts que de manquer à mon debuoir, ny me rendre indigne des loüanges que l'on me donne. Ainsis'entretenans de mille discours ils arriuerent vn peu deuant la nuit dans vne bonne hostellerie où ce ieune hōme voulust loger. Les armes de ce cheualier ayant donné de l'espouuante à tous ceux du bourg l'hostesse ne le vist entrer qu'avec regret, mais estant asseürée par son conducteur

qu'elle feroit fort bien payee elle le fist conduire à la plus belle chambre qu'elle eust, & luy fist la meilleure chere du monde. Les nouveautez sont agreables & tousiours elles donnent subiet de parler à ceux à la cognoissance desquels elles arriuent? Si tost que ce cheualier fust logé, tous ceux du bourg en furent aduertis, chacun courut à l'hostellerie, les plus curieux demanderent qu'il vouloit dire avec ses armes, quelques vns s'estonnerent par ce qu'ils apprehendoient la descente de quelques troupes, les autres creurent que c'estoit vn trait de galanterie, & qu'il alloit faire vne partie pour combattre à la barriere chez quelque seigneur, bref entre tant de iugemens diuers qui se firent il n'y en eust pas vn qui touchast iustement au but, de sorte que s'il n'eust pas permis qu'on le fust venu visiter dans sa chā-

bre on eust iamais cogneu ses def-
faux: Mais comme le soleil ne scauroit
parestre sans communiquer sa lu-
miere, nostre extrauagant ne peut
estre veu sans tesmoigner de quelle
maladie il estoit frappé; il demanda
tout incontinant s'il y auoit point
d'aduantures estranges en ceste pro-
uince, si l'on n'auoit point veu de
geans horribles qui troublassent le re-
pos du peuple, ou quelques monstres
qui desolassent la prouince, & par là il
donna à cognoistre que sa ceruelle
estoit frappee d'une des cornes de la
lune & peut estre de toutes les deux, si
bien que le bruit courust au bout d'un
cart d'heure que ce cheualier estoit
fou. Parmi tous ceux qui l'allerent
voir il se treuua vn fin matois pareil à
ceux que l'on nomme filloux à Paris,
lequel ayant fort bien cogneu le fon-
dement des extrauagances de ce che-

ualier resoluſt de faire profiter ceſte
occaſion, & de luy tirer la meilleure
plume qu'il euſt aux aiſſes. L'eſprit de
ces eſueillez ne manquant iamais à
leur fournir mille ſortes d'inuentions,
il ſ'auifa tout incontinant d'une ruze
la plus gentille qui luy pouuoit tom-
ber en l'eſprit; il reſoluſt de contrefai-
re le fraudeur des ruzes duquel il auoit
veu les fripponeries dans les Amadis,
& de deniaifer cét hypocondriaque
de ſon cheual qu'il trouuoit fort beau.
L'ayant reſolu il l'executa d'une fa-
çon toute crotelſque: ayant appris le
chemin par lequel il deuoit aller par-
ce que celui qui le conduiſoit auoit
eſté ſi peu preuoyant que de ſ'en eſtre
informé deuant tout le monde il deſ-
logea plus matin que luy avec une
bouteille en main qu'il auoit fait rem-
plir de ſang, il ſ'arreſta contre vn petit
bois lequel eſtoit plein de foſſes & de

marescages, cacha son espee, son manteau & son chappeau en quelque buisson reculé qu'il remarqua bien, vuida sur sa teste & sur ses cheueux la bouteille de sang qu'il portoit en telle facon qu'il paroissoit auoir receu trois ou quatre grands coups d'espee, & descourant de loing nostre cheualier s'estendist au pied d'un buisson iusqu'à sa venue. Le sçachant fort proche il commença de ietter des cris pitoyables se doutant bien qu'il ne manqueroit iamais d'estre touché de compassion & de s'offrir à tirer la raison de l'outrage qu'il auoit receu. En effet il ne fust point trompé en son opinion: Si tost que don Clarazel eust ouy ses plaintes il donna de l'esperon dās le ventre de son cheual, & s'estant approché du buisson contre lequel il estoit couché luy demanda qui l'auoit traitté si cruellement? Helas mon-

seigneur (luy respondist il d'une voix qui sembloit mourir de foi bleſſe) ce ſont trois meſchâs cheualiers, leſquels ayans veu à mon colla plus riche eſpee qui fuſt iamais faite, & que ie portois par le commandement d'une ſage magicienne à vn fameux guerrier que l'on nomme le beau deſolé ou le cheualier aux triſtes péſces, me l'ont oſté avec violence, & parce que ie criois au volleur tant que ie pouuois, & que ie proteſtois de les ſuiure eternellement, ils m'ont mis en l'eſtat que vous me voyez, que ſi vous avez le cœur auſſi bon que voſtre contenance eſt belle vous aurez compaſſiô d'un pauvre affligé & le vengerez de ces traîtres qui ſe ſont iettez dans ce bois il n'y a pas encor vn cart d'heure. Par dieu (dit-il) mon cher amy ie ne vous manqueray pas à ce grand beſoin puis que ce malheur vous eſt arriué pour

l'amour de moy. Comment monseigneur (luy dit le fillou) est-il bien possible que vous soyez ccluy que ie cherche? certes ie ne m'estime plus malheureux, monseigneur descendez icy s'il vous plaist: car ce taillis est si espais & marescageux que vous n'y scauriez entrer à cheual; A ces mots don Clarazel se iettât à terre ne fist aucune difficulté d'entrer dans le bois quoy que son conducteur fust d'aduis contraire, mais tout au mesme temps qu'il eut fait dix ou douze pas il tomba dans vn grand fossé si mal à propos qu'il entra dans la boue iusques à la ceinture. Cét accident l'estonnant vn peu il se voulut efforcer pour sortir de là, toutefois se sentant tousiours enfoncer au lieu de s'en retirer comme il esperoit, il cogneut bien qu'il n'en sortiroit iamais qu'avec assistance, voila pourquoy appel-

lant celuy qui le conduisoit pour le secourir il donna beau iour à tous les desseins du fillou. En effect ce ieune homme estant descendu pour aller vers luy, ce matois qui contrefaisoit l'homme mort se leua, se ietta dans la selle du cheual de don Clarazel, prist l'autre par la bride, & s'efforça de l'emener aussi bien que l'autre, mais ayât recogneu qu'il ne marcheroit pas fort facilement quand on le tireroit par la bride, il prit des ciseaux en sa poche qui luy valloient beaucoup plus qu'une metayrie, couppa les resnes tout aupres du mors, & voyât reuenir Clarazel tout couuert de bouë luy dist avec vne action bouffonne: Cheualier, le plus niais que i'aye rencontré de ma vie, n'avez-vous iamais ouy parler du fraudeur des ruzes qui viuoit du temps d'Amadis? Ouy sans doute ie l'ay cogneu (luy respondit

don Clarazel) & ses artifices m'ont fait rire plus de mille fois? Mais beau fire pour quoy me faictes vous ceste question? parce (respondit le fillou) que vous n'estes pas plus sage que ceux qui sont quelquefois tombez en ses mains, & que vous vous estes laissé surprendre avec moins d'artifice & de peine qu'ils n'ont esté pris. Comment (luy dit don Clarazel) seriez vous bié vous mesme cet affronteur duquel vous parlez? Ho ho (dit le fillou) ie serois trop vieil, sçachez pauvre malheureux son arriere fils, que mes ruzes ne ceddent point à celles qu'il prattiqua contre Darinde, Garaye & mille autres que vous sçauiez, & que vous n'estes pas mieux arriué d'estre entre mes mains que vous eussiez esté dans les siennes si vous eussiez porté les armes de son temps: voulez vous vne preuue de ce que ie dis? mes cheueux

sont tous pleins de sang, croyez vous que ce sont des grands coups d'espee qui l'ont fait sortir ? Non sur ma foy c'est vn artifice que i'ay inuenté pour vous abuser, & si vous m'eussiez visité de pres vous eussiez bien cogneu que ce sang estoit d'un mouton plustost que d'un veau, mais vous avez esté trop credule ou trop negligét, il vous faut punir de vostre paresse, ou plustost de vostre sotise; vous irez donc à pied s'il vous plaist parce que i'emmenne vostre cheual pour vous punir de la faute que vous avez faite de l'abandonner sur la parole d'un incogneu, & d'estre entré dans vn marais pour y pescher cinq ou six grenouilles plustost que pour y rencontrer quelques cheualiers. Mon predecesseur n'a iamais trompé les bons cheualiers que pour leur profit, ie veux practiquer vne mesme chose enuers vous, ie vous

rendray sage pour vne autre fois au moins si vous me voulez croire, car ie vous conseillera de ne vous refier iamais qu'en ceux que vous cognoistrez bien & de longue main, d'autant qu'il y a tant de mattois en Frâce que de iour à autre on vous fera de nouuelles supercheries si vous estes tousiours aussi niais que vous l'avez esté en ceste occasion. Ce disant il donna deux ou trois coups de gaule à ce bô coursier, & fist mine de se retirer sans vouloir aucune responce: toutefois entendât crier nostre extrauagant il retourna pour demander ce qu'il desiroit. Ce que ie veux (respondit-il tout en colere) est que vous me rendiez mô cheual, & que vous vous contentiez de me voir tout couuert de fange, autrement. Tout beau mon cheualier tout beau (luy dit le fillou en riant) vous apporteriez peut estre vn grand pre-

iudice à vostre santé si vous vous met-
tiez maintenant en colere? Ne sçauiez
vous pas bien que mon predecesseur
ne rédoit iamais que par force ce qu'il
auoit vne fois conquis par la dexterité
de son esprit? Si c'estoit seulement
pour rire que i'eusse inuété ceste ruze,
ie serois desia satisfait, mais ayant eu le
dessein de profiter de vostre sottise, vo-
stre cheual seruira de prix & de recô-
pense à ma peine: Escoutez (dit alors
le ieune homme qui conduisoit no-
stre extrauagant) maistre donneur de
billeuezees, il n'y a qu'un mot qui ser-
ue à cecy: Si vous rendez quelque des-
plaisir à ce gentilhomme on vous ira
chercher iusqu'au bout du monde
pour vous en faire rendre conte? Par
ma foy (luy respondit le fillou en
branlant la teste) mon amy vous estes
encore plus sot que ce cheualier. He
de quoy me menacez vous? Sans doute

d'une chose dont ie me soucie aussi peu que de l'eau qui court : à d'autres ie vous en supplie , retirez vous, & vous souuenez que vostre cheual tiendroit compagnie à celuy sur lequel ie suis s'il eust vallu la peine de le desrober. A ces mots donnant derechef de la gaule à son bon cheual, il s'esloigna d'eux au galop, & les laissa si transportez de cholere qu'ils demurerent plus de deux heures à trepigner des pieds contre terre sans sçauoir à quoy se résoudre : toute fois ayans bien cogneu que leurs fougues estoient inutiles ils s'appaiserent à la fin pour songer aux remedes qu'ils pourroient apporter à cet accident. Toute leur industrie ne leur en ayantourny qu'un qui estoit de monter tous deux sur le cheual qui leur restoit iusques au premier logement, ils attacherent les iaretieres de ce ieune homme au lieu des


resnes, & don Clarazel se mettant en selle offrist la croupe à son conducteur; Mais tout au mesme temps qu'il y fust le cheual se mist à ruer de telle furie qu'il les ietta tous deux sur la terre, & s'enfuit au trauers du bois où il se fist chercher tout le long du iour. Ce fust alors qu'ils se penserent desesperer, car don Clarazel ne pouuant marcher à cause de la pesanteur de ses armes & de l'eau dont ses bottes estoient toutes pleines, & d'ailleurs ce ieune homme ayant toute l'eschine rompuë du sang dangereux qu'il venoit de faire, ils demurerent vne longue espace de temps à se regarder comme si chacun eust voulu dire à son compagnon qu'il falloit courre apres le cheual: Neantmoins prenans mesmes mouuemens presqu'en mesme temps ils entrerent tous deux dans le bois & firent tant de tours & tant de détours

qu'ils treuverent le cheual qui s'estoit de luy mesme attaché aux branches de quelques petits arbres par le moyé de la iarretiere qui s'y estoit prise. L'ayant recouuré ils appaiserent vn peu leur courroux, ils le menerent dans le grand chemin, don Clarazel monta dessus, & l'autre estant contraint de le suiure à pied commença de donner mille maledictions à ce nouveau fraudeur des aduis lequel leur donnoit tant de peine.

Comme

Comme le fillou resolust d'attrapper encor vne fois nostre cheualier hypocondriaque: Leurs discours: L'artifice dont il vsa pour venir à bout de son entreprise & le tirer hors du logis: Comme ce volleur ayant attaché nostre extrauagant à vn arbre il fust luy mesme attrappé par le ieune homme qui le conduisoit: La vengeance estrange qui fust prise sur ce frippon: Restitution du cheual qu'il auoit desrobé avec ce qui se passa en ceste aduventure.

CHAPITRE XIX.

 Ve les volleurs sont effrontés & qu'il est difficile de corriger l'habitude qu'ils ont à mal faire! Le butin leur est ce que la charongne est aux loups, ils
Ee

courent apres avec vn desir enragé, & lors qu'ils l'ont vne fois rencontré ils ne considerent pas le danger qu'il y peust auoir à le prendre: ce fillou duquel nous auons parlé dans le chapitre precedent me fait aduancer ces parolles, voicy le subiet. Ce malheureux n'estant pas content du cheual de don Clarazel voulust encore auoir vn habit tres riche que le baron dela Tour luy auoit donné, il inuenta de nouuelles ruses pour l'attrapper, il fist bien leuer ses cheueux, les fist couper plus modestement qu'ils n'estoient, changea d'habits, s'accompagna d'un bon bourgeois de son mestier, l'instruisist fort particulierement de tout ce qu'il auoit à faire, le mist en sentinelle sur les aduenuës du prochain bourg où il se doutoit bien que celuy qu'il vouloit dupper se seroit arresté, & ne m'acquiesça point de se rendre au meilleur lo-

gis avec vne ferme croyance qu'il l'y
treuueroit. Sa pensee ne le trompa
point, il y rencôtra veritablement no-
stre cheualier & son compagnon les-
quels estans merueilleusement fati-
gués y estoient demeurez pour se re-
poser le reste du iour & chercher vn
cheual de loüage afin de marcher le
lendemain plus commodement. La
coustume de ces mattois estant de se
fourrer dans les compagnies à quel-
que condition que ce fust, ce galland
s'adressa tout incontinât à l'hostesse
& sçachant d'elle qu'il y auoit vn gen-
tilhomme en la chambre haute la pria
d'aller sçauoir s'il auroit aggreable
qu'ils souppassent ensemble. Ceste
femme s'acquittant de ceste priere al-
la treuuer don Clarazel lequel ayant
ouy parler de compagnie tesmoigna
qu'il seroit fort content del'auoir. Ce
bon marchant fust donc appellé il en-

tra avec la contenance d'un homme qui ne demande qu'amour & simpleſſe, fiſt mille complimens honneſtes à ce pauvre fou, & voyant qu'il eſtoit encor empesché à faire ſeicher ſes habits luy demande par quel accident il eſtoit mouillé de la ſorte. Par ma foy (luy reſpondiſt-il) c'eſt vn accident veritablement, mais le plus agreable du monde, & quoy que i'en aye ſouffert de la peine il n'eſt pas en mon pouuoir de m'empeschier de rire à bon eſcient: l'ay treuvé ce matin le ieune fraudeur des aduis arriere-fils de celui qui viuoit du temps d'Amadis, lequel fraudeur m'a ioué le plus gétit trait dont on ſe puiſſe iamais aduiſer: il s'eſt couuert le viſage & les cheueux de ſang avec vn ſi grand artifice qu'il ſembloit tout haché à grands coups d'eſpee, il s'eſt couché au pied d'un buiſſon, m'a demandé de l'aſſiſtance

contre trois meschans cheualiers qui l'auoient mis en cet equipage parce qu'il ne leur vouloit pas dōner vne riche espee qu'il m'apportoit, m'a fait entrer dans vn marais duquel ie ne me suis iamais peu retirer qu'avec l'ayde d'un ieune homme qui me sert maintenant d'escuyer, bref est monté sur mon cheual & l'a emmené apres m'auoir fait mille contes qui m'ont pensé faire enrager. Sur mon ame monsieur (luy dit le fillou) voila vne grande meschanceté, mais vous ne vous en deuez pas beaucoup estonner, car ce volleur duquel vous parlez fait si souuent des choses pareilles qu'on le craint icy à l'entour beaucoup plus qu'on ne fait le diable. Qui plus est il trompe tousiours trois ou quatre fois vn mesme homme, voila pourquoy prenez garde à vous s'il vous plaist. Ne me tenez iamais pour homme de

bien (dit l'extrauagant) s'il m'attrap-
pe comme il a fait, car sçachant toutes
les finesses ie m'en garderay bien de-
ormais. Croyez monsieur (luy dit le
volleux) que vous ferez des plus adui-
fés de ce siecle si vous ne retombez
point en ses mains. A ces mots la vian-
de estant desia sur la table ils prirent
de l'eau & commencerent à manger
de bõ appetit. Pendant qu'ils iouoiēt
ainsi des machoüeres, Florantel (on
appelloit ainsi le ieune homme qui
conduisoit nostre cheualier) regardoit
si attentifüement les actions de ce fil-
lou qu'il le recogneust, ce qui le fai-
sant merueilleusement estonner de
son assurance ou pour mieux dire de
son extreme effronterie il fust trois ou
quatre fois sur le point de se leuer
pour le faire prendre par l'hoste &
trois ou quatre valets qu'il auoit chez
luy, mais iugeant bien qu'il gasteroit

tout s'il se precipitoit en ceste affaire, & d'ailleurs ne doutant point que ce volleur ne fust retourné pour faire quelque meschâceté nouvelle il conclud d'y procedder avec prudence. Feignant donc de ne l'auoir point recogneu il acheua de soupper avec la mesme contenance qu'il auoit au commencement du repas, & voyant peu de temps apres les tables leuées il quitta la compagnie sous pretexte d'aller faire penser les cheuaux, neantmoins son dessein estoit d'aduertir l'hoste de toute l'affaire & de prendre au piege ce maistre galland, ce qu'il fist fort bien à propos comme ie vous diray tantost. Ce maistre volleur qui se vouloit seruir dignemēt des occasiōs voyant ce ieune homme esloigné tira tout incontinent droit au but où il auoit resolu de frapper, il dist à l'hypocondriaque que les viandes ne se-

roient pas d'une facile digestion s'il ne faisoit quelque promenade & l'engageant insensiblement à ce qu'il vouloit, il le mena tout droit où son compagnon s'estoit mis au guet le dos contre un arbre & les bras esleués en haut comme s'il eust esté attaché aux brâches. Ce second mattois les voyant fort proches quoy que la nuit commençast desjà d'estre noire il leur dist avec un accent de cholere. Arrestez vous malheureux & n'approchez point de cet arbre lequel enferme le miroir des secrets d'amour, autrement vous estes menacez d'un supplice fort rigoureux pour punir la temerité de vos actions. O dieu (dit alors le premier fillou faisant semblant d'auoir une merueilleuse frayeur) quelle voix est ce que j'entens, ou bien quelle memorable aduventure se presente à nous maintenant? Sur mon ame quand ie

deurois petit en ceste entreprise ie verray ce qu'elle cōtient? Nō non (luy dit dō Clarazel l'arrestant à ceste parolle) ceste aduventure n'est pas pour vous, parce que vous n'estes pas cheualier, retirez vous & me laissez faire. Ce disant il mist courageusement la main à l'espee & s'approchant plus pres de l'arbre demanda ce qu'il falloit faire pour espreuver ceste aduature. Cheualier (repondist le second fillou) les armes ne sont pas necessaires à la gloire de ceste entreprise, & toute la difficulté ne consiste qu'à me deslier de ce tronc auquel ie suis attaché par enchantement. Si vous estes aussi loyal qu'Amadis de Gaule, ou qu'Agésilas de Colchos vous le ferez fort facilement, & par ce moyen il vous sera permis d'emporter ce precieux miroir qui est en mes mains, sinon vous n'aurez point de peine plus grande

que de vous retirer promptement avec le regret de n'auoir pas eul l'honneur de ceste aduventure pour auoir failly contre vostre amour. Ce discours ayant obligé don Clarazel à remettre l'espee au fourreau il alla prendre cet homme au trauers du corps & se roidist merueilleusement sur ses iambes pour l'emporter, mais il n'estoit pas besoing de si grand effort, ce volleur le lia tout incontinant avec ses bras, & se treuuant secouru de son compaignon qui mist vne corde aux pieds à l'extrauagant le porta par terre à la troisieme secousse qu'il luy donna, si tost qu'il fust en cet estat ils luy osterent son espee avec menace de luy couper la gorge s'il crioit, apres cela ils le despoüillerent depuis les pieds iusques à la teste à la reserue de ses bas de chausses, & ne se contétans pas encor del'autre traitté de la sorte

se mirent à le gausser beaucoup plus qu'il n'auoit esté le matin, le firent souuenir du fraudeur des ruzes duquel il ne s'estoit peu garder la seconde fois, & se voulant donner du plaisir commencerent à danser à l'entour de luy. Mais ô dieux quel reuers à ceste medaille? Florantel lequel auoit decouuert à son hoste toute l'affaire arriuant sur ces entrefaittes avec cinq ou six payfans armés de bonnes fourches de fer saisist si brusquement ce premier voleur au collet qu'il l'arrestamalgré qu'il en eust par l'assistance que luy rendirent ceux qui le suiuiôient. L'autre voyant le malheur de son cōpagnon ietta par terre tout ce qu'il tenoit, & prenant la fuitte se garentist à la faueur des tenebres qui le couuroient. Sa fuitte ayât fait crier Florantel trois ou quatre fois au renard, don Clarazel se souuint que les escuyers d'Ama-

dis de Grece & de Gaule auoient vne fois surpris le fraudeur des ruses en l'isle de Guindaye, voila pourquoy croyant comme il estoit vray que son nouueau fraudeur estoit pris, il se releua tout au mieux qu'il peut, se defist apres mille peines des cordes qui luy tenoient les iambes attachees, & courant saisir ce volleur au collet il lui dit. Par dieu maistre volleur il est raisonnable que ie vous manie vn peu à mon tour, que ie sçache si vous auez fort bonne peau, & que ie vous fasse payer avec vsure les outrages que vous m'auuez faits tout le long du iour. Ce disant il luy cassoit les dens à grands coups de poing, & ne se contentant pas de cela le traïsna iusques au logis apres auoir recommandé tous ses habits à Florâtel, car il auoit desia repris son espee qu'il tenoit à la gorge de ce fillou. La plus part de ces paysans te-

nans ce maistre volleur aucul & aux
chausses, il fut plustost porté que traif-
né à l'hostellerie, on le fist monter à la
chambre dás laquelle il auoit souppé,
on l'attacha avec des cordes à vne des
colonnes du lit, & tout au mesme
temps Florantel commanda qu'on
eust à luy chercher cinq ou six balets.
Ces parolles ayans merueilleusement
estonné ce maistre fillou il adressa
sa parole à don Clarazel, & pensant se
sauuer par vn nouveau tour de sou-
plesse le supplia de luy pardonner, &
luy remonstra que tout ce qu'il en
auoit fait n'auoit esté que par raillerie
& à l'imitation du fraudeur, mais Flo-
rantel qui ne vouloit plus aller à pied
l'interrompant à ceste parolle. Non
non maistre galland (luy dit-il) vous
n'eschapperez pas comme vous pen-
sez, il n'y a point d'excuse à vostre ma-
lice, & ie vous veux apprendre aujour-

d'huy à n'estre iamais effronté iusques
là que de vous venir presenter deuant
ceux que vous auez traittez en nou-
ces; où est le cheual de ce gentilhom-
me? Helas (respondit le filou) ie vous
le feray rendre demain le matin, pour-
ueu que vous me remettiez en ma li-
berté. En ta liberté (reprit Florantel)
ah sur mon ame tu ne l'auras point
que nous n'ayons icy le cheual, apres
cela nous songerons à la vengeance
que nous deurons prendre de toy. He
bien (luy repliqua ce malheureux)
vous me traitterez cōme il vous plai-
ra puisque ie suis en vostre puissance,
mais si vous repassez vn peu en vostre
memoire avec quelle peine on gai-
gne sa vie en quelque mestier que ce
soit, vous ne treuueriez pas ce que i'ay
fait tant estrange que vous le criez,
vous y songerez s'il vous plaist & me
regarderez d'vn œil de pitié sous la

promesse que ie vous fais d'estre de-
ormais moins malicieux, cependant
vous voulant satisfaire en tout & par
tout ie feray venir le cheual que vous
demandez. Alors confessant qu'il l'a-
uoit laissé en vne metairie, laquelle
n'estoit esloignee que d'un bon cart
de lieuë pour le plus, il donna des en-
seignes pour l'aller querir, & s'adres-
sant derechef à don Clarazel le supplia
d'auoir compassion de luy. Vrayemēt
gentil fraudeur des ruzes (luy respon-
dit don Clarazel) ie te donnerois biē
subiet de faire d'autres meschancetez
si ie te laissois impuni de celles que tu
m'as faites aujourd'huy par deux fois,
il te faut apprendre que les supplices
suiuent les mauuaises actions de fort
pres, & comme tu me donnois ce ma-
tin des instructions pour deuenir sa-
ge, ie te veux faire maintenant des
leçons pour te faire changer de vie.

La peine fait trembler les meschans, il t'en faut donner vne qui te fasse peur lors que tu projetteras quelque mauuais trait: alors il prit vn gros balet, fist faire deux bonnes paires de verges, en donna vne à Florantel, & par'ce qu'il estoit encor tout nud il fist mettre ce malheureux volleur en chemise: le voyant en ceste posture il luy dist. Or sus fraudeur tu m'inuitois tantost à danser apres m'auoir despoüllé de tous mes habits, danse maintenant & te souuiens tant que tu viuras du cheualier aux tristes pensees. Ce disant il commença à frapper dessus à droit & à gauche, & commandant à Florantel d'en faire de mesme, on ne vist iamais estriller vn homme si brusquement ny avec tant de plaisir, car à chaque coup quel'on luy donnoit on y mesloit tousiours quelque raillerie, de sorte que la chambre estant toute pleine de mon-

de monde qui venoit voir ce passe-temps, ce pauvre fillou souhaitta la mort plus de mille fois. Enfin le cheual qu'on auoit enuoyé chercher estant arriué, don Clarazel fist deslier ce malheureux qui rechinoit d'une façon du tout estrange, & le mettant tout nud en chemise à la ruë apres luy auoir tiré plus de cinq ou six onces de sang des espaulles, des cuisses & des fesses il l'exposa à la rage de la populace laquelle ne faisant pas de moindres huees qu'elle eust peu faire à la rencontre d'un troupeau de loups, le chargea presqu'en vn moment de pierres & de bouë: Toutesfois s'estant arraché de leurs mains apres en auoir versé cinq ou six par terre par les violents efforts qu'il fist pour se depestrer il s'alla mettre à couuert de quelques gros arbres, & reprist tout incontinant le chemin du lieu où son com-

pagnon l'attendoit avec des inquietudes eſtrâges. Imaginez vous vn peu ie vous prie quelles eſtoient alors ſes penſees, ce qu'il pouuoit dire dans l'excès de ſa paſſion, & qu'elle fuſt en fin la rage qui le faiſiſt au ſouuenir de l'aſfront qu'il auoit receu? Tout'furieux il iura plus de mille fois qu'il ſe vengeroit, & pour ce faire il ne proiettoit rien moins que d'aller prendre ſes premiers habits, & de ſuiure noſtre cheualier pour luy donner vn coup de piſtolet dans la teſte, touteſois ceſte reſolution n'eut point ſon effet, & l'on ne le viſt iamais du depuis au moins en ces lieux où il auoit eſté ſi bien eſtrillé, ny en quelque part que ſe treuua noſtre extrauagant. Ce pauvre malheureux eſtant expedie de la ſorte que ie vous ay dit, Florantel dont l'eſprit eſtoit fort prudent iugea qu'vn plus long ſejour en ce lieu

ne luy pourroit apporter que du préjudice, voila pourquoy contentant l'hostesse comme elle voulust il alla faire seller ses cheuaux, & les voyant en fort bon estat remonta promptement dans la chambre pour dire à don Clarazel qu'il luy falloit prendre les armes & continuer leur chemin, mais luy qui vouloit alors reposer s'alla mettre sur vn bon liect, & sans faire cas de tous ses discours se prist à ronfler presqu'au mesme temps, ce qui mettant Florantel en mauuaise humeur il l'alla prédre par le bras & la tirât fort rudement. Cóment cheualier (luy dit-il) est ce ainsi que vous vous acquittez des promesses que vous m'auiez faittes? Et vous beau sire (luy respondit-il ayant les yeux à demy fermes) est ce ainsi que vous abusez de ma patience? Considérez les maux que nous auós soufferts aujour d'huy?


Je considere bien tout ce que vous dittes (reprist Florantel) mais chevalier mespriserez vous les occasions, & ne songerez vous point qu'il ne faut perdre qu'un seul moment pour faillir à la gloire d'une aventure? Le vous ay dist de quelle importance est celle à laquelle ie vous conduits, il me semble que vous ne deuez pas maintenant faire le paresseux ou le faineant? Ah mon dieu (dit-il) ie voy bien que c'est, l'aventure de laquelle vous me parlez maintenāt n'est pas si pressée, & ie m'assure que nous n'y arriuerons que trop tost, mais vous avez peur que ce fraudeur ne nous dresse quelque embuscade, si ce n'est que cela qui vous donne de l'inquietude, reposez vous en sur moy ie vous prie, nous nous deffendrōs bien de sa force & de celle de tous ses amis puis que nous auons esuité les pieges qu'on

nous a dressez. Comment (dit Florantel à quice discours estoit importun) cheualier pensez vous que la crainte me fasse tenir celangage? Non i'ay le cœur aussi bon que vous, & quand nous nous treuuerons aux occasions ie vous feray voir que i'ay dist toutes ces choses plustost par iugement que par necessité ou par couardise: Que si vous refusez encor vne fois de marcher vous me ferez mal penser de vostre courage, & me donnerez subiet de dire par tout que vous preferez vostre repos à l'honneur qui doit estre le but des bons cheualiers. Sur ma foy (luy dit'Clarazel se leuant avec vne action de colere) il faut aduoüer que vous estes merueilleusement importun ou beaucoup plus sage que moy. Certes c'est plustost l'un que l'autre (luy dit Flo-

rantel) nous ne sommes pas sur ceste querelle, prenez vos armes & me suivez. A ces mots luy mettant luy mesme la cuirasse sur les espaulles, le casque en teste & l'escu au bras, il fist tirer ses cheuaux hors de l'escurie, & n'ayant pas oublié vn bon guide prist le chemin qui le pouuoit conduire au chateau d'Arcail.

Discours excellens tenus entre Florantel & nostre cheualier hypocondriaque: Quel en fust le subiet: Ce qui luy arriva avec vn bouvier: Comme il prist vn courrier & son postillon pour Amadis de Gaule & don Galaor roy de Sobradize: Folle imagination conceüe contre vn batelier: Comme il tua ce batelier: Le subiet pourquoy, avec tout ce qui se passa en ceste aduventure.

CHAPITRE XX.

 A fortune tient vn grand empire sur nous, elle nous flatte quelquefois pour no^r faire treuuer ses loix agreables, elle nous persecute aussi pour nous tesmoigner qu'elle nous mesprise; Elle melle des douceurs à ses amertumes, de amertumes à ses douceurs, bref se iouant de nous selon son caprice elle nous apprend que nous n'auons rien de plus incertain que les effets de son amour ou de sa hayne. Vous auez veu dans le chapitre precedent en quel déplorable estat elle auoit reduit nostre extrauagant par l'artifice d'vn fillou, comme en vn moment elle changea sa peine en repos, luy faisât recouurer son cheual & ses habits avec toute satisfaction qu'il eust iamais peu desi-

rer d'un si grand outrage : Vous allez voir non pas des disgraces à plaindre ny des faueurs à souhaiter, mais vn mélange assez gentil de ces deux choses si differentes dans les aduentures qu'elle fist naistre à ce pauvre hypochondriaque. Ce malheureux ayant marché toute la nuit & plus de deux heures du iour avec vne pensee continue de Syluiane se treuua tellement pressé de sommeil qu'il fust contraint de se reposer à quelque condition que ce fust : Choississant donc vn lieu que l'ombrage de quelques arbres rendoit fort propre à cet effet il mist pied à terre, & laissant son cheual, entre les mains de Florantel lequel eust beaucoup mieux aymé manger que dormir, s'estendist sur l'herbe faisant vn cheuet de son escu comme il auoit veu que les cheualiers errans auoient accoustumé de faire lors qu'ils dor-

moient à la campagne. Son esprit
estant puissamment occupé de ces
folles imaginations, il ne fust point
plutost couché qu'il ne se remist en
memoire quelque chose de ce qu'il
auoit leu dans les Amadis, voila pour-
quoy leuant sa teste avec la paulme de
sa main qui la soustenoit il dist à Flo-
rantel. Escoute escuyer mon amy ie
te prie de prendre garde que quelques
singes ne viennent icy pendant mon
sommeil pour se iouer de mon heaul-
me & de ma cuirasse? Comment mon-
sieur (luy dit Florantel à qui toutes ces
niaiseries estoient merueilleusement
deplaisantes) que voulez vous dire par
là? Sur mon ame ie pense que vous in-
uentez tant de belles choses que vous
faittes à chaque moment pour vous
faire rire vous mesme? A quel propos
me parlez vous maintenât de singes?
Ah mon amy (dit-il branflant la teste

avec vn soufris vn peu dedaigneux) ie voy bien que ton esprit n'est pas des plus riches du monde, & que tu ignores sottement ce que tu deurois sçauoir depuis le berceau. Péses-tu que ie t'aye parlé de singes sans que i'en aye eu du subiet? Sçaches mon amy qu'une fois Garniter roy de Dace & Manely le Sage estans endormis dans vne isle deux grands singes arriuerent vers eux lesquels ayans pris leurs cuirasses & leurs heaulmes monterent avec vne merueilleuse legereté sur les arbres au pied desquels ils reposoient, se ietterent fort longuement vn de ces heaulmes comme s'ils eussent voulu iouer au pot cassé, rompirent quelques petites branches avec lesquelles ils s'allerent chocquer plus de mille fois faisant des sauts & des gambades du tout estranges, & que ces cheualiers desquels ie te parle ne peurent iamais re-

couurer leurs armes qu'apres de tres grandes difficultés: Or est il que ne voulant pas auoir tant de peine ie t'ay donné cet aduertissement afin que tu ne dormes pas tousiours & que tu les chasses à grands coups de pierre si de fortune il y en arriuoit icy quelques vns. Vrayment (repartist Florantel qui ne sçauoit s'il deuoit rire ou se fâcher) monsieur voila bien resué de belle façon, à quoy diable allez vous songer? Dormez dormez & craignez plus le fraudeur des ruzes que vous rencontrastes hier que des singes imaginaires, ie vous guarantiray bien de ceux cy, & ne vous oserois promettre cela de l'autre au lieu où nous sommes. Ho ho Florantel (luy dit-il) est il bien possible que tu ayes encor peur de ce malheureux? Par ma foy ie ne pense pas qu'il luy prenne iamais enuie de nous venir voir, car ayant esté si bien

frotté sur le ventre & par tout comme tu as veu. Il nous apprehendera plus que la foudre. Or sus ie t'ay declaré mes pensees, c'est à toy maintenant à faire le reste. Ce disant il se recoucha & s'endormist tout incontinent laissant faire la sentinelle à son conducteur lequel ayant peur que le fillou ne les vint surprendre pour se vanger des coups de fouët qu'il auoit receu ne se voulust iamais endormir. Deux grosses heures s'escoulerent en ceste façon au bout desquelles nostre extrauagant resuant à sa dame comme s'il l'eust veuë dans le miroir des secrets d'amour, commençoit à luy faire ses plaintes & à luy descouurir le mal qu'il souffroit par sa cruauté, quand il ouit la voix d'un chartier lequel estant assis sur vn char avec deux ou trois femmes de ses voisines animoit ses bœufs par ses cris & par ses parolles. Ce bruit

L'ayant fait resueiller en sursaut, il se leua soudainement, mist le casque en teste & l'espee au poing, & s'imaginant que c'estoit vn gean qui emmenoit quelques damoiselles se prist à courir vers luy de toute sa force luy commandant de s'arrester. Ce pauvre charriers'estonnant de ceste parolle se ietta par terre plus passe qu'un mort, ces femmes à demy transies commencerent à joindre les mains pour implorer sa misericorde, & toutes tremblantes luy demanderent ce qu'il desiroit. Belles dames (leur respondist-il) ie veux que vous me disiez franchement si l'on vous emmeine par force, car en ce cas ie chastieray si cruellement ce maudit gean qui vous a rauies que ie le feray seruir d'exemple aux meschans. Helas monsieur (luy respondit vne bonne vieille) ce pauvre gars n'est pas vn volleur comme vous pensez, c'est

mon fils qui nous meine dans sa charrette iusques au logis. Ah (dit il) me voila content, car a n'en point mentir ie pensois au commencement que ce fust vn gean qui eust fait quelque mauuais coup, & pour ceste consideration ie m'estois offert à vostre serui-
ce, vous dittes qu'il est vostre fils, les autres sont toutes contentes de l'ac-
côpagner, marchez à la garde de dieu vous n'aurez point d'empeschement par mon moyé. Ce disant il les laissa si satisfaites d'en estre elchappé à si bô marché quelles creurent estre presque resuscitees de mort à la vie, & s'en retourna treuuer Florantel lequel ayant admiré ce transport d'esprit n'auoit pas moins pris de plaisir à la frayeur de ces pauvres gens qu'à la boutade de ce cheualier. Le treuuant tout prest à partir il fust à cheual en moins d'un moment, & sans se souuenir que le so-

leil luysoit dans son ventre se remist sur ses resueries accoustumees; Toutefois il n'y demeura pas attaché si longuement qu'il eust bien voulu, il en fust retiré par l'accident que ie vous vay dire. Vn courrier passant pres de luy avec vne diligence incroyable il tourna la teste, & comme son imagination n'estoit pas moins prompte que tous ses sens il se souuint d'auoir leu qu'Amadis de Gaule & don Galaos couroient vne fois au secours de la reyne Oriane, Lucelle infante de Cicile & de quelques autres princesses que l'on emmenoit, auquel temps Amadis de Gaule abbatist le cheualier del'ardenteespee d'un coup de lance, & par consequent il creut que ces deux qui passoient estoient cheualiers lesquels se diligentoient de la sorte pour quelqu'entreprise hazardeuse, voila pourquoy s'adressant au po-

stillon qui courroit deuant il luy dit.
Cheualier au nom de dieu dittes moy
le subiet qui vous fait marcher avec
vne diligence si grande, car si mes ar-
mes sont vtilles a vostre seruice ie ne
manqueray point de les employer
de bon cœur. A ce mot de cheualier
le postillon le regardât se mist à rire,
& sans luy respondre vn seul mot pas-
sa outre comme vne esclair, ce qui le
mettant en colere il se tourna vers vn
gentilhôme qui venoit & le supplia
par la memoire de la chose qu'il ay-
moit le plus d'arrester vn peu pour
luy dire l'occasion qui le faisoit pres-
ser de la sorte, & ne manqua point
de luy offrir la mesme assistance qu'il
auoit faite à son compagnon. D'a-
bord ce gentilhomme fust vn peu sur-
pris, & comme il n'estoit pas des plus
gracieux qui fussent au monde il fust
sur le point de s'offencer de son actiô,
neant-

néantmoins deuinant tout inconti-
nant en quelle partie du corps il estoie
bleffé il luy respondit. La chose par
laquelle vous me coniurez est de si
grand prix, qu'il faut que ie vous con-
fesse en depit de moy que ie suis Ama-
dis de Gaule; O mô dieu(s'escria tout
au mesme temps nostre extrauagant)
quelle rencontre est celle cy? Sur mon
ame ie m'en suis douté quand ie vous
ay veu venir de la sorte. Grand roy
qui n'auiez iamais eu de pareil au mô-
de & deuant lequel les plus forts che-
ualiers de la terre doiuent trembler;
donnez moy s'il vous plaist vos vi-
ctorieuses mains à baiser afin que ie
me puisse vanter d'auoir vn iour tou-
ché ce qu'il y a de plus precieux sur la
terre. Certes ie ne m'estonne pas si
tous les Historiens se sont arrestés à
descrire vos prouës incôparables,
car vous estes digne de la gloire qu'ils

vous ont dōnce, & ie ne treuue point de loüanges qui ne soient encor au deffous de vostre merite. Sire, quelque grande entreprise vous a fait mettre en campagne sans armes, au nom de dieu seruez vous des miēnes qui sont excellentes, ou permettez que ie les aille employer pour vostre seruice en ceste occasion? Mon cheualier (dit ce gentilhomme qui prenoit vn plaisir merueilleux à tout ce discours, & qui n'en eust pas pris vne part si courte s'il n'eust esté pressé par quelques importantes affaires) ie ferois marry d'abuser de vostre bôté, l'aduenture à laquelle ie cours est tres difficile, toutefois i'espere d'en venir à bout moyenant la grace de dieu. Ah sire (repliqua l'hipocondriaque) ie n'en doute point, vous n'avez iamais rien entrepris que vous n'ayez executé fort heureusement, & mesmement en la compagnie de ce

vaillant roy qui va deuant vous (notez qu'il prenoit le postillon pour don Galaor) duquel neantmoins ie me plains vn peu pour n'auoir pas esté si courtois que vous, mais i'aurois vn regret extreme pour toute ma vie, s'il vous arriuoit quelque disgrâce par faute d'auoir vn tres bõ harnois; voilà pourquoy ie vous supplie encor vne fois de prendre le mien ou d'auoir agreable que ie vous suiue, peut estre que ie ne vous seray pas tant inutile que vous le croyez. Non non cheualier (dit le gentilhomme) ie viendray bien à bout de mes ennemis sans vostre assistance de laquelle toutefois ie vous remercie pour n'estre pas ingrat de l'amitié que vous me portez: ie voy ce me semble vne occasion dans laquelle vous pourrez employer vostre force & vostre valeur, allez sous l'heureuse guide du ciel, ie m'en vay suivre

mon chemin. A ces mots nostre hypocondriaque s'estant abbaissé iusques sur l'arçon de la selle pour saluër ce gentil homme avec respect il tourna la teste pour voir l'aduéture dõt on luy parloit, & apperçeut vn batelier lequel descendant le long d'vne petite riuiere qui tombe dans Loyre menoit deux femmes en vn batteau. Sa ceruelle ayât plus de chambre à louër qu'il n'y en a dans tous les fauxbourgs de Paris il treuua tout incontinent belle place pour vne imagination nouuelle, il creut que ce batelier estoit quelque cheualier insolent qui vouloit forcer ces deux femmes, & par consequent il iugea qu'il estoit obligé de venger l'outrage qu'il leur vouloit faire. S'appuyant donc encor sur la parolle de ce gentilhomme qu'il croyoit estre Amadis de Gaule, ou pour mieux dire ressentant vn conten-

tement nompareil du commandement qu'il luy auoit fait il s'en alla à toute bride vers ce batelier, & le voyant à sept ou huit pas du riuage luy cria. Cheualier outrageux laisse ces princesses & ne fais point d'effort à leur chasteté, autrement tu sentiras ce que pese mon coutelas: La nature de ces gens qui viuent sur mer & sur les riuieres estant presque toute barbare, ce batelier fronça le sourcil à ceste menace, & s'en mocquant comme d'une pure sottise luy respondit assez brusquement. Vraymēt c'est mont, monsieur le nouveau soldat allez à la guerre & ne venez point icy quereller des gens qui ne vous craignent pas beaucoup: Comment meschant (repliqua l'hypocôdriaque) est ce toute la satisfaction que tu me donnes que de me respondre avec arrogance? Par dieu ie t'apprendray comme il faut parler à

des personnes qui me ressembloit.
Alors voyant que ce batelier s'esloignoit, & que branlant la teste de moment à autre il sembloit le menacer en quelque façon, il entra en telle fureur que sans considerer si la riuere estoit profonde ou non il se ietta dedans pour le suiure. Ce batelier s'estonna d'abord de la resolution de ce cheualier lequel treuuât les eaux fort basses s'approchoit tousiours à coups d'esperons, mais reprenant ses esprits en moins d'un moment il se saisist d'un gros baston long de huit pieds, & n'attendant pas que l'ennemy fust plus proche le luy rabatist sur la teste avec vne telle roideur que si le casque n'eust esté bon il l'eust escrasé infailliblement. Ce premier coup troubla nostre extrauagant tout à fait, il chancela trois ou quatre fois sans sçauoir s'il estoit au monde, & fist signe tout au-

tant de fois qu'il alloit tomber, sur-
quoy le batelier redoublant avec la
mesme furie ne manqua pas de le ren-
uerfer dedans l'eau si bien priué de iu-
gement que sans doute il alloit boire
à tous ses parens pour le dernier coup
si Florantel ne fust arriué sur ces en-
trefaittes. Ce ieune homme voyant en
danger celuy que sa maistresse luy
auoit plus recommandé que sa vie, se
ietta tout au mesme temps sur la terre
& de là dans l'eau où rencontrant ce
pauvre fou qui n'en pouuoit plus il le
traisna iusques sur le bord, luy osta ses
armes le plus promptement qu'il luy
fust possible, & le couchant sur vn
penchant luy passa si souuent les
mains sur le ventre qu'il en fist sortir
tout l'eau qui le remplissoit, de sorte
qu'au bout d'une demie heure il le
rendist en fort bon estat. Le voyant
gaillard & dans la mesme disposition

qu'il estoit peu auparauant il luy pensa remontrer la follie qu'il auoit faite de s'aller precipiter inconsiderement dans vne riuere sans auoir vn subiet d'honneur ou de gloire, mais tout au mesme temps qu'il l'eust fait resouuenir de ceste aduventure il le vist releuer avec furie & le ietter sur son cheual avec la resolution de suite ce batelier qui l'auoit frappé de sorte que tout ce qu'il peut faire fust de courir apres luy pour ne le point perdre de veüe. La fantaisie de l'extravagant estant merueilleuse d'autant qu'il se souuenoit qu'Amadis de Gaulle luy auoit recommandé ceste affaire comme faisant grande estime de sa valeur, il alla à toute bride le lóg du riuage par l'espace d'une grosse heure au bout duquel temps treuuant de mauuaise fortune ce batelier qui mettoit à terre les deux femmes qu'il cõduisoit

il courust droit à luy de telle furie qu'il luy mist sa lance au trauers du corps sans que ce malheureux peult gaulchir au coup quoy qu'il eust essayé de ce faire. Ceste vengeance luy semblant encortrop petite pour l'outrage qu'il auoit receu il mist pied à terre, & tenant l'espee à la main luy alloit sans doute aualler la teste si Florantel ne fust arriué sur le point qu'il l'alloit frapper. Ce ieune homme s'estant donc ietté sur la terre plus legerement qu'un oyseau luy faist le bras & le retirant vn peu rudement: Tout beau tout beau cheualier (luy dit-il) vous vous faictes tort de mettre les mains sur vne personne tant indigne de vostre courage, remettez l'espee au fourreau & confiderez que vous n'en auez que trop fait. Comment Florantel (luy respondit-il avec vne action toute brusque) te mocques tu de moy

de me demander la vie de cet outrageous corsaire qui m'a rendu tant de desplaisir? Sur ma foy tu es insensé? A ces mots voyant cinq ou six hommes qui s'auançoient avec des fourches pour véger ce batelier qu'ils cognoissoient bien il se ietta de telle furie tout au trauers d'eux qu'il ouurit la teste au premier qui se presenta deuant luy, & mist le bras d'un autre non pas sur la poudre, mais en estat de ne s'en seruir de sa vie. Ceste furie estonnant les autres ils commencerent tous à fuyr, surquoy Florantel qui craignoit merueilleusement d'estre enueloppé de tous les costés & de ne se pouuoir retirer quand il voudroit s'approchant de luy luy remonstra en peu de paroles le danger extreme qu'il y auoit à demeurer là plus long temps, mais au lieu de l'addoucir il ne s'en fallust pas beaucoup qu'il n'attirast sur soy sa co-

lere, car ce cheualier le regardant d'un œil de trauers luy dist: Meschant que me conseilles tu? Pense tu que i'aye peur de ceste canaille, & que ie ne mette point en mille morceaux tous ceux qui se presenteront pour nous rendre du desplaisir? Non non ie les veux exterminer en moins d'un cart d heure? Ie le sçay bien (reprist Florâtel qui ne iugea pas qu'il fust à propos de l'irriter encor vne fois) mais monsieur la necessité de l'affaire pour laquelle ie vous conduis ne vous permet pas de demeurer icy d'auantage, au nom de dieu contentez vous, & ie vous supplie par la memoire de Syluiane de monter tout incontinant à cheual, autrement ie luy diray le peu d'estat que vous auez fait d'elle en ceste occasion? Ah Florantel (luy respondist-il) que tu es merueilleusement importun, neantmoins tu me conjures par

vne chose à laquelle ie ne puis faillir sans me rendre trop criminel. Ce disant il mist brusquement le pied en l'estrier, & parce que Florantel gallopoit desia il commença de galopper aussi bien que luy laissant tous ceux qui ne l'auoient peu arrester si faschés de ceste aduventure qu'il y en eust trois ou quatre des plus mutins qui se resolurent à le suiure: Toutefois ce fust vne peine inutile, car son conducteur l'esloigna si bien en fort peu de temps qu'ils ne le peurent iamais rencontrer. Ce ieune homme se voyant donc hors de toute crainte, & en ce lieu où il pouuoit auoir du recours par l'autorité du seigneur du lieu qu'il cognoissoit bien, il s'arresta dans vn bon logis pour passer la nuict tant pour laisser repaistre ses cheuaux que pour se reposer luy mesme. La faim le pressant encor plus que l'enuie d'aller dormir

il fallust soupper & pour ce faire l'hostesse enuoya pour seruir à table deux ou trois personnes entre lesquelles vne sienne fille extremement belle aagée de quinze ou seize ans, s'approchant de don Clarzael pour luy verser de l'eau sur les mains, il se mit à la regarder avec vne si grande attention que la pauvre fille estant toute honteuse de se voir regarder de si pres se tourna trois ou quatre fois d'un autre costé. Le cerueau de ce cheualier estât disposé à receuoir toutes sortes d'impressions il s'imagina tout au mesme temps que ceste fille innocente estoit quelque grande princesse ainsi deguisee pour la crainte de quelque malheureux accident, voila pourquoy pendant le souuenir des viandes qui l'attendoient sur table il luy dist : Belle bergere pardonnez moy si ie suis vn peu curieux, ie ne pèse pas qu'un pay-

san peut faire vne si belle chose que vous, & ceste agreable beauté qui me charme me fait coniecturer que vostre naissance est plus glorieuse, que vous estes quelque princesse ainsi disguisee, & que vous n'avez pris cet habit qu'à l'exemple de quelques belles qui ont vsé d'un mesme artifice pour esuiter la tyrannie de quelque geant. Si cela est vous me feriez vne singuliere faueur de me descouurir vos secrets en recompense de laquelle vous vous pourriez asseurer de tirer de moy autant de seruice que vous en pourriez desirer de qui que ce soit. Monsieur (respondit ceste fille qui rougist à ceste parolle) vous me pardonnerez s'il vous plaist si ie ne vous respons pas comme vous meritez, vrayment ie n'entends pas ce que vous me dittes, & ie ne puis comprendre pourquoy vous ne voulez pas que ie sois fille du


maistre de ceans, car ma mere est femme de bien. Ma mignonne (luy repliquat-il) ie ne touche point à l'honneur de vostre mere qui qu'elle soit, mais ie dis que vous estes trop belle pour estre fille d'un payfan. Quand la bergere Syluie de la beauté de laquelle les liures d'Amadis ont parlé si souuentefois comme d'une rare merueille, quand (dis- ie) ceste incomparable bergere alloit garder les brebis en un petit village qu'on nommoit Tyrel, elle croyoit estre fille d'un villageois, neantmoins elle estoit sortie de race royale & peu de temps apres elle fust cogneuë pour fille de Lisuard de Grece & d'Onolorie heritiere de l'empire de Trebifonde, ce qui me fait imaginer veu l'excellence de vostre visage que vous luy pourriez estre parente ou sortie d'une famille autant illustre que la sienne: Ne faites point de difficulté

de me descouurir toutes vos pensees sur la parolle que ie vous donne de vous seruir fidellement en vostre affaire. Monsieur (luy respondit-elle en riant parce qu'elle croyoit qu'il se vouloit donner du bon temps) vous vendrez s'il vous plaist vos cocquilles à d'autres, car ie ne les acheptera y pas; Le vous ay desia dit que i'estois fille du maistre de ceans croyez le ou le charbonnez. Alors luy faisant vne reuerence à sa mode elle s'en alla raconter vne partie de tout ce discours à sa mere laquelle n'ayant pas vn esprit assez delié pour cognoistre d'où ce mot venoit fust sur le point de s'en offencer, & de luy aller chanter des iniures, toutefois craignant la charge de quelques costez sur le dos elle passa le tout sous silence, & n'en eust point d'autre végeance que de faire payer l'escot à son cōducteur au double de ce qu'il valloit.

L'arriuee

L'arrinee de don Clara^zel au chateau d'Arcail: De quelle inuention se seruiſt la duchesse pour en iouir: Comme elle luy fiſt à croire qu'elle eſtoit grande magicienne: Leurs discours, leurs actions & comme elle l'arresta dans Arcail avec vne ferme opinion qu'il eſtoit enchanté.

CHAPITRE XXI.

 Lorantel ayant fait durer la nuit en ſa chambre deux heures apres que le ſoleil l'eust chassée de dessus le terre il se leua, & s'approchant du liſt de l'extravagant luy demanda s'il dormoit encor: Helas (luy reſpondit-il auſſi toſt) mes douleurs m'en empeschent bien, & la cruauté de Syluiane ne me laiſſe

Hh

iamais reposer qu'avec des inquietudes estranges; Toutefois il faut que ie te confesse icy franchement que ie ne songeois pas maintenant à elle; A quoy luy dit Florantel? A la faute que ie fis hier (luy respondit-il) de n'auoir pas acheué ce cheualier outrageux qui demeura sur la poussiere, car i' apprehende qu'il ne fasse encor mille maux aux dames s'il reuient vne fois en conualescence. Ah vrayment (luy dit Florantel) voila debuté d'une autre façon, monsieur par ma foy vous vous deuriez taire, car vous me faites rire malgré que i'en aye. Quelle apparence ie vous prie de desirer vne nouvelle mort à ce malheureux batelier que vous laissastes hier sans ame? Ho ho Florantel (luy dit-il) ie voy bien que tu te mescontes, & que tu ne pris pas bien garde à tout ce qui se passa en ceste aduventure puis que tu nommes

ce grád cheualier qui estoit corsaire & demy gean vn simple meneur de bateaux? Sans doute tes yeux estoient ofusquez par les charmes de quelque sorcier, ce qui ne m'est pas arriué comme à toy par la vertu de mon espee qui deffait les enchantemens. Encor mieux (luy dit Florantel) vous rencontrez tousiours à gaulche , monsieur ie voy bien que ie serois plus fou que vous si ie contestois plus long temps sur ceste matiere : Leuez vous seulement & vous depeschez de vous habiller attendu que l'heure nous presse. Ainsi luy faisant quitter le cheuet il alla faire accommoder ses cheuaux & le desicuser le quel estant mangé demie heure apres ils prirent le chemin d'Arcail dont ils n'estoient esloignés que de douze lieuës. Le passe sous silence plusieurs discours qu'ils tindrent ensemble tout le long du

iour parce qu'ils ne vallent pas la peine qu'on les mette icy, pour vous dire que Florantel n'ayant pas perdu la memoire des instructions que la duchesse luy auoit donnee mesura si bien son temps qu'il n'y arriua que de nuict. Se voyant au lieu où il se desiroit avec vne impatience si grande il fist mettre pied à terre à nostre guerrier dans la basse cour du chateau, le prist par la main & le mena dans vne petite chābre basse vn peu escartee où ne voulant rien oublier de ce qui luy auoit esté commandé il luy fist prendre de l'essence de pauot avec du vin que la duchesse luy auoit fait mettre dans vne bouteille pour le commencement de la ruze qu'elle vouloit practiquer enuers luy. Cela fait il le laissa avec promesse qu'il luy apporteroit à soupper vn cart d'heure apres, mais au lieu de penser à cela il sortist pour don-

ner le loisir à son breuuage de faire son operation & s'en alla treuuer la duchesse laquelle se sentant merueilleusement esmeuë à son arriuee se leua pour luy demander en secret quel fruit il rapportoit d'un si long voyage. Madame (luy respondit-il) tout tel que vous le pouuez desirer, nostre homme est ceans apres m'auoir donné mille peynes le long des chemins, & ie m'assure qu'il est desia enueloppé dans vn sommeil duquel il ne sortira de six heures. Voila qui va bien (luy dit elle) Florantel laissez endormir tous ceux de ceas, & puis l'apportez à la chambre peinte, la morisque vous aydera, car elle sçait desia le secret de toute l'affaire, mais sur tout prenez garde que personne n'esuente cecy? Madame (luy respondist-il) reposez vous en sur moy ie vous prie ie conduiray la chose si secrettement que

vous n'en entédrez iamais parler que par d'autres à qui vous le voudrez decouvrir. Ainsi toutes choses estans résolues Florantel fortist, s'en alla souper à plein, ventre & voyant peu de temps apres l'heure propre à l'exécution de son entreprise ne manqua point de porter nostre extrauagant dans la chambre qui luy auoit esté ordonnée, de le deshabiller par l'assistance de la morisque, de le coucher dans vn riche liét & de fermer toutes les portes en telle façon qu'il ne peut sortir sans la permission de madame laquelle n'estoit pas alors si bien à son aise que luy, car elle auoit des resueille-matins qui ne luy permettoiet pas de dormir, son impatience la mettoit en des inquietudes estranges & ses desirs amoureux la chatouilloient en telle façon qu'elle se leua plus de tréte fois de son liét pour s'en aller coucher avec

luy : Toutefois deux considerations l'empescherent, elle iugea qu'elle le treuueroit si fort assoupi qu'il ne pourroit iamais satisfaire à ses passions impudiques, & d'ailleurs elle aprehendoit de gaster toute son affaire au lieu del'aduancer comme elle vouloit, si bien que se recouchant avec resolution d'attendre le temps qu'il falloit elle laissa venir le iour. Le voyât parestre fort clair elle se leua, prist celuy de tous ses habits quiluy donnoit le plus de grace, adiousta tout ce que l'artifice peust inuenter à la beauté que la nature luy auoit donnee, & prenant vn miroir elle regarda dedans plus de mille fois pour chercher parmy tous les traits de ses yeux celuy qui seroit le plus propre à faire vn effort dans l'ame de ce cheualier. Pendant qu'elle s'adiustoit en ceste façon, ou plustost qu'elle trauailloit à se faire belle, no-

estre extrauagāt n'estoit gueres moins empesché, car s'estant treuue à son reueil dans vne chambre richement parée où l'or esclattant de mille costés releuoit agreablement les plus belles peintures du monde, il estoit tellement estonné qu'il ne pouuoit pas recognoistre s'il estoit encor enuelpé dans les charmes de quelque sommeil, ou si ce qu'il voyoit estoit veritable. Il se souuenoit fort bien d'estre arriué de nuit en vne maison qui sembloit belle quant à l'apparence, d'estre entré dans vne petite chambre basse, & d'y auoir beu d'un vin excellent attendant l'heure du soupper, mais de comprendre comme il se treuuoit alors dans vn autre si riche & couché dans vn si beau liēt, il ne pouuoit pas, de sorte qu'ayant resué plus de demie heure à ceste aduēture qu'il treuuoit digne de merueille, il commença de

soupçonner qu'il estoit enchanté par quelque belle magicienne laquelle estant amoureuse de sa vertu l'auoit fait amener en ce lieu pour le posséder. Ceste pensée luy remettant plusieurs choses dans la memoire il se souuint que don Rogel de Grece, Fortunian le beau, & don Edoüard prince d'Angleterre auoient quelquefois esté arrestés de mesme façon par Argonide, Ginolde, & Sardenie, & par consequent il iugea que la mesme chose luy pouuoit alors arriuer, si bien qu'estant dans vne inquietude tres grande il ne sçauoit à quoy se resoudre quand il vist entrer Astralize avec vne contenance maiestueuse, vn air amoureux, & ie ne sçay quelle grace pleine d'appas qui le confirmant tout à fait dans ceste opinion l'empescha de douter encor que la chose fust eritable. La presence de ceste dame

luy donnant vne esmotion fort estra-
ge il la contempla quelque espace de
temps à demy rauy ne sçachant s'il de-
uoit parler ou attendre qu'elle eust
commencé de parler, mais songeant à
la fin que son silence pourroit estre
reputé pour vne sottise il se souleua
vn peu sur son liect, & la voyant desia
fort proche luy dist. Belle dame, si
vous descendez des cieux pour m'ad-
uertir de quelque chose qui regarde
ma vie ou ma mort permettez que ie
vous adore, sinon dittes moy qui
vous estes afin que ie vous rende
l'honneur que vous meritez & ne de-
daignez pas tout d'vn mesme temps
de me dire où ie suis, par qui i'ay esté
mis en ceste chambre qui semble vn
autre paradis, & ce que l'on veult faire
de moy? Beau cheualier (luy respon-
dit-elle) ie vous puis esclaircir en fort
peu de temps de tout ce que vous me

demandez ; mais afin que ie sois aussi
satisfaitte de vous que vous le ferez de
ma part il faut que vous m'accordiez
vn dô s'il vous plaist, Vraymêt mada-
me (luy dit-il) ie vous l'octroye de bô
cœur, car ie ne pense pas que sans cri-
me l'on nous puisse refuser quelque
chose, parlez donc quand il vous plai-
ra pour me faire sçauoir ce que vous
voulez. le sçauois bien (repliquat-elle
& prenant le pied de son liêt pour vn
siege) cheualier ie sçauois fort bien
que vous me feriez la response que
vous m'auiez faitte, neâtmoins ie vous
ay voulu faire parler pour vne particu-
liere satisfaction de mô ame, & pour
vous tesmoigner que ie n'estime pas
tant mes charmes que vostre parolle.
Ce mot vous estonne ie le iuge à vo-
stre action, & sans doute vous appre-
hendez qu'estant sçauante aux arts
magiques ie n'vse sur vous de quel-

que rigueur, mais ne craignez rien ie vous prie, l'estat où vous estes vous doit asseurer, vous deuez lire vostre fortune en ma contenance & en mon visage, & vous deuez iuger que ie ne vous ay pas fait venir en ce beau palais pour vous rendre du deplaisir. Il est vray que vous y estes à ceste heure enchanté, toutefois voyez ie vous prie en quelle façon? Sans doute comme don Rogel de Grece estoit avec Sardenie en l'isle amoureuse, Fortunian le beau avec Ginolde, & le vaillant don Edoüard avec Argonide, car ie vous ay rendu l'vsage de la raison que vous perdistes en entrant ceans non pas pour vous faire sentir des supplices, mais pour vous donner des contentemens incroyables, & vous traiter comme ces belles dames, desquelles ie vous viens de parler, traitterent ces princes excellens. Ne me voulez vous

pas bien rendre les mesmes tesmoignages d'amour que ces princes donnerent à ces belles magiciennes sans que i'vse de plus grands charmes pour vous y forcer? Certes madame (luy respondist-il) c'est en vain que vous me demandez si ie veux auoir pour vous la mesme affection que ces cheualiers eurent pour ces dames, mes volontez sont desormais en vostre puissance, & vous ayant pour moy la mesme inclination que ces belles dames auoient pour ces princes incomparables il est raisonnable que ie satisfasse à des obligatiōs si puissātes. Madame, ie vous diray que ie suis disposé à receuoir avec respect vne chose si precieuse que la iouissāce de vostre beauté, & que dās ceste possession ie m'estimeray le plus heureux cheualier qui soit sur la terre. A ces mots estédāt le bras il la tira avec vn peu d'impatience, il approcha ses

leures des fiennes, & la baïsa trois ou quatre fois avec tant d'amour que toutes ses puissances se resueillans sur ces entrefaites il la mist tout à fait entre les draps pour luy donner ce qu'elle auoit cherché avec tant de soing & qu'elle attendoit avec des impatiēces tres grandes. Ces premiers feux estans esteints ils les r'allumerent avec mille sortes de mignardises, & demurerent ainsi parmy des rauissemens incroyables par l'espace de trois grosses heures, au bout desquelles ce vaillant champion voulant prendre haleine la supplia de ne s'offencer point s'il luy demandoit son nom, & comme elle s'estoit peu resoudre à l'aymer veu qu'il n'estoit que simple cheualier errant tres-indigne de telles faueurs. Ceste bonne dame, qui auoit bien premedité ce qu'elle deuoit dire sur ceste question, se soufrist à ceste parolle &

le regardant amoureusement. Ah certes cheualier (luy dit elle) vous le prenez sur vn bonton, & vous auez fort bonne grace de me vouloir celer qui vous estes comme si ie le pouuois ignorer: Pensez vous que ie ne sçache point que vous estes don Clarazel de Balearé quelquefois surnomé le beau desolé par la fantaisie d'un hermite, & le plus souuent le cheualier aux tristes pensees? Ignore ie les grands faits d'armes que vous auez executé en vne des plus belles prouinces de France? N'aez vous point deffait vn monstre tres horrible le propre iour que vous fustes armé cheualier? N'aez vous point trióphé des sauuages, des ours & d'une infinité de geans? Non non cheualier ie n'ignore rien, & ie ne me suis iamais resoluë à me mettre en vostre puissance que ie ne vous aye mieux cogneu que vous ne vous co-

gnoissez vous mesme, voila pourquoy
ne praticquez plus aucun artifice pour
vo^r deguiser ou pour me cacher quel-
que chose, quant au reste qui consiste
au desir que vous auez de me cognoi-
stre il est raisonnable que ie vous con-
tete: le suis Fortuniane aux beaux che-
veux fille de don Fortunian le beau &
de Ginolde, & sœur d'un des plus vail-
lant princes du monde nommé par
tout don Ginoldan pour l'amour de
ma mere comme ie suis nommee For-
tuniane à la consideration de don
Fortunian le beau mon pere. Ah ma
chere ame (dit-il l'embrassant amou-
reusement) certes vous me descouurez
vne chose qui me donne vn conten-
tement nompareil, car si ie vous ay-
mois ardemment pour le seul merite
de vostre beauté, ie vous doy main-
tenant adorer par la consideration
de vostre naissance; quant à la faute
que

que i'ay faitte de vouloir vous cacher
mó extractiõ vous me la pardõnerez
s'il vous plaist à condition que ie ne
vous fascheray iamais en quoy que ce
soit, & que ie ne sortiray point de vo-
stre palais que par vostre commande-
ment. Mon cher amy (luy respondist-
elle) ceste promesse merite bien le par-
don que vous demandez, voila pour-
quoy ne parlons plus de ceste affaire &
songeons à nous caresser pour satis-
faire à nos passions amoureuses. A ces
mots renouuellant leurs embrasse-
ments ils attachèrent leurs bouches
l'vne contre l'autre avec tant de dou-
ceurs & de mignardises qu'ils sem-
bloient estre tous deux ravis dans vn
paradis de delices. Deux heures s'e-
stans encor escoulees depuis ces secõ-
des escarmouches la duchesse qui
vouloit donner du relasche à son chã-
pion se leua, fist mine d'aller à sa Bi-

bliotecque pour quelque affaire d'importance, & luy laissant dans son antichambre vne table couuerte de tres-bonnes viandes avec Solize pour le seruir s'en alla disner comme de coustume pour ne point donner d'ombrage à ses seruiteurs lesquels signoroient tous ses praticques à la reserve de Solize, Florantel & la Morisque dont nous auons parlé cy dessus. La bien seance luy commanda bien de demeurer à la salle vne heure ou deux apres le repas pour entretenir quelques dames qui l'estoient venu visiter, mais ses appetis sensuels l'emportans à la fin par dessus toutes considerations elle leur faussa compagnie, & volla s'il faut parler en ceste façon iusques à la chambre où elle auoit laissé son cœur. Sa presence faisant vn mesme effect dans l'ame de don Clarazel qui ne pouuoit desia souffrir son

absence qu'avec des inquietudes & des deplaisirs, sa presence (dis-je) faisant vn mesme effect dans le cœur de ce cheualier que les rayons du soleil font sur les brouillars qu'ils dissipent, il deuint ioyeux aussi tost qu'elle fust entree, il courust à elle les deux bras ouuerts, il lui baïsa les yeux, la bouche & les tetons plus de trente fois, la tint quelque espace de temps tant estroitement embrassée qu'ils sembloient estre collés ensemble, & ne se pouuāt taire dans l'exces du contentement qu'il sentoit luy dit. Certes madame ie cognois bien maintenant que ie suis veritablement enchanté, car ie languis tout au mesme temps que ie vous ay perdu de veüe, au nom de dieu ne me laissez plus si long temps tout seul, quittez le soucy de vos liures & des affaires de vostre maison pour me caresser, & puis que vous

m'auez voulu rendre heureux iusques à me donner vne chose de si grand prix que vostre amour, ne m'en prieuez pas s'il vous plaist pour des considerations si legeres. Le feu qui consummoit leurs cœurs les embrasant alors viuement ils s'estendirent sur le liect, & renouellerent par deux ou trois fois les embrassemens estroits qu'ils s'estoient donnés le matin avec tant d'amour qu'ils sembloient estre tous deux ravis dans la iouissance de tant de plaisirs. Le temps ayant appaisé ces premieres fougues don Clarazel se remist sur ses resueries de l'histoire des Amadis, & regardant amoureusement celle qu'il tenoit encor entre ses bras luy dit avec vn petit trait de feinte colere. Certes madame ie vous ay tãtost dist que i'estois le plus heureux cheualier qui fust sur la terre & il est vray, mais il faut que ie vous confesse


que i'ay quelques petits desplaisirs secrets qui me font treuuer vn peu d'amertume parmy tant de rauissantes douceurs desquelles vous nourrissez ma flame: Le n'ay pas tant de liberté avec vous que le prince don Fortunian vostre pere auoit avec la belle Ginoldeny don Rogel avec Sardenie, ils alloient se promener dans les plus beaux iardins du monde, ils caressoiēt leurs maistresses sur vn million de fleurs odoriferantes qui releuoit vn peu le goust de leurs baisers, ils dorment à l'ombrage des myrthes, des lauriers, des iossemins, & de quelques arbres encor plus beaux: Le n'ay pas tant de priuilege vous me retenez dās ceste chambre de laquelle ie ne puis sortir par ce que ie suis enchanté, & par consequent vous me priez de tous ces plaisirs. Non non mon amy (luy respondist-elle aussi tost) ne vous

estonnez pas de cela ie ne vous ayme pas moins que ces belles aymoient ces grands princes, mais ie veux estre plus sage qu'elles & ne vous perdre pas dans vn iardin comme elles y perdirent tous leurs cheualiers. Vrayment (dit-il) ceste raison me semble si bonne que i'ay subiet de m'en contenter, & par là ie cognois que vous m'aymez plus que ces belles magiciennes n'aymerent iamais ces grâds princes: Madame ie vous en remercie, ie vous ay peult estre offencee ie vous en demande pardon. Non non mon cheualier (luy repliquat-elle) ie ne m'offence pas si legerement, & ie ne vous aimerois pas selon vos merites si ie prenois vn subiet de mescontentement de si peu de chose, vous ayez les fleurs ie vous en feray tant naistre demain en ceste chambre qu'il ne vous prendra point d'enuie de les aller fouller aux

parterres; En effect elle s'acquitta fort bien de ceste promesse , car ayant commandé à Solize de faire cueillir vne grande quantité de rozes , d'œillets , de tulippes , de marguerites , & d'autres fleurs elle les fist porter à son antichambre, en garnist les cheueux & les bras de cet extrauagant & demeura presque tout le long du iour avec luy. Ainsi follastrans tantost de iour & tantost de nuit elle passa six sepmaines entieres parmy des contétemens incroyables. Laissons les iouir heureusement de tant de delices iusques à ce que nous fassions finir cet enchantement, cependant disons autre chose qui est necessaire pour la suite & perfection de nostre discours.

Comme Syluiane fust aduertie du malheur de don Clarazel: Le deplaisir qu'elle en ressetist: Ses inquietudes: Ses regrets sur la nouuelle de la mort de Cloridamant: Quelle fust la resolution qu'elle prist pour le repos de don Clarazel, & comme ayant changé d'habits elle se mist en campagne pour l'aller chercher.

CHAPITRE XXII.

 Endant que don Clarazel iouissoit avec plaisir des baisers & des embrassemens d'Astralize la fortune commençoit à se repentir de l'auoir persecuté si cruellement, elle prenoit quelque fantaisie de luy monstrier vn meilleur visage, elle se resoluoit à changer sa peine

en repos, & luy promettoit enfin des faueurs au lieu des disgraces qu'elle luy auoit enuoyees. Sa puissance estât merueilleuse il luy fust facile d'exécuter tout ce qu'elle auoit proietté, & par ce qu'elle vouloit qu'on la redoutast par ses effets tout pleins de merueilles elle se seruist d'un moyen tout extraordinaire en ceste occasion, ie vous vay dire comment en peu de parolles. Nous vous auons dist cy dessus que le Baron d'Alcret auoit esté présent à toutes les aduentures qui estoient arriuees à nostre cheualier hypocondriaque dans Artigny & dans Arcail, il est à propos de le mettre en ieu maintenant pour faire voir que la fortune fait iouer des ressorts estranges pour venir à bout de tous ses desseins. Ce ieune seigneur dont les inclina-
tion estoient vertueuses ne pouuant demeurer oisif en Bourgogne reso-

Iust de chercher la perfection de la gloire dās la cognoissance des mœurs estrangeres, & pour ce faire il conclud de passer vn an dans l'Italie, vn dans l'Espagne, & de parcourir quelques autres prouinces pour faire son profit des deffaux & des perfections de toutes les nations qu'il verroit. L'ayant resolu il l'executa, il se mist en campagne douze iours apres que nostre extrauagant fust sorti d'Arcail avec le dépit d'auoir esté trompé malheureusement comme vous auez veu dans le chapitre où il est traité du feint enchantement de Syluiane, & se rendist deux iours apres dans Lyon pour prendre la commodité du Rosne qui descend iusques à la mer. Que me seruiroit il de rediger icy par escript les particularités inutiles de ce voyage ? Rie sans doute que pour ennuyer le lecteur, voila pourquoy ie les passeray

sous silence pour vous dire qu'en fin ceste aveugle deesse de laquelle nous auons parlé cy dessus le fist arriuer par mistere aux Isles Baleares plustost qu'aux lieux où il auoit resolu de faire s^{on} premier seiour. L'humeur de ce cavalier estât belle & fort curieuse il n'y fust point plustost arriué qu'il ne destrast d'y faire quelque cognoissance: S^{on} merite & le bon equipage auquel il estoit luy firent biē tost rencontrer ce qu'il souhaittoit, il contracta quelque espeece d'amitié avec vn gentilhomme nommé Rodanis des plus apparens de ceste contree, & ayant veu par son entremise quelque petite assemblée de dames, il treuua tant de charmes en leur conuersation qu'il resolust de passer cinq ou six sepmaines en ces Isles. Pendant ceste espace de temps il eust mille diuertissemens agreables, & Rodanis luy fist treuuer

des rauissemens dans les compagnies où il le mena, mais tout ce qui le contenta le plus fust la rencontre de Syluiane qu'il vist vn iour dans le iardin Royal des ombres. Ceste belle qui portoit en ses yeux vn subiet de merueille & d'estonnement venant à passer de fortune dans la mesme allee où il estoit avec quelques dames, elle luy pleut en telle façon qu'il demanda qui elle estoit tout au mesme temps qu'elle fust passée; A quoy vne de celles ausquelles il parloit luy respondant avec vn soufrire. Vrayment (luy dit-elle) vous auez raison de vouloir cognoistre ceste belle dame, car si vous n'eussiez point eu ceste curiosité i'eusse dit que vous eussiez esté insensible, ou pour le moins ie vous eusse accusé de n'auoir pas eu assez d'esprit pour iuger de l'excellence de quelque chose, monsieur sçachez que l'on nomme

Syluiane le plus beau soleil qui luyse en ces isles, & peust estre danstoute l'Europe. Ah par ma foy (dit il) il faut aduouër que ie suis vn peu malheureux d'auoir eu la rencontre de ceste damoiselle à laquelle ie desire extremement de dire deux mots sans que i'aye peu profiter de ceste occasion. Madamoizelle, au nom de dieu treuez l'inuention de nous assembler afin que ie luy dise quelque chose que i'ay sur le cœur. Monsieur (luy dit ceste femme en riant) prenez garde ie vous supplie que vous ne desiriez temerairement l'aspect d'un astre si brillant, il y a du peril à s'en approcher? Ie le sçay bien (luy respondist il) mais estant desia sur mes gardes i'empescheray bien que ses traits n'arriuent iusques à mon cœur, il est question d'autre chose, madamoiselle aduançons nous ie vous en supplie afin que quelque malheu-

reux accident ne nous rauisse ceste occasion. Allons allons (dit-elle) ie voy bié que c'est, vous voulez brusler malgré que i'en aye, vous en sentirez plus de mal que moy; Toutefois vous estes louable en quelque façon puis que vous cherchez vne belle mort. Alors ayans doublé le pas ils se treuerent en moins de rien coste à coste de Syluiane, ce qui obligeant à parler celle qui conduisoit le baron d'Alcret elle la tira par le bras comme si elle l'eust voulu arrester, & souffriant de fort bonne grace luy dist. Ma cousine ce caualier meurt d'enuie de parler à vous, ie croy que c'est pour vous adorer, ie vous supplie de luy en donner le loisir: Mademoiselle (dit alors le baron d'Alcret) il est tres-vray que ie vous donnerois ce que vous meritez iustement quand ie vous aurois suiui tout expres pour vous admirer & pour

vous donner des louanges, mais pardonnez moy s'il vous plaist, ce n'est pas le seul subiet qui m'a donné vn si grand desir de parler à vous, c'est pour vous aduertir d'vn extreme malheur dont vous estes cause, & que peust estre vous ignorez. Helas monsieur (dist ceste fille toute estonnée) de quoy me voulez vous parler? Sur ma foy ie tremble desia, & ne pouuant deuiner ce que vous auez enuie de me dire vous pouuez iuger si ie suis dans l'inquietude ou dans le repos, monsieur parlez vistement ie vous en supplie & ne me faites point languir plus long temps? Mademoiselle (luy repliquat-il) ie suis marry de vous auoir donné l'alarme si chaude, mais il me sēble que ie ne pouuois pas parler plus modestement que i'ay fait, & si vous eussiez attendu avec patience la fin du discours que ie vous faisois vous eussiez

sans doute esté moins troublee. Je continueray donc pour vous asseurer, & vous diray que cet extreme malheur duquel ie vous parlois est vn accident fort estrange arriué à vn gentil-homme lequel s'est perdu pour vous auoir treuuee insensible à son mal & à ses prieres: Je parle de don Clarazel vn des plus gétils caualiers qui soient en Europe, mais le plus affligé ou pour mieux dire le plus malheureux qui soit sous le ciel. Vrayment monsieur (luy repliquat-elle avec vne cōtenance plus addoucie) vous m'obligez peut estre beaucoup plus que vous ne croyez de me dire des nouuelles de don Clarazel que i'estimois mort, car sur ma foy ie l'estime plus qu'il ne pèse, & si i'eusse peu disposer de moy lors qu'il en deuint amoureux croyez que i'eusse adoré ses perfections, mais mes affectiōs estoient engagees i'ay-
me

me mieux rougir d'un trait de foiblesse que d'ingratitude) ie ne pouuois donc receuoir son cœur ny les vœux. il s'en plaint ie supporte vn regret extreme, neâtmoins ce n'est pas la le fods de l'affaire, pour suiurons ie vous prie & me dittes vn peu quel est le malheur que vous pleigniez tantost en luy? Beaucoup plus grand que ie ne voudrois (respondist le Baron d'Alcret) Madamoifelle il a perdu le iugement, il court de prouince en prouince avec des armes sur le dos, il croit estre cheualier errant comme estoit Amadis de Gaule, il fait des choses estranges sur ces fantaisies, en vn mot il passe pour extrauagant, ce que ie dis avec regret parce que i'estime son courage plus que les anciens n'estimoient celuy du dieu Mars: Mais ce qui donne encor vn plus grand subiet de le plaindre à tous ceux qui voyent

ses transports & ses follics c'est qu'il ne parle que de vous comme du plus bel obiet de son ame, il fait gloire de vous garder vne extreme fidelité, il vous prefere à toutes les dames qui sont sur la terre, il regarde avec mespris toutes celles qui luy viennent parler d'amour, s'il entreprend quelque aduventure parmy ses folles imaginations c'est pour l'honneur de vostre beauté, bref vous estes son ciel, & pour vous le dire en peu de parolles il n'y a personne en Bourgogne qui ne cognoisse vostre nom plustost que celui de son gouuerneur. Mademoiselle si vous le pouuiez retirer de ce labyrinthe & remettre son esprit dans l'estat où vous l'avez veu, ie pense que vous obligeriez tout le monde à parler de vous comme d'une rare merueille, car vous feriez autant que les dieux si vous arrestiez le cours de ses

maux comme vous leur avez donné la naissance: Cela ne se fera iamais que par vn trait de charité & de prudence, iugez si vous estes assez sensible pour le premier point, & si vous avez des remedes pour le second? Monsieur (respondist-elle) ie suis tellement estourdie que ie ne vous sçauois respondre avec iugement, ie vous ay desia dist que le malheur de ce caualier auoit esté plus grand que mon ingratitude, & que l'on m'accuseroit tousiours avec iniustice ie ne me deffendray plus là dessus; Il est question ditesvous de le retirer de ce labyrinthe, helas cela se peust il faire? Sans mentir ie voudrois que mon sang se peust engager pour luy faire ceste faueur, ie le repandrois librement, & des à ceste heure ie ferois cognoistre à toute la terre que les femmes sont genereuses quand il le faut estre. Ne le pleignez

donc plus de ce costé là, car en vn mot si ma ceruelle ne souffre point le cœur me fait mal veritablement. A ces mots les grosses larmes luy sortans des yeux du regret qu'elle auoit d'estre la cause du malheur de don Clarazel duquel elle aymoit la vertu, elle se tourna de peur qu'on ne la vist pleurer, & continuant son chemin sans faire aucuns complimens au Baron d'Alcret lequel ayant bien remarqué sa tristesse en receut vn contentement n'ompareil par l'esperance qu'il eust que ce deplaisir si sensible seroit quelque iour cause du repos de don Clarazel, en quoy certes il ne se trompa nullement comme vous verrez tout à ceste heure. Si tost que Syluiane fust au logis elle se remist en memoire tous les discours qu'elle auoit ouis, & parce qu'elle estoit genereuse le malheur de don Clarazel luy fust si sensible qu'abhorrat même les

compagnies qu'elle auoit tousiours
recherchees elle s'enferma dans sa
chambre pour auoir la liberté de se
plaindre en ceste façon. O dieux (dit-
elle) faut il que ie sois malheureuse ius-
ques à mespriser vn homme qui n'e-
stime que moy dans le monde? Faut-il
que ie luy donne subiet de publier
mon ingratitude puis qu'il ne me
fournist que des occasiōs de me louer
de sō amour, ou pour mieux dire faut-
il que ie le fasse mourir parce qu'il m'ai-
me & qu'il m'adore? O que ie me veux
mal à moy mesme avec raisō puis que
ie ne scaurois dōner vn fondement à
mes fâtaisies, & qu'il faut malgré moy
que i'aduouë que ie fais tort à ce caua-
lier? Grāds dieux ie ne vous inuite pas
en ceste incomparable bonté que ie
demande en vous tous les iours! Vous
ne voulez que le cœur des hommes, ie
renuoye avec mespris le sacrifice que

cestuy-cy me fait de son cœur? Vous voulez nos affections toutes entieres, ie me fasche qu'il en ait pour moy. Ah certes ie suis indigne des graces que vous m'avez liberallement octroyees, vous ne me deuiez point donner la beauté qui rend mô humeur orgueilleuse, ou vous me deuiez donner vn cœur assez doux & sensible pour recognoistre les seruices de Clarazel; Clarazelle plus parfait de tous ceux qui sont sur la terre? le suis cause que vous seruez de rizee à mille cocquins pendant que vous publiez mes louanges deuant mille personnes d'honneur & de qualité? O regret! ô ingratitude! Mais helas pourquoy parle ie en ceste façon? Pauvre malheureux, ce ressentimēt vous est inutile, ie vous plains sans pouuoir apporter du remede à vostre douleur parce que mon cœur n'est plus à moy, & m'accusant d'in-

gratitude qui a quelque apparence de satisfaction il semble que ie ne le fasse que pour vous en priuer tout à fait? Ouy ce regret est infructueux, toutefois si vous auez encor quelque reste de iugement vous treuuez que vous estes obligé au pardon comme ie suis cōtrainte d'aduouër icy l'offence que ie vous ay faitte, & m'excusant vous accuserez l'amour de tout vostre mal. Alors ayant entendu quelque bruit elle essuya promptement ses yeux lesquels estoient tous chargés de larmes & retenant sa douleur au fonds de son ame se mist en estat de la cacher à qui que ce fust : Neantmoins personne n'entrant apres quelque petite espace de temps elle se remist non pas sur ses plaintes, mais sur des pensees estranges lesquelles aboutissans toutes au repos de don Clarazel elle souhaitta plus de mille fois d'auoir deux cœurs

pour luy en donner tout autant qu'elle en auoit mis au pouuoir de Cloridamas (on nommoit ainsi celuy lequel occupoit toutes ses pensées) cela ne pouuât estre elle demeura trois ou quatre iours parmy de terribles inquietudes sans se pouuoir resoudre en quelle façon elle chercheroit du remède à l'affliction de don Clarazel quoy qu'elle en eust vn desir extreme. En fin la fortune ayant resolu de le rendre heureux & de donner à Syluiane plus de moyens de le secourir qu'elle n'en vouloit elle fist arriuer vne chose estrange pendant ces trois ou quatre iours. Cloridamas estant engage dans la compagnie de quelques siens intimes amis qui auoient vne broüillerie, il embrassa leurs interers avec tant de passion qu'ayant esté d'vne partie de trois contre trois il receut vn grand coup d'espee qui le fist tomber mort.

sur la poudre. Vous sçavez que la renommée a des ailes qui portent en moins d'un moment les nouvelles où elle les veust enuoyer? La querelle de ces messieurs ayant esté sçeuë, la mort de Clondamas fust tout incontinât diuulguee, de sorte que Syluiane qui tiroit vne telle gloire de la captiuité de ce caualier qu'elle vouloit bien que tout le monde n'ignorast point leurs intentions, fust aduertie de cet accident vne heure apres qu'il fust arriué. Son amour luy faisant sentir ce coup malheureux iusques dās le cœur elle tomba sur les carreaux si bien priuee de iugement qu'elle y demeura bien pres de deux heures sans se reconnoistre, ny sans ressentir aucune assistance des remedes qu'on luy donna: Toutefois l'heure de sa mort n'estant pas encor arriuee elle reprist ses esprits au bout de ce temps & com-

mença de si pitoyables regrets qu'elle fist fondre en larmes tous ceux qui se treuverent alors en sa compagnie. Chacun sçachant bien le iuste subiet qu'elle auoit de s'affliger d'une telle perte il n'y eust personne en la compagnie qui peut condamner à l'abord ses ressentimens naturels, on permist le cours à ses plaintes & à ses souspirs par l'espace de vingt quatre heures, & l'on fust contraint de donner à sa passion tout ce qu'elle voulust pendant ceste espace de temps, mais quelques vns de ses parens voyans que sa douleur augmentoit de moment à autre, & qu'il y auoit mesme vn danger extreme à la continuation de ses pleurs & de ses regrets, parce qu'elle ne vouloit point manger ny dormir, ils luy firent venir vn bon pere avec lequel elle traittoit souuent du repos de sa consciéce, pour la resoudre à recevoir

ce coup dangereux avec des resolutions plus chrestiennes qu'elle n'auoit fait. D'abord elle ne le vouloit point entendre parler & le supplioit de la laisser dans la liberte de ses plaintes, mais ce bon pere ne se rebutant point pour trois ou quatre actions de cholere qu'elle tesmoigna il eust tant de charité qu'au lieu de se taire il luy allegua mille pertinētes raisons pour luy faire voir qu'elle offensoit le ciel & le monde dans l'excez de ses pleurs & de ses souspirs, de sorte que luy ayant en fin donné quelque apprehension d'irriter le ciel, & de prouocquer sō courroux elle commença peu à peu à treuuer des consolations en ses conseils, & par cōsequent elle chassa de son cœur mille resolutions furieuses qu'elle auoit conceuës pendant le trouble de son esprit. Son iugement estant donc remis en assez bon estat pour donner


lieu à la raison on la fist mettre dans le liect où ayant dormy bien pres de six heures elle commença de resuer à ceste aduenture, & parce qu'elle se souuenoit qu'entre les raisons que son confesseur luy auoit donnees pour la bien resoudre il luy auoit dist que dieu l'affligoit peust estre en ceste façon pour la punir de quelque faute qu'elle auoit faite, elle creut que la mort de Cloridamas estoit arriuee pour la vengeance du tort qu'elle auoit fait à don Clarazel; Surquoy se representant l'amour extreme de ce caualier elle conceut vn si grand desir de le secourir que la crainte qu'elle eust de ne treuuer pas des remedes assez puissâs pour le guerir de sa follie ne luy fist gueres moins de mal que la nouuelle de la mort de Cloridamas. Neantmoins esperant tousiours quelque chose elle commença de faire vn peu meilleure

chere, & se remist si bien au bout de dix iours qu'elle ne ressentoit plus qu'un peu de mal en son esprit que le malheur de Cloridamas affligeoit encor malgré qu'elle en eust. Se voyant en fort bon estat elle s'advisa que pour auoir un repos entier il falloit posséder Clarazel, & que pour le rappeler il falloit des inuentions: Elle se resolut donc à luy enuoyer vne lettre par laquelle elle l'asseureroit de ses bonnes graces, & pour cet effect elle choisist un lacquay en la fidelité duquel elle auoit beaucoup d'esperance, mais ayant peur que la folle imagination dont l'ame de ce caualier estoit preoccuppée ne l'empeschast de cognoistre sa lettre & de retourner, elle iugea que sa presence estoit necessaire à ceste entreprise, & par consequent elle rompist la lettre qu'elle auoit escrite, elle changea d'aduis & conclud de l'aller

chercher elle mesme iusques en Bourgogne & plus loing s'il le falloit faire. Vn habit de fille n'estant gueres propre à vn long voyage, elle en fist faire vn de soldat, & sans se soucier de donner subiet à beaucoup de monde de mal parler de son action elle semist en campagne sans aucune compagnie que celle du lacquay qu'elle auoit choisi peu auparauant auquel elle fist des deffences tres-estroittes de ne decouurir son secret à qui que ce fust. Laissons la marcher avec vne impatience tres-grande d'arriuer bien tost en Bourgogne, & allons deliurer nostre extrauagant de l'enchantement amoureux d'Astralize.

Comme don Clarazel fust deliuré de l'enchantement auquel Astralize le retenoit: Qui fust le Cheualier qui paracheua ceste glorieuse aduventure: Son despart du chasteau d'Arcail, avec la mort d'Astralize arriuee par le regret des reproches du duc son mary.

CHAPITRE XXIII.

 Nous auons laissé Clarazel au chasteau d'Arcail couché sur des fleurs, enyuré des caresses de la duchesse, & tellement preoccupé de la folle opinion qu'il estoit retenu par les charmes d'une belle magicienne, qu'il ne songeoit point à sortir de la chambre dás laquelle on l'auoit logé; Il faut que nous le retirions de ce plaisant enchantement, &

que pour cet effect nous conduisions dans Arcail quelqu'aduentureux qui fçache deffaire les charmes qu' Ilralize auoit mis sur luy Nous n'auons point parlé du duc d'Arcail dans nostre lettre, & par là nous auon fait iuger au lecteur que la duchesse estoit vefue ou que son mary n'estoit pas alors au pays parce qu'elle n'eust pas eu la liberté de faire toutes les sotizes qu'elle commist avec Clarazel, il me semble qu'il est à propos de le mettre en ieu maintenant afin que nous donnions vne bonne suite à nostre discours. Il est tres vray que ce seigneur à qui le courage & l'experience au faict de la guerre auoient fait meriter des charges honorables, estoit alors occupé à ranger au ioug quelques esprits mutins qui s'estoient voulu reuolter de l'obeissance qu'ils deuoient au roy, & que son esloignement estoit cause

cause que la duchesse auoit abbatu la bride à ses passions, mais sa prudence ayant apporté la paix plus heureusement quel'on ne croyoit, il retourna beaucoup plus tost qu'il n'estoit attendu de sa femme, de sorte que l'on ne se doit pas estonner si ceste malheureuse fust surprise en ses larcins impudiques. Ce seigneur entrant dans Arcaïlors qu'on le croyoit encor à l'armée il fust apperceu de Solize laquelle courant promptement à la chambre peinte où la duchesse estoit alors à demy rauie de baiser à souhait le front, les yeux & la bouche de son amant, elle luy dit à l'oreille que monsieur venoit d'arriuer. Belles ames, ne me demandez point quel fust alors le saisissement de ceste duchesse? Sa couleur vn peu releuee par l'exercice qu'elle venoit de prendre se changea tout incontinent, elle passit d'estonnement,

sa bouche demeurât entr'ouuerte fist iuger qu'une froide peur l'empeschoit de respirer comme de coustume, & ne sçachant à quoy se resoudre dans le trouble de son esprit elle regarda trois ou quatre fois tantost Scilize, & puis Clarazel comme si elle leur eust voulu demander quel conseil elle deuoit prendre en vne telle necessité. En fin l'affaire estant trop importante pour demeurer plus longuement dans ses irresolutions, elle alla ioindre ses lectures à celles de don Clarazel, elle luy dist qu'elle venoit de receuoir vne nouuelle qui l'obligeoit à le quitter pour vne heure ou deux, & composant son visage le mieux qu'elle peut s'en alla tout droit à sa chambre où elle sçauoit bien que le duc n'auroit point manqué de se rendre. En effect elle l'y trouua si disposé à luy rendre mille tesmoignages de son amour

que si elle eust eu plus de iugement, ou pour mieux dire moins d'amour pour don Clarazel, elle eust rougi de la faute qu'elle auoit faite au lieu de desirer son mary comme elle fist plus de mille fois parmy les dangers des coups de canon & des mousquetades. Je ne m'amuse point à vous dire icy les feintes caresses qu'elle luy fist parce que ce discours seroit inutile, mais aussi ne voulant rien oublier de ce qui peust seruir à l'embellissement de ceste piece, il me semble que ie vous doy fidellement reciter ce qui arriua de ceste aduenture. Les sages mondains nous ont dist mille fois que les amans sont aueugles en leurs passions, qu'ils ne prennent iamais garde aux maux qui peuuent arriuer de la liberté qu'ils se donnent, ceux qui parlent plus chrestienement nous assurent que les pechez nous fermēt les yeux qu'ils nous

attirent insensiblement dans les precipices, & que par des secrets incomprehensibles le ciel en fait ordinairement la vengeance: Les vns & les autres ont raison, voicy vn exemple pour les authoriser tout en mesme temps. L'estonnement de ceste femme ayant esté trop grand pour luy faire preuoir tout ce qui luy pouuoit rendre du desplaisir elle voulut attédre la nuit pour faire euader nostre extrauagât, mais elle n'eust pas assez de prudēce pour cōduire ceste affaire cōme elle pēsoit, elle laissa sortir le duc sous opinion qu'il iroit faire quelque promenade en ses parterres, & par ceste negligence elle se perdist. Vous allez voir comment en peu de parolles. Nous vous auons dist qu'elle auoit fait apporter quelques liures d'Amadis de Gaule dans la chambre de don Clarazel pour le diuertir pendant qu'elle seroit occuppee

à l'entretien des compagnies qui la venoient voir, que ce malheureux treuuant vn contentement nompareil en la lecture de ses liures les auoit tousiours à la main quād il estoit seul, & que le plus souuent imitant les actions de ceux desquels il lisoit les faits d'armes il se mettoit dās les mesmes postures qu'il leur voyoit faire par la force de son imaginatiō? Or est il que la duchesse l'ayant quittré comme vous auez veu cy dessus pour aller receuoir son mary il prist de fortune l'onzieme liure d'Amadis de Gaule dans lequel voyant quelques vers que Daraide chantoit à la louange de sa Diane il s'imagina si bien d'entendre les accens de la voix & du luth de ce ieune prince amoureux qu'il demeura quelque espace de temps immobile comme s'il eust esté rai par l'oreille iusques dans le troiziesme ciel. Ayant

demeuré bien pres de demie heure en ceste posture il reuint à foy, & frappât les mains l'une contre l'autre. Sur mō ame (s'escria-il) voila la plus douce harmonie que i'aye iamais entendue : O gentil prince de Colchos que vous scauez bien exprimer vos inquietudes amoureuses parmy les loüanges de vostre princesse ! Certes ie ne m'estōne plus si vous l'avez en fin reduë amoureuse de vostre vertu, car ie ne me puis moy-mesme empescher d'estre amoureux de vous sous cet habit qui vous deguise. O Syluiane si vous vouliez prester l'oreille au recit de mes passions avec autant de patience que Diane donna la sienne aux plaintes de son Agefilan i'exciterois peult estre en vous les mesmes mouuemens de pitié que ses chāsons firent naistre au cœur de ceste dame ! Mais helàs ! vostre humeur est bien differente de celle de

ceste princesse, son ame estoit douce, ie puis asseurer que la vostre est toute barbare, & que vous avez plus d'aersion contre moy qu'elle n'eust iamais d'inclination pour ce prince, ie ne sçay d'où vient ce malheur, tant y a que ie ne vous ayme pas moins qu'il faisoit la dame, & que vous m'estes beaucoup plus cruelle qu'elle ne fust iamais enuers luy. Toutefois, dequoy me plains ie? Ie n'ay iamais essayé de vous fieschir qu'une fois ou deux, vous n'avez pas fait semblant de m'entendre, est ce à dire que vous n'ayiez point pris de plaisir aux témoignages de mon amour? Syluiane ie me reprends, & ie confesse quasi que i'ay tort: Vous avez peust estre deguisé vos affections pour ne parestre point inconsiderée, ou si vous m'avez mesprisee c'est pour sçauoir si i'estois capable de vous bien aimer. Il faut donc que ie continuë à

vous declarer mes tourmens, & que ie ne me lasse iamais de souffrir pour vous si c'est vostre volóte que ie souffre. Ce disant il quitta son liure, prist vn luth que la duchesse luy auoit donné pour se desennuyer lors que la lecture le fascheroit, & commença de chanter quelques vers lesquels exprimans assez bien le mal d'un amant mal traicté, il s'y pleut en telle façon qu'ayant repeté deux ou trois fois vne mesme chose il eust chanté tout le long du iour s'il n'eust esté interrompu par vn accident fort estrange. Le duc estant sorti sur ces entrefaites pour aller contéter ses yeux par l'obiet de tout ce qu'il aymoit le plus en ceste maison qui estoit ses parterres & ses iardins, il passa si proche de la chambre peinte dás laquelle on auoit logé nostre extrauagant qu'il ouit les accords du luth qu'il touchoit. Ceste

musicque l'estonnant parce qu'il sçauoit bien que pas vn de ses domestiques ne s'aydoit d'vn tel instrument il s'approcha plus pres de la porte pour mieux entendre, mais tout au mesme temps qu'il eust ouy la voix de don Clarazel qui chantoit agreablement vne basse il commença de redouter le malheur qui luy estoit arriué pendant son absence. Ceste opinion luy troublant vn peu la ceruelle il essaya d'entrer par ceste porte laquelle estât trop bien fermee pour luy en donner la commodité il iugea que celle de l'antichambre ne seroit pas en ceste façõ: En effect ayant fait le tour il treuua qu'elle estoit ouuerte, ce qui estoit arriué par le trouble d'esprit où sa venue inopinee auoit mis sa femme & Solize. Il entra donc sans difficulté, & voyant nostre extrauagant sur le pied d'vn liect le luth à la main il luy deman-

da d'une action toute brusque & mal gracieuse qui il estoit. Mais vous beau sire (luy respondist-il assez froidement) que demandez vous, & qui vous a donné l'assurance d'entrer en ceste chambre qui est consacree à l'amour pour y troubler mes delices & mon repos? Par dieu ie m'estonne que vous n'avez rencontré cent mille demons sous autant d'horribles figures pour vous empescher de venir icy. Comment ventre-bleu (repliqua le duc) que voulez vous dire par là, quelqu'un me peust il bien empescher de faire ceans ce qu'il me plaira puis que i'en suis seigneur absolu? Seigneur absolu (reprist Clarazel) cheualier c'est donc depuis peu, mais ie ne pense pas que la belle Fortuniane soit d'accord avec vous touchant ce point là, pour le moins ie suis assure que c'est son palais, & que si vous en estes mainte-

nant le maistre c'est par la vertu de quelque precieuse espee qui deffait les enchantemens, ou bien par celle d'un bon escu pareil à celuy que le gentil Spheramond de Grece portoit lors qu'il alla deliurer la belle Richarde sa dame des mains du Patranon. Teste mort (poursuiuiſt le duc lequel enrageoit de depot) ie pense que ce bougre se mocque de moy, Mor bleu pendart si vous ne changez de langage, & que vous ne parliez à bon escient vostre corps ne pesera pas vne once au bout d'un cart d'heure: Qui vous a fait venir ceas? Cheualier (luy respōdist-il entrāt en colere à ceste parolle) il semble que vous ayez enuie de me menacer, par dieu si i'auois comme vous la cuirasse sur les espaules ie vous apprendrois comme il faut parler à vn homme qui me ressemble; Ayez patience que ie sois armé, vous verrez si ie sçay cha-

stier les insolens & les curieux qui
veillent sçauoir des choses dont ils
n'ont que faire. Vous me demandez
qui ie suis, & qui m'a fait venir ceans,
c'est ce que ie veux sçauoir de vous en
depit de vous. Alors iettant le luth
sur le liect il se mist en place & com-
manda comme s'il eust parlé à son es-
cuyer Gandalec qu'on luy apportast
promptement ses armes, ausquelles
parolles le duc cognoissant bien qu'il
estoit hypocondriaque resolut d'y
proceder d'une autre façon pour des-
couvrir le secret de toute l'affaire: Ad-
doucissant donc sa voix & ses actions
que la fougue rendoit desia toutes
violentes il luy dist. Mō caualier, mor-
bleu dittes mon cheualier reprist Cla-
razel: He bien cheualier (repartist le
duc) s'il nous faut venir au combat
nous aurons assez de temps pour sa-
tisfaire à nos passions, nous n'en som-

mes pas encor sur ces termes, & tout ce que ie desire de vous est qu'il vous plaise de me dire qui vous estes, ce que vous faites ceans, & qui vous a mis en ceste chambre? Ah (respondit-il) c'est ainsi qu'il faut demander quelque chose au moins quand on la veust auoir; Cheualier, vostre humilité me plaist tellement que ie changeray de courage pour vous satisfaire, & par là ie vous donneray à cognoistre que ie ne suis pas moins gracieux quand on me sçait prendre de bonne façon, que redoutable quand on m'irrite. Sçachez donc que ie suis vn cheualier errât arriué de fortune en ce beau palais où i'ay esté enchâté par la belle magicienne Fortuniane, laquelle ayât vne amour extreme pour moy m'a retenu par enchâtemens pour satisfaire à ses appetits amoureux, & de peur que quelque cheualier aduâtureux ne me

retirast de ses mains comme les princes de Grece ont esté quelquefois deliurés d'une pareille captiuité elle a mis des charmes estranges sur ceste chambre où nous auons desia passé cinq ou six sepmaines parmy des rauissemens incroyables, de sorte que ie m'esmerueille avec beaucoup de raison comme vous estes peu venir iusqu'icy, ce que vous n'eussiez pas fait infailliblement sans l'assistanced'une riche espee ou d'un bon escu comme ie vous ay tantost dist. Voila ce que vous auez desiré de moy, en recompense dittes moy par quelle aduanture vous estes icy, & si vous y estes venu pour me deliurer à la priere de ma Syluiane. O dieu que ces nouuelles firent mal au cœur à ce duc! La douleur le fit passer plus de mille fois, les parolles de don Clarazet furent autant de coups de poignard qui luy trauerserent le cœur, il

le regarda de trauers vne lógue espace de téps sans mot dire, & la rage se formant peu à peu dans son ame il fust sur le point de luy donner cent coups de dague au trauers du corps, & de n'espargner pas sa femme, toutefois estant extremement sage il considéra que ce malheureux estoit sans crime parce qu'il estoit sans iugement, que pour ceste consideration il ne luy deuoit rendre aucun deplaisir, d'ailleurs il iugea que ceste vengeance luy apporteroit beaucoup plus de confusion que de gloire, & par consequent il resolut de dissimuler ce qu'il en pensoit pour ne se point faire appeller Publius Cornelius par son imprudence. Rendant donc le calme à ses yeux quoy que son ame fust toute en trouble il luy dist. Vrayment cheualier vostre aduenture est plus heureuse que ie ne pensois, car ie croyois bien vous

treuver plus chargé de fers que de fleurs, & pour ceste consideration ie venois d'un pays estrange pour vous deliurer de ceste misere, & punir tout d'un mesme temps ceste folle magicienne, mais puis que la chose n'est pas ainsi ie luy veux pardonner de bon cœur: Neantmoins ie suis resolu de ne vous pas laisser en ceste posture, ie vous feray souuenir que ceste vie oyssue est indigne d'un bon cheualier, & vous emmeneray tantost afin que vous repariez par quelque action glorieuse le tort que vous vous estes fait d'auoir plus aymé vos plaisirs que vostre honneur. Je pense que vous receurez ceste remonstrance en tres-bonne part, & que vous sortirez d'icy sans regret puis que c'est par le commandement de vostre maistresse qui vous desire avec des impatiences tres-grandes. O dieu (dit-il) bon cheualier
quelle

Quelle nouuelle m'apportez vous? Le ciel vous veuille recompenser de la peine que vous avez prise, & me veuille faire la grace de vous rendre vn iour quelque bon seruice: Il est vray que i'ay eu mille sortes de contentement avec Fortuniane qui est fille du prince de France, don Fortunian & de la gentille Ginolde magiciëne, toutefois ie perdray volôtiers le gout de ses caresses & de ses baisers puis qu'il est question d'aller voir madame. Commandez s'il vo⁹ plaist que mes armes me soyent réduës, ie partiray tout à ceste heure si vous le voulez? Non non (dit le duc qui vouloit attendre la nuit pour le faire sortir sans bruit) ie vous enuoyeray querir quand il fera temps, cependant vous demeurerez icy comme de coustume. Ce disant il passa la porte, fist appeller son valet de chambre auquel il descourist toute ceste affaire,

luy commanda de faire sortir secretement nostre extrauagant par l'entremise de Solize qu'il iugeoit estre de ceste cabale, & s'en allant treuuer sa femme laquelle se dispoisoit alors à faire vn tour à la chambre peinte, il luy dist qu'il se vouloit aller promener avec elle iusques dans son parc. Ceste proposition la fâcha merueilleusement parce qu'elle eust bien voulu prendre ce temps pour faire euader ce beau parroquet qu'elle auoit tenu si long temps en cage, neantmoins ne voulant pas contreuenir aux volontés de son mary pour luy faire croire qu'elle ne desiroit que sa compagnie elle enuoya dire que l'on mist ses cheuaux au carosse, & s'en alla peu de temps apres trauerser vne bonne partie des allees du parc. Le diuertissement fust tres doux à tous ceux qui l'accompagnoient, mais elle n'en

ressentist pas le contentement non plus que le duc son mary car il enrageoit quelque bonne mine qu'il fist, & quant à elle elle n'estoit gueres plus doucement que sur des elpines parce qu'elle n'auoit peu donner ordre au depart de don Clarazel comme elle l'auoit resolu: Toutefois il fallust auoir patience malgré qu'elle en eust, & quelque instance qu'elle fist le duc la fist promener tantost d'un costé & tantost d'un autre iusques à la nuit. Pédant qu'on la traismoit ainsi le valet de châtre de son mary s'acquittoit du comâdemét qu'il auoit receu, car tout aussi tost qu'ils furent partis il s'en alla treuuer Solize, & la tirant à part dans vn cabinet il luy dist. Solize, ie n'ay pas grande chose à te dire, il est temps de songer à ta conscience, tu es perduë asseurement, & la trahison que tu as faite à nostre maistre ne te doit pas

faire esperer quatre iours de vie: Il a treuue vn homme à la chambre peinte lequel luy a naïfvement confessé qu'il auoit iouy à souhait des embrasemens de madame, & la rage où il est est si grande que ie ne penle pas que ceste femme malheureuse ne luy paye par quelque coup le tort qu'elle luy a fait de se prostituer en ceste façon: Quant à toy ie m'estonne comme tu n'es desia morte de honte d'auoir esté le ministre de ses impudiques affectiôs au lieu de luy remonstrier sagement la faute qu'elle vouloit faire. Helas (respondist ceste pauvre fille qui commença de trembler plus fort qu'une feuille que le vent agite) si vous scauiez bien tout ce que i'ay fait vous ne me blasmeriez pas de la sorte, ie me suis opposee à ses volontés tout autant que ie l'ay peu faire, mais mes conseils ont esté reiettés avec mespris,

& malgré moy i'ay esté contraincte de
contribuer à sa paillardise ; Que mau-
ditte soit l'heure que ie vins au mon-
de, mô dieu, mon dieu ie suis perduë,
il faut que ie m'aille noyer, & que ie
n'attende pas la colere de monsei-
gneur que i'ay veritablement offensé
si cruellemét qu'il seroit trop bon s'il
me pardonnoit/Non non Solize (re-
pliqua ce valet de chambre) comme la
cognoissance de vostre faute vous
donne ces mouuemens furieux & de-
sesperés, le ciel vous en deffend l'effect
pour ne perdre point vostre ame avec
vostre corps ; Vous feriez mieux ce
me semble de vous retirer sagement
iusques à ce que le courroux de mon-
sieur soit vn peu passé, cependant il
faut que vous contribuiez à la repara-
tion du mal comme vous avez fait à
l'offence : Portez secrettement les ar-
mes de ce gentilhomme à la chambre

où il est, ne luy parlez en façon du monde de ceste affaire, & sur tout prenez garde à ne luy dire point le nom de madame de peur qu'il n'aille publier sa sotize en quelque autre lieu, ie m'en vay faire seller & brider son cheual, cela fait nous le ferons bien sortir sans qu'on l'apperçoie. Alors laissant ceste pauvre fille desia demy morte il descédist à l'escurie, fist accommoder le cheual de l'extrauagant qu'il fist mener par Florantel iusqu'à vne petite porte par laquelle on pouuoit sortir du logis fort secrettemēt, & voyāt que la terre commençoit à deuenir noire s'en alla pour parler à luy. Le treuuant couuert de ses armes par l'assistance de Solize il luy dist. Monsieur ce vaillant cheualier qui vous a deliuré de l'enchantement auquel vous estiez ayant esté contraint de partir pour la deliurance de quelques dames

que quatre geans traissent dans vn coche, vous m'ade par moy que vous le suiuez en diligence iusques à ce que vous l'ayez rencontré d'autant qu'il espere beaucoup en vostre assistance. Ah par dieu (dit-il) il est raisonnable que ie le serue, & puis qu'il me iuge capable de le seconder en ses entreprises croyez que ie m'en acquitteray courageusement; A ces mots ce valet de chambre l'ayant conduit sans flambeaux iusqu'au lieu où Florantel l'attendoit avec son cheual il luy monstra vn chemin par lequel on alloit droit à Ville-franche, & le laissant aller au galop s'en retourna pour songer à d'autres affaires. Solize estant donc demeuree seule à la chambre peinte elle se souuint des menaces qu'on luy auoit faittes lesquelles luy representans à chaque moment le visage affreux de la mort, elle se resolut de

preuenir la fureur du duc, & descédift le grand escalier avec dessein de s'aller ietter dedans les fosses, mais s'estant souuenuë en chemin du conseil du valet de chambre elle tourna teste, s'en alla tout droit à sa chambre, prist quelque argent & quelques bagues qu'elle auoit, & sans craindre l'horreur des tenebres enfil le premier chemin qui se presenta sur lequel elle marcha iusqu'au iour avec des frayeurs incroyables. Il est tres-vray que son mal n'estoit pas des moindres du monde parce que la peur luy faisoit souffrir tout autant de morts qu'elle entendoit de feuilles bransler, mais il n'estoit pas encor comparable à la douleur que ressentoit alors la duchesse laquelle estant de retour au logis demanda où estoit Solize & sortift tout incontinent de la salle. Le duc deuinant bien qu'elle alloit commander à Solize de

faire euader son amant, ou peust estre qu'elle alloit elle mesme luy donner conge il la suiuit si discrettement que la voyant entrer dans la chambre peinte avec vn flabeau. que la morisque portoit deuant elle, il fut à la porte tout aussi tost qu'elle. Entendant d'abord qu'elle demandoit à ceste morisque qu'estoit deuenu l'extrauagant il luy respondist en entrant inopinement. Madame il est arriué ceans vn cheualier qui porte des armes lequela deffait vos enchantemés & qui l'a remis dans les droits de sa liberté, n'estes vous pas bien marrie de cet accident qui a rompu le cours à vos libertés? A ces mots vne extreme frayeur ayant fait pailir & trembler tout en mesme temps ceste pauure femme elle se laissa couler sur la terre où n'ayant peu proferer que trois mots qui furēt, he-
las monsieur misericorde, elle rendist

l'ame sans pouuoir estre secouruë ie ne sçay si cet accident qui troubla veritablement toute la maison, fust sensible au duc, ou s'il se resioüist en son ame de n'auoir plus vn obiet de confusion & de honte, mais ie me suis laissé dire par quelques vns de ses seruiteurs qu'au bout de huit iours il ne laissa pas de boire & de iouer comme de coustume. Quoy qu'il en soit nous le laisserôs rire ou plaindre, & reprendrons nostre extrauagant afin que nous ne nous esloignons point de nostre subiet.

*Les Amours d'Adamant & de Leonie:
Infideliè d'Adamant: Leonie deuient
hypocondriaque: Quel fust le subiet
de cet accident; Comme elle fust ren-
contree par don Clarazel: Admira-
bils discours que ces deux malades
d'esprit eurent ensemble: Don Cla-
razel croyant que c'estoit la Reyne
Oriane la meine trois ou quatre iours
en triomphe; Comme ils rencontre-
rent Adamant: la fuitte: la pour-
suitte de Leonie, & comme don Cla-
razel demeura seul à beau pied sans
lance.*

CHAPITRE XXIIII.



*N chef d'armee sage & pru-
dent change ses desseins se-
lon l'occurrence des choses*

& bien souuent ayant resolu de faire camper ses troupes en vn lieu il les fait aller autrepart sur vn aduis d'importance qui luy est donné. l'en fais de mesme maintenant; i'auois promis à la fin de l'autre chapitre de reprendre nostre cheualier hypocódriaque, vne autre pensée me contraint de le laisser en cor pour vn peu de temps en arriere non pas pour vous differer le contentement de rire de ses extrauagances, mais pour aduancer vne histoire que vous ne pouuez ignorer sans perdre vne des meilleures rencontres qui soient arriuees à ce pauvre fou. le vous diray donc qu'à cinq ou six lieuës de Lyon il y eust en ce temps duquel ie vous parle vngentilhomme nommé Adamant si braue caualier & d'vne conuersation si douce que s'estant fait admirer de toutes les dames qu'il frequentoit il les rendoit toutes

amoureuses de ses perfections ou de sa beauté, de sorte qu'il faudroit faire vn gros volume au lieu d'un chapitre si ie voulois vous raconter toutes les bonnes fortunes qu'il eust en amour, mais parce que ce discours ne seroit pas propre à nostre subiet ie ne vous parleray que des amours d'une Leonie parce que ie ne les scaurois obmettre sans rendre mon œuvre imparfaite. Ceste fille ayant l'esprit merueilleusement esueillé s'addonna mesme en sa ieunesse à la lecture des liures d'Amadis de Gaule lesquels estans fort propres à disposer nos cœurs à l'amour, le sien ne manqua point de recevoir ces impressions agreables. Elle ayma cinq ou six personnes en vn mois selon les qualitez qu'ils auoient pour se faire aymer, mais toutes ces affections cesserent aussi tost qu'elle eust remarqué en nostre Adamant toutes les

perfections qu'elle auoit cheries en tous les amans, il fust l'vnique objet de son ame, & tout aussi tost qu'elle le vist soupirer pour elle elle commença de soupirer pour l'amour de luy. Les ieunes gens font gloire de captiuer vn fille qui a du merite, Leonie estant tres-gentille, d'vne humeur merueilleusement agreable, & ie veux dire encor assez belle pour donner de l'amour aux plus insensibles du monde, Adamant s'estima le plus heureux caualier de toute la terre de posseder les affections de ceste damoiselle, & pour ne perdre point vne singuliere faueur que l'amour luy sembloit offrir il commença de trauailler pour en auoir le contentement qui rauist les hommes. La premiere chose qu'il fist fust de luy persuader qu'il n'auoit iamais eu de cœur que pour elle: En suite de creance à laquelle il la dis-

posa fort facilement il la pria d'auoir
aggreable qu'ils eussent enséble quel-
que petite alliance d'amour qui fust
conforme à la fidelité qu'ils se pro-
mettoient. Ceste fille qui n'estoit pas
plus sage que celles de ce temps qui
pensent faire passer vn trait de follic
pour vne prudence en amour quand
il empruntent le noms de Syluandre,
Diane, Celadon, Astree, Hylas, Philis,
Madonthe, Damó & autres sembla-
bles pour dóner quelque couuerture à
leurs entreprises amoureuses, ou pour
tirer quelque vanité de leurs actions;
Ceste fille (dis-je) ne pouuant refuser
si peu de chose aux prieres de ce caua-
lier qu'elle ay moit resoluist de chan-
ger ce nom d'Adamant & de Leonie
pour tromper l'œil & la cognoissance
de ceux qui voudroient esclairer leurs
desseins & leurs actions: Elle nomma
don Adamant Amadis, permist que

toutes les lettres qu'il luy escriroit fussent adressees à l'incomparable Oriane, protesta de les receuoir avec ce tiltre, & de ne sousscrire point les siennes d'un autre nom: En effet elle luy escriuist plus de mille fois, receut aussi plus de mille lettres, & prist vne telle habitude à mettre ce nom d'Oriane au bas de ses lettres que la plus part du temps elle ne s'en pouuoir empescher quand elle escriuoit à d'autres personnes qu'à son Amadis. Vous sçauiez que la iouissance est le dernier desir de tous les amans, que c'est vn but auquel ils visent & qu'ils emploient toute la force de leurs esprits pour y arriuer? Adamant ayant cet obiet il practiqua toute sorte d'inuentions pour iouir de ceste beauté & trauailla si bien par l'espace de deux ou trois mois qu'il la contraingnist enfin de luy accorder ce qu'il desiroit. Iene m'amuse point à descrire
les

les mignardises de leurs caresses, ceux qui se sont treuuez quelquesfois parmi des pareilles felicités le sçauent mieux que ie ne le sçauois exprimer, tant y a qu'elles durerent par l'espace d'un an tout entier, au bout duquel temps Adamant se degoutant d'une viande si commune & si ordinaire commença de se retirer peu à peu. L'amour de ceste pauvre fille luy faisant treuuer cinq ou six iours d'absence fort importuns elle se pleignoit avec quelque petit trait de colere, elle imitoit les regrets qu'Oriane, faisoit pour l'absence de son Amadis, elle luy escriuoit de moment à autre, & luy reprochant bien souuent sa froideur elle l'attiroit quelquesfois malgré qu'il en eust: Mais ayant esté aduertie qu'il commençoit à mespriser ouuertement les lettres qu'elle luy enuoyoit elle deuint si melancholique qu'elle per-

dist en six sepmaines plus de la moitié de son iugement, & voyez vous un peu ie vous prie iusques où s'estendist son malheur? Comme elle cogneust qu'il fuyoit les occasions de parler à elle elle en chercha de le rencontrer & pour ce faire elle estoit de moment à autre en campagne tantost de iour & tantost de nuit, si elle reposoit quelque peu c'estoit avec des inquietudes estranges, elle n'estáchoit sa soif qu'avec ses larmes, elle ne vouloit plus parler de manger, & son esprit estoit si troublé qu'elle alloit & venoit sans sçauoir ce qu'elle faisoit, si bien qu'au bout de quelque temps elle deuint hypocondriaque par la force de la douleur dans laquelle parlant ordinairement de ce perfide qu'elle nommoit son Amadis elle imprima si bien dás son opinió qu'il estoit le roy de la grande Bretagne comme elle s'ima-

gina d'en estre la Reyne, que deslors elle n'eust point de plus grand desir que de l'aller chercher. Elle se mist d'oc en campagne en depit de tous ses parens, & s'en alla de maison en maison demander s'il y estoit point. Mais ce perfide voltigeant de costé & d'autre pour ne se récontrer point deuant elle, elle n'en peut iamais apprendre aucunes nouuelles : Or est il que don Clarazel estant sorti du chateau d'Arcail en ce mesme temps comme vous auez veu cy dessus pour treuver le bon cheualier qui l'auoit deliuré des prisons amoureuses d'Astralize, arriua sur le point du iour en vn bois où la fortune auoit amené ceste folle amante laquelle soustenant sa teste sur la paulme de sa main gauche arrousoit ses iouës d'une grande abondance de larmes. Ses pleurs luy touchâs le cœur fort sensiblement il s'approcha d'elle,

luy offrist son assistance avec des complimens extraordinaires, la supplia de luy dire qui elle estoit, & luy demâda courtoisement le subiet de son desplaisir, surquoy ceste femme le considerant avec quelque contentement elle luy respondist. Bon cheualier, i'auois resolu de ne me descouurir iamais iusques à ce que i'eusse rencontré vn prince vaillant que ie cherche, neantmoins vostre bonne mine me force, & malgré moy ie suis cōtrainte de vous aduouër que ie suis la Reyne Oriane tombee en la plus grande infortune du monde par la perte du Roy Amadis mon seigneur, lequel estant appelé à quelqu'adventure m'a laissé seule en ce petit bois avec des inquietudes estranges. O madame (dit alors nostre extrauagant se mettant à genoux deuant elle) que la terre est honorée de vostre retour en ce monde,

& que ie suis heureux aujourd'huy de vous pouuoir rendre quelque serui-
ce ? Belle princesse, ne vous affligez
point ie vous en supplie, le Roy est si
coustumier de vaincre tous les enne-
mis qu'il attaque, que vous ne deuez
point douter qu'il ne retourne de ce-
ste entreprise avec autant d'honneur
& de gloire qu'il a fait de toutes les
autres où il a fallu employer l'espee:
Quant au reste vous auez treuue vn
cheualier errant lequel scachant don-
ner le prix à vostre merite ne vous lais-
sera pas icy toute seule & qui ne se las-
sera iamais de vous suiure qu'il ne
vous ait remise entre les mains de vo-
stre mary: Madame allons donc com-
mencer la queste de ce grand prince, &
cependant songez s'il vous plaist que
ces larmes sont mal seantes aux yeux
d'vne si grande Reyne laquelle doit
auoir appris à supporter les coups de

fortune avec plus de courage & de patience, ie veux dire que vous vous devez resiouir. Vrayment cheualier (luy respondist elle) il est difficile d'estre insensible à quelque disgrâce que ce soit, & vous ne vous devez pas estonner si vous avez treuvé mes yeux tous couuerts de larmes, car estant icy toute seule ie ne scauois à quoy me resoudre ; Neantmoins ie me veux consoler pour l'amour de vous ; Vous me presentez vostre compagnie pour aller chercher monseigneur, ie ne la puis refuser avec raison. Alors don Clarazel s'estât releué apres luy auoir baisé les mains avec vn respect nonpareil il la prist par deffous les bras, la mena iusques au lieu où son cheual païssoit vn peu d'herbe, la mist sur la selle, prist les resnes, & commença de marcher à pied deuant elle ayant la teste toute descouuerte comme il auoit

veu que quelques vns des princes de Grece auoient fait lors qu'ils conduisoient leurs maistresses ou quelques belles imperatrices. Imaginez vous vn peu ie vous prie quelle estoit la gloire que ceste nouuelle Reyne de la grande Bretagne ressentoit de se voir conduire en triomphe par vn hōme de si bonne mine, & quel estoit aussi le contentement de nostre cheualier hypocondriaque pour la faueur qu'elle luy faisoit de le iuger digne de sa conduite? Sans mentir ils estoient tous deux esgallement ravis de ceste aduenture, ils se glorifioient en leurs ames, & ie m'asseure qu'ils n'eussent pas voulu tous deux posseder le plus grand Empire du monde pour estre priués d'vn si grand honneur. S'estans entretenus quelque espace de temps en ceste pensee ils se voulurent entretenir de quelques discours pour treu-

uer la longueur du temps moins fasteuse. Don Clarazel se treuuant d'oc en sa belle humeur pour la ioye qu'il ressentoit il tourna ses regards sur ceste damoiselle, & souriant comme s'il luy eust voulu dire qu'il songeoit alors à de belles choses il luy dist. Madame deuineriez vous bien quelle est ma pensee? Non certes (luy respondist elle) si vous ne me la dittes vous mesme? Le resuois (reprist-il tout incontinent) à vne chose estrange qui me peust arriuer en l'affaire que i'entreprends: Madame si nous rencontrions maintenant Amadis que me diroit il de me voir faire l'office d'un ieune amoureux enuers vous? Sur mon ame i'aprehenderois qu'il ne m'inuitast au combat sur ceste querelle, ou pour le moins qu'il ne conceut quelque ialousie? Non non (dit-elle l'interrompant à ceste parolle) deux raisons vous

doiuent asseurer contre ceste crainte, le Roy monseigneur n'a i' amais douté de ma fidelité ny de mon amour, & puis sçachant bien que vous estes don Guillan le pensif son bon amy il ne prendroit iamais ombrage de vous. Comment madame (luy dist Clarazel se mettant vn peu en colere à ceste parolle) vous croyez donc que ie suis Guillan le pensif? Pardonnez moy ie vous supplie, sur mon ame vous vous trompez, ie suis vn cheualier errant nommé don Clarazel de Baleare, & quant à celuy duquel vous parlez ie vous assure que ie le deliuray il y a six sepmaines d'vn enchâtement tres-fascheux, & qu'il doit estre maintenant à Londres pour y attendre vostre maiesté. Ah vrayment (dit-elle) voila qui est bon: Guillan vous pensez donc m'abuser avec des parolles, mon amy cest artifice est bon pour

quelqu'autre, quant à moy i'ay les yeux trop bons pour vous mesconnoistre, & ie me souuiens fort bien que ie vous ay veu mille fois à Londres à la compagnie du Roy Monseigneur & de mon pere le bon Roy Liliard: Moy madame (reprist Clarazel) le diable m'emporte si i'ay iamais mis le pied dans Londres, ny dans le Royaume de la grande Bretagne, au nom de dieu considerez moy mieux que vous n'avez fait ie vous en supplie, vous treuueriez infailliblement que ie suis tout autre que vous ne pensez. C'est en vain que vous aduancez toutes ces excuses (luy repliquat-elle) vous estes don Guilan le pensif fort asseurement, & ie treuue ceste opiniastrerie de tres-mauuais goust, parce que vous voulez peust estre vous excuser du seruice que vous me deuez. Non madame ce n'est pas cela (luy respondist-il)

mais ie ne puis souffrir qu'on m'appelle Guillan le pensif estant don Clarazel de Baleare, que si vous continuez à me dire ce que vous me dittes, ie croiray fort asseuremēt que vous estes enchantee ou bien que ie le suis moy mesme. La la (dit-elle) n'en parlons plus & nous entretenons d'autre chose, ie vous cognois si bien que ie ne doute point que vous ne soyez celuy que ie dis. Madame (luy respondist-il) vostre commandement me fermela bouche, mais par ma foy ie vous promets bien que ie suis don Clarazel de Baleare & non pas Guillan le pensif; Vous voulez que ie vous entretienne de quelques discours plus plaisans, madame ie ne penle pas que vous ayez rien de si doux que la memoire de vos premiers contentemens avec Amadis, aurez vous aggreable que ie me iette sur ceste matiere? Ouy sans mentir

(luy respondist-elle) vous ne me scauriez faire vn plus grand plaisir. Madame (reprist Clarazel) ie vous demanderay donc s'il vous plaist si vous receustes plus de plaisir lors que vous perdistes le nom de pucelle qui fust le propre iour que monseigneur Amadis vous deliura des mains de l'enchanteur Arcalans, que vous ne fistes à son retour de la Roche pauvre. Ho ho (dist-elle) vous estes vn peu trop curieux: Sçachez don Guillan mon amy que monseigneur Amadis n'eust aucune part en moy quand il me deliura des mains de cet enchanteur duquel vous parlez, ny quand la damoiselle de Dannemarc me le ramena de la Roche pauvre. Ah madame (dit-il frappant des mains l'une contre l'autre) vous me pardonneriez s'il vous plaist si ie parle trop librement, ie ne vous laisseray point passer celle la, vous

deguisez vn peu les matieres & suiuez
en cela le naturel de toutes les femmes
qui ne veulent iamais aduouër vne
belle faute. Je sçay bié qu'apres qu'A-
madis vous eust deliuré des mains
d'Arcalans vous allastes reposer dans
vn pré par lequel vn petit ruisseau ser-
pentoit agreablement, & qu'apres
mille difficultés il obtint de vous le
dernier bien qu'on fait aux amans
pendant que son escuyer alloit cher-
cher des viures pour vostre soupper:
D'auantage ne vous souuenez vous
pas qu'au retour de la Roche pauvre
vous luy fistes faire vne clef pour en-
trer par la porte secrette qui donnoit
l'entree au verger, que vous le mena-
stes en vostre chābre, & que Mabile
estant absente ses desirs le presserent
en telle façon qu'il mist la main sur
vostre teton, & tout incōtinant apres
vers la partie plus desirée, que sur ces

entrefaittes vous vous estendistes sur
luy avec vne rougeur qui tesmoi-
gnoit assez l'alteration de vostre ame,
& que mesme vous luy demandastes
si l'hermite de la Roche pauvre luy
auoit appris ces façons de faire? Mada-
me que sert il de dissimuler, vous
vous donnastes en proye à tous ses de-
sirs, vous contrefistes vn peu la morte,
& luy laissastes cueillir le bien duquel
il auoit desia iouy quelque petite es-
pace de téps: le ne parle pas par cœur
ie vous en assure, les mots que ie
vous dis sont les mesmes que l'histo-
rien a mis dans ses liures, voila pour-
quoy vous auez tort au moins ce me
semble de dire maintenant que non:
Que si vous me faictes chercher des
raisons plus puissantes pour vous
conuaincre ie vous allegueray la nais-
sance d'Esplaudian que vous auez
tousiours recogneu pour fils lequel

prouint de les caresses desrobees dont ie vous ay parlé cy dessus. Il est vray (dit-elle) que i'ay tort de disputer, ou plustost de vouloir nier vne chose que i'ay bien voulu que le monde sçeut, Guillan mon amy vous auez raison, mais vous sçaez bien que les dames ne confessent pas volontiers vne faute qu'oy qu'elles sçachent bien que le monde en ait cognoissance. Madame (luy respondist-il sans luy donner le loisir d'acheuer ces derniers propos) ie vous ay desia dist qu'on me nommoit don Clarazel & non pas Guillan le pensif, au nom de dieu faites moy l'honneur de m'appeller par le nom que i'ay: He quoy (dit-elle) cheualier continuerons nous en nos feintes, leuez le masque ie vous en prie, & considerant qui ie suis, aduouëz aussi ce que vous estes, autrement ie diray que vous estes fou. Par dieu madame

(luy respondist il en branslant le teste)
vous direz ce qu'il vous plaira, mais
vous ne me persuaderez point que ie
sois autre que moy mesme, & si vous
continuez en ceste opinion ie pourray
dire avec apparence que vous estes
folle vous mesme, ou bien que quel-
que magicien vous a fait perdre le iu-
gement. Ainsi s'entretiens de mille
discours extrauagans ils se promene-
rent trois iours entiers logeã tantost
sous des arbres, tantost chez quelque
bó laboureur & traísnãs tousiours vne
multitude d'enfans, lesquels couroiẽt
apres eux comme on voit qu'ils vont
apres quelque meneur d'ours. Ceste
espace de temps estant elcoulee pen-
dant laquelle ils dirent des choses ad-
mirables, la fortune qui vouloit des-
charger don Clarazel d'un si grand
fardeau leur fist rencontrer Adamant
au milieu d'un bois. Ce gentilhomme
voyant

Voyant vn equipage si crotisque il
s'en voulust approcher pour le confi-
derer avec plus de contentement, &
d'ailleurs nostre cheualier hypocon-
driaque l'ayant descouuert s'en alla
tout droit à luy pour luy demander s'il
auoit point ouy des nouuelles d'Ama-
dis de Gaule, mais comme il commen-
çoit à parler Leonie qui auoit fort bié
recogneu Adamant se ietta d'un saut
sur la terre, l'interrompist au premier
mot, & courant à luy les deux bras ou-
uers. Monseigneur mon amy (luy dit-
elle) ie réds graces à Dieu de ceste ren-
côtre, ne soyez plus en inquietude voi-
cy vostre chere Oriane sous la côduitté
du bon dô Guillan le pêsist. En ma cô-
sciéce madame (luy respôdist dô Cla-
razel assez brusquemét) vous deuriez
ce me seble me traiter pl⁹ courtoise-
ment & châger vn peu de discours, car
vous ayant desia dit plus de mille fois

que ie n'estois pas Guillan le pensif
ne sçay pourquoy vous prenez plaisir
à m'y appeller, mais ie me console en
quelque façon, voicy vn tesmoing
qui condamnera vostre opiniastrété:
N'est-il pas vray monseigneur (con-
tinuat-il se baissant deuant Adamant
pour luy rendre plus de respect) n'est
il pas vray que ie ne suis pas Guillan le
pensif, & que la reyne madame a tort
de me persecuter là dessus. Belles ames
figurez vous vn peu l'estonnement
de ce gentilhomme de rencontrer vne
femme dót il abhorroit la presence, de
se voir prendre pour Amadis par vn
hóme de si bonne mine, & d'entédre
des discours tant extrauagans? Sans
mentir il se treuua tellement surpris,
ou pour mieux dire tant esmerueillé
de voir que la fortune auoit assemblé
deux hypocondriaques qu'il eust en-
uie trois ou quatre fois de passer huit

ou dix iours de temps avec eux pour auoir le plaisir de leur voir faire leurs extrauagances & leurs follies. Toutefois ayant peur qu'il ne se peut apres desgager quand il luy plairoit de ceste compagnie, il ayma mieux perdre les rauissemens qu'il en esperoit que d'y demeurer plus long temps. Ne respondant donc pas vn seul mot à l'vn ny à l'autre il tourna bride & poussant son cheual tout d'vn mesme temps s'enfonça si brusquement au trauers du bois qu'on le perdist de veuë en moins d'vn moment. Le vous ay tantost supplié de vous figurer l'estonnement que ce gentilhomme eust à l'abord de ces deux hypocódriques, ie vous conjure de vous représenter maintenant celuy qu'ils eurent quand ils le virent desloger en ceste façon? Don Clarazel qui n'auoit iamais veu faire vne pareille action au vaillant

Amadis de Gaule demeura presque tout esperdu, il ietta trois ou quatre fois les yeux sur la pretenduë Oriane pour voir quelle seroit sa contenâce, & quant à elle la douleur luy ferra le cœur en telle façon qu'elle demeura plus de demie heure sans pouuoir proferer vn seul mot. Enfin s'estans tous deux regardés pendant ceste espace de temps & avec vn estónement merueilleux ils se resolurent, elle à le suiure & don Clarazel à luy conseiller de courir apres, & pour ce faire il luy presenta son cheual sur lequel estant assize. comme auparauant elle se ietta tout incontinant au trauers des arbres & pour suiuiſt si longuemēt celuy qui fuyoit sa presence que nostre cheualier hypocondriaque ne la vist iamais. Nous dirons à l'autre chapitre les incommodités qu'il eust de la perte de son cheual & les aduantures estran-

ges qui luy arriuerent le lendemain.

Quelles furent les aduantures de don Clarazel apres l'esloignement de la damoiſelle hypocondriaque : Il rencontre trois gentil hommes morts en vn préſurquoy il prend vne reſolution digne de la foibleſſe de ſon cerueau : Le preuoſt de Lyon arriue avec vne trouppes d'Archers : Eſtranges boutades de don Claraſel : Le Preuoſt le prend priſonnier, l'enuoye aux priſons : Les diſcours qu'ils tindrent enſemble : Et comme la paix fuſt faite entre eux.

CHAPITRE XXV.



A fuitte d'Adamant que noſtre Clarazel croyoit eſtre Amadis de Gaule ne l'ayant pas moins eſtonné que s'il euſt veu

tomber la poudre à ses pieds, il demeura dans ce bois bien près de quatre heures pendant lesquelles il resua tousiours à ceste aduventure sans qu'il peut comprendre comment il s'estoit peu esloigner de son Oriane avec des mouuemens de mespris, car s'estant fort bié souuenuë que ce prince auoit tousiours tesmoigné vne amour extreme à sa dame, qu'il l'auoit seruie avec des respets incroyables, & qu'il n'en auoit iamais perdu la presence qu'avec de la douleur & du deplaisir, il se treuuoit si troublé de ceste boutade qu'il ne croyoit ce qu'il deuoit dire. Il creut à l'abord qu'il estoit deuenu infidelle à l'exemple de la plus grande partie des hommes qui font gloire de n'aymer qu'un iour ou qu'un mois, mais il perdist ceste fantaisie quand il se souuint des grandes preuues d'amour que ce cheualier auoit

rendues à ceste princesse, & eust opinion qu'il estoit alteré en son iugement par la vertu des charmes de quelque maudit enchanteur, de sorte qu'ayant compassion de cet accident il se souhaitta plus de mille fois pres d'Vrgande la descogneuë, ou du bon Alcandre pour les supplier d'apporter quelque remede à ce grand malheur: Toutefois s'estant à la fin souuenu que ces magiciens auoient le naturel assez bon pour secourir ces amans affligés sans y estre incités par la priere de qui que ce fust, il se persuada qu'ils les assisteroient quand il seroit temps & se cōsola. Se resoluât donc à chercher vn cheual parce que la Reyne Oriane ne retournoit point avec le fié il marcha iusqu'à la nuit sãs treuuer aucune maison que la cabane d'un pauvre berger, lequel luy dōna le couuert & du pain. L'extreme desir qu'il auoit d'exercuter

quelque memorable fait d'armes pour reparer le tort qu'il s'estoit fait demeurant oisif dans Arcaïl par vne si longue espace de temps l'ayant fait leuer dès le point du iour, il prist congé de ce bon homme qui l'auoit logé, & suiuit le premier chemin qui se presenta sur lequel ayant cheminé par l'espace de deux bonnes heures avec vne grande incommodité à cause de la pesanteur de ses armes il eust enuie de se reposer. Le lieu où il estoit alors ne luy semblant pas propre à cela il tira tout droit vers vn petit pré qui paroïssoit à sa main gauche avec dessein de se desarmer & se coucher à l'ombrage de quelques arbres, mais ayant veu trois cheuaux attachez par la bride à quelques buissons il cōceut l'opiniō de quelque memorable aduenture, il creut qu'il auoit rencontré vn subiet de gloire, & pour cet effet il ietta ses re-

gards par tout pour chercher les maistres de ces cheuaux : s'estant tourné trois ou quatre fois, & n'ayant decouvert personne il entra dans ce pré avec opinion qu'ils y estoient entrez pour se reposer. En effect il les y treuua, mais ô dieux en quelle posture? Estendus sur l'herbe, tous couuerts de sang, & pour le mieux dire en vn mot tous trois roides morts: Ce pitoyable obiect l'estonnant merueilleusement il les considera long temps sans mot dire, il s'approcha d'eux peu apres pour les visiter & les secourir s'ils auoient encor quelque peu de vie, mais les treuuât tous percez de grands coups d'espee lesquels estoient encore sur l'herbe il iugea bien que le dessein qu'il auoit de les assister estoit inutile: S'arrestant donc à les plaindre plustost qu'à leur preparer des remedes, il versa sur eux quelques larmes, il alla pren-

dre vn de ces corps lequel estoit vn peu à l'escart, le mist tout proche des deux autres, & iugeant bien qu'un plus long seiour aupres d'eux ne leur profiteroit de rien il sortist du pré & s'en alla monter sur le meilleur des trois cheuaux dont nous auons parlé cy dessus. Toutefois s'estant souuenu des le premier pas que don Galaor ayant rencontré le corps du bon Antebon estoit demeuré à ses pieds pour venger l'outrage qu'on luy auoit fait, il mist pied à terre, attacha le cheual au mesme lieu où il l'auoit pris, & s'allant mettre sous vn arbre fort proche de ces gentilshommes qui se venoiēt de couper la gorge en duel, protesta de venger leur mort & de ne sortir iamais de cel lieu qu'il n'eust des nouuelles de ceste aduventure. Belles ames dittes moy ie vous prie vn peu si vn homme qui eust bien vsé de son

jugement ne se fust esloigné delà le plus vilstement qu'il eust peu pour preuenir l'extreme danger qu'il y auoit à estre rencontré proche de ces corps, & que vous direz encor que don Clarazel tesmoigna en cela la maladie de sa ceruelle? Il est vray que vous aurez vn tres-iuste subiet de le dire, ce malheureux fist vn tour de fou veritablement, il souffrist aussi beaucoup pour auoir fait vne telle faute comme ie vous diray tout incontinent. Trois ou quatre heures s'estas escoulees pédât lesquelles il auoit tousiours esté couché sur la terre il ouit le bruit de quelques cheuaux, lesquels l'ayans fait leuer assez brusquement il descourist le Preuost des mareschaux de Lyon suiuy de douze ou quinze Archers lequel ayant esté aduertit de tout ce qui s'estoit passé entre ces gentilhommes qui s'estoient

battus venoit pour enleuer les corps selon le deuoir de sa charge. Leur objet luy ayant fait croire que c'estoit vne troupe de voleurs qui auoient assassiné ces bons cheualiers qu'il gardoit si soigneusement, il mist le casque en teste, l'espee à la main, & s'auançant vers eux avec vne action toute furieuse. Meurtriers infames (leur dist-il) il faut aduouër que le ciel est iuste puis qu'il vous conduit icy pour receuoir par mes mains la punition du crime que vous auez fait ayât malheureusement massacré ces bons cheualiers le sang desquels demande vengeance au ciel & aux hommes? Si ces parolles estonnerent merueilleusement ce Preuost ne me le demandez point ie vous prie: Sans mentir il fust si confus à l'abord qu'il ne sçauoit ce qu'il deuoit dire, ny que faire en ceste rencontre, car ceste parolle audacieuse

fist mourir la resolution qu'il auoit de luy demander ce qu'il faisoit là: Neantmoins s'estant resolu en fort peu de temps, & croyant que ce compaignon ne s'estoit armé que pour faire enleuer ces corps il luy respondist. Sur ma foy le trait est gentil, & vous n'aurez pas trop mauuaise grace si vous pouuez eschapper de nos mains par cet artifice, vous estes peust estre vn de ceux qui auez cōtreuenu aux edits du Roy & pour vous excuser il sēble que vous nous vouliez rēdre coupables du fait. Gallād armes bas autrement ie vous feray percer cōme vn crible. Par dieu (dit dō Clarazel) ie me garderay bien si ie puis de tōber au pouuoir de personnes si lasches & traistres: Ce disant il porta l'espee si furieusement sur ce luy qui se presenta le premier qu'il la luy fist entrer dans la cuisse plus d'vn demy pied, surquoy ces Archers luy

laschanstout d'un mesme temps quatre pistolets sur ces armes ils l'estourdirent en telle façon qu'ils luy firent faire cinq ou six demarches en arriere, quoy que le plomb n'eust point porté iusques dans la chair. Le Preuost le voyant alors en desordre poussa son cheual & le choqua de telle furie qu'il le renuersa sur la poudre. La coutume de ces gens estant de se bien seruir des occasions, la plus part de tous ces Archers seietterent d'un saut sur la terre, luy mirent des cordes aux iambes, & l'arrestèrent ainsi fort facilement apres auoir souffert deux douzaines de coups de pied & de coups de poing. Estant attaché de la sorte & hors du pouoir de faire mal ils le mirent sur vn des cheuaux des deffunts, l'attacherent par les iambes avec des cordes, enleuerét les corps de ces gentilhommes & commencerent à re-

prendre le chemin de la ville en cet equipage. Ce mauuais traitement luy donnant vn tres grand depit il grommeloit contre ce Preuost, il le regardoit de trauers, le menaçoit avec le doigt côme l'on fait les petits enfans, & ne se pouuant empescher de parler ne luy promettoit rien moins que la mort tout au mesme temps qu'il seroit dans la liberté de ses actions, ce qu'estant veu par ce Preuost il luy dist avec vn soufrire. Mon gentilhomme ie voy bien que vous vous eschauffez trop sous ces armes, il vous faut soulager en quelque façon & vous descharger les espauls & la teste de ce lourd fardeau. Brigand (luy respondist il avec vn mouuement de colere extraordinaire) par le dieu qui forma le ciel & la terre vous mentirez, vous ne me desarmerez iamais que ie ne sois mort. Comment (repliqua le pre-

uoist) pensez vous quel'on vous veuil
le pendre avec ces armes, ie vous les
feray bié quitter auant qu'il soit nuit?
Ouy (dit il branlant la teste) vous
estes donc vn pendeur de gens? Par
dieu si vous auiez fait ceste faute que
ie nommerois volontiers sotize l'on
vous apprendroit bien tost à n'en fai-
re plus, car on prendroit de vous vne
vengeance si cruelle & si memorable
que l'on en parleroit d'icy à cent ans.
Ho ho seigneur cheualier (reprist le
Preuost) vous me feriez peur à la fin,
mais encor qui sont ceux qui me
traitteroient si mal que vous dittes?
L'excellent cheualier à la roze verte
(reprist Clarazel) ou à son deffaut le
gentil prince de Colchos Agefilá, dō
Sylues de la Selue, Amadis de Gaule,
le cheualier du Soleil, ou quelqu'au-
tre des princes de Grece, lesquels ne
manqueront pas de t'aller chercher
iusques

iufques aux enfers pour le punir de la
cruauté fi toft qu'ils auront appris
que tu m'auras rendu quelque de-
plaisir. He quoy (dit le Preuost se met-
tant à rire) vous me penfez donc ef-
pouuanter par des ombres, ou pour
mieux dire par des fantosmes. Tu as
menti (reprist Clarazel l'arrestant à ce-
fte parolle) ceux dõt tu parles ne font
point fantosmes ny ombres, mais des
princes tres valeureux & tres redouta-
bles: Tu ris de ce discours par ce que
tu les crois au tombeau, & peult estre
que ceste opinion te rend insolent
iufques à ne craindre point leur ren-
contre, mais tu te trompes ils sont re-
fufcités depuis quelque temps par la
vertu d'un magicien qui n'a iamais eu
fon pareil, & pour vne preuue de ce
que ie dis fçaches que i'ay veu le sou-
uerain Roy Amadis, Agefilan, don
Sylues, Guillan le pensif & plusieurs

autres; Souuien toy donc qu'ils sont mes amis, & qu'ils ne dormiroit iamais qu'ils ne t'ayent mis en mille morceaux si tu me rends quelque deplaisir. A ces mots le Preuost le regardant attentifuelement fort esmerueillé de l'extrauagance de ce discours il commença de iuger qu'il estoit hypochondriaque, & de croire par consequent qu'il estoit innocent du crime pour lequel il l'auoit fait prendre, voila pourquoy communicquant sa pensee à quelques vns de ses Archers qui eurent la mesme opinion il fust sur le point de commander qu'on le desliaist & de luy dire qu'il prist vn autre chemin s'il vouloit. Toutefois aprehendant que ce ne fust vne ruze pour s'exempter de la prison il resolut enfin de le mener iusques à la ville & l'interroger fort exactement sur les circonstances du fait. Il l'y mena donc & le

fist conduire aux prisons, mais quand il fust question de l'examiner il reuint à ses premieres opiniõs, accusa le Preuost d'auoir fait le meurtre, & demanda le combat contre luy pour iustifier ce qu'il proposoit, desorte que ne cõfessant rien & personne ne l'accusant le Preuost fust d'aduis de le renuoyer. Estât donc prest à le faire cõduire hors la ville il vist entrer vn lacquay chez luy qui luy dist que monsieur le gouuerneur estant aduerti de tout ce qui se passoit en ceste affaire luy enuoyoit dire qu'il vouloit voir ce prisonnier. Ces parolles seruans de commandement au Preuost il le mena chez le gouuerneur lequel le voyant entrer avec la cuirasse sur les espaules luy demanda qui il estoit. Don Clarazel le voyant accompagné de sept ou huit gentilhommes qui l'estoient venu visiter creut qu'il estoit quelque grand

prince, & par consequent il iugea qu'il luy deuoit beaucoup de respect. Il luy dist donc courtoisement: Prince excellent, ie suis vn cheualier errant qui cherche les aduantures estranges du monde pour me mettre dans l'estime des gens de bien par quelque beau trait de valeur. Or est il que la fortune me fist hier rencontrer en vn pré trois cheualiers malheureusement massacrés par quelques volleurs desquels ie pense que ce soit là le capitaine monstrant le Preuost. A ces mots tous les assistans se prirent à rire si hautement qu'il fust interrompu malgré qu'il en eust: Toutefois chacun desirant scauoir ce qu'il vouloit dire on luy fist silence dans lequel il reprist ainsi son discours. La disgrace de ces trois malheureux cheualiers me touchant le cœur fort sensiblement ie me souuins que les loix de cheualerie m'obli-

geoient à lavé geance de ceste cruauté,
voila pourquoy ie iuray solennelle-
ment de ne sortir iamais de là que ie
n'eusse fait mourir les meurtriers s'ils
pouuoient venir à ma cognoissance.
Estant donc au guet dans le mesme
pré ie veis venir ce traistre accompa-
gné de quatorze ou quinze pendarts
qui ne vallent pas mieux que luy, les-
quels suiuanz leur bonne coustume
qui est d'estre traistres & de prendre
les bons cheualiers avec aduantage
m'attacherét comme vn larron apres
m'auoir estourdi par cinq ou six coups
d'arguebuze, & m'amenerent à la pri-
son où l'on m'a fait de si grandes indi-
gnités qu'il faut que ie vous en de-
mande raison. S'il est de vos Satrapes
ou de vos subiets vous le supporterez
infailliblement, mais monsieur, vous
vous souuiendrez s'il vous plaist, que
vous deuez la iustice aux estrangers

aussi bien qu'aux vostres, & que l'equité donne plus de seruiteurs à vn Prince que la Fortune ne luy a donné de subiets. Les combats sont institutez de tout téps pour venir à la preuve de l'innocence ou du crime de quelques vns, c'est vne coustume que tous les gens de bien pratiquét, vous nous l'accorderez s'il vous plaist, & pour tesmoigner que ie le desire, voila mōgage que ie luy presente. Ce disant il ietta au Preuost vn de ses gantelets, & monstrant vne contenance asseuree tourna les yeux sur le gouuerneur pour mieux entendre la responce qu'il luy feroit. Le gouuerneur qui cogneut la maladie du compagnon par l'extrauagance de ce discours, luy respondist avec vn soustris. Seigneur, ie scay fort bien qu'il n'y a rien qui réde les actiōs d'un grand si recommandables que la iustice: voila pourquoy ie l'ayme &

fais profession de la rendre à qui que ce soit, sans auoir plus d'esgard à mes amis ou à mes domestiques qu'aux estrangers, cela estât vous deuez croire que là où vous aurez raison de vous plaindre de celuy que vous accusez, ie vous en feray la raison toute telle que vous la pouuez desirer, mais ie sçay bien qu'il n'est pas coupable du mal que vous luy imputez, & qu'il n'a point massacré ceux que vous ren-
contrastes hier, au contraire ie vous assure qu'il s'estoit mis aux champs pour prendre ceux qui auoient fait le coup suiuant le deuoir de sa charge, car il est Preuost, & son office est de se saisir de tous les meschâs pour les faire punir de leurs crimes, de sorte que ie ne vous puis accorder le combat que vous demandez contre luy. Vous perdrez d'óc ceste fantaisie, puis qu'elle n'a point de fondemēt, & au lieu de le

quereller vous serez son amy s'il vous plaist. Comment son amy (reprist Clarazel) monsieur vous vous moquez de moy, quand il n'auroit point fait ce meurtre comme vous dittes, dois ie demeurer sans ressentiment de l'affrôt qu'il m'a fait de me lier avec descordes comme vn larron? Il faut qu'il meure ou pour le moins qu'il me demande pardó d'un si grand outrage. Ah vrayment (dit le gouuerneur) il est iuste que vous soyez satisfait en quelque façon, il aduouë d'auoir failly & promet d'apporter vne autre fois plus de iugement à ses actions, que voulez vous plus? C'est assez (reprist Clarazel) me voila content, ie m'en vay reprendre mon gage. Ce disant il receut son gantelet de la main du Preuost qui luy dist: Seigneur cheualier si ie vous ay rendu quelque deplaisir i'en ay du regret, & vous prie que ie demeure en

Vos bonnes graces. le le veux bié (luy
respondist il) mais monsieur le Pre-
uost deuenez plus sage, & ne menacez
iamais les bons cheualiers de les faire
pédre: or sus sus (dit le gouuerneur)
seigneur cheualier il se seruira de ce-
ste leçon, cependant ie vous veux prier
d'une courtoisie qui est de me dire
que vous esperiez de la garde de ces
corps morts? Ce que i'en esperoïs (luy
respōdist il) mōsieur c'est vne questiō
que vous ne me deuez point faire au
moins ce me semble, car vous deuez
croire que l'honneur étant le seul but
de mes actions i'en attendois vne
gloire pareille à celle que le gentil don
Galaor eust d'une entreprise seblable
Ayant treuue le corps du bō cheualier
Antebō qu'un nōmé Palingues auoit
occis malheureusement, il fist vne
actiō si genereuse qu'il ne me souuiér
point d'en auoir iamais leu dans les


histoires vne plus hardie, il se laissa tirer dans vne corbeille par dessus les murailles du chateau du traistre Palingues, il mist à mort & vengea l'outrage qu'il auoit fait au bon Antebon: Que si dans l'aduenture que ie rencôtray il se fust présenté vne occasion de tesmoigner vn trait de valeur, ie n'eusse pas moins fait que don Galaor, & i'eusse végé la mort de ces cheualiers, mais à propos de ces malheureux monsieur que sont ils deuenus? Ils sont encor dans la prison (luy dist le Preuost) toutefois ie pense qu'ils n'y demeurerôt pas long temps, car ie les vay condamner au gibet suiuant les edits contre les duels. Au gibet (reprist Clarazel) ô dieux qu'entens-ie maintenant? Monsieur le Preuost est il bien possible que vous puissiez exercer sur des corps morts ceste espee de tyrannie, ou de cruauté qui est certes du tout

horrible ? Ah ne le faittes point ie vous en supplie au moins si vous voulez que nous demeurions bons amis. Que voulez vous que ie fasse à cela (luy dist le Preuost) ce sont les loix du Royaume qui le veullent ainsi ? C'est vn abus (luy respondit-il en cholere) les combats ne sont ils pas ouuerts par toute la terre, & mesmement institués pour la preuue des crimes ou de l'innocence ? He que seroit-ce, si l'on faisoit mourir tous les cheualiers errans qui tuent leurs ennemis honorablement & sans aduantage ? la terre seroit bien depeuplee. Non non seigneur cheualier (dist le gouuerneur en riant) cela ne se passera pas ainsi, puis que vous ne le desirez point, & ie vous promets de leur faire donner vne sepulture honorable en l'air : Ha certes (luy respondit-il) c'est ainsi que les Princes de bonnaires ont accoustu-

mé de parler, monseigneur, le monde louëra ce trait genereux cōme il eust blasmé l'autre infailliblement, la chose estât donc bien en ceste façon il ne reste plus rien à vous dire sinon que vous me fassiez rendre mon casque, mon espee & mon escu que les compagnons du Preuost me prirent hier, & que vous me fassiez donner à disner, car ie vous iure en ma consciēce qu'il y a tantost deux iours que ie n'ay mangé. Ah par ma foy (dit le gouuerneur qui estoit bien aise de le retenir quelque temps pour en auoir vn plaisir plus grand) seigneur cheualier vous auez raison, ie ne me souuenois plus que la bien seance m'obligeoit à vous presenter ceste courtoisie. Alors faisant apporter force bonnes viandes il fist mettre nostre hypochondriaque au bout de la table & prist place.

*Aggreable discours de nostre cheualier
hypocondriaque & du gouverneur
de Lyon.*

CHAPITRE XXVI.

 Endant que nostre cheualier hypocondriaque deuoroit les viandes, le gouverneur le consideroit attentifuemēt & le treuuant de fort bonne mine pleignoit en son ame la disgrace qui luy auoit fait perdre le iugemēt, toutefois ayāt resolu d'en tirer du plaisir il ne pensoit pas qu'il fust à propos de s'amuser alors à le plaindre. Le remettant donc sur le discours de ses follies il luy demanda s'il n'estoit pas ce fameux cheualier des tristes pensees dont les admirables faits d'armes

auoient rempli d'estonnement toutes les prouinces circōuifines, à quoy respondant fort modestement. le ne sçay monsieur (luy dit-il) si ma renommee est telle que vous la publiez maintenant, mais ie ne craindray plus de vous dire que l'on m'apelle ainsi partout. Ha certes (dit le gouuerneur) ie m'en doutois bien, & dès à ceste heure ie vous demande pardon de bō cœur du deplaisir que vous auez receu de mes gens, car i'estime merueilleusement les bons cheualiers, & ie ne pense pas qu'il y ait prince au monde qui ne me cedde en l'affection de les caresser & les retenir en ma cour, voila pourquoy si vous voulez demeurer icy vous ne souhaitterez iamais rien de moy que vous n'obteniez fort facilement. Monsieur (luy respondist il) si i'estois à moy i'aurois bien tost satisfait à vostre priere, car

vous sçavez obliger si parfaitement que ie ne vous quitterois de ma vie qu'avec regret, mais vous sçavez en quelle inquietude sont les amans quand ils sont esloignés du subiet de leurs passios, & vous n'ignorez point que les empires sont de trop petite consideration pour les arrester. Vous estes donc amoureux, dit le gouverneur? Helas (luy respondist-il froidement) pouuez vous douter de cela? Monsieur, vous n'avez iamais quel-que cheualier errant que ce soit à qui la gloire d'une beauté n'ait serui d'obiet à ses armes, ils sont tous frappez de ces traits dorés qui n'exemptent personne de leurs douces pointes, & quāt à moy i'ose asseurer que tous les princes de Grece ensemble n'ont iamais eu tant d'amour que moy. Voila (reprist le gouverneur) vne proposition bien hardie? Cheualiers, pensez vous

emporter la gloire de bien aymer par
dessus Amadis de Gaule Agesilan,
don Sylues, Spheramond & plusieurs
autres qui nous ont esté donnés pour
exemples de fidelité & d'amour. Je
sçay fort bien (luy respondit-il sans
s'estonner) que si ie ne surpasse tous
ces cheualiers excellens en ceste admi-
rable perfection de sçauoir aymer
sainctement & sans artifice, ie les es-
galle pour le moins, & sans vanité ie
puis dire qu'à la reserve d'Amadis de
Gaule ie sçay mieux aymer que les au-
tres. Et pourquoy (dist le gouuerneur)
reservez vous plustost celuy là que les
autres lesquels n'ont iamais esté soup-
çonnés d'infidelité? Par ce (respondit-
il) qu'il a longuement aymé dans la
Roche pauvre avec le desespoir de
iour iamais de son Oriane, & que les
autres ont tousiours nourri leurs affe-
ctions de l'esperance des recompenses.

Vrayment

Vrayment (dit le gouuerneur) vostre raison me semble tres-bonne, mais à ce conte il faut que vostre sort soit pareil à celuy d'Amadis de Gaule, & que vous n'esperiez non plus de grace de vostre maistresse qu'il faisoit alors de son Oriane? Il est encor plus déplorable (luy respôdilt il) ie sçay bié qu'Oriane auoit vn regret extreme d'auoir si mal traitté ce prince fidelle, & i'ignore si madame a receu quelque desplaisir de m'auoir esloigné de ses bonnes graces sans luy en auoir donné du subiet, voila pourquoy n'ayant pas moins d'amour queluy i'estime mon sort encor plus fascheux que le sien. Vous plaidez si puissamment pour la gloire de vostre amour (dist le gouuerneur) qu'il faut que i'aduouë que les princes de Grece vous en doiuent vn peu de resle. Mais ie voudrois sçauoir pour authoriser ceste violente

passion que vous tesmoignez si le sujet que vous adorez est digne d'une amour si grande, ie veux dire si vostre dame est aussi belle qu'estoit Oriane, Syluie. Leonide, Diane, ou Richarde princesse des Parthes? Monsieur (luy respondit-il) fronçant le sourcil pour le regarder de trauers) ceste question est impertinente (pardonnez moy si ie parle ainsi) peulez vous que ie me voulusse laisser consommee à plaisir pour vn subiet indigne de mes affections, que madame voulust ceder le prix de la beauté à pas vne de celles que vous nommez & que si tous les princes de Grece estoient assembles pour luy disputer ceste gloire ie ne les combatisse point sur ceste querelle? Par dieu ie ne craindrois pas de les attaquer tous ensemble pour soustenir le merite de sa beauté, elle possedde mon cœur & mon ame & si me vou-

lez obliger vous ne reuocquerez point en doute qu'elle ne soit la plus parfaite qui soit sur la terre. Que si vous auez del'affection pour quelqu'une, & que vous vouliez maintenir avec les armes le contraire de ce que ie dis vous n'aurez qu'à mettre la cuirasse sur les espaules, nous verrons par la victoire de l'un ou de l'autre ce qui sera de la verité. Non non seigneur cheualier (dit le gouuerneur en riant de le voir en telle colere) ie ne dispute rien à vostre maistresse, ie croy qu'elle a plus de charmes qu'un magicien n'en scauroit faire en toute sa vie, & nous n'entrerons iamais en camp clos sur ceste querelle. Vous ayant satisfait au moins ce me semble vous addoucirez s'il vous plaist ce ton de voix qui m'a fait trembler, & nous continuerons nos discours par vne demande que ie vous feray dans laquelle vous treuve-

rez vne curiosité qui n'est pas commune. Vous cognoissez tous les princes de Grece comme si vous les auiez eueus, nommez moy ie vous prie celuy pour lequel vous auez vne inclination plus forte, car il n'est pas possible que vous les aymiez tous en mesme degre? Par ma foy (luy respondit-il) vous m'estonnez plus que ie ne l'ay iamais esté par les dangers de quelque aduventure que i'aye iamais espreuee, ie les ay tous treuuez si parfaits & si accomplis qu'il me sera bien difficile de vous dire que ie fais vne estime plus particuliere des vns que des autres. Amadis de Gaule auoit de grands charmes pour se faire aymer, il estoit courtois & vaillant, d'une conuersation merueilleusement agreable, & ie m'assure qu'il treuuera plus de partisans que les autres, car il auoit en luy toutes les vertus que l'on a attribuees

à ses successeurs & l'on ne l'a iamais accusé d'aucun vice dont on a blasmé quelques vns de sa race, neantmoins par ce que les hommes ont de différentes humeurs & de diuers gous, les serieux donneront leur voix à Esplaudian, les autres qui seront d'une humeur plus douce parleront pour Lisuard de Grece ou pour Spheramond, ceux qui seront coleres & volages prefereront infailliblement dō Roger de Grece, ainsi chacun voulant donner de l'autorité à son inclination naturelle il parlera pour celuy avec lequel il aura plus de simparchie; Quant à moy ie vous confesseray franchement que les actions d'Amadis de Grece m'ont tousiours donné plus d'amour que celles des autres, il me semble que ie l'ay treuvé vn peu plus vaillant, ses coups ont esté plus grâds & plus redoutables, il a esté fort

courtois fort genereux merueilleuse-
mēt propre à donner de l'amour aux
dames, & s'il n'eust esté vn peu infidel-
le enuers la princesse de France il n'y a
point de doute que tout le monde
l'eust preferé à qui que ce fust, mais ce
deffaut luy rabat vn peu de sa gloire.
Au contraire (dit le gouuerneur qui le
vouloit engager à continuer ce dis-
cours) ceste action fait dire par tout
que son iugement estoit excellent par
ce qu'il preferoit les diuines perfectiōs
de Nicquee aux simples beautés de
Lucelle, & si vous en demandiez l'ad-
uis des dames de ce temps elles vous
diroient infailliblement que ceste hu-
meur estoit plus louable que celle d'A-
madis de Gaule ou d'Agefilan qui
passerēt des annees entieres à pleurer
comme des enfans. Monsieur (repar-
tist l'hypocondriaque) vous m'alle-
guez les excuses ordinaires des incon-

Etans lesquels ne sçachans cognoistre la gloire qu'il y a de sçauoir aymer sainctement couurent leur malice de quelques apparentes raisons, mais ie ne m'en estonne pas, nous sommes en vn siecle où le vice passe pour vertu; la trahison pour galanterie, & l'innocence pour vne sotize: Pour moy comme i'ay tousiours admiré toutes les actions de ce grand empereur duquel nous parlons quand elles ont esté vertueuses, il faut que ie blasme en luy celle cy parce qu'elle me semble tenir quelque chose de la trahison. I'ay satisfait à vostre desir en peu de parolles, mon estomac est assez rempli ce me semble. Monsieur donnez moy congé s'il vous plaist, mes passions amoureuses me pressent en telle façon, qu'il faut que ie me mette aux champs pour voir si la fortune aura changé d'humeur pour moy. Ho ho

cheualier (dit le gouuerneur) vous ne teniez pas tantost ce langage, vous n'esperiez plus aucune faueur de vostre maistresse, maintenant vous voulez partir pour aller sçauoir si elle vo^a ayme? Le vous ay dist (luy repartist-il) que i'ignorois si madame auoit du regret de m'auoir esloigné de ses bonnes graces, mais les discours que ie vous viens de tenir à ceste heure vous resmoignent bien que ie ne me suis pas voulu tout à fait exclurre de l'esperance de voir quelque changement à mon mal, parce que sans cela ie ne viurois plus; vous croyez donc (dit le gouuerneur) que vostre maistresse est capable de changer de cœur & de vo^a aymen. Si ie ne l'esperois ainsi (luy respondit-il) ie ne ferois aucune difficulté de me faire mourir moy-mesme. Croyez donc aussi tout d'un mesme temps (adiousta le gouuerneur) que si

elle chāge aujourdhuy pour l'amour de vous elle changera bien demain en faueur d'un autre, & qu'ainsi vous ne possederez iamais vn bien assuré. Tout beau monsieur (respondist il l'interrompant à ceste parolle) vostre conséquence n'est pas des meilleures, il se peut faire que celuy qu'elle ayme aujourdhuy luy donera subiet de luy vouloir mal, qu'estant fort sésible à l'offense, elle le chassera pour me rappeler aupres d'elle, & qu'elle n'en aymera iamais vn autre que moy parce que ie ne l'offenceray point, & que ie chercheray les occasions de luy plaire. Or sus sus (dit le gouuerneur) laissons toutes choses au hazard, vous aurez du contentemēt ou du mal, vostre maistresse changera ou elle demeurera ferme en l'affection qu'elle a pour vn autre, ce n'est pas à quoy ie m'arreste : les bons cheualiers, sont

courtois, ils ne refusent pas volontiers quelque chose qu'on leur demande, ne me voulez vous pas accorder vn don? Deux si vous le voulez, luy respondist il, soyez donc mon hoste pour deux ou trois iours (dit le gouuerneur) pendant ce temps ie m'essayeray de vous faire meilleure chere que vous n'avez fait ce matin. Sans mentir (luy respondit-il) vous m'eussiez fait vn plaisir extreme de ne me point arrester icy, toutefois vous ayant promis ce que vous voudriez il n'y a pas d'apparence que i'aille au contraire. A ces mots le gouuerneur qui ne l'auoit retenu que pour luy faire passer le temps l'ayant embrassé comme s'il luy eust voulu tesmoigner qu'il s'obligeoit fort par ceste promesse, il le mena dans vne chambre, le pria de quitter ses armes, & luy ayant fait apporter vne paire de riches habits il le laissa

dans la liberté de ses actions pour aller donner ordre à quelque trait de gallanterie qu'il vouloit faire, pour tirer du plaisir de cét innocent. Nous verrons reüssir vne partie de les desseins à l'autre chapitre, cepédant nous songerons à dire le reste.

Nostre hypocondriaque s'estant allé promener au iardin d'Enay s'y laisse enfermer pendant vne nuit, ce qui luy arriua là dedans : Le gouverneur luy ayant en fin fait apporter à manger le retire de là pour le mener à l'esprenue d'une aduanture fort plaisante : Supplice feintement ordonné à l'escuyer du cheualier à la roze verte : Le subiet pourquoy avec les choses estranges que fist l'hypocōdriaque en ceste rencontre.

CHAPITRE XXVII.



Ostre extrauagant s'estant raffraichi par l'espace de deux bonnes heures pendât lesquelles le gouuerneur auoit mis huit ou dix personnes en campagne avec tout ce qui estoit necessaire pour faire reussir les desseins qu'il auoit conceus, il se resolust de l'aller treuuer & le mener à la promenade dans vn beau iardin qui n'a point d'autres fossés que le Rofne qui l'embrasse à gauche & la Saone à droit. Le lieu qui est des plus delicieux que l'on puisse voir luy donnant des rauissemens plustost que des plaisirs communs, il attachoit ses regards par tout avec tât d'admiration qu'ayât alors perdu la memoire de Syluiane il ne se souuenoit plus de ses maux, & ne songeoit point à sortir de

là quoy que la nuit fust desia proche si le gouuerneur luy tirant le bras ne l'eust fait souuenir qu'il estoit temps d'aller soupper. Par ma foy monsieur (luy dit-il) ce lieu me plaist en telle façon que sans me soucier de viandes ie souhaitteroie avec passion de n'en sortir iamais pourueu que Syluiane y fust avec moy. Il est vray (dit le gouuerneur en riant) qu'il est capable de diuertir vn peu les inquietudes d'vn homme affligé & de maintenir vn esprit gaillard en sa ioye, mais si vous y auiez demeuré deux iours sans manger vous le treuveriez si desaggreable & si ennuyeux que vous eschelleriez les murailles pour en sortir si l'on ne vouloit pas vous ouurir la porte. Voila que c'est (dit l'extrauagant) il faut que les hommes ayent des sentimens diuers en toutes les choses qui se presentent, vous ne pourriez pas faire ce

que ie dis, & pour ceste consideration vous croyez qu'un autre ne le scauroit faire. Laissez moy seulement icy cinq ou six sepmaines pour entretenir mes pensees de la memoire de madame, vous verrez que ie ne rompray point les murailles pour en sortir ; Ah vraiment (dit le gouuerneur) i'aurois tort d'apporter de la contrainte à vos actiōs, si vous le desirez de la sorte i'en suis contēt. Ce disant il fist sortir tous ceux qui se promenoient alors dans les allees, deffendist au iardinier d'ouurir la porte à qui que ce fust, & passāt la Saone pour aller soupper lascia don Clarazel en ce beau iardin. Ce pauvre fou qui n'estoit pas satisfait d'auoir veu trois ou quatre fois tout ce qu'il y auoit de rare les vist esloigner avec plaisir, il retourna tout incontinent sur ses pas, il alloit d'allee enallee, il s'arrestoit vn peu dās les cabinets pour

se reposer, il en sortoit pour suiure les riuës de quelque caual, il voyoit nager le poisson avec vn contentement incroyable, bref se laissant raurir aux moindres choses qui se presentoient à ses yeux il ne s'arresta point que la nuit ne luy eust caché tout ce qu'il venoit d'admirer. Ne sçachât donc plus où mettre les pieds il se souhaitta dans la chambre du gouuerneur, parce que la faim commençoit à le traualler, mais iugeant bien que son desir ne luy seruiroit pas alors de beaucoup, & d'ailleurs ayant honte de vouloir vne chose qu'il auoit mesprisee peu auparavant, il creut qu'il luy feroit bien plus honorable de demeurer ferme en son opinion que de chercher les moyens de satisfaire à son appetit. Ceste pensee l'emportant dans vn cabinet il s'estendist sur terre, & ne pouuant oublier Syluiane s'entretint de

son souuenir iusques à minuit, auquel temps la nature demandant vn peu de soulagement ses yeux se fermerent, & son esprit eust quelque relasche des inquietudes qui le rauailloient ordinairement. Trois heures s'estans escoulees ainsi doucement les oyseaux qui descouuroient l'aurore commencerent à ouurir le bec, & s'assemblans assez près du lieu où nostre mallade d'esprit prenoit son repos concerterent leurs petites chansons avec tant de bruit que ce malheureux s'esueilla. Sa fantaisie estant preuenue de mille folles opinions il creut que ceste douce musique estoit faitte par le ministere de quelques sages magiciens qui vouloient addoucir ses maux par ceste harmonie: En effet se leuant avec ceste pensee, & ne ressentant pas les incommodités de la faim cōme il auoit fait le soir precedēt parce que le corps estoit
encor

encor trop assoupi pour auoir ses organes bien disposés il creut que sa pen-
tée estoit veritable, & recommença la
visité de ce iardin qu'il parcourust
plus de tréte fois auant que midy fust
sonné. Ce fust alors que l'exercice luy
ayant resueillé l'appetit il commença
d'enrager de faim & se repentir de ce
qu'il auoit dist le soir precedent, il al-
loit à la porte de moment à autre, il
regardoit par l'ouuerture de la serrure
si quelqu'un venoit pour le secourir,
& ne voyant personne il s'appro-
choit de la muraille pour monter des-
sus, mais quand il se ressouuenoit d'a-
uoir dist qu'il n'en viendrait iamais à
ce point il se reculoit pour ne cōtreue-
nir point à sa parole & retournoit à
la serrure pour regarder comme aupara-
uant. Le gouuerneur qui vouloit ti-
rer du plaisir de ceste sotize arriuant
sur ces entrefaites fist heurter quel-

qu'un à la porte ce qui faisant esperer
vne bonne fortune à nostre extraua-
gāt il courust à la porte à demy rauy,
& demanda tout incontinent qui va
la. Je voudrois bien pouuoir entrer
pour voir ce iardin (respondist celuy
qui heurtoit) iardinier ouurez ie vous
prie ie satisferay à la peyne que vous
prendrez de me monstrier les singula-
rités de ce lieu que l'on dist estre fort
aggreable. Helas (respondist l'hypo-
condriaque merueilleusement affligé
de ceste parolle) monsieur ien'ay pas
le pouuoir de faire ce que vous vou-
lez, & ie vous puis bien asseurer que
i'ay plus d'enuie de sortir que vous
n'en auez d'y entrer, car il y a bié pres
de vingt quatre heures que ie suis icy
enfermé. Qui estes vous donc repli-
qua cet homme? Je suis, luy respōdist-
il, vn pauvre cheualier errāt qui vous
prie de me ietter vn morceau de pain

par dessus la muraille de peur que ie n'enrage de faim : A ces mots le gouverneur s'esclatant de rire, sur ma foy (dit-il) ie me doutois bien qu'il songeroit plustost maintenant à la viande qu'à la maistresse iettez luy vn pain ie vous prie. Alors l'autre reprenant la parolle. Certes cheualier (luy dit-il) ie suis fort marry de l'incommodité que vous ressentez, & ie serois bien le plus ingrat homme de tous ceux qui sont sur la terre si vous pouuant assister ie ne le faisois pas: Tenez voila ce que les dieux m'ont inspiré d'apporter icy. Ce disant il luy ietta vn pain qu'il auoit pris dans vne corbeille où le gouverneur auoit fait mettre des viandes pour faire manger cet extravagant, & l'asseura qu'il alloit chercher quelqu'un pour le faire sortir de là. Ce malheureux voyant voller ce pain par dessus la muraille le receut

avec autant de ioye que les enfans d'Israël receurent iadis la manne du ciel, & mist les dens dedans au mesme moment, surquoy le gouuerneur le voulant surprendre, il commanda qu'on ouurist la porte. Don Clarazel entendant le bruit tourna la teste, & voyant entrer le gouuerneur se treuua tellement surpris parce qu'il auoit la bouche pleine qu'il ne sçauoit à quoy se resoudre: Enfin auallant vn morceau qu'il auoit dans la bouche sans le macher il ietta le reste parmy des herbes, & s'auança tout au mesme temps vers le gouuerneur auquel il dist d'un premier abord qu'il pleignoit son malheur qui l'auoit priué d'un celeste contentement qu'il auoit receu là dedans. Le gouuerneur se soufriant à ceste parole luy demanda s'il auoit là rencontré quelque memorable aduenture. Ouy (luy respōdist-il avec vne action

qui tesmoignoit quelque estonnement) quelques sages magiciens qui m'ayment beaucoup ont assemblé ce matin tous les plus excellens oyseaux de la terre pour me resueiller avec vne rauissante musicque laquelle a fait en moy des effets diuers, car elle m'a refait en moins d'un momét des traux que i'ay soufferts depuis quatre iours, & m'a fait passer l'incommodité de la faim qui me trauailloit. Vrayment voila des choses estranges (dit le gouuerneur) & ie ne m'estonnerois point maintenant quand vous ne mangeriez point de deux ans: l'auois fait apporter icy quelques viandes avec opinion que ie vous ferois vn plaisir extreme de vous en donner, mais puis qu'elles vous sont inutiles ie m'en vay commander qu'on les rapporte. Non non monsieur (luy dit il avec quelque regret d'entendre ces mots)

elles viennent veritablement plus à propos que vous ne croyez, ceste musique m'a rassasié pendant le temps qu'elle a duré, mais ie vous aduoüeray franchement que i'ay eu faim tout aussi tost qu'elle a cessé, de sorte que ie mangerois bien maintenant. Je me doutois bien (dist le gouuerneur) que ma preuoyance ne vous seroit pas inutile, & que vous ne vous referiez l'estomac qu'auec du vét si vous vous attendiez à ces magiciens fantastiques, voila pourquoy vous me deuez croire plus sage qu'eux. A ces mots ayant fait estendre vne seruiette sur l'herbe il fist mettre dessus deux perdrix, vn faisan & deux lapereaux, ce qui ayant esté deuoré par nostre hypochondriaque en moins d'un cart d'heure, le gouuerneur qui vouloit faire iouer ses ressorts luy dist qu'il auoit resolu de le mener à la promenade à

deux lieues de là. l'en suis content (luy
respondist-il) mais monsieur faites
moy donc apporter mes armes: He
qu'en voulez vous faire dist le gou-
verneur? Que i'en veux faire, reprist
Clarazelle m'en veux servir aux occa-
sions. Et s'il se presentoit quelque
gean, qui nous deffendrait de la vio-
lence qu'il nous voudroit faire, & si
nous rencontrions quelque aduentu-
re n'aurions nous pas vn regret extre-
me de n'estre pas en estat d'en faire
l'espreuve? Monsieur, iamais les bons-
cheualiers ne vôt en campagne qu'ils
ne soient armés. Vous avez raison
(dist le gouverneur) vous les aurez
tout incontinent. A ces mots vn valet
de pied ayant commandement de les
aller querir en diligence ils firent deux
ou trois tours de promenade s'entre-
tenans tousiours de mille contes ex-
trauagans. Le chemin n'estant gueres

long depuis la maison du gouuerneur iusques à Enay (on appelle ainsi ce iardin) les armes de don Clarazel parurent au bout d'un cart d'heure, il en fust couuert tout au mesme temps, & parce que le gouuerneur estoit en carrosse il se mist tout aupres de luy. Le cocher sçachant bien le chemin qu'il deuoit tenir ils furent à vne lieuë de la ville auant que nostre hypocondriaque eust fait le conte de toute sa vie au gouuerneur lequel ayant vne extreme enuie de cognoistre cette belle magicienne quil'auoit retenu si long temps aupres d'elle par vn autre nom que par celuy de Fortuniane, s'en informoit curieusement, quand vn homme à cheual s'approchant du carrosse, dist à don Clarazel quil descouuroit vne multitude de peuple au tour d'un grand feu, & quil y auoit beaucoup d'apparence quil faudroit iouer des

couteaux. Ces parolles luy ayans donné vn contentement que l'on ne sçau-
roit exprimer il se ietta tout d'vn mes-
me temps sur la terre, mist le casque en
teste & l'espee au poing, & le faisant
monstrer l'aduéture dont on luy par-
loit y dressa ses pas avec vne contenance si asseuree, qu'il fist iuger au gou-
uerneur qu'il alloit sans peur aux oc-
casions ; En effet son courage estoit
des plus asseurés qui fussent au mon-
de comme vous le verrez par la suite
de ce discours. Si tost qu'il eust des-
couuert huit ou dix Soldats qui fai-
soient semblant de conduire vne fille
au feu, il commença de courir à eux
quoy qu'il fust à pied, & s'auança en
telle façon qu'il n'en estoit pas esloi-
gné de cinquante pas quand il ren-
cōtra vn petit ruisseau lequel estāt lar-
ge de cinq ou six toises l'arresta tout
court. Cet obstacle le pensa faire de-

desesperer, car entendant que ceste fille
crioit au secours il enrageoit d'auoir
treuvé des empeschemens sans les-
quels il eust desia esté aux mains avec
ces Soldats. Ne scachant donc que fai-
re il leur cria qu'ils se donnassent bien
garde de rendre aucun desplaisir à ce-
ste fille s'ils ne vouloient mouir par
ses mains, mais se mocquans de ces
menaces ils passerent outre, & s'ap-
procherent tousiours du buscher,
surquoy ceste fille redoublant ses cris,
il entra en telle furie qu'il se ietta dans
le ruisseau auquel il entra d'abord ius-
ques aux espaules. Ces soldats qui
auoient eu leur leçon par le gouuer-
neur le voyât alors au milieu de l'eau,
quitterent la fille, ils se saisirent de
grandes perches que l'on auoit mises
expres sur la riue, & commencerent à
frapper dessus si rudement, qu'il fust
bien souuent sur le point d'aller à l'en-

uers: toutefois sa fureur augmentant par la difficulté qu'il rencontroit il se poussa de telle roideur qu'il gaigna la riue en despit de tous. Ces gallans le voyans alors s'auancer fort gaillardement, quoy qu'il iettast l'eau de mille costez, ils quitterent leurs perches, chacun saisit vne carabine où il n'y auoit point de plomb, & pensans l'estonner luy tirerent tous en mesme temps: Neâtmoins voyans qu'il marchoit tousiours la teste baissée, & qu'il s'é venoit droit à eux l'espee à la main ils prirent la fuitte vers vn chasteau qui paroissoit fort proche de là, & où le gouuerneur leur auoit donné le rendez vous, pour l'entreprise dont nous vous parlerôs cy apres. Nostre hypocondriaque les voyât esloignez comme des perdreaux les laissa courir, & ne se souciât que du salut de ceste miserable qu'il croyoit qu'on allast brus-

ler s'approcha d'elle, la deslia & luy parla en ceste sorte. Mademoiselle ne craignez plus, vos ennemis ont pris la fuitte, & vous ne trouuerez icy persóne qui ne soit fort à vostre seruice. Ah bon cheualier (luy dit-elle) les Dieux vous rendent la recópense du secours que vous m'auiez donné auourd'huy; i'estois perdue sans vostre arriuee, mais ie ne crains plus rien maintenát, quel bon demon vous a donné le mouuement de venir icy? Mais vous, mademoiselle (luy respondit-il) quelle mauuaise fortune vous auoit mise entre les mains de ces brigands? Au nom de Dieu declarez moy vos aduentures, afin que si ie vous puis seruir mieux que ie n'ay fait ie m'y employeray de tout mó cœur. Vraymēt (dit elle) seigneur cheualier il est tres-iuste que ie vous cótente & sás ingratitude ie ne pourrois refuser à vostre de-

sur ce que vous voulez, couchés nous
sur l'herbe ie vous conteray en peu de
parolles le subiet de mes infortunes, &
principalemēt celuy pour lequel l'on
m'alloit exposer au feu. Alors s'estans
tous deux assis sur l'herbe ceste fille cō
mença de parler ainsi selon l'instru-
ction qu'elle en auoit eue du gouuer-
neur. Seigneur cheualier sçachez que
ie ne suis pas fille cōme vous croyez,
mais vn ieune homme qui sert d'es-
cuyer au vaillant cheualier à la roze
verte. Ha mon petit amy (dit l'extraua-
gant l'interrompant à ceste parolle)
permettez que ie vous embrasse pour
l'amour de vostre maistre que i'estime
infiniment, dittes moy ie vous prie où
il est? Vous le sçaurez (reprist cet hom-
me qui se faisoit appeller Ormin) par
la suite du discours que ie vous vay
faire. Vous sçauiez que les bons che-
ualiers ne manquent iamais aux occa-

sions de la gloire, & qu'ils sont plus zelés au seruice de leurs amis qu'à leur salut M^o maistre qui est le g^etil Roza-bel nepueu du gr^ad cheualier du Soleil, ayant appris ces iours passés qu'une vieille magicienne n^omée Alfrane auoit surpris par vne insigne trahison le Roy Amadis, l'Empereur Amadis de Grece, don Rogel, Spheramond, don Sylues de la Selue, le cheualier du Soleil & don Belianis de Grece il se resolust de mourir ou les deliurer, & parce que l'entreprise estoit merueilleusement difficile il se mist à resuer aux moyens qu'il auoit d'en venir à bout, il se resolust vne fois d'y mener des troupes pour tirer plus facilement la raison de l'affront que ses amis auoiét receu, mais suivât l'humeur de tous les cheualiers errans qui ne veulent point de compagnons dans la gloire de leurs actions, il proposa

tout incontinant le contraire, il creut que ce chemin estoit plus seur & plus honorable que l'autre, & pour vous le dire succinctement il conclud d'estre seul en ceste entreprise. Sortant donc vn soir du logis apres m'auoir commandé de mettre vn habit de fille en ma malle il prist le droit chemin de ceste maison sans chercher aucune assistance qu'en celle de son courage & de son espee. Nous marchasmes deux iours entiers sans treuuer aucune aduventure, & sans qu'il songeast quasi de parler à moy, de sorte que m'en-nuyant quasi de ce long silence ie le voulus retirer vn soir de ses resueries, & n'en treuuant point de meilleur moyen qu'en le faisant souuenir de son entreprise ie luy demāday à quoy deuoient seruir ces habits de fille qu'il m'auoit commandé de mettre en ma malle. Ormin ne t'en estonne

point (me respondit il) i'ay de grãds desseins, & cét habit duquel tu me parles m'en peut donner vne bonne issue: Alors il me conta ce qu'il auoit appris de la captiuité de ces princes, & continuant son discours il me dist ainsi. La malice d'Alfranc est si grande que nous n'eschapperons pas de ses mains si nous n'vsons de quelque artifice: Tu n'as point de poil au menton, ton visage est beau, tu peux bien passer pour fille quand tu voudras, prens ceste robe, desguise ton sexe, & t'en allant à la maison de ceste forcierre côme si tu voulois aller chercher quelque cheualier par le monde remarque bien comme elle attrappe ceux que la fortune conduit chez elle, & ne manque point deux iours apres ton arriuee d'en sortir pour me venir rencontrer sur le grand chemin, afin qu'estant bié aduerti de tout ce qu'elle fait

le fait ie ne tombe point en ses pieges,
ainsi ie deliureray mes amis, & m'ac-
querray la plus grâde gloire que che-
ualier ait iamais acquise. Que me ser-
uiroit-il de tirer ce fait en longueur?
Je partis tout à la mesme heure avec
cet habit, ie m'en allay rendre chez ce-
ste fême qui me receut plus courtoi-
semēt que ie n'esperois, ie remarquay
par l'arriuee, ou plustost par la disgra-
ce d'un cheualier de fort bonne mi-
ne que ie croy estre Fortiman de Gre-
ce qu'elle faisoit tomber des filets de
fer sur les cheualiers qui entroient dās
son logis, & qu'elle les prenoit aussi
fort facilement, de sorte que voulant
aduerir mon maistre de tout ie ne
manquay point de l'aller treuver &
luy dire ce que i'auois veu. Cet aduer-
tissement luy deuoit seruir si ceste
meschante n'eust eu que ceste inuen-
tion pour attrapper les bons cheua-

liers, mais hélas mon maistre ayant sagement esuité le danger que i'auois preueu ne se peut guarentir d'un second, faisant le tour du chateau pour entrer par vne autre porte il tomba dans vn precipice où parmy l'estonnement de sa cheute il fust facile à quatorze ou quinze volleurs de luy mettre des chaisnes à l'entour du corps & de l'arrester. La vieille Alfrane venant à resuer à ceste aduanture, & ne pouuāt comprendre pourquoy ce cheualier n'estoit pas entré par la grande porte qui estoit ouuerte, se douta tout incontinant qu'il auoit esté aduertit de tout ce secret par mon seul moyen, si bien que ne me voulant pas donner le loisir d'aduertir quelqu'autre aduantureux de ses tromperies elle resolut de m'attrapper & de prendre vne horrible vengeance de moy. La peine de me rencontrer ne fust pas trop gran-

de, car estât accouru pour aller secourir mon maistre ie fus enuironné de quatre pendars comme ie commençois à plaindre ma perte, on me mena vers ceste enragee laquelle ne voulât point de preuues plus grandes de ma trahison que les larmes qui roulloient le long de mes ioües me condamna d'estre brulé, & pour me faire souffrir encor d'auantage me iura qu'elle feroit pendre tous ses prisonniers dans vingt quatre heures. En effect (helas puis- ie prononcer ces tristes parolles sans creuer de rage & de dueil) cheualier il n'y a remede, il faut que ie parle, elle a fait attacher aux carreaux de sa maison Amadis de Gaule, Amadis de Grece, don Sylues, don Rogel, Spheramond, Belianis de Grece, le cheualier du Soleil, mon pauvre maistre & cinq ou six autres, & sans auoir esgard à leur qualité les a fait exposer au iour

comme des larrons. O dieux quel dommage (dit alors nostre extrauagant) ah vieille mastine as tu bié esté si cruelle? Par dieu si ie deuois mourir mille & mille fois par les plus cruels supplices du monde ie t'iray chercher iusques aux enfers pour te traitter comme tu merites. Alors entrant en vne fureur qui ne luy permist pas de songer au gouuerneur qui luy auoit fait dresser ceste farce, il dressa ses pas vers ceste maison resolu de la mettre en cédres, & d'inuenter des supplices horribles pour punir Alfranc : nous verrons à l'autre chapitre ce qui arriua de ceste aduventure.

Arriuee de l'hypocondriaque au chasteau de la cruauté: Ses regrets estranges à l'obiet de quelques fantosmes qu'il cro-
yoit estre les Princes de Grece: Excel-
lent artifice pour luy faire croire que
Vrgande la descogneüe & le grand
Alcandre arriuoiẽt miraculeusement
au chasteau d'Alfrane: Ses discours
auec ces sages magiciens: Gentille in-
uention d'Alcandre pour luy persua-
der l'excellẽce de sa magie: Fin de l'ad-
uenture: Aduis d'importance donnẽ
au gouuerneur: Son despart de ce cha-
steau auec l'hypocondriaque, quel en
fut le subiet.

CHAPITRE XXVIII.



A colere qui dominoit no-
stre extrauagant l'ayant fait
marcher auec vne diligence

incroyable il fut en moins d'un carz
d'heure à la porte de ce chasteau du-
quel Ormin luy auoit parlé, mais s'il
auoit eu quelque subiet de se cour-
roucer lors qu'on luy parla de la cru-
auté d'Alfrane il deuint tout à fait fu-
rieux à l'obiet de huit ou dix fantos-
mes armez qui pendoient en l'air, car
croyant fermement que c'estoient ces
Princes excellens dont il adoroit la
vertu, il fust poussé d'une telle rage
qu'il fust trois ou quatre fois sur le
point de passer son espee au trauers de
son estomach pour ne suruiure pas à
leur perte, neantmoins ne iugeant pas
qu'il fust à propos de mourir qu'il
n'eust tiré la raison d'un si grand ou-
trage, il resolut de viure iusques à ce
qu'il eust satisfait à sa passion. Treu-
uant donc vn marteau qui pendoit à
la porte de ce chasteau, il commença
de frapper dessus avec vne violence si

grande, qu'il sembloit deuoir mettre en pieces toute la maison : Personne ne luy respondant il mella sa voix à ses actions, il cria plus de tréte fois qu'on luy vint ouurir, il dist mille sortes d'injures à la vieille Alfrane, & tempesta si horriblement par l'espace de demie heure, qu'on eust dit à voir ses postures estranges qu'il estoit possédé par quelque demon. Ces inquietudes si grandes ayans encore esté sans fruit, il leua les yeux vers le ciel pour luy demander du secours, ou peut estre le depiter (car tous ses mouuemens estans furieux il n'estoit pas alors capable d'vne pensee humble & deuote) mais oubliant ce qu'il vouloit faire au second obiect de ces fantosmes qu'il vist au dessus de sa teste, il commença de verser vn ruisseau de larmes parmy lesquelles ne se pouuant taire il disoit. O dieux auez vous permis ce malheur

qui doit affliger tout le monde, & n'aurez vous point de foudres aujourdhuy pour punir vne cruauté qui n'a point d'exemple? Que vous sert-il d'auoir rendu la vie à ces cheualiers invincibles, puis qu'une vieille magicienne s'oppose maintenant à vos saints decrets avec insolence? Son pouvoir sera il plus grand que le vostre, souffrirez vous qu'elle partage vostre autorité, ou plustost qu'elle dispose de la vie des hommes avec plus de puissance que vous? Ah certes il y va de vostre interest, & si vous ne punissez ceste audace les hommes auront raison de recourir à ces soruileges au lieu de faire fumer vos autels? Escrasez ceste vieille garce des diables, & laissez vn exemple de vostre iustice, afin que les meschans y prennent exemple; Quant à moy ie vous seruiray de ministre si vous le voulez pour exter-

miner ces furies. Alors cessant de parler aux dieux il regardoit ces cheualiers fantastiques l'un apres l'autre, & continuant ses regrets il disoit. O princes excellens est il bien possible qu'un licol honteux ait finy vos iours si cruellement? Vous avez serui d'estonnement à toute la terre, vos actions ont tousiours esté des miracles, vostre nom a fait trébler les plus forts geans qui fussent au monde, cependant vne femme vous a fait mourir? O regret, ô douleur, ô rage! Bons dieux que ne tiens ie ceste sorciere! O Alcandre que direz vous quand vous aurez appris ce malheur? Helas sage Virgande la descogneue que vous avez bié maintenant manqué au besoing à ces cheualiers que vous auiez si soigneusement protegés par l'espace de cinq censans? Vous vous desespererez infailliblement quand vos demós vous

aduertiront de ceste tragedie, & ie ne pêle pas que vous ne vous precipitez d'un rocher en bas quâd vous treuuez vos arts inutiles à reparer ce grâd dômage. Mais ô dieux, si ceste perte est irraisonnable pourquoy m'amuse ie à la plaindre au lieu d'en chercher la raison? Vieille sorciere qui as fait mourir tant de gens de bié ouure moy la porte hardimét, car aussi bien tous les demons ne te guarentiront iamais de l'orage que ie veux faire tomber sur toy, ie porte vn remede contre tes charmes, & tost ou tard tu souffriras le mesme supplice que tu as fait souffrir à ces cheualiers. Ce disât il voulust enfoncer la porte à grands coups de pied, mais voyant qu'il n'aduançoit rien il frappa dessus avec le pommeau de son espee, surquoy voyant parestre le gouuerneur il luy alla au deuant, & luy dist les larmes aux yeux.

Ah monsieur couvrez vous le visage de vostre mouchoir afin de ne voir pas la perte incroyable que le monde a faite aujourdhuy. De quelle perte me parlez vous (dist le gouverneur) faisant semblant d'ignorer ce qu'il vouloit dire? De celle de tous ces chevaliers pendus aux carreaux de ceste maison (luy repliqua-il) car sçachez que ce sont les plus grands princes qui marcherent jamais sur la terre? Ce premier est Amadis de Gaule, ah le cœur me faut à ceste parolle, toutefois il faut acheuer, celui qui suit est le chevalier du Soleil, voila Belianis de Grece, l'autre est don Rogel, ce cinquiesme est l'excellent empereur Amadis de Grece le plus intime de mes amis, les autres sont Florizel de Nicquee, Spheramond, Fortiman de Grece & Rozabel surnommé depuis peu de temps le chevalier à la roze verte. Il est

vray (dist le gouuerneur assez froidement) que la porte dont vous parlez se peult dire extreme si ces cheualiers ne sont secourus, mais les choses ne sont pas encor dans le delespoir, & vous verrez qu'Vrgande la descogneuë ne dormira pas puis qu'il est question d'un si grand trefor. Helas (respondist-il en branlant la teste) que ceste esperance est bien foible. Monsieur ne nous attendons pas à cela ces princes sont morts. Je ne le croy pas (dist le gouuerneur) & si vous vous donnez de la patience vous aurez subiet de vous resiouir infailiblement; Qu'ainsi ne soit n'entendez vous pas vn grand bruit en ceste maison? Sur ma foy ie iurerois bié que nous verrons tantost des choses estranges; A ces mots la porte s'ouurant assez rudement ils virent vn grand chariot lequel leur sembla d'abord tout de feu par ce qu'il y

auoit huit ou dix flambeaux à l'entour
d'un dome qui estoit esleué de cinq
ou six pieds. Les cheuaux qui le traïs-
noient estoient admirables, il estoient
couuerts de carton, ils auoient des ais-
les longues de six pieds, leurs testes res-
sembloient à celles d'un griffon, leurs
croupes estoient accommodees en
queuës de Lyon, bref ils paroissoient
estre des grifaleons tels que Galeris
en a depint vn entre les iambes d'Age-
filan. Deux vieillards assis sous ce do-
me dont nous auons parlé cy dessus
paroissoient avec vne majesté peu
commune, leurs habits estoient diffe-
rens, leur sexe le sembloit estre aussi,
l'un portoit vne fausse barbe iusques
à la ceinture, le visage de l'autre estoit
couuert d'un masque de femme à qui
l'aage auoit mis des rides au front; Le
vieillard n'auoit pour tout habit
qu'une sotane de sarge noire dont les

manches estoient retroussées iusques au coude, & celuy qui faisoit la femme auoit vne vieille iuppe de satin bleu laquelle s'attachât au milieu du corps ne descendoit gueres plus bas que les genoux; Leurs mains droittes estoient garnies de baguettes noires, les gauches de liures, leurs cheueux qui leur couuroient plus de la moitié des espaulles estoient couronnés de lierre, & ce qui estoit encor plus considerable estoit de voir sous leurs pieds vn fantosme de paille couuert des habits d'vne femme & d'vn fort beau masque de vieille, lequel se remuoit de moment à autre par le moyé de quelques ressorts. Ceste chose extraordinaire donnant de l'estonnement à dō Clarazel il creut que ces vieillards estoient Alcandre & Vrgande la descogneuë, qu'Alfranc estoit ceste vieille qu'ils fouilloient aux pieds, & sur ceste

pése il coméça d'esperer quelque chose de bon du salut de ces cheualiers, la perte desquels auoit esté capable de luy faire suer des gouttes de sang: S'agenouillant donc deuant eux il baissa son chef iusques sur la terre, & le relevant tout incontinent il leur dist. Souuerains princes des arts magicques, l'equipage auquel ie vous voy me fait croire que vous ne serez pas venus inutilement en ceste maison; Voyez vn peu ie vous supplie vn spectacle du tout horrible, & si vous auez esté quelquesfois capables de reuocquer les ames des champs Elysees treuuez aujourd'huy du remede à ce grand malheur. Ce disant il leur monstra les armes qu'il voyoit penduës aux carreaux, & tesmoignant vn regret extreme. Helas (dit-il) n'est ce pas là vn tres beau subiet pour faire voir l'excellence de vostre sçauoir, au nom de

dieu n'espargnez rien qui puisse servir à ces miserables, & confidez qu'ils n'ont iamais eu tant affaire de vostre secours qu'ils ont maintenant. Cheualiers aux tristes pensees (repondist alors le vieillard) reuenez à vous & iugez si le pouuoir des magiciens n'est pas admirable; ils peuuent faire passer des illusions pour choses reelles, des ombres simples pour des corps, & des fantosmes pour des veritez; vous auez creu que c'estoient là les corps d'Amadis de Gaule, du cheualier du Soleil, & des autres princes de Grece d'ot vous auez pleuré le trespas, Alfranc mesme qui les a voulu faire mourir l'a creu comme vous, mais sçachez que ce ne sont que des fantosmes que i'ay supposez en leur place, qu'il ne m'a pas esté difficile de les preseruer, que ie les ay transportez dans vn beau palais où ils sont parmy des delices incroyables,

croiables, & qu'Alfrane leur pensant
mettre des cordes au col n'a fait pen-
dre que de la paille: Qu'ainsi ne soit
ie vous vay donner le plaisir de rire
aux despens de ceste forcierre que nous
foullons maintenāt aux pieds iusques
à ce que nous luy ayons ordonné des
supplices qui soiēt dignes de sa cruau-
té. Ce disant il fist deux ou trois signes
de la baguette qu'il auoit en main, sur
quoy ceux qui tenoient en l'air ces
fantosmes les ayans laschés ils tombe-
rent tous sur la terre en mesme mo-
ment. Ce fust alors que nostre extra-
uagant receut vn contentement nom-
pareil, car les ayant tous visités sans
auoir treuue dans les armes que des
habits de toille remplis de paille, il res-
sentist vne ioye si grande qu'il pensa
mourir de plaisir comme il auoit esté
prest à mourir par la violence de sa
tristesse. Ce transport le faisant leuer

apres quelque petite espace de temps, il dist des choses incroyables à la louange d'Alcandre & d'Vrgande la descogneuë, il leur baïsa le bord de la robbe plus de dix fois, il les supplia de le trāsporter au palais où tousces princes se resiouissoient, & s'imaginant qu'il ne falloit que monter sur ce chariot pour y estre mené en moins d'un cart d'heure il se tourna vers le gouverneur pour l'asseurer de son seruice. Comment mon cher amy (dit le gouverneur) me voulez vous quitter contre la promesse que vous m'avez faite de demeurer trois ou quatre iours avec moy? Sans mentir i'aurois bien raison de me plaindre? Monsieur (luy respondist-il) il est vray que ie vous ay promis tout ce que vous dittes, mais vous cōsidererez aussi s'il vous plaist que ie ne rencontreray iamais l'occasion de voir tant de vaillans princes

ensemble si ie perds la commodité de ce chariot enchanté; Au nom de dieu dispensez moy de ma parolle pour cinq ou six iours, ie vous promets foy de cheualier de vous venir seruir au bout de ce tēps & de m'aquitter libérallement de ce que ie ne puis refuser à vostre priere. Vrayment (dit le gouverneur) vostre desir est si honneste que ie ne vous refuseray point le congé que vous me demandez, allez à la bonne heure si ces sages magiciens vous veulent emmener. A ces mots s'estans embrassés nostre extrauagant alla monter sur ce chariot sans s'informer si on le vouloit receuoir ou non, mais comme il commençoit à mettre les fesses sur vne planche, il en sortit huit ou dix fusees lesquelles ayans espouuanté les cheuaux ils emporterent ce chariot si brusquement que ne s'estant peu retenir dessus, il alla donner

de la teste & des espaules sur la poul-
siere pendant que le chariot s'en al-
loit de loing, le gouuerneur ne se peut
empescher de rire lors qu'il luy vist
faire le saut, neantmoins ayant peur
de quelque accident il courust à luy
promptement, & le releuant: Mon
cher amy (luy dit-il) vous voyez que
ces sages magiciens ne veulent pas vo-
stre cōpagnie au moins pour ce coup.
Cela me fasche merueilleusement (luy
respondist-il) mais ce qui me console
beaucoup est qu'ils ne me laissent pas
icy sans quelque mystere, ie suis tout
froissé de ma cheute, cela n'importe, ils
me gueriront quand il leur plaira: ce
qui m'importune le plus est qu'il m'en
faut retourner avec vous sans auoir
veu ces princes vaillans que j'ayme
d'une amour extreme. Que voulez
vous (dit le gouuerneur) nous ne
sçaurions forcer les destins, vne autre

fois vous aurez ce contentement, remettons nous en carrosse & retournons à la ville si vous me croyez. le pense (luy respondiſt-il) qu'il ſera plus expedient de ce faire que d'attendre icy plus long temps. Alors ayans repris leurs places au carrosse ils commençoient à tirer du coſté de la ville quand on vint aduertir le gouuerneur que ſon fils le marquis d'Arbarmont eſtoit en campagne avec dix ou douze de ſes amis pour empescher la retraite du conte d'Orbec lequel auoit enleué la belle Ericlee qui eſtoit fiancée audit marquis. Ceſte nouuelle luy ayant fait perdre la fantaſie de prendre encor du plaſir de noſtre hypocondriaque, il ſe ietta à bas du carrosse & commanda qu'on euſt à luy amener vn cheual, ſur quoy don Clarazel en prenant vn autre ils commencerent à galopper au trauers des

champs pour ioindre leurs amis & les secourir. Nous verrons à l'autre chapitre le succès de ceste aduventure.

Le Conte d'Orbec ayant enleuè Eri-
clee est poursuiui par le marquis d'Ar-
bamont ; & rencontré par nostre
hypocondriaque : Les merueilles que
fist ce cheualier en ceste occasion : Dés-
faite du Conte d'Orbec : Mariage
du Marquis d'Arbamont avec Eri-
clee : Admirable trait de folliè de don
Clarazel sur l'opinion qu'un presi-
dent de Grenoble estoit le patriache de
Trebisonde.

CHAPITRE XXIX.



Affection que ces deux ca-
ualiers apportoiēt à ceste
entreprise ayant donné plus

de pointes à leurs esperons que leurs cheuaux n'auoient accoustumé d'y y treuuer, ils firent vne dilligence si grande qu'ayans trauersé trois ou quatre lieuës de pays en vne heure ils descourirent le conte d'Orbec lequel tenant Ericlee au milieu de dix gentilhommes qui l'accompagnoient sembloit ne point apprehender que quelqu'un luy vint disputer la possession d'un si grand tresor. Mais qui ne sçait qui est tres dangereux de tomber sous la main d'un fol? Nostre hypocondriaque qui commença d'entrer en fureur tout au mesme temps qu'ils parurent ne s'arresta point aux prudentes raisons du gouuerneur qui ne les vouloit point attaquer iusques à ce qu'il eust le marquis d'Arbamont son fils par l'assistance duquel il esperoit la raison d'un si grand outrage, il les alla charger avec furie, & ne se cōrentât

pas des effects il joignist la parolle à ses actions pour les espouuâter d'un premier abord. Brigâs infames (leur cria-il avec vne voix effroyable) arrestez vous & tournez visage si vous ne voulez mourir en poltrôs, ceste dame que vous emmenez est trop belle pour seruir de proye à des traistres. Ce disant il entra sur eux de telle furie qu'ayant passé son espee au trauers du corps du premier qui se rencontra il fist lascher en l'air quatre pistolets qu'on luy pensoit tirer à la teste. Le conte d'Orbeil s'estonnant de son assurance il quitta promptement Ericlee, & l'environnât avec tous ceux de sa compagnie on luy tira derechef dix ou douze coups, mais sa bonne fortune en ayant fait adresser la plus part sur son casque & sur sa cuirasse & les autres dans le ventre de son cheual qui tomba tout incontinent roide

mort, il n'eust aucun mal que le des-
plaisir d'estre à pied entre tât de gens;
Ce depit l'animant encor plus qu'on
ne sçauroit dire il se degagea prom-
ptement des estrieux, il n'apprehenda
point de les voir tous reuenir avec l'es-
pee à la main, & choisissant le conte
qui pour auoir plus d'interest à ceste
partie le pressoit plus que tous les au-
tres, il luy porta vn estramaçon de tel-
le roideur sur la iambe, que l'espee
estant extremement bonne il la luy
couppa toute nette; alors voyant trois
ou quatre de ces gentilshommes qui
poussioient leurs cheuaux pour les luy
faire passer sur le ventre, il fist deux
molinets si bié à propos, que la poin-
te de son espee ayant porté fort rude-
ment sur la teste de ces cheuaux, ils em-
porterent leurs maistres malgré qu'ils
en eussent. Ainsi faisant des miracles
avec l'espee il donnoit vne merueil-

leuse frayeur à tous ces messieurs lesquels estans presqu'enragez de voir qu'un seul homme les traittoit si mal ils alloient mettre pied à terre pour l'enfoncer plus facilement par le défaut de la cuirasse quand ils descouurent le marquis d'Arbamont, lequel ayant ouy l'escopeterie arriuoit au galop avec sa troupe. Son objet leur ayant fait changer de dessein ils prirent la fuitte, ils se ietterent dás le bois, & se sauuerent sans se soucier d'Eri- clee de celuy qui auoit esté tué le premier, ny du conte mesme qui estoit estendu d'un autre costé. Si le marquis fust estonné de voir deux hommes sur la poussiere & les autres escartez comme des perdereaux, ie croy que vous ne me le demanderez pas, car ayant sceu par son pere que nostre extrauagant auoit esté seul parmy la troupe de ses ennemis il l'admiroit, & ne

pouuoit, trouuer assez de parolles pour esleuer le merite de sa vertu. Cro-
yant donc que l'assistance qu'il auoit
receu de sa valeur l'obligeoit à s'en
ressentir, il mist pied à terre pour l'em-
brasser, il luy fist tous les remerciemés
qu'il peut faire, & protestant de s'en
reuancher par quelque seruice pareil
le quitta pour aller chercher Ericlee
qui s'estoit allé cacher parmy des buif-
sons tout au mesme temps que le cô te
d'Orbec l'eust mise sur terre. Amour
qui les auoit vnis par des affections
reciproques les fist bien tost rencon-
trer en cel lieu desert, ils s'embrasserent
à demy ravis, Ericlee de se voir hors
des mains d'un homme qu'elle auoit
en horreur, & le marquis de ioye ex-
treme de tenir ce riche tresor dont il
auoit redouté la perte. Leur conten-
tement estant grand ils demurerent
quelque espace de temps sans mot di-

re, mais ne pouuans tousiours demeurer muers parmy tant de subiects de resiouissance, ils commencerent leurs discours par le recit des apprehensions qu'ils auoient eus, ils le continuerent par mille demandes qu'ils se firent de ce qui s'estoit passé en ceste action, & le finirent par mille sermés de mourir plutost que de souffrir la diuisió de leurs cœurs par quelque accident que ce fust. Ces protestations reciproques leur semblans assez suffisantes pour les asseurer, ils allerent treuuer leurs amis qui les virent venir ensemble avec vn plaisir nonpareil. Ericee fist mille sousmissions au gouuerneur qui estoit pere de son amant, elle n'oublia pas de caresser nostre hypocondriaque comme elle y sembloit obligee par sa vertu, & fist tant de remerciemens aux autres qui auoient accompagné le marquis en ceste actiõ

qu'ils creurent luy en deuoir de reste. Vne grosse heure s'estant escoulee en ces complimens pendant laquelle le conte d'Orbec expira, il fallust songer au retour, ils monterent tous à cheual, & ne voulans pas aller à la ville parce qu'ils n'y eussent peu arriuer de iour ils prirent le chemin d'un chateau qu'on nomme Dorteil lequel appartenoit au marquis. S'ils furent seruis magnifiquement vous le iugerez bié sans que ie le die puis qu'il y auoit vne belle dame à traiter, tant y a que l'on ne vist toute la soiree que des actions de plaisir pendant lesquelles le gouuerneur qui estoit homme de preuoyance ne manqua pas de faire partir en poste vn gentilhomme pour aduertir le Roy du secret de ceste aduventure, d'en depescher vn autre vers le pere d'Eriquee qui estoit en campagne avec ses amis, & d'enuoyer tout d'un

mesme temps à la ville pour faire informer de l'action du conte d'Orbec. Tout cela fust executé fort heureusement, & quant au reste tout ce qui deuoit arriuer de la rencontre de ces amans sortist son effect, car les principaux parens d'Ericlee estans arriués dans Orteil ils conclurent de paracheuer son mariage avec le marquis afin d'obuier aux trauerses que la fortune leur pouuoit encor apporter. En effect ils furent espousés avec fort peu de ceremonies, mais parce que nostre hypocondriaque ne manqua point de faire en ceste action quelque nouueau trait de folleie i'ay creu que ie ne deuois pas manquer de les dire, veu mesmement que ce furent les derniers tesmoignages de la foiblesse de son cerueau. Comme il fust question d'aller à l'eglise pour donner la benediction à ces deux amans, il s'informa

si le patriarche de Constantinople y estoit pour faire les ceremonies, surquoy quelqu'un luy ayant respondu qu'il n'y auoit que le curé. Sur mon ame (dist-il) ces princes ont grand tort ils ne sçauent pas estimer leur grandeur comme elle doit estre estimee? Qu'elle apparence qu'un simple prestre s'acquitte dignemēt d'une chose qui surpasse sa capacité? Il faut que ie dōne ordre à cela pour faire voir à ces messieurs que ie regarde de fort pres aux choses qui concernēt leur gloire. Alors il s'en alla droit à la chappelle, prist tous les ornemens du curé sans que personne l'en peut empescher, retourna tout d'un mesme temps à la salle, & s'approchant d'un president de Grenoble parent d'Ericlee lequel portoit vne longue soutane de satin noir il luy dist avec vne parolle graue. Souuerain prelat de l'empire de Tre-

bifonde ne vous estonnez pas si ce prince & ceste princesse que l'on va ioindre par mariage ne songēt point aux choses qui peuuent adiouster quelque gloire au contentemēt dont ils vont iouir, ils sont tellement transportez de ioye qu'ils ne voyent pas ce qui leur est propre: On veut qu'un petit curé les espouse, parce que le Patriarche de Constantinople n'est pas icy, pour moy ie ne sçauroy souffrir ceste indignité, vous estes constitué dans vn pareil degré d'honneur estant Patriarche de Trebifonde, il faut que vous fassiez aujourd'huy l'office pour honorer ceste belle & son cheualier, ces ornemens ne sont guieres riches, neantmoins ils vous seruiron au besoin. Ce disant il luy presenta l'aube, apres l'auoir baisée trois au quatre fois de fort bonne grace, ce qui faisant faire vn tres-grand esclat de risée par
par

par toute la salle, tout le monde se mit à l'entour de ce president pour voir la responce qu'il luy feroit. Cét homme qui n'estoit pas des plus gracieux qui fussent au monde, fut d'abord merueilleusement estonné, & n'estant pas accoustumé à ces railleries, il ne scauoit comme prendre ceste belle harangue qu'il croyoit estre faite par mocquerie, mais iugea tout incontinant qu'il ne se pouuoit fascher de ceste action s'il vouloit parestre habille homme, il luy respondist assez froide-ment. Mon caualier vous auez si bonne grace à faire le fou qu'il faudroit estre de mauuaise humeur pour s'offencer de vos actions: le ris comme tous ces messieurs de l'extrauagance que vous auez faite de me prendre pour vn patriarche. Par dieu (luy respondist-il brusquement l'interrompant à ceste parolle) vous ferez si

vous voulez aussi sot que ceux qui rient ordinairement sans subiet, mais vous ne sçauriez dire avec raisõ qu'il y a de l'extrauagance à vous prendre pour vn patriarche, & si vous sçauiez aussi bien manier l'espee que le breuiaire ie vous apprendrois à parler auant qu'il fust nuit. A ces mots tous les assistans commençans à battre les mains il creut que l'on se mocquoit de ce president, voila pourquoy poursuivant son discours il reprist ainsi. Or sus monsieur ie vous pardonne ceste follie, mais n'y retournez plus si vous me croyez, & ne blasmez iamais les personnes dont vous ne cognoistrez pas le merite, le temps nous presse, depeschez vous de prendre tous ces ornemens, que s'ils ne sont si riches, que vous le desireriez bien vous ne laisserez pas pour cela d'estre patriarche. Alors luy mettant l'aube sur la teste il

la luy laissa tomber tout le long du corps ce qui faisant redoubler le bruit & le passer temps, on en vist tomber contre la muraille plus de huit ou dix à force de rire, il n'y eust que le presidēt à qui tout ce ieu ne pleut pas, car ne se pouuāt oster de la fantaisie que don Clarazel ne fist ces boutades pour tirer du plaisir de luy il estoit prest d'entrer en colere, & de luy lascher quelques coups de poing sur le nés si le gouuerneur ne l'eust asseuré qu'il n'y auoit point d'artifice en ceste action: Faisant donc aussi bonne mine qu'il auoit fait au commencement il osta ceste aube de dessus son dos, la tendist au curé, & prenant tous le reste des ornemens de la main de don Clarazel les porta iusqu'à la chappelle. En fin la messe estant celebree par le curé malgré les raisons de nostre hypocondriaque qui vouloit que monsieur le

president fist l'office on commença de sortir en confusion, ce qui faschant encor nostre cheualier il se mist promptement à la porte, & les arresta tous remonstrant qu'on deuoit obseruer vn ordre comme les princes de Grece auoient tousiours fait en choses pareilles. Ceste nouuelle boutade ayant renouuellé la rísee le gouuerneur se voulust approcher de luy pour luy dire que l'on ne praticquoit pas ces ceremonies, mais toutes les raisons furent inutiles, il luy dist qu'il ne permettroit iamais vn si grand desordre, & malgré qu'ils en eurent ils furent contrains d'en passer par là où il voulust, c'est à dire de sortir deux à deux & de marcher avec grauité à la salle où le disner les attendoit. Ce festin fust fort somptueux quant aux viandes, meilleur encor quant aux discours que l'on y tint, car on fist mille contes des

Hypocondriaque.

677

naïfuetéz de don Clarazel, mais il
finist par vn accident fort estrange.
Vous verrez dequoy ie veux parler
dans l'autre chapitre.

Vv iij



Syluiane arriuant à Dorteil donne de l'amour à la sœur de l'hostesse, de son logis: Insigne meschanceté de ceste paisane pour se vanger du mespris qu'on auoit fait d'elle: Syluiane attachée avec des cordes est menée au chasteau: ClaraZel l'ayant recogneüe commence vne tragedie sanglante pour venger l'outrage qu'on luy auoit fait: Syluiane ayant addoucy sa fureur, fait vn discours de ses aduentures: Les caresses qu'elle receut du gouverneur & d'Erilee: Merueilleux artifice dont elle se seruiſt pour combattre la folie de don ClaraZel: Plaisantes raisons que ce cheualier apporta pour defendre ses opinions fantastiques: Puisſant effet de son amour par le moyen duquel Syluiane l'ayant remis dans l'usage de sa raison ils furent espousez ensemble.

CHAPITRE XXX.

NOus auons trop long temps
laissé Syluiane parmy les
chemins, il est téps que nous
luy fassions rencontrer son amant, &
que nous finissions ce volume, com-
me nous l'auons promis au commen-
cement. Ceste fille ayât marché quin-
ze ou seize iours avec des inquietudes
estranges, parce qu'elle ne pouuoit
apprendre des nouuelles certaines de
celuy qu'elle alloit chercher, elle arri-
ua finalement à Dorteil le iour des
nopces du marquis avec Ericlee. Tout
le monde parlant de ce mariage elle
sçeut tout incontinent qu'il estoit
heureusement accompli par le mo-
yen d'un cheualier qu'on estimoit
fou, ce qui la faisant informer curieu-
sement de ce qui pouuoit seruir à sa

passion, elle apprist en peu de parolles quelle estoit l'humeur, la taille & la façon de ce cheualier duquel on parloit, de sorte que cognoissant quasi Clarazel par ce seul discours, elle fut bien souuent sur le point d'enuoyer vers luy ou de l'aller demander elle mesme sous pretexte de l'employer à quelque aduventure. Elle sortit trois ou quatre fois du logis avec ce dessein, & retourna tousiours à la chambre par ce qu'au mesme moment qu'elle estoit sortie elle se troubloit, & ne iugeoit pas qu'il fust à propos qu'une si grande compagnie sceut l'estat de ses affaires & de ses amours: En fin se resoluant à ce qu'elle treuuoit de meilleur qui estoit de luy enuoyer vn billet, elle se fist donner du papier & de l'ancre, & commençoit à tracer ses conceptions qu'ad elle vist entrer vne ieune fille qui estoit sœur de son ho-

steffe laquelle se venant mettre aupres d'elle luy arracha le papier des mains. Ce badinage faschant Syluiane elle luy demanda tout incontinent que vouloit dire la liberté de ceste action, à quoy ceste fille effrontee qui la prenoit pour vn garçô, parce qu'elle en auoit les habits, luy respondant avec vn soufrire; monsieur (luy dit elle) ne vous faschez point s'il vous plaist de ce que i'ay fait, ce n'a esté que par l'exces de ie ne sçay quelle passion qui me travaille depuis vne heure, & pour auoir vn sujet de vous descouurir ce que i'ay dâs l'ame, vous estes si beau qu'il faut que ie vous donne mon pucelage. Ah vrayment (luy dist Syluiane qui ne se peut empescher de rire à ceste parole) m'amie vous auriez mieux fait ce me semble de l'offrir à vostre vallet, car en vn mot ie ne vous treuue pas assez belle pour m'as-

subiettir à vos passions, rendez moy ce papier & me laissez faire ce que ie veux, ce sont des affaires qui m'appor- teront plus de plaisir que vos amou- rettes. Aga monsieur que vous estes fier luy repliqua elle? Iesus on ne ren- uoye pas ainsi les filles en nostre villa- ge, la la regardez moy bien encore vne fois vous ne me treuuez pas des plus deschirees? Mamie (luy dist Syl- uiane qui n'entendist ceste seconde effronterie qu'avec vn extreme des- pit) vous estes vne sotte, ie n'entre point en consideration si vous valez quelque chose ou non, tant y a que ie vous commande encore vne fois de vous retirer, autrement i'aduertiray vos parens de vostre insolence. A ces mots ceste fille l'ayant regardec de trauers luy ietta só papier sur la table, & grommelant entre ses dens passa dans vne autre chambre où d'abord

elle eut recours à les larmes pour décharger son cœur qui creuoit. Mais ô dieux qu'elle changea bien tost de façon de faire, la rage de se voir mesprisée la fist deuenir furieuse, elle reserra ses pleurs presqu'au mesme temps qu'elle eust comméce d'en couvrir ses iouës, elle repassa dans la chambre où Syluiane estoit attentifue à son escriture, & se iettant à son cou malgré qu'elle en eust, elle commença de crier à l'ayde. Sa voix qui esclatoit effroyablement ayant fait monter cinq ou six personnes tout en mesme téps, l'hoste creut que ce gentilhomme Gaulois violoit la sœur de sa femme, & sur ceste opinion il s'en alla saisir vn baston duquel il frappa Syluiane si rudement qu'elle en sentist vne extreme douleur au bras plus de douze iours. La colere nous donne des forces, & le ressentiment d'vn outrage est

si grand qu'il nous change en moins d'un moment? Ceste fille se voyant traittee de la sorte eut tout incontinent vn courage d'homme, elle se degagea des mains de celle qui la tenoit, courut vers vn liēt sur lequel estoit son espee, la mist à la main, & sans apprehender vn second coup de baston la poussa si vertement dans le corps de l'hoste qu'elle luy entra plus de quatre doigts dans les costes : Ce fust alors que la maison fust remplie de bruis & de cris, l'hostesse voyant son mary sur les carreaux se desesperoit, sa sœur estant à la fenestrecrioit comme si elle eust esté enragee, on voyoit arriuer des payfans de tous les costez avec des bastons & des fourches, bref, plus de vingt personnes monterent à la chambre de Syluiane, & luy porterent tant de coups qu'ils luy firent tomber des mains son espee. N'ayant plus de-

quoy se deffendre elle fust saisie, on luy attachâ les mains avec des cordes, & parce que la prison estoit au chasteau elle y fut conduitte. Ceste affaire arriuant sur la fin du repas comme ie vous disois dans l'autre chapitre, le gouuerneur commanda qu'on fist monter le criminel iusques à la salle afin qu'on l'examinast sur le crime duquel il estoit accusé, mais certes on eust bien autre chose à faire, & le desordre qui arriua tout au mesme tēps qu'elle fust entree ne fust gueres moindre que celuy qui estoit arriué à l'hostellerie. Syluiane ayant recogneu son amant entre tous les autres ne se peust empescher de dire, ah Clarazel que i'endure beaucoup pour l'amour de vous, surquoy nostre hypocondriaque l'ayant fermement regardee il s'escria. O dieu que voy ie, & qu'ay ie entendu? Madame est il bien possi-

ble que vous soyez tombee au pou-
voir de ces inhumains? Pédarts (con-
tinuat-il parlant à ceux qui la tenoient)
laissez ceste dame, autrement ie feray
cent mille pieces de vostre corps. A ces
mots voyant que ces gallands ne fai-
soient pas semblant de l'entendre par-
ce que la presence de leur seigneur
les asseuroit, il mist furieusement la
main à l'espee, & fist descendre vn fen-
dant de telle roideur sur la teste de ce-
luy qui se rencontra le premier qu'il
l'enuoya sur les carreaux avec vn ab-
breuoir à mouches lóg de demy pied.
La colere l'emportant alors on alloit
voir vn ieu estrange en ceste salle, car
l'outrage quel'on auoit fait à sa dame
le mettant au suprefme degré de la
rage il alloit frapper indifferemment
sur qui que ce fust, si le gouuerneur
n'eust preueni ce defastre par sa pru-
dence. Ce bon vieillard le prenant

donc sur le temps qu'il alloit encor
plonger son espee au corps de quel-
qu'un il luy dist. Seigneur cheualier ie
vous prie de moderer vn peu la cole-
re qui vous emporte, nous vous ferôs
des satisfactions s'il vous en eschet, si-
non nous nous souuiendrons de vos
bons seruices pour vous pardonner
ce que vous auez fait contre nos sub-
iets: Commēt (dit-il) contre vos sub-
iets, par dieu ie depeupleroist toute la
terre sur ceste querelle, & ie ne feray
iamais vostre amy que vous ne m'ayez
fait la raison de l'offence que l'on a
faite à ceste dame. O madame (pour-
suiuiſt il se mettant à genoux deuant
elle) ie verray donc vos mains atta-
chees avec des cordes, & ie ne feray pas
mourir tous vos ennemis: Ah certes ie
serois indigne de porter vne espee &
de viure, il faut que ie les sacrifice au
iuste ressentiment que vous deuez

auoir de leur insolence. Ce disant il se releua avec furie & regarda tous ceux de la salle pour sçauoir par la mort duquel il commenceroit le massacre, quand Syluiane estendant les mains le mieux qu'elle l'arresta pour luy faire entendre ces mots. Don Clarazel (luy dit-elle) demeurez la, & donnez vous bien garde de leuer l'espee sur peine de perdre mes bonnes graces. A ces mots le voyant plus doux qu'un agneau elle adressa sa parolle au gouverneur qui luy ostoit les cordes des bras, & luy dist. Monsieur, ie croy qu'il n'y a personne en ceste compagnie qui ne sçache fort bien iusques où s'estend la puissance d'un dieu que l'on nomme Amour, voila pourquoy ie ne rougiray point de vous dire que mon cœur a esté sensible à ses retraits & qu'il est auteur du dessein qui m'a fait prendre ces habirs qui deguisent
mon

mon sexe pour chercher ce caualier avec moins de peine. Mais parce que ie ne m'explique pas assez en ce peu de mots, & que vous ne pourriez pas sçauoir la railon que i'ay eüe de me trauestir, il me semble qu'il est à propos de vous conter succintement les aduantures de ce caualier & de moy. Il est sorti d'une des meilleures maisons del'Europe si i'excepte celle des Roys & des Souuerains, s'il est courageux & vaillant ie croy que vous le sçauiez aussi bien que moy, car vous luy auez veu faire depuis quatre iours tout ce qu'un homme de bien peust faire, quant au reste vous l'auiez assez practiqué pour auoir cogneu son esprit & sa gétillese si vous l'auiez mis hors des termes sur lesquels il se pert ordinairement. La fortune qui nous fist naistre en mesme pays & de mesme condition nous donna d'abord quel-

que particuliere inclination l'un pour l'autre, toutefois il faut que i'aduouë icy ma foiblesse, ie ne cogneus iamais sô merite comme ie le cognois maintenant, & parce que i'estois fort capable de vanité ie le mesprisay quand il se voulust donner tout à moy: Son amour luy ayant fait treuuer vn excès de douleur en quelque fascheuse response que ie luy fis, il s'addonna tellement à la resuerie & tout d'un mesme temps à la lecture de quelques liures pernicious que son iugement se perdist en ses fantaisies: En vn mot il deuint hypocôdriaque ce que ie dis avec regret par ce que ie pense estre la seule cause de ce malheur. Je me mocquois de ceste follie & ie confesse icy franchement que i'eus quelque consolation de sçauoir qu'il estoit sorti du pays, car i'aprehendois ses reproches, mais certes l'amour m'a bien punie de mes tra-

hifons, ou pour mieux dire de ma malice, car m'ayant fait aduertir par vn ieune seigneur de france que l'on nomme le baron d'Alcret du mauuais estat où Clarazel estoit reduit par ma cruauté i'en conceus vn si grand regret que ie ne craignis point de mettre ma reputatiō au hazard pour guerir le mal dont i'estois la cause: le partis des isles Baleares avec l'habit que vous me voyez, & sçachant par le rapport du Baron d'Alcret que Clarazel s'estoit arresté en Bourgongne i'en pris le chemin toute resoluë de le retirer de ses folles opinions par quelque artifice & de le mettre en possession du tresor qu'il auoit desiré avec tant d'ardeur. Or est il que la fortune m'a fait arriuer ce matin en vne hostellerie qui est en ce bourg où l'hoste venant à parler de quelques gaillardises qu'un cheualier incogneu auoit faittes à vn pre-

‘fident, ie me suis imaginé que don Clarazel estoit seul au monde capable de ceste extrauagance, desorte que i’ay euvn extreme desir de le voir pour cognoistre si ma pensee estoit veritable. le suis sortie du logis trois ou quatre fois pour venir icy, trois ou quatre fois ie suis retournée à la chambre ne iugeant pas qu’il fust à propos qu’une si grande compagnie sceut le secret de mes amours, toute fois le ciel l’a voulu de la sorte pour quelque cause qui m’est incogneuë & ie suis maintenant contrainte de vous dire ce que i’aprehédois que l’on sceut. Ne me pouvant donc resoudre à venir icy comme vne effrontee quoy que mes habits semblassent me donner ceste liberté, i’ay voulu escrire vn billet à don Clarazel, mais comme ie commençois la premiere ligne vne petite fille qui est au logis m’est venu arracher le papier

des mains & m'a dit en peu de paroles que me treuuant merueilleusement beau à son gré elle me vouloit donner son pucelage. Ce discours si naïfue-ment fait m'a fait rire ie le confesse, & si ie n'eusse esté dans dans l'inquietude de sçauoir si don Clarazel estoit celuy duquel on parloit ie vous aduouë que i'eusse fait causer ceste fille pour en auoir vn plaisir entier, mais ne treuuant aucun goust à ces niaiseries ie l'ay renuoyee avec quelques petites leçons pour la remettre en s^{on} deuoir. Qu'est il arriué de ma charité? Tout le mal que vous auez veu : Monsieur ceste malheureuse fille estant enragee de ce que ie n'auois pas voulu satisfaire à ses passions impudicques elle a inuenté la plus insigne meschanceté qui tomba peust estre iamais dans le cœur d'une paysane; Elle s'en est retournée à ma chambre, elle m'a prise au trauers du

corps & s'est mise à crier à l'ayde comme si ie l'eusse voulu forcer. L'hoste arriuant sur ces entrefaittes avec cinq ou six personnes s'est imaginé ce que ceste meschante fille vouloit bien qu'il creut, & pour vous le dire en peu de parolles il m'a chargée à coups de baston. Vous sçauiez que le ressentiment est fort naturel? Ces coups m'ayants mise en colere ie me suis deffaitte de ceste fille qui me tenoit, i'ay mis l'espee à la main, iel'ay passée au trauers du corps de ce gros maraut qui m'outragéoit si cruellement, & sans doute i'allois punir ceste petite paillarde effrontee si quarante ou cinquante payfans ne fussent arriués sur ces entrefaittes. N'ayant peu resister à ceste trouppes qui sembloit merueilleusement eschauffee l'on m'a fait tomber mon espee, on m'a faisie & l'on m'a conduite ceans; Vous auez veu ce qui est arri-

ué par le ressentiment de don Claraz-
zel, il ne vous reste plus qu'à iuger si
mes passions & les siennes ont esté ius-
tes. Mademoiselle (dist le gouver-
neur) nous voyons arriuer de grands
maux par le peu de cognoissance que
l'on a des choses, nous auons pensé
faire vne faute en vous mal traittant,
Clarazel a esté sur le point de tuer
cinq ou six personnes, ie louë dieu que
nous n'ayons rien fait contre vous qui
merités d'estre seruie, & que nous auôs
empesché l'effect de la iuste fureur
qu'il auoit: Vous demandez que nous
ayons à iuger de vos actions, nous se-
rons plustost parties avec vous que
vos iuges si ce n'est pour vous donner
vne entiere absolution, & sans nous
soucier beaucoup des blessés qui gue-
riront s'ils peuuent des coups qu'ils
ont, nous vous asseurerons que vous
aurez tousiours ceans le mesme pou-

voir que nous y auons, vous deuriiez estre satisfaitte en quelque façon de l'outrage que l'on vous a fait, mais ce n'est pas assez ce me semble, ie veux que la grace de tous ces cocquins depende de vous. Alors ayant fait venir l'hostesse, sa sœur & tous ceux qui l'auoient offencée il les fist mettre à genoux deuant elle, chacun luy demanda pardon avec des larmes (Laudine on nommoit ainsi la sœur de l'hostesse) confessa publiquement la chose comme Syluiane l'auoit deduite, bref on luy fist toutes les satisfactiōs qu'elle eust iamais peu desirer, & les blessés estans emportés on ne songea plus qu'à passer le temps. Cela ne se pouuant faire que Syluiane n'eust vn autre habit Ericlee la mena à sa chambre, luy en fist donner vn fort riche & la remena peu de temps apres à la salle où d'abord elle fist parestre tant de

graces & de majesté qu'on ne s'estonna plus que don Clarazel eust perdu le sens par le desespoir de posséder vne chose de si grand prix. La presence de ceste incomparable beauté ayant donc resueillé les desirs de la plus part de la compagnie & principalement de don Clarazel il s'alla mettre à genoux deuant elle, & ne se pouuant taire en l'extremité de la ioye qu'il ressentoit il luy dist. Madames ne voulant pas troubler le plaisir de ceste compagnie honorable ie ne vous conte pas maintenant les peines que i'ay soufferts pendant le temps de ma disgrâce, ie ne vous dis point l'extremité dans laquelle i'estois reduit lors que ie me fis appeller le beau desolé, & ie ne vous cote point encor le nombre des pleurs que i'ay respendus depuis que changeant le nom de beau desolé i'eus agreable que l'on me nommast le

cheualier aux tristes pensees, car ayant subiet de dire aujourd'huy que ie suis le plus heureux cheualier qui soit sur la terre, ie ne pense pas qu'il me soit permis de me plaindre. Pleust à Dieu que toutes les princesses de Grece fussent maintenant icy assemblees ie pourrois bien soustenir avec les armes que ce que l'on a tant vanté en elles ne seroit rien à comparaison de ce que l'on admire en vous. Don Clarazel (luy respondist-elle modestement) arrestez vous là ie vous prie, il est tēps que ie repare le mal que i'ay fait, i'ay esté la cause de vostre follie, ie veux commencer à chercher vostre guérison. A ces mots tous ceux de la cōpagnie ayans cessé leurs discours & leurs entretiēs, pour voir ce qui se passeroit en ceste actiō, elle poursuiuiſt ainsi sō discours. Clarazel ne me donnez vous pas vn pouuoir absolu sur vos volon-

tés? Madame (luy respondit-il) ie ne
sçay pas pourquoy vous me faittes
ceste demande si ce n'est pour auoir
des tesmoins de vostre pouuoir, car
vous estes tres asseuree que ie ne veux
respirer que par vous, & que i'execu-
teray tousiours franchement ce qu'il
vous plaira de me commander quand
il seroit question de cent mille morts.
Or sus (reprist elle) voila qui va bien,
ce que ie veux de vous pour le prix de
mes bonnes graces que ie vous pro-
mets, est que vous ne croyiez plus qu'il
y ait eu des Amadis, des cheualiers du
Soleil, des Palmerins, des Primaleons
ny des cheualiers de semblable estoife?
Ah madame (luy respondist-il) ie di-
ray ce que vous voudrez, mais vous
considererez s'il vous plaist que vous
me ferez parler contre la verité & ma
conscience quand vous m'obligerez
à parler ainsi: Madame, i'ay cogneu

Amadis de Gaule, l'excellent empereur Amadis de Grece, don Sylues de la Selue, i'ay veu mille fois d'Araide qui est don Agefilan de Colchos, i'ay mesmement eu vn escuyer de la race de Gádalin lequel s'est perdu depuis peu par vne aduanture estrange, i'ay passé par les mains du fraudeur des ruses qui me trompa par vn artifice admirable, voulez vous que ie trahisse ma cognoissance & que ie deuienne menteur contre ma nature? Non non (luy dit-elle) don Clarazel vous vous trompez merueilleusement en cela, vous auez veu quelques gentilhommes qui ont emprunté ces beaux nōs pour faire extrauaguer vostre iugement & tirer du plaisir de vos actiōs, & si l'on a feint quelques aduentures ce n'a esté que pour vous enfoncer tousiours dans le precipice & pour vo^r tesmoigner que ie ne parle pas par

cœur escoutez vn peu ce que ie vuy dire: Vn seigneur qui a esté présenté à la plus part de vos aduentures m'aduertist de tout le secret il y a quelque temps: il me dist que celuy qui vous auoit fait cheualier se nommoit le Côte d'Oran, & non pas le cheualier à la Roze verte, que l'on vous supposa vn chien pour vn monstre par l'inuention d'une toille peinte, que l'on vous trompa du depuis par le moyen de deux gentilhommes vestus en sauuaiges, que ceste Daraide dont vous me parlez qui acheua l'aduenture du cabinet des merueilles estoit la marquise d'Orbeil, il n'oublia pas à me faire le conte d'une certaine morisque qui vous deceut, il m'assura que vostre escuyer estoit vn petit frippon de lacquay qui se feignist sortit de la race de Gandalin pour vous desfrober, & que ce fraudeur des ruzes dont vous vous

pleignez estoit vn de ces messieurs de Paris qu'on nomme filloux qui se vouloit donner vne gorge chaude de vostre cheual & de vos habits. Or rentrez maintenant en vous meisme, & iugez si l'on ne vous a pas fait passer des fables pour des verités. Mais afin que vous ne disiez pas que ie vous allegue toutes ces raisons avec artifice ie vous veux conuaincre par vostre bouche: Dittes moy; Auant que vous eussiez de l'amour pour moy croyiez vous qu'il y auoit eu des Amadis? Non ie ne le croyois pas luy respondist il: Pourquoi d'oc vous l'imaginez vous maintenant (luy repartist elle) car s'ils n'auoient point esté en ce temps ils ne sont pas venus du depuis au monde? Madame (luy respondist-il froide-ment) il semble que vostre argument soit bien fort, mais s'il vous plaist de m'escouter ie le vay detruire en peu

de parolles: ie ne croyois pas alors dites vous que les Amadis eussent esté, donc ie ne le doyp pas aujourd huy parce que s'ils n'auoient esté ils ne sont pas venus du depuis? Madame pardonnez moy si ie dis que vostre consequence n'est pas des meilleures, car il s'ensuiuroit de là que leur estre dependroit de m^o opini^on, ou de ma croyance, i'ignorois alors qu'ils eussent esté, & ie dis encor d'auantage ie nommois insensés ceux qui le croyoient, mais ie lesay veus depuis ce temps là, ie puis donc dire que ma croyance d'aujourd'hui est beaucoup meilleure que celle que i'auois alors, & que ceux que i'estimois fous estoient beaucoup plus sages que moy? Pour vne preuue contre laquelle vous n'aurez plus aucune raison Madame sçachez de ce prince (dit-il montrant le gouuerneur) s'il n'a pas veu depuis quatre iours Ama-

dis de Gaule, Amadis de Grece, le che-
ualier du Soleil & plusieurs autres
princes de Grece deliurés d'une peine
estrange par la science admirable du
grand Alcandre & Vrgande la desco-
gneüe; monsieur (luy dit alors le gou-
verneur) ne vous fondez pas là dessus
autrement vous estes perdu & serez
contraint d'aduouër que tous ceux
desquels vous parlez n'ont iamais esté
qu'en peinture: Ceste estrange aduen-
ture de laquelle vous pensez bien vous
preualoir estoit inuentee pour sçauoir
iusques où s'estendoit vostre valeur
& vostre courage, vous avez veu les
armes sous lesquelles vous croyiez
tous ces princes de Grece pendus, vous
avez veu (dis-ie) ces armes remplies de
toille & de foing, vous deuez donc iu-
ger par là que ce n'estoient que des
fantosmes, quant est du reste ie vous
veux faire voir que vous avez esté fi-
nement

nement trompé par des masques & par des habits sous lesquels i'ay fait pa-
restre mes valets de chambre au lieu
d'Alcandre & d'Vrgande la desco-
gneü. Alors luy ayant fait apporter
les cartons avec lesquels les cheuaux
de son carrosse auoient passé pour gri-
faleons, & luy ayant représenté les mes-
mes hommes qui auoient contrefait
ces magiciens avec les mesmes habits
qu'ils auoient alors il le rendist telle-
ment confus qu'il fust quelque espace
de temps sans mot dire, surquoy Syl-
uiane le voulant presser elle se tourna
& luy dist: He bien Clarazel confesse-
rez vous maintenant que vos opinions
ont esté des erreurs conceuës par la foi-
blesse de vostre cerueau? Madame (luy
respondit-il) certes ie ne sçay ce que ie
doy dire, car ce que ie voy m'estonne si
fort que i'aprehende d'estre enchanté.
Non non (dist-elle avec vn soufrire)

vous ne l'estes point si ce n'est par les
doux charmes de mes yeux: Clarazel
tous ces discours sont inutiles, ie ne
veux point d'autre raison pour vous
conuaincre que mes commandemēs,
sçauiez vous bien que veut dire ceste
parolle? Ouy madame (luy respondist-
il) cela veut dire qu'il faut que ie croye
fermement tout ce que vous me com-
manderez de croire. Je veux donc (luy
repartist-elle) par ceste obeissance à la-
quelle vous vous soufmettez que vous
confessiez tout à ceste heure que les
Amadis n'ont iamais esté que dans la
teste des escriuains qui nous ont laissé
sous ces fables beaucoup d'exemples
de vertu. Madame (luy respondist-il)
puis que vous le voulez de la sorte ie
le veux bien dire avec vous. Voila qui
va le mieux du monde (continuat-
elle) mais Clarazel ce n'est pas tout, il faut
que vous disiez tousiours ce que vous

dittes maintenant : d'auantage, si ces folles opinions vous reuiennent quelquesfois à la teste, ie veux que vous diffiez tout incontinent, madame a condanné ces niaiseries, ie les condamne, elle m'a dist que ces cheualiers estoient des fantomes, ie dis avec elle qu'ils le sont veritablement, & ie proteste des aujourd'huy de n'en parler iamais autrement. Madame (luy respondist-il) ie voy desia si clairement la sotize de mes opinions que vous n'aurez pas beaucoup de peine à me faire executer ce commandement, car ie me treuve desia si changé qu'en mon ame i'ay du regret d'auoir fait les folles que ie me resouuiens bien d'auoir faites, voila pourquoy ie vous promets par mon amour de n'en parler iamais comme i'ay fait, & de ne lire iamais ces Romas qui ont fait naistre mon malheur que pour me mocquer des folles dont ils

font pleins. Alors prenant desia ses actions toutes serieuses il resiouïst infiniment tous les assistans & principalement Syluiane, laquelle ayant eu soing de luy faire donner des bains avec des parfuns d'Elebore elle l'entretint en si belle humeur par l'espace de quinze iours qu'au bout de ce tēps il ne parust point que son iugement eust esté blessé quelquefois. Cette admirable ayant réussi plus heureusement quel'on esperoit, Syluiane voulust retourner au pays & pour cet effect ayant fait mille remerciemens à tous ceux quil'auoient assistee en son entreprise, elle prist congé du gouuerneur d'Ericlee & de son mary qui leur donna deux gentilhommes, deux damoiselles, quelques pages & quelques lacquais pour les accôpagner iusques aux Isles Baleares. N'ayans pas eu la curiosité de sçauoir desquels discours ils

s'entretindrent pendant ce voyage ie n'ay pas aussi relolu de les dire. Belles ames il vous suffira de sçauoir qu'ils furent espousés avec beaucoup de magnificences quatre iours apres qu'ils furent arriuez. Laissons les parmy leurs plaisirs & cherchons les nostres.

F I N.

Y y iij



TABLE
DES CHAPITRES
contenus en ce liure.



*Quelle fust la patrie du Cheualier qui sert de
fondemēt à tout cet ouurage, sa naissance,
ses mœurs, ses vertus, sa condition & le
commencement de ses amours avec Syl-
uane.* fol. x.

*Comme don Clarazel se resolust d'aller donner une sere-
nade à sa dame: La musique est interrompue par un
accident: il desgage Adamant frere de Syluane de la
main de quelques filoux: Ses discours avec Syluane:
Son desespoir, & quel fust le subiet de sa maladie d'es-
prit.* 23.

*Quelles estoient les imaginations de don Clarazel: Comme
il prist resolution de se rendre hermite à l'exemple
d'Amadis de Gaule: Le commencement de ses bouta-
des faites à Lyon: Ses extravagances incroyables à la
rencontre d'un aduocat & dans les discours qu'ils
eurent ensemble.* 40

*Comme don Clarazel se rendit hermite au mont-d'or: Les
discours que l'hermite luy tint sur ses folles imagina-
tions, & comme il voulust estre appelé le beau d'solé*

DES CHAPITRES.

à l'imitation d'Amadis de Gaule qui s'estoit fait autre-
fois appeller le beau tenebreux. 60

La triste vie que don Clarazel menoit au mont d'or : Ses
discours avec l'hermite: Comme ayant pris une nouuel-
le imagination par le moyen d'un songe qu'il fist, il se
resolust de recevoir l'ordre de cheualerie: Son départ de
l'hermitage du mont d'or: La rencontre qu'il eust d'un
lacquay mattois & ruzé qu'il receut pour son escuyer:
Leurs discours, & comme changeant le nom de beau de-
solé il se fist appeller le cheualier aux tristes pensees.

78

Comme Gandalec escuyer de don Clarazel luy apporta des
armes complètes: La resolution qu'ils prirent ensemble
d'aller treuver le conte d'Oran que Gandalec surnom-
moit le cheualier à la Roze verte, afin qu'il donnast
l'ordre de cheualerie à don Clarazel: Plaisante inuen-
tion de Gandalec pour ne toucher point sur la dure avec
son maistre: Comme le conte d'Oran fust aduerti de l'af-
faire du cheualier hypocondriaque, & ce qu'il resolust
touchant ceste affaire. 100

Quelles furent les ceremonies que le conte d'Oran pratic-
qua pour donner l'ordre de cheualerie à don Clara-
zel: Comme il le fist combattre contre un dogue qu'on
luy supposa pour un monstre: Particularités de ce com-
bat estrange & plaisant: Insigne fripponnerie d'un page
pour tromper nostre extrauagant, lequel prist un vicil
apoticaire pour maistre Elizabetb chirugien ordinaire
d'Amadis de Gaule. 119

Comme la duchesse d'Arcail deuint amoureuse de nostre
cheualier hypocondriaque: Rare inuention pour faire
naistre une aduventure des plus agreables du monde
par le moyen d'une escarpollette: Admirable combat d

T A B L E

- don Clarazel contre un gentil homme qui estoit dessus:
La fin d'iceluy par une façon toute estrange avec tout
ce qui se passa en ceste entreprise.* 148
- Comme la duchesse d'Arcail descouvrist ses passions
amoureuses à don Clarazel: La réponse qu'elle en re-
ceust. Son dépit & la résolution qu'elle prist sur ceste
matiere.* 170.
- Les estranges extrauagances que fist nostre hypocondriaque
dans la representation du rauissement de Proserpine:
Prudence du conte d'Oran pour empescher le desordre
qui pouuoit arriuer de tant de bonatac: Gentil trait d'es-
prit des comediens pour faire une farce aux despens
de ce malheureux: Et quelle fist la résolution de la du-
chesse d'Arcail touchant son amour.* 188
- Artifice admirable de la duchesse d'Arcail pour tromper
nostre extrauagant, & le posseder sous le nom de sa Syl-
uiane: L'estonnement de ce malheureux apres la cog-
noissance de ceste tromperie, & comme son dépit luy fist
quitter ceste compagnie.* 209
- Subtile inuention de Gandaec pour tromper son maistre,
luy voller son argent & se retirer: Discours plaisant du
cheualier hypocondriaque avec un berger: Son abord
vers une damoiselle auaricieuse: Mefchanceté de ceste
damoiselle pour le chasser de sa maison: Son arriuee chez
un paysan sur la plainte duquel il resolust d'aller des-
fier le baron de la Tour.* 253
- Comme l'hypocondriaque alla deffier au combat le baron de
la Tour: Les propos qu'ils eurent ensemble sur ceste ma-
tiere: Grande amitié contractee entre eux: Aggreable
dispute de l'extrauagant & d'un capucin pour sca-
uoir si la lecture des liures d'Amadis de Gaule estoit
inuille ou pernicieuse: Et comme le baron de la Tour*

DES CHAPITRES.

Wantant tirer du plaisir de ce malheureux manda tous ses amis avec resolution de leur bien faire passer le temps.

278

*Priscalie princesse d'Alban, Philoxene duchesse d'Os-
mont, Cleandrine marquise d'Orbeil, Armoriane
contesse du mont des sauvages, Philodamant duc de
Saxalie & de Floridanis arriuent au chasteau de la
Tour: Le baron treuve l'inuention d'une aduventure
du tout admirable: Cleandrine marquise d'Orbeil
donne les deniers traicts à cet artifice par une pen-
sée excellente: Et comme nostre extrauagant entreprist
d'espreuuer cet encharnement.*

299

*Suite de l'adventure du cabinet des merueilles espreu-
uee par l'extrauagant: Admirable inuention de la
marquise d'Orbeil qui se feint estre Daraide pour don-
ner fin à ceste aduature: Sa rencontre avec l'hypo-
condriaque: Les plaisans discours qu'ils eurent ensim-
ble. Combat de ce cheualier lunatique contre deux gen-
tils hommes vestus en sauvages: Autre combat qu'il
eust contre un ours: Sa cheute dans un fossé plein
d'eau dont le cabinet des merueilles estoit enformé: En
quelle fust la fin de ceste entreprise.*

321

*Admirables discours tenus entre Priscalie, Philoxene,
Armoriane & nostre cheualier hypocondriaque sur
les noms de Lucelle, Miralinde & Clairangie que ces
belles dames emprunterent: Meschanceté nompareille
d'Armoriane pour se vanger del'extrauagant: Recit
de toute ceste aduventure: Et quel fust le ressentiment de
don Clarazel.*

355

*Comme l'hypocondriaque soustint les ioustes pour la gloire
de Syluiane & de toutes les dames qui estoient alors à
la Tour: Les ceremonies qui furent faictes pour l'armer:*

TABLE

- Insigne fripponnerie d'un page pour luy faire prendre le saut: Particularitez de ces ioustes: Arrivee d'un estrange pour emmener nostre extrauagant. 383
- Qui estoit celuy qui emmenoit nostre cheualier hypocondriaque: Le subiet pourquoy: Trait admirable d'un fillon qui se feint estre le fraudeur des ruzes pour luy desrober son cheual: Recit de ceste aduanture crotésque. 409
- Comme le fillon resolut d'attrapper encor vne fois nostre cheualier hypocondriaque: Leurs discours: L'artifice dont il usa pour venir à bout de son entreprise & le tirer hors du logis: Comme ce volleur ayant attaché nostre extrauagant à un arbre il fust luy mesme attrappé par le ieune homme qui le conduisoit: La vengeance estrange qui fust prise sur ce frippon: Restitution du cheual qu'il auoit desrobé avec ce qui se passa en ceste aduenture. 433
- Discours excellens tenus entre Florantel & nostre cheualier hypocondriaque: Quel en fust le subiet: Ce qui luy arriva avec un bouvier: Comme il prist un courrier & son postillon pour Amadis de Gaule & don Galaor roy de Sobradixe: Folle imagination conceüe contre un batelier: Comme il tua ce batelier: Le subiet pourquoy, avec tout ce qui se passa en ceste aduenture. 454
- L'arrivee de don Clarazel au chateau d'Arcail: De quelle inuention se seruist la duchesse pour en iouir: Comme elle luy fist à croire qu'elle estoit grande magicienne: Leurs discours, leurs actions, & comme elle l'arresta dans Arcail avec vne ferme opinion qu'il estoit enchanté. 481
- Comme Syluiane fust aduertie du malheur de don Cla-

DES CHAPITRES.

razel: Le déplaisir qu'elle en ressentist: ses inquietudes: Ses regrets sur la nouvelle de la mort de *Cloridamant*: Quelle fust la resolution qu'elle prist pour le repos de don *Clarazel*, & comme ayant changé d'habit elle se mist en campagne pour l'aller chercher. 504

Comme don *Clarazel* fust deliuré de l'enchantement auquel *Astralize* le reuenoit: Qui fust le Cheualier qui paracheua ceste glorieuse aduëture: Son despart du chasteau d'*Arcaïl*, avec la mort d'*Astralize* arrinee par le regret des reproches du duc son mary. 527

Les Amours d'*Adamant* & de *Leonie*: Infidelité d'*Adamant*: *Leonie* deuient hypocondriaque: Quel fust le subiet de cet accident: Comme elle fust rencontrée par don *Clarazel*: Admirables discours que ces deux malades d'esprit eurent ensemble: Don *Clarazel* croyant que c'estoit la Reyne *Oriane* la meine trois ou quatre iours en triomphe: Comme ils rencontrerent *Adamant*: Sa fuite: La poursuite de *Leonie*, & comme don *Clarazel* demeura seul à beau pied sans lance. 555

Quelles furent les aduantures de don *Clarazel* apres l'esloignement de la damoiselle hypocondriaque: Il rencontre trois gentilhommes morts en un pré surquoy il prend vne resolution digne de la foiblesse de son cerueau: Le preuost de Lyon arrive avec vne troupe d'Archers: Estranges boutades de don *Clarazel*: Le Preuost le prend prisonnier, l'enuoye aux prisons: Les discours qu'ils tindrent ensemble: Et comme la paix fust faite entre eux. 581

Aggreable discours de nostre cheualier hypocondriaque & du gouverneur de Lyon. 605

Nostre hypocondriaque s'estant allé promener au iardin d'*Enay* s'y laisse enfermer pendant vne nuit, ce qui

TABLE

luy arriva là dedans : Le gouverneur luy ayant enfin fait apporter à manger le retire de là pour le mener à l'esprenue d'une aduventure fort plaisante : supplice feintement ordonné à l'escuyer du cheualier à la roze verte : Le subiet pourquoy avec les choses estranges que fist l'hypocondriaque en ceste rencontre. 619

Arrivée de l'hypocondriaque au chasteau de la cruauté : Ses regrets estranges à l'obiet de quelques fantosmes qu'il croyoit estre les Princes de Grece : Excellent artifice pour luy faire croire que Virgandela descogneuë & le grand Alcandre arriuoient miraculeusement au chasteau d'Alfrane : Ses discours avec ces sages magiciens : Gentille inuention d'Alcandre pour luy persuader l'excellence de sa magie : Fin de l'adventure : Aduis d'importance donné au gouverneur : Son despart de ce chasteau avec l'hypocondriaque, quel en fust le subiet. 645


Le Conte d'Orbec ayant enleué Ericlee est poursuiui par le marquis d'Arbamont ; & rencontré par nostre hypocondriaque : Les merueilles que fist ce cheualier en ceste occasion : Deffaitte du Conte d'Orbec : Mariage du Marquis d'Arbamont avec Ericlee : Admirable trait de folie de don Clarazel sur l'opinion qu'un president de Grenoble estoit le patriache de Trebisonde. 662


Syluiane arriuant à Dorteil donne de l'amour à la sœur de l'hostesse de son logis : Insigne meschanceté de ceste paisane pour se venger du mespris qu'on auoit fait d'elle : Syluiane attachée avec des cordes est menée au chasteau : Clarazel l'ayant recogneuë commence une tragedie sanglante pour venger l'outrage qu'on luy auoit fait : Syluiane ayant addoucy sa fureur, fait un discours de ses aduentures : Les caresses qu'elle receut du

DES CHAPITRES.

*gouverneur & d'Ericce: Merueilleux artifice dont elle
se seruit pour combattre la folie de don Clara Zel: Plai-
santes raisons que ce cheualier apporta pour deffendre
ses opinions fantastiques: Puissant effet de son amour
par le moyen duquel Syluiane l'ayant remis dans l'u-
sage de la raison ils furent espousez ensemble. 678*

Fin de la Table des Chapitres.





24Co